


«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2011



*Киприклар – қорачиқнинг соқчилари,
Хақиқат нурларин түссанғыз агар
Юлиб ташлагумдир битта қолдирмай...*

A handwritten signature in black ink, appearing to read "Токайев".

ТОҲИР МАЛИК

ШАЙТАНАТ

Бешинчи китоб



**«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2011**


ББК 84(5У)6
М 22

Масъул мухаррир
Ахрор АҲМЕДОВ

Ю 32380
2/5з1

М 22 Малик, Тохир.
«Шайтанат»: роман (5-китоб). — Т.: «Sharq»,
2011. — 640 б.

Ҳар бир соҳада бўлганидек, шайтанат оламида ҳам маълум бир жиноят гурухи ўрнига ёшрок авлод келади. Кесакполвон ва Чувриндининг ўлимидан сўнг ёлғизланиб колган Асадбек киркилган икки қаноти ўрнига янгиларини тиклаш харакатига тушади. Янги авлод эса шайтанат оламига хукмронлик қилиш истаги билан унга яқинлашади. Икки авлод орасидаги зиддият, таъбир жоиз бўлса, шайтанат тахти учун кураш нима билан



Y

ББК. 84(5У)6

ISBN 978-9943-00-619-5

© «Sharq» нашриёт-матбаяа акциядорлик компанияси
Бош таҳририяти, 2011.

Бисмиллахир Роҳманир Роҳийм.

«Парвардигор шайтонга айтди:

«Малоикалар макомидан туш. Бас, сенга бу малоикалар макомида туриб гарданкашлик килиш ярамайди. Сен хорлик билан жаннатдан чиқ!» Шайтон айтди: «Қиёматгача менга мухлат бер, мени ўлдирмагил». Худо айтди: «Сенга Қиёматга қадар мухлат берилди».

Иблис айтди: «Мени рахматингдан маҳрум килганинг бадалига Одам фарзандларини тўғри йўлдан оздириш учун мунтазир бўлиб турман.

Сўнгра ўнг тарафларидан келиб, васваса киламан ва орқаларидан келаман ва чап тарафларидан келиб, йўлдан оздираман. Сўнгра уларнинг кўпларини шукр қилгувчи ҳолларида топмассан».

Парвардигор айтди: «Эй шайтон, мардуллик ҳолатида хор бўлиб, Худонинг азобига учраб, жаннатдан чиқиб кет! Албатта,

Ўз зотимга қасамки, сен билан ва зурриётинг билан ва сенга тобе бўлганлар билан жаҳаннамни тўлдираман».

(Аъроф сурасидан маъно таржима.)

МУАЛЛИФДАН

Буюклик ва құдратда ягона, ширк ва нүксон кирларидан пок, бақонинг эгаси, раҳмли ва шафқатлы Аллоҳ таборак ва таолонинг муқаддас номини дилимга мұхрлаган ҳолда сүз бошлаяпман. Барча неъматларни ато қылғувчи – Аллоҳ, сүнгсиз қаҳр билан интиқом олувчи ҳам Аллоҳ. Осмонлару ерда Ү зотга шукрлар адади беҳисобдир. Аввали охир Ү зот учун ҳамдларга тұла!

Очиқ мұльжизалари билан бани Одам ичра мұмтоз жаноби Пайғамбаримиз Мұхаммад алаіхиссаломга, ахли байтлари ҳамда саҳобаларига саловату саломлар бўлсин!

Ассалому алейкум, ардоқли китобхон!

Сизлар билан, яна гойибона тарзда бўлса-да, учрашириётган Аллоҳга ҳамд этиш баробаринда Үл зотдан Сиз азизмөнлар хонадонига қут-баракот бермогини, шайтанат оғатидан Үз ҳифзи-ҳимоясига олмогини илтижо қиласман.

«Шайтанат», аввал ҳам айтганимдек, уч китобдан иборат бўлиши керак эди. Сүнг тўртинчи китобни ёзиши эҳтиёжи ҳам түгилдики, бу меҳнатдан бўйин товлаш номардликдай туюлиб, Аллоҳга таваккул қылған ҳолда бу ишни бошлаб, ниҳоясига етказгандай бўлдик. Бу мавзуга яна қайтиш фикридан узоқда эдик. Лекин, начора, кейин эшиштган, билган воқеаларимиз кўнгилни қитиқлай бошлади, асарни давом эттиришга даъват этаверди. Турли учрашувларда айрим китобхонлар «асар якунланмаган, давом эттириш керак», деган фикрларни билди-

риб, каминани қўлга яна қалам олишга ундаши. Ниҳоят, хайрли оқибатни умид қилиб, ишни бошлияпмиз. Учрашув ва суҳбатларда китобхонларга мурожсаат этиб, асарни шунчаки «давом эттиринг», деб эмас, «яхшилаб ёзинг», деб дуо қилишиларини сўраб эдик. Дуоларнинг ижсобат бўлишига умид билан дастлабки сатрларни ёзяпмиз. Сўнгги сатрларга қадар ҳамсуҳбат бўлиб қоласиз, деган умиддаман. Шубҳасизки, айрим баёнларда қаламнинг ожизлиги сезилиб қолар, бунинг учун узр сўрайман. Асар кўнглингизга мақбул бўлса, бу Аллоҳнинг марҳаматидандир, сиз – азизларнинг дуоларингиз оқибатидандир. Сизларни бутун қалби билан севувчи адабнинг миннатдорлигини қабул қилинг. Бирбирларимизни хайрли дуо қилишида давом этайлик.

АХТАМ

1963 йил, 16 июнь, Магадан

Рихсия шу куни ўғил кўрди.

Сууруга тўла қизлик пайтларида, ширин хаёллар канотида учган дамларида ботир ва ҳалол бир ўғлонни учратишни, севиб-севилиб турмуш куришни, олти ё етти ўғил ва уч қиз кўриб, умрни шукроналиқ билан ўтказишни орзу киларди.

Бир ўғлон учраб, киз кўнглини ром этди. Аммо, на-доматким, у ботир эмас, номард бўлиб чиқди. Унинг айёрлик ва муттаҳамлик чодирига буркалган, ҳаромни касб қилган абллаҳ эканини Рихсия кейинроқ – тақдир ёзуғидан нолиб, камоқда ўтирганида англаб етди. Ундан бўлган болани олдириб ташлашни истади. Бирок, камоқхона врачи вакт ўтганини айтиб, рухсат бермади. Бола тушиб кета колсин, деб оғир-оғир нарсаларни кўтарди, вужудни заҳарлани мумкин бўлган нарсаларни ҳам еяверди. Лекин ҳароми бўлса-да, бир ўғил кўриши тақдир ёзуғида бор экан, унинг барча ҳаракатлари зое кетди. Қамокхонада туғилган чақалок озодликдаги аёллар ҳам ҳавас киладиган даражада соғлом ва кўркам эди. Қамокхонадаги хотинлар ҳар куни бола туғавермайдилар. Тукканлари эса боласини эмизишдан, ҳатто унга бир қараб қўйишдан воз кечавермайдилар. Шу боис Рихсиянинг «эмизмайман ҳам, қарамайман ҳам», деб боладан юз ўгириши ҳамширанинг жаҳлини чиқарди. Аввал яхши гапирди, сўнг пўписа қилди, кор қилмагач, шапалоғини ишга солди.

Қадимда Оврупода ҳамшираларни «мехрибонлик олиҳалари» деб шарафлашган экан. Агар бу сифат қамоқхона ҳамширасига нисбатан қўлланилса, «ок

иштонга жун жияк» деганларидек, ҳам кулгили, ҳам энсанни қотирадиган бир ҳол вужудга келиши мумкин эди. Эҳтимол, бу аёл озод эканида меҳрибонлик нима эканини билгандир. Лекин касалхонадаги тинчлантирувчи ва оғрик қолдирувчи дориларни ўғирлаб, гиёҳвандларга сотиши оқибатида қамоққа тушгач, энг ваҳший ҳайвонларга ҳам бемеҳрлик дарсидан сабок берса оладиган даражага етди. Тили эса энг сўконғич эркакларни ҳам аро йўлда қолдириб кетадиган бўлди. Маҳкумалардан қай бири касалга чалиниб, турма шифохонасига бир марта тушса-ю, кейинроқ иккинчи бор хасталанса, шу хотинни кўрмай ўлиб кетишига минг марта рози бўлиб қоларди. Ҳамширани ана шу иллатлари учун қамоқхона маъмурияти иззат килар, маҳкумалар эса нафратланишарди. «Ёмоннинг бир қилиғи ортиқ», деганларидай хушбичимроқ маҳкумаларни қандайдир базмларга қантдай қилиб тайёрлаб бериш ҳам унинг зиммасида эди. Маҳкумалар орасидаги гўзалларнинг аксари бу хизматдан бўйин товламас, аксинча, чорланмай қолишиша кўнгиллари хуфтон бўларди. Улар бошқа нарсадан – базм якунлангач, тунни шу эркакшода ҳамшира билан ўтказишдан безишарди. Безишка-да, кўнглини овлашга мажбур эдилар. Чунки базму майшат оркасида ҳомиладор бўлиб қолишиса, бу ҳамшира доялик қилиб, уларни бу юқдан куткаарди.

Рихсиянинг ой-куни етиб, кўзи ёрийдиган пайтда шу ҳамшира доялик қилди. Дунёнинг ажабтурурлиги шундаки, ҳаромдан бўлган бола ҳаромни касб қилган хотин кўлида кўзларини очди.

Икки юзига шапалоқ тушган Рихсия кўзларини катта-катта очиб, ҳамширага кўркув билан қаради, навбатдаги зарбани кутди. Лекин ҳамшира бошқа урмай, маҳкумаларнинг эски чойшабига йўргакланган болани унинг тиззасига кўйди.

– Агар шу бола очдан ўлса, сени қийнаб-қийнаб ўлдираман. Шу пайтгача одамзод кўрмаган азобларни

сенга атаб тайёрлаб кўйганман, – деб ўз хукмини маълум қилиб кўйгач, чақалокнинг юзини очди.

Корнида қимирлай бошлаганидан бери ўлимни истаган боланинг жавдираган кўзларига кўзи тушиши билан Рихсиянинг вужуди титраб кетди. Кўкрагида иликлиқ сезилди. Бир оз караб тургач, кўкрагини очиб, эмиза бошлаганини ўзи ҳам сезмай қолди. Чақалок эмашма ухлади. Рихсия уни бағрига босганича ўтироқчи эди, ҳамшира рухсат бермади. Болани юлқиб олиб, темир панжарали эшикнинг темир панжарали даричасини очди-да, дахлизда пойлаб турган аёл назоратчига узатди. Рихсия эмизаётган пайтда ҳамширанинг кетмай караб тургани сабабини билолмай ажабланган эди. Боласи худди кераксиз буюмдай панжара нарёғига бериб юборилгач, вужудида титрок турди.

– Нега у ёкка бериб юбордингиз? Болам ўзим билан ётмайдими? – деди йигламсираб.

– Уйингда туққанингда ёнингда ётарди. Бу ер онангнинг уйи эмас, – деб ҳамшира гапни калта килди. Кейин асабий равишда тўнғиллади: – Ҳозиргина болангга ўлим тилаётувдинг-ку, энди меҳринг уйғониб қолдими?

Бу гапни айтгандан кўра, ҳамшира уни тепа-тепа абжафини чиқариб юборгани маъқулрок эди. Ҳамшира тухмат қилмади, ҳақ гапни айтди. Аччик ҳақиқатни тан олиш бу муштипар учун ниҳоятда оғир эди. Эмиза туриб «болада ҳеч қандай гуноҳ йўқ-ку?! Нега унга ўлим тиладим, ундан кўра туғиб ўлганим аълорок эмасмиди?» деб ўзини ўзи лаънатлади. Бола тўйиб эмиб, ширин уйқуга кетгач, ўзининг ўлиши мумкин эмаслигини, гўдагини кўкрак сути билан бокишига мажбур эканини тушунди. Оналик масъулиятига итоат этган нафасда фарзандини бағридан юлиб олдилар. Шунда у даҳшатли ҳақиқатни англади: қамоқхонада дунёга келган ўғли ўзи каби озодликдан маҳрум эди! Ўзи-ку, жинояти учун жабр тортияпти, аммо болада нима гуноҳ!

Назоратчилар инсоф қилишса, кунда түрт ёки беш марта, боланинг бигиллаб йиғлашидан безишса, тунда ҳам темир панжарали эшикнинг темир панжарали даричасини очиб, болани латтага ўралган буюм каби узатардилар. Чақалоқ эмиб, нафси ором топгач, яна шу ҳолда қайтариб олардилар. Рихсия боласининг оғзига кўқрагини солгач, унинг секирок, шошилмай эмишини истарди. Бағрида кўпроқ олиб ўтиришни хоҳларди. Ҳар сафар болани қайтариб бераётганда Рихсиянинг юрагидан битта томир узилгандай бўлаверарди.

Бир хафтадан сўнг ҳамшира унга бир янгиликни маълум қилди:

– Болангга туғилганлик ҳақида гувоҳнома ёзиб беришди. Отасининг тайини бўлмагани учун ўзингнинг фамилиянгда колди. Оти «Ахтам» бўлди.

Рихсия мактабда ўқиб юрганида синфдош болага кўнгил қўйганди. Бу туйғу севги мартабасига етмаган бўлса-да, уни кўп эсларди. Ўғлига ўша йигитнинг исмини беришни ният қилиб ўтирганда бу хабарнинг маълум қилиниши уни ажаблантириди:

– Нега «Ахтам»?

– Кўз очиб кўрган йигитимнинг оти Ахтам эди. У бутун Татаристонни ётқизиб-турғизарди. Москвага борса, энг зўр мафиозлар ҳам қуллук қилиб турарди. Ўшанга ўхшаб юрсин, деб ният килдим. Шу исм мендан сенга ёдгорлик бўлиб қолсин. Қамоқхонада ўлиб кетмасанг, озодликка чиққанингда эслаб юрарсан.

Бу гапни эшишиб Рихсиянинг кўз олди қоронгилашди. Бола туғилганда келажаги гўзал бўлсин, деб умид қилинарди. Бу хотин эса бир ўғри-каллакесарга ўхашини ният қилибди. Рихсия ҳужжатда зикр этилган исмни сира тилга олмади. Боласини қўлига олганда суйганининг исмини айтиб, эркаларди. Ахтам бу исмга кўнишиб ҳам қолган эди. Болалар уйига жўнатилгач, онаси суйган исмни унутиб юборди.

Ахтам чақалоқлик ёшидан ўтиб, эммай қўйгач, Рихсияга камрок кўрсатадиган бўлишди. Бола уч ёшга

тўлган куни ҳамшира уни етаклаб кириб, она қалбини тилка-тилка қилиб юборувчи янгиликни айтди:

– Ўғлинг билан хайрлашиб ол, энди, ўлмасанг, камоқдан кутулганингдан кейин кўришасан.

– Нега? – деб сўради Рихсия боласини хавотир билан бағрига босганича.

– Негалигини билмайсанми? Қамоқхонада туғилганлар уч ёшга тўлгандан кейин ташқаридаги болалар уйига юборилади. Ўғлинг озод бўлди, қувонсанг-чи!

Уч йил мобайнида қамоқхона боғчасида улғайган, озод дунё, озод болалар қандай бўлишини билмайдиган бегуноҳ гўдакнинг эркинликка чиқиши, албатта, қувонарли эди. Лекин у қайси шаҳарнинг қайси болалар уйига боради? Қандай даврада камолга етади?

Бу қамоқхонада она учун ҳам, бола учун ҳам биргина юпанч, биргина баҳтли дақиқалар бор эди. Кўришмоқлик, дийдор саодати бу онда барҳам топди. Накадар беражмлик! Бундан сўнг дийдорга қачон етишадилар? Дийдор киёматга қолса-чи?

Онанинг қалби шу саволлар исканжасида. Бола қалби бу азобдан холи бўлса-да, онасини бошка кўрмаслигини сезибми, йиғлай бошлади.

– Вакт бўлди, ташқарida кутиб туришибди. Ўлмасанг, етти йилдан кейин кўрасан болангни, – ҳамшира шундай деб, Ахтамни елкасидан ушлаб ўзига тортди.

Рихсия қўйиб юборгиси келмади.

– Жоним болам, эсингда турсин, сен билан мени бебаҳт қилган одамни улғайганингда топасан! Бу хўрликларимиз учун ўч ол! Унинг оти...

Боласи эслаб колсин учун бу исмни уч марта қайтарди. Уч ёшли боланинг бу гапларга тушуниши кийин эди. Шунга қарамай, умид билан айтди. Ҳамшира Ахтамни она бағридан юлқиганча ажратиб, тутун каби қўлтиқлаб олди-да, ташқари томон юрди. Боланинг йиғиси даҳлиздан эшитилиб турди. Йигитинмай туриб, Рихсия ҳушсиз йикилди.

Бу дунёда йигирма беш йил умр кўрган жувон бу айрилиққа чидолмади. Кундан кунга сўлиб бораверди. Уч ойдан кейин адолатсиз дунёни ташлаб кетди...

Эркинликдаги болалар уйида ўйинчоклар кўп бўлгани билан Ахтамга ёқмади. Озодликда туғилиб-ўсаётган болалар билан қамоқхонадан келган Ахтамнинг тил топишиши қийин кечди. Озодликда улғаяётган икки бола ўйинчоқ талашса ёки уришиб колса, энагалар уларга танбех бериб қўя колишарди. Ахтам талашса ёки биронтасини урса, жазога тортиларди. Қамоқхона боғчасидан келган болага муносабат ўзгача эди. Ахтам буни гўдакларга хос фаҳми билан англади. Атрофига нафрат кўзи билан қарашиб хисси шу ерда туғилди.

Мактаб ёшига етганда яна бошқа етимхонага жўнатилди. Онасининг қамоқдан чиқиб олиб кетишини токат билан кутди. Кун санаб яшади. Ўн ёшга тўлганида онаси озодликка чиқиши керак эди. Бу шодлик куни яқинлашган сайин соат ва дакикалар санаб яшади. Ўша кун, ўша соат, ўша дакика етди. Аммо онаси келмади.

Етимхонада бир меҳрибон энага бор эди, сўраб-суриштириб, Рихсиянинг вафот этганини аниклади. Лекин ўша йили буни болага билдирамади. Ахтам кун, соат санамаса ҳам онасининг келиб, олиб кетишини кутиб, умид билан яшайверди. Меҳрибон энага «онаси ўлган бўлса, тоғаларими ё амакиларими бордир?» деган илинжда яна сўраб-суриштириди. Рихсиянинг акаси яшайдиган манзилни аниклаб, унга хат ёзди. Жиянининг аҳволини баён қилди. Тоғадан келган мактуб очиб ўқилгунича меҳрибон энага қалбига кувонч бахш этди. «Биз у бадбаҳт сингилдан юз ўтирганмиз, демак, жиянимиз ҳам йўқ», деган сатрлар эса бу кувончни заҳарли тирноклари орасига олиб эзғилаб ташлади. Энага бу хатни Ахтамга бермади. Ахтам мактабни битириш арафасидагина кўрсатди.

– Нима учун бундай деб ёзганини билмайман. Балки ўшанда нимадандир норози бўлгандир, энди

ховуридан тушгандир. Унинг олдига бор, ёлғиз юрма, ёлғизлик ёмон, – деди.

– Шу ёшгача қариндошларсиз яшадим, бундан кейин ҳам яшайман, – деди Ахтам ўжарлик билан.

Шундай дегани билан орадан бир йил ўтмай она юртига йўл олди. Қариндошлардан паноҳ излаб эмас, балки онаси ва ўзининг баҳтиқаролиги сабабини аниқлаш мақсадида борди.

ФАЗЛИЯ

1984 йил, 7 август

Фазлия эрининг қимор ўйнашига ҳам, кеч келишига ҳам, бир неча кунлар йўқ бўлиб кетишига ҳам кўнишиб қолган. Эри пайдо бўлганда «нега кеч келдингиз?» ёки «кеча каерда санқиб юрувдингиз?» деб кўкрагига санчқи тирамайди. «Овқат иситайми, чой ичасизми?» деб сўрайди. Қиморда баҳт куёши қиягина кулиб боқкан бўлса ҳам, эри олиб келган пулинин ўртага ташлаб, то тонгга қадар мактанишдан чарчамайди. Фазлия пулларни қўриб шодланиб кетмайди, сарфлашга ҳам шошилмайди. Рўзғорга кераклисини олиб, колганини эрининг кўзидан панароққа яширади. Эри ютқизиб келса сувга бўккан мушукдай кунишиб олади. Тонггача ухламайди, дардини ичига ютиб, ўз ёғига ўзи қоврилиб жимгина ўтираверади. Охири «пулдан колганми?» деб хотинига ялинади.

Фазлия қиморбозларнинг яхши-ёмон одатлари ҳақида кўп миш-мишларни ҳам, тўғри гапларни ҳам эшитган. Хотинларни қиморга тикиб юбориши оқибатларини озми-кўпми билади. Жойнамозда ўтирган хотинга қиморбозларнинг тегмаслигини унга айтишган. Лекин у эрининг бу қадар пасткашликка бормаслигига ишонгани учун сира жойнамоз устида кутиб ўтирмаган.

Эри бу кеч уйида тунамай, пешинга яқин кайтди. Фазлия унинг тунд чехрасига бир қарашдаёк ютқизиб келганини англали. Одатига кўра, ортиқча гап-сўз қилмай, ошхонага кириб овқат иситди. Эри овқатга қарамади. Узатилган пиёлани олди-ю, ҳатто чойни хўпламай дастурхон устига қўйди. Фазлия ундан садо чиқишини токат билан кутиб ўтираверди. Эри қарзга ботган бўлса, сандиқда эҳтиётлаб қўйган тугунчани очади, етмаса, сигир-бузокни сотар... Унинг хаёли эрини қарздорлик ботқоғидан кутқариб олиш билан банд. Эрининг уч-тўрт марта хўрсиниб, сўнг пушаймон бўлган одамнинг хаста овози билан «пулдан борми?» деб сўрашини, пулнинг дарагини эшигач эса «иккинчи ўйнамайман», деб қасам ичишини кутди.

Эри хўрсинди. Лекин пул эмас, арок сўради. Ярим шиша арок бор эди. Катта пиёлани тўлдириб, ютоқиб-ютоқиб ичди. Газак қилмай, афтини буриштирганича ўтиреди. Бунақа одати йўқ эди, шунинг учун Фазлия хавотирлана бошлади. Охири «тинчликми, дадаси?» деб сўради. Эри «тинчлик» дегандай бош ирғаб қўйди. Лекин унинг кўзларига қарашга ботинмади. Унинг бу холатидан Фазлияning хавотири баттар ошди. Ҳатто хаёлига «Мени қимор ўлгурига тикиб, ютқизиб келган бўлса-я!» деган ўй келиб, енгилгина сесканиб олди. «Ёшгина таннозлардан бўлсан экан, қиморга тикса, ютиб олган одам мени бошига урадими!» деб ўзига ўзи таскин берди.

Бундай ўтиравериш ўзининг ҳам жонига тегдими, эри туриб кўча томон юрди. «Ҳозир келаман», деб тўнғиллаб қўйди-да, чиқиб кетди. Шу кетганича икки кун кўринмади. Фазлия қайноғасиникига бориб маслаҳат сўрамокчи эди, эридан гап очиши билан тўхтатишиди:

– Мен у аблахга гапиравериб чарчаганман, келин. Ҳадеб бошимни оғритаверманг. Қарз сўраб келган бўлсангиз, аввал олган пулларини тўлаб қўйсин.

– Пул сўраб келмадим, маслаҳатингиз керак...
Қарзларни... тўлаган эдилар-ку? Ё яна олувдиларми?

– Қарзни қачон олиб, қачон тўлагансанлар? Пул ҳар куни ишлаб турмаса, айланиб турмаса қадри кетади. Сенлар обдон қадрини тушириб, кейин қайтаргансанлар. Жигарим экан, деб индамадим. Энди бундан бу ёғига жигар-пигарчилик йўқ.

Бошқа галга ҳожат йўқ эди. Фазлия эрини оқламайди, лекин пул туфайли икки жигарнинг айри-айри бўлишига чидаши кийин эди. Пул – қўлнинг кири. Қўлнинг кир бўлиши ҳам осон, ювилиб, тоза бўлиши ундан-да осон. Лекин бу оқибатсизларнинг онаси тирилиб келиб бирига ака, бирига ука туғиб бермайди-ку...

Эри шомга яқин қайтди. Ширакайф эди. Қўлидаги халтада яна икки шиша ароқ, озгина колбаса билан нон бор эди. Сўрига чиқиб, дастурхон солинмаган хонтахта устига нарсаларини қўйди. Ошхона остонасини ҳатлаган Фазлия унинг ҳаракатларини индамай кузатиб тураверди.

– Шункорбойваччадан йигирма беш сўм қарз олдим, эртага сўраб келса, берворасан, – деди эри унга қарашга ботинмай. Сўнг халтадан чети учган пиёла чиқаргач, ароқни очди-да, тўлдириб қуйиб сипкорди.

Мана шунисига Фазлия чидай олмади. Чакқон юриб келиб сўрига чиқди-да, унинг қўлидаги пиёлани юлқиб олди:

– Бу қанақа қилик? Қаердан олдингиз буни? – деди титроқ овозда.

– Бу ёққа бер, пиёла магазинчиники, эртага сўраб келса берворасан.

– Балони бериб юбораман. Менга қаранг-чи? Нима бўлди? Яна ютқиздингизми?

– Менми? Мен ютқизаманми? Йў-ўқ... Мен ҳеч қачон ютқизмайман. Мени алдаб-алдаб, ахмок қилиб ютишади. Ҳали мен уларга кўрсатиб қўяман!

Фазлия унинг қанақасига кўрсатиб қўйишини

билмаса-да, овутиш мақсадида «ҳа, у жувонмаргларни боплайсиз», деб кўйиб ароқни олмокчи эди, эри жонҳолатда шишага ёпишди. Фазлия ичиб-ичиб ухлаб колар, эртага ўзига келар, деган ўйда сўридан тушди. Эри ичонғичлардан эмасди, салгинага мост бўлиб коларди. Иккинчи шишадан ярим пиёла ичиб-ичмай ёнбошига шилк этиб тушди. Фазлия унинг бошига ёстиқ кўйиб, устига чойшаб ёпди.

Хуфтон қоронғилиги атрофни ўз ҳукмига олганда болалар ухлаб қолишган эди. Кенжаси инжиқлангани учун Фазлия унинг ёнида ётиб кўзи илинган экан. Юраги ўйнадими ёғойидан бир нима туртдими, аниқ билмайди, чўчиб кўзини очди. Қандайдир хавотир билан иргиб ўрнидан турди. Эрининг йиғламсираган овозини эшитиб, ташкарига отилди. Ошхона эшиги тепасидаги чироқ оғилхона томонни ҳам хирагина ёритиб туради. Уша томонда эрининг кораси кўрингач, Фазлия югурди. Арқон ушлаб олган эри тимирскиланиб ниманидир излар, йиғламсираганича ўзига-ўзи лаънат ўқир эди:

– Бу кунингдан ўлганинг яхши Норбой! Сен аҳмоқни қийма-қийма қилиб ташлаган одам савобга қолади! Туғилишинг билан онанг тагига босиб ўлдириб кўйганида минг марталаб яхши бўларди. Сендай палидга кафан ҳам ҳайф, гўр ҳам ҳайф...

Бу гапларни эшитиб Фазлиянинг вужудидан жончиқиб кетаётгандай бўлди.

– Дадаси!

Ўз назарида фарёд қилгандай эди. Лекин ўз овозини ўзи аранг эшитди.

– Дадаси!!

Бу сафарги кичқириғи довдираётган эрини ҳам чўчитиб юборди.

– Қоч, Фазли, қоч, менга халақит қилма, – деди у минғирлаган овозда.

– Уйга юринг...

– Фазли, қоч, мени Худо уриб кўйди.

— Ютқизган бўлсангиз, ўрни тўлиб кетар, сиқилманг.

— Энди ўрни тўлмайди, Фазли. Энди менга бир сўм ҳам сарфлама.

Эрининг аҳди катъийлигини сезган Фазлия бир сапчиб, унинг қўлидаги арқонни тортиб олди. Эри бундан баттар довдириб, хўнграб йиғлай бошлади. Атрофига олазарак қараб, ўнг томонидаги бешлик санчқини чангллади.

— Фазли, кет! Кета қол!

Фазлия арқонни четга ирғитиб, у ҳам санчқининг дастасини маҳкам ушлади.

— Нега ундай қиляпсиз? Шунчалик кўп ютқиздингизми?

Эри жавоб бермай хўнграганича пешонасини унинг елкасига кўйди. Ҳам хавотир, ҳам иложсизлик чангалида қолган Фазлия қўрқибгина сўради:

— Мени ютқиздингизми?..

Эри жавоб ўрнига баттар хўнгради. «Мени ютқизгандир», деган шубҳа хақиқатга айланди. Эридан нафратланди. Бетларини юлиб олгиси келди.

— Шунчаликка бордингизми? — деди нафратли титроқ билан.

— Фазли... Фазли... Сен ўйлагандан ҳам баттар... Сен болларни олиб бирон ёққа коча қол. Келганлар билан ўзим ҳисоб-китоб қиласман.

Бу гапи ажабланарли бўлди.

— Нега қочаман?

— Фазли, сен билмайсан, мени Худо уриб кўйди... Қиморга сени тикай десам, кўнишмаса, аччиқ устида болларни тикиб юборибман. Сен болларни олиб коч, хозир келиб колишади у номардлар...

Фазлия қиморга опа ёки сингиллар, хотинлар, ҳатто янгалар ёки келинлар тикилганини эшигтан, аммо ўз фарзандини бу балога рўпара қила оловчи ҳайвоншева оталар ҳам мавжудлигини тасаввур ҳам қилолмас эди. Фазлия «ростданми?!» деб аниқлаштирмади. Эрининг

гапи унинг аклу ҳушини парчинлаб ташлаган эди. У бор кучи билан санчкени тортди. «Фазли, коч! Фазли қоча кол!» деб тинмай ялинаётган эри дастани қўйиб юбормади. Оқибатда эр-хотин ўртасида санчки учун олишув бошланди. Эри киндигига тиззаси билан зарба берганда Фазлия оғриққа чидолмай букчайди-да, бир қўлини қўйиб юборди. Шунда бўйнига иссик бир нима томди. Кейин яна томди. Бошини кўтариб караб дод деб юборди. Санчки эрининг бўғзига санчилиб қолган эди...

Фазлия даҳшат тўрига бурканиб, нима қилишини билмай турганида орқа томондан овоз эшитилди:

– Эрини гумдон килибди-ку!

Овоз келган томонга караб, нотаниш икки кишини кўрди-ю, хавотир билан уй томон қаради.

– Эринг бизга ютқизиб қўйган эди... Эрингни ўлдирган бўлсанг, бу сенинг ишинг. Бизга бу аҳмоқнинг жони керакмас. Бизнинг ҳисоб-китобимиз бошқа.

– Қанақа ҳисоб-китоб? – деди хиркироқ овозда Фазлия. Буларнинг мақсадини билса-да, яна сўради: – Қанақа ҳисоб-китоб? Ана – эрим, мана – мен! Ҳисоб-китобингизга иккита жон камлик қиладими?

– Сенинг жонинг тикилганда, сен билан ҳисоблашардик. Сенинг жонинг итга ҳам керакмас.

Шундай деб уй томон бурилишганда Фазлия санчкени чанглаб югурди-да, йўлларини тўсди:

– Инсофинглар борми ўзи! Болаларда нима гуноҳ?

– Бизда инсоф бор, эрингда йўқ эди ўша инсоф. «Болларингни тик», деб ҳеч ким зўрлагани йўқ.

Шундай деб улар яна уч-тўрт қадам қўйдилар. Фазлия тисарилди. Сўнг санчкени ўқталди.

– Ўзимам ўламан, икковингниям ўлдираман, лекин болаларимнинг битта тукини ҳам тўқтирмайман.

Улар бир-бирларига караб олиб, тўхташди.

– Яхши, биз одамхўр эмасмиз. Эрингни қўмиб ол, сенга кирк кун муҳлат берамиз. Эрингнинг карзини тўлайсан. Бўлмаса, етимчаларингни олиб кетамиз.

Кўркма, ўлдирмаймиз. Сендан кўра яхширок қараймиз. Бизнинг хизматимизни қилиб катта бўлишади. Балки шу болларинг туфайли остоанггача тилладан бўлиб кетар.

Улар ўгирилиб кетишгандан кейин ҳам Фазлия жойидан жилмади – санчқини маҳкам ушлаганича тошдек қотиб тураверди. Кейин секин-секин тисарилганича уй остонасига борди. Кўшниларни ёрдамга чакириш, эрига қарашиб хаёлига ҳам келмади. Назарида бу икки одамхўр уни алдаб сал нари кетишгану ҳадемай қайтишиб, болаларини бир-бир сўйиб чикишадигандай эди.

Қанча турганини билмайди. Дарвозалари олдида машина тўхтагач, сергакланиб ўша томон тикилди. Бирин-кетин югуриб кирган икки милиция ходими унга тўппончаларини ўқталиб бақиришди:

– Паншахангни ташла, бўлмаса отамиз!

Фазлиянинг назарида боягилар милиция кийимида қайтиб келгандай туюлиб, санчқини ўқталганича қотиб тураверди. Милиционер йигитлар яқинлашишга ҳайиқиб, яна огоҳлантиришди. Шовқинни эшитиб чиқкан қўшнилар аввалига ҳайратланиб туришди. Фазлиянинг ҳолатида ўзгариш сезилмагач, бу хонадонга сирдош бўлган қўшни хотин унга аста яқинлашиб, елкасини силади. Сўнг қотиб колган бармокларни санчқи дастасидан ажратди. Шундан сўнг милиционерлардан бири югуриб келиб, Фазлиянинг кўлига кишин солди. Буни кўрган қўшнилар норози бўлиб, йигитларни ўраб олишди.

– Бу хотин эрини ўлдирган! Милицияга қаршилик кўрсатди, – деди кишанлаган йигит, сўнг атрофдагиларга «тарқалинглар!» деб буюрди.

Оғилхонадаги ахволдан бехабар қўшнилар дарров бўш кела қолишмади.

Лекин... чорасиз эдилар...

Фазлияни эрини қасддан ўлдиришда айблаб, олиб кетишди.

Фазлия эрига санчки қандай санчилганини билмай колган эди. Шу боис айбга бўйин эгишдан ўзга чораси колмади.

Мурдани қариндошлар, кўшнилар кўмишди. Гарчи кафанга арзимаса ҳам кафандлашди, гарчи лаҳадда ётишга лойик бўлмаса ҳам, икки кулоч ер-у битта гувалани ундан аяшмади.

Болаларни қариндошлар битта-битта бўлиб олишган эди. Қирқ кундан кейин уларнинг барчаси бир кунда, ҳатто бир соатда ғойиб бўлдилар...

АСАДБЕК

1955 йил 30 октябрь.

Асад онасидан ҳам ажрагач, қўни-қўшнилар унинг тақдиридан ташвишлана бошлашди. Унинг ошиқ тепувчи киморбозларга дастёрчилик килаётганидан хабар топган Жалилнинг отаси аввалига яхши гапириб кўрди. Ӯшанда Асад ўртоғини сотқинликда айблаб, у билан хафалашиб қолганди. Жалил ўртоғининг киморбозлар орасида ўралашиб юрганини, чўнтағида пул пайдо бўлиб колганини билгани билан отасига айтмаганди. Қўшни маҳалладаги битмаган иморат ёнидан ўтаётган Жалилнинг отаси ичкарида ошиқ тепаётганлар орасидаги Асадни кўриб колганди. Насиҳат кулоққа олинмагач, қўшнилар Асаднинг узок қариндошлари билан биргаликда маслаҳат қилишиб, уни мактаб-интернат деб аталмиш янги услубдаги етимхонага топширишни маъқул кўришди. Асад эътироуз қила олмасди, чорасиз эди. Овози раста бўла бошлаган ўсмирнинг озод хаётдан бу эрксизликка ташла ниши оқибатини ҳеч ким ўйламаганди. Улар болани ёмонлар даврасидан асрашмоқчи эдилар. Ҳолбуки, бола бу давра булоғидан баҳра олишга улгурган эди. Энди у учун яхшилар булоғининг суви bemaza тую-

лишини күшнилар тасаввур эта олмасдилар. Аввалига норози бўлгани билан, бир-икки ҳафтадан сўнг Асад қўшниларининг бу тадбирларидан қувонди. Қиморбозларга қўшилганида қўшниларнинг сезиб колишларидан чўчириди. Энди, интернат ҳавосини олгач, истаган пайтда ғойиб бўлиши мумкинлигидан мамнун эди.

Бу интернатда етимлардан ташқари, ота-онаси тирик болалар кўпроқ эди. Катта-кичик мартабаларда хизмат қилиб, боласи тарбияси билан шуғулланишга вакти йўқ ота ва оналар фарзандларини етимхонага топширишдан истиҳола қилишиб, шундай мактаб-интернатларни барпо этишганди.

Асад интернатга жойлашган куниёқ бир қизга маҳлиё бўлиб қолди. Махалласида ҳам, мактабида ҳам чиройли қизлар кўп эди, лекин уларни кўрган онларида бундай туйғу уйғонмаганди. Болалик даврлари ортда қолиб, ўсмирликнинг тотли фаслига кириб келганини у ҳали фаҳмламас эди. Унинг билгани – шу ёқимли ва чиройли қизни кўрганида юраги бошқача ура бошлайди. Яна билгани – шу гўзаллик олиҳасига угина эга чиқиши керак! Бошқача бўлиши мумкин эмас! Шу қиз учун олишиш шарт бўлса – олишади! Унга етишмок учун қоплон бўлиши зарур бўлса – қоплонга айланади, илон бўлиш талаб этилса – бундан ҳам қайтмайди! Энди у «халқ душмани»нинг фарзанди»га нафратларини изхор этиб, башарасига тупурилаётган пайтда мутелик билан турувчи бола эмас. Энди у ғазабини яширмайди, энди атрофни олов бўлиб куйдиришга ҳам қодир...

Қалбда уйғонган муҳаббат чўғи янги Асадни тарбия қила бошлаган эди.

Интернатга келганининг учинчи куни нонушта пайтида, ёнида ўтирган шерикларидан сўраб ҳам ўтирмай, стол устидаги повидлоли тўртта ширин сомсани олди-да, чой ичиб ўтирган ўша қизга яқинлашди. Бир стол атрофидаги тўрт қиз, жумладан, ўша гўзал ҳам, унга ажабланиб қарадилар.

- Отинг Манзур экан-а? – деди у дабдурустдан.
- Манзур эмас, Манзура, – деди үша чиройли қизнинг дугонаси лабини буриб.
- Нима фарқи бор? – деди Асад, тўпорилик билан, кейин сомсаларни қизнинг олдига қўйди. – Бу сенга.
- Менга? – деб ажабланди Манзура. – Нима қиласман?
- Нима қиласдинг, ейсан. Озғинлигингни қара, сен кўп овкат ейишинг керак.
- Сенга озғин қизлар ёқмайдими? – деди бояги киз, хиринглаб кулиб.
- Сендақа хомсемизларга тоқатим йўқ, – деди Асад кўполлик билан.

Бу гаплардан ранжиган Манзура шарт ўрнидан туриб, икки бетини кафтлари билан ушлаганича, ошхонадан чикиб кетди. Дугоналари ҳам ўринларидан туришди. Бояги киз дугонасига эргашаётib Асадни бир гап билан чақиб олишни унутмади:

- Одаммисан, тўнкамисан, нима бало!

Асад ичиди сўқинди-ю, киз бола билан тенг келишни истамади.

Ошхонадан чикаётганида бўйдор бир бола уни тўхтатди:

- Нега Манзурнинг атрофида ўралашиб колдинг? – деди у беписандлик билан.
- Ўралашганим йўқ, сомса бердим, – деди Асад унга тик қараб.

Янги келган боланинг бундай қарashi бўйдорга ёқмади, унинг ёқасига кўл юборди. Асад чакқонлик қилиб, билагидан маҳкам ушлади. Бўйдор унинг кучини хис қилган бўлса ҳам, бўш келишни истамай дағаллик билан деди:

- Агар яна Манзурга яқинлашсанг, битта оёғинг синиб қолиши мумкин, чўлокланиб юриш ёқса, билганингдан қолма.
- Икки оёғинг сингандан кейин эмаклаб юришингни бирор кўрса, оркаси билан кулса керак? – деди Асад заҳарли пичинг билан.

Бу гапни эшитиб, бўйдор қулини силтаб тортиб олди. Бу онда икки жўжахўрозднинг юзма-юз туришидан бир ёмонлик исини сезган тарбиячи ҳай-ҳайлаб колди.

– Ким эмаклаб қолишини кўрсатаман!

Бўйдор шундай деб ташқарига йўналди. Асад, уч бола унга эргашганидан, унинг интернат зўрларидан эканини билди. Тарбиячи унга яқинлашиб, енгидан силтаб тортди:

– Нега уришяпсан? – деди қўпол оҳангда.

– Уришганим йўқ, танишдим.

– Сен ўзингдан кетма, бола! Суннатиллани жигига тегмай, жим юр.

– Менинг бу болангиз билан ҳам ишим йўқ. Факат бир савол берди, шунга жавоб топиш имконим керак экан.

– Қанақа савол?

– «Битта оёқ синиб чўлокланиб юрган яхшими ё икки оёқ синиб эмаклаб юрган яхшими?» деб сўради.

Бу гапни эшитиб, тарбиячининг капалаги учуб кетди. Ҳатто лаблари бир оз титради ҳам.

– Агар Суннатиллани чертгудай бўлсанг отасидан балога қоласан! – деди.

– Отаси зўрми?

– Зўрми, зўр эмасми, бу сенинг ишинг эмас!

«Яхши бола бўлиб юришга» сўз бериб, тарбиячининг тарбиявий дақиқасидан кутулгач, Асад синфдошлиридан бўйдор ҳакида сўраб-суриштириди. Тарбиячининг чўчиб тушиши бежиз эмас экан, бўйдорнинг отаси жисмонан эмас, мартаба жиҳатдан «зўр» бўлгани учун ҳамма унинг эътиборидан чўчиб тураркан. Бўйдор куч жиҳатдан эмас, ана шу обрў жиҳатдан интернатнинг зўри – «пахани» ҳисобланаркан.

Ўша куни пешиндан кейин Асад бўйдорга яна рўпара келди.

Икки дугонаси билан чинор дарахти соясида сухбатлашётган Манзурага Асад хумор кўзларини қадаганича сал нарида ёниб турарди. Бўйдор ҳам шу якин атрофда эди. Асад унинг ҳаракатларини ҳам на-

зардан қочирмасди. Бўйдор чўнтағидан қоғоз чиқариб, шеригига берди. У, ҳаялламай, қизлар томон юрди. Манзурага хатни тутказди-да, қулогига нимадир деб пичирлади. Қизлар сирли равишда кулишди. Манзура эса уялиб, кафтини бетига тутди. Иккинчи қўлидаги хатни ўқимай, гижимлади.

Асадбек кузатиб тураверишга ортиқ тоқат қилмай, киз томон юрди. Унинг яқинлашаётганини кўрган қизлар нари кетишди. Манзура жойидан жилмади. Бу Асадга маъқул келиб, янада дадиллашди.

– Бу хат менга экан, бола пакир адашиб сенга берибди, – деб қўлини чўзди. Манзура чўчинкираганича бўйдор томон бир караб олиб, сўнг ихтиёrsиз ҳолда хатни узатди. Асад хатни олиб, баттар гижимлаганича деди: – Сен у найновга қарама, хатларини ҳам ўқима.

– Қараётганим йўқ, ўзи шилқимлик қиласверади, – деди Манзура нажот нигоҳи билан унга қараб. Асадга бу ҳолат ҳам ёқиб тушди.

– Энди шилқимлик қилмайди, менга ваъда қилди, – деди Асад катъий. Манзура бу гапга ишониб, изоҳ берди:

– Олдинги шанбада уйга кетаётганимда оркамдан эргашиб борди...

– Энди бормайди.

Асаднинг дадил гапириши Манзурага ёқди. Боланинг эрталабки тўпорилиги учун ранжиган қиз кўнглидан хафалик чиқиб кетди. Беихтиёр «рахмат» деди-да, бурилиб, дугоналари изидан югурди. Асадбек хатни майда-майда қилиб йиртган чоғида бўйдор унга яқинлашди.

– Кучайдингми? – деди ўқрайиб қараб. Асад унинг таҳдидига парво ҳам қилмади.

– Нима демокчисан?

– Чиройли қизлар кучли одамларники бўлиши кепрак.

– Тўғри айтасан, чиройли қизлар эгасиники бўлади.

– Нима демокчисан? Эгаси... сенмисан?

– Ҳа, менман.

– Кече келиб, бугун хўжайинлик қилмоқчимисан?

Чиқасанми? – деди бўйдор Асадни олишувга даъват этиб. Асад бу пўписага ҳам парво қилмади:

– Бирга-бирми ё думларинг ҳам қўшилишадими?

– Олдин битта думим билан тушасан. Уни қойил килсанг, кейин менга чикасан.

– Ҳозирми?

– Йўқ, ҳозир қорнинг очиб, шилқиллаб турибсан.

Қоронғи тушганда, ошхонанинг орқасида. Ҳоҳласанг ўзинг ҳам думларингни олвол.

– Дум сенда бўлади. Мен ўғил боламан!

Бўйдор жавоб кайтара олмади. Гапдан енгилгани алам килиб сўкинди-да, ўз даврасига қайтди.

Белгиланган жойга шом қоронғисида Асаднинг бир ўзи келди. Ӯн чоғли бола уни кутиб турган эди.

– Гапимиз ўғил болачасига бўлади, – деди бўйдор уни қарши олиб. – Олдин Шухратик билан тушасан. Эпласанг эпладинг, бўлмаса, жимгина писта килиб юришга сўз берасан.

Асад куч жиҳатдан Шухратнинг зўр эканини фаҳмлади. Бу болани бўйдор пул берибми ё бирон ваъда биланми ўзига қарам килиб олганининг сабаби барчага номаълум эди.

Чап бетига тарсаки, ўнг бетига енгил мушт тушганда Асад гангиб колди. Тўпланганлар масала ҳал бўлди, икки муштлик ҳоли бор экан, деган тўхтамга келишди. Айниқса, бўйдорнинг кўзлари шодликдан кулди.

Ўртадаги икки йигитча бир-бирини яхши танимасди. Шухратдан фарқли ўлароқ, Асад нима учун муштлашаётганини аниқ биларди. Бу олишувда Шухрат кул мақомида эди: хўжайнини буюрди, у уришяпти. Енгса, хўжайнини миннатдор бўлади, енгилса – кўп нарса йўқотмайди – сўкиш эшитади. Асад эса енгса, кўнгил қўйганига эга чиқади, мағлуб бўлса – ўз фикрига кўра, ҳамма нарсасини бой беради – хорлик ботқоғига чўкади. Шу боис унга факатгина ғалаба керак!

Асад ҳарифидан кўзларини узмаган ҳолда тезгина тисарилди. Ошик тепувчи ўйғур йигит унга хитойча тепишни ўргатган эди. Асад ҳозир ўша тепкини ишга солиш вакти келганини англади. Ўнг оёгини орқага буқди, ўнг қўли билан панжасини ушлади-да, оёқка куч берди, сўнг қўйиб юборди. Оёғи худди камондан узилган ўқ каби учиб Шухратнинг жағига урилди. Бунақа тепкини ҳеч ким кўрмаган, демакки, кутмаган эди. Асад тепиш жараёнида устозининг яна бир ўгитига амал қилди: ракибининг онасини эслаб, бўралаб сўқди. Шухратнинг хушидан кетишига битта тепки кифоя қилди. Асаднинг сўкишини эшилмади, сўкиш бу ёқдагиларнинг қулокларини қоматга келтирди. Шухрат уч-тўрт дакикада ўзига келди. Болалар аввалига ўлиб қолди, деб кўрқишиди ҳам. Асад уларни кузатганича майдондан чиқмай тураверди. Жаги шиша бошлаган Шухрат хушига келгани билан муштлашувни давом эттирадиган ҳолда эмасди. Шу боис бўйдор енг шимариб ўртага тушди.

– Бекор киляпсан, сенга шунинг ўзи кифоя эди, – деди Асад, уни огоҳлантириб.

Бўйдорнинг кўзларида кўрқув зохир эди, аммо сир бой бергиси келмади:

– Сен бугундан бошлаб эмаклаб юрадиган бўлиб коласан!

Бўйдор дағдаға килмокчи эди. Лекин овозида таҳдид эмас, ишончсизлик оҳанги сезилиб қолди. Аввал зарба учун пайт пойлагандай давра ўртасида айланаверишди. Асад ҳужумни бошламади. Бўйдорнинг муштларига чап бериш билан қаноатланди. Бир маҳал тепиш учун оёгини орқага буқди. Бундан сергакланган бўйдор тисарилди. Лекин Асад уни тепиб шикастлашдан ўзини тийди. Башарасида из қолишини, кейин шу туфайли кандайдир балоларга дуч келишини истамади. Бўйдорни белига қўл юбориб, маҳкам қисди-да, кулатди. Сўнг уни миниб олиб, ўнг кўлини орқасига қайириб олди. Бўйдор оғриқдан додлаб юборди. Болалар «пахан»ларини кутқаришга чоғланишганда бўй-

дор ётган ерида: «Қайтларинг! Ўзимиз келишамиз!» деб бакирди.

Келишдилар...

«Пахан»лик мартабаси ўша ондан Асадга ўтди.

Ўша онда у ўз оламини белгилаб, чегаралаб олди. Ўз оламига хоким бўлди. Ўзининг мустаҳкам қалъаси пойдеворига биринчи мустаҳкам тошни қўйди.

Ўшанда энг чиройли қизга тўла эга чиқдим, деб янглишган эди. Орадан йиллар ўтиб, уйланиш палласи келганда, совчилари куруқ қайтишганда адашганини сезди. Энди қизга муштлашув орқали эга чиқа олмас эди. «Киморни ташлайман» деб қасам ичгач, Жалилнинг отаси қиз хонадонига қатнайвериб, кўнмагунларича ҳоли-жонига қўймади...

Асадбекнинг қиморбоз дўстлари ҳиммат қилишиб, тўйни дабдаба билан ўtkазиши. Манзура келинлик либосида остона ҳатлаб кирганда Асадбек ўзини илк маротаба чинакамига баҳтли ҳис килди.

АБДУРАҲМОН ТАБИБ

1990 йил, 3 июнь.

Дев аканинг хужрасини макон тутганлар ҳадеганда йўқолиши мадди. Худди бу ерга бутунлай кўчиб келишгандай бамайлихотир яшайвериши. Бу атроф қишлоқларни назорат қилувчи милиционер йигит ҳам уларга бир мартагина рўпара бўлди холос, кейин «нима учун берухсат ётибсизлар?» деб сўрамади.

Абдураҳмон табибининг сезгир юраги қандайдир зулмни ҳис килиб, сикилаверди. Беш-олти марта хужра ёнидан ўтди. Аввалига нотаниш маллалар ажабланиб караб қўйиши. Шу қишлоқда туғилган, улғайган палласида шайтон йўриғига кириб кетиши туфайли бу тупроқка бегона бўлиб қолган Қоравой эса норози киёфада кўз тикди. Маллаларнинг ажабла-

ниши ҳам, Қоравойнинг норозилиги ҳам бежиз эмасди. Бешинчи марта ўтаётганида Қоравой хужрадан чикиб, унинг йўлини тўсди.

– Бу томонларга бунча серқатнов бўлиб қолдингиз? – деб сўради у саломни унутиб.

– Доим ўтиб юрадиган йўлим, сенга нима куткулиги тушиб қолди? – деди Абдураҳмон табиб зарда билан.

– Юришингиз ошналаримга ёқмай турибди, сал наридан айланиб ўтганингиз маъкул.

– Ёкмаётган бўлса, ошналарингни олгин-у, бу ердан қорангни ўчир.

– Учакишманг, ошналаримнинг жаҳли ёмон.

Тақдир баъзан шундай ғаламислик қиласади, таажжубдан кўра ғазаби келади, кишининг. Айникса, сурбет одам билан юзма-юз келганда ўз корнига ўзи пичоқ тортиб юборишга ҳам рози бўлиб қолади. Қоравойнинг туриши, нурсиз нигоҳидаги зулм булутининг сояси, тилидан учган совук гаплар Абдураҳмон табибни шундай кўйга солди.

– Гўрга кириб кетган жаҳли ёмонларни санаб адогига етиб бўлмаслигини ҳеч ўйлаб кўрганмисан? – деди у жаҳлини яширмай.

Қоравойга бу ҳақиқат ҳам таъсир этмади, ўша совук охангда эътиroz билдириди:

– Булар осонлик билан гўрга кирадиганлардан змас.

Жимгина оқаётган сув ўз остидаги гирдобни ҳар вакт ҳам яшириб сақлай олмаганидек, Абдураҳмон табиб ҳам вужудини қамраб олаётган ғазаб ўтини жиловлашга ожизлик қилиб, овозини кўтарди:

– Унакада буларингни Худо ёмон урибди: ошналингга гўр ҳам насиб этмас экан...

Бу гапни эшигтан эси бутун одам келажагини кўз олдига келтиролса, юраги ёрилиб, ўлиб қолиши ҳам мумкин эди. Қоравой эса пинагини бузмади. Аламини ичига ютиб юрган кишиникига ўхшатиб заҳарханда килди:

— Совук нафас килманг. Биз ҳали кўп яшаймиз, майшатлар қиласиз, ўйнаб-куласиз.

— «Яшаймиз» дедингми? Сен ҳали ўзингни тирик одам каторида кўряпсанми? Сен Мамасолининг сигирини ўғирлаган кунинг ўлган эдинг. Сен одам эмас, хунук бир шарпасан.

— Агар бир пайтлар онамни даволамаганингизда хозирги гапингиз учун гўрингизга бенавбат кирғизворган бўлардим. Иzzатингизни билинг-у, жўнанг бу ердан!

Абдураҳмон табибни ғазаб баттар бўға бошлади. Бу бадбаҳт қанчалар қарғишта лойик бўлса ҳам, шариат йўриғига амал қилиб, дуоибад этмай, унга инсофтафик тилади-да, нари кетди.

Қоравойнинг нурсиз нигоҳи унга кимнидир эслатди. Ўйлай-ўйлай ёдига тушди, чувакдан келган, сўхтаси совук одамни эслади: ўтган йили «ошнам касал, тузатсангиз, оғзингизга сиққанича сўрайсиз, бир тийин кам берган – номард!» деб катта кетган бу одамнинг илтимосини рад этгач, «билиб кўйинг, ошнам ўлса, бу уйда битта ҳам тирик жон қолмайди!» деб дўқ урган эди. Ўшанда табиб: «сен... валади зинога ўхшайсан» деб гапини калта қилганди. Аравондаги улокка олиб борилаётган отлар ўлдирилганди ўшанда. Абдураҳмон табиб ўша воқеани, иблис нури билан чақнаган ўша кўзни унутиши мумкин эмас. Яқинда бир туш кўрди: кўкатлари жазирамада куриб, ковжираб кетган гўр устида бир калла турганмиш. Кўзларни таниди: ўша одам. Бу кўзлардан кон ока бошлагач, Абдураҳмон табиб босинкираб уйғониб кетди...

Қоравойнинг кўзлари ҳам ўшанга ўхшайди. Зулмини касб қилганларнинг нигоҳлари бир-бирига шунақа ўхшармикин?..

Орадан бир неча кун ўтгач, хуфтонни ўкиб бўлиб, ётишга тайёргарлик кўраётган онида кўча эшиги тақиллади. Бу хонадонда табибнинг ўзими ё энг ки-

чик ўғил набирасими бўлса, бас, бирор чакириб келса, эшикни очиш у ёқда турсин, аёллар овоз беришмас эди. Абдураҳмон табиб гўдаклигидан бери биладиган бу одатга ҳеч қандай ўзгартиш киритмаганди. Ҳозир хам «мен ётяпман, бирортанг чика кол», деб буюрмади. Кўйлагини эринмай кийиб, эшик сари юрди. Остона нарёғида турган Коравойни кўриб ажабланди. Бу сафар Коравой салом берди. Табиб алик олди. Атроф коронғи бўлмаганида унинг лаблари салгина титраганини, юзига ташвиш булути соя ташлаб турганини сезган бўлар эди.

– Маслаҳатга келувдим...

Коравойнинг bemavrid ташрифидан ажабланган Абдураҳмон табиб бу овозда титроқ сезиб, таажжуби янада ошди. Ичкарига таклиф килди. Коравой кирмади.

– Мен билан бирга мозорга бориб кела оласизми? – деди умид билан.

– Мозорга? Ҳозирми?

– Ҳа... ҳозир...

Тунов кунги учрашувда гўрга бенавбат кирғизвориш истагидаги одамнинг коронғи кечада мозорга таклиф қилиб келиши ғоят ажабланарли ҳол эди.

– Нима бўлди? Сабабини айт-чи?

– Кўзимга бир нарсалар кўриняпти. Асли... кишлоқка келганимдаёқ бошланувди. Ўтиб кетар, деб ўйловдим. Баттар кучайяпти. Икки кундан бери ўйку йўқ. Кўзларимни юмсам, юрагим портлаб кетай деяпти.

– Үлдирган одамларингни кўраётгандирсан, мурдалардан қўркмасанг ҳам бўлади.

– Улар эмас... онам кўринадилар...

– Унда... онанг қилаётган ишларингдан безовта экан. Сени деб бечора маломатларга колди, йўлингга кўз тикиб ўлди. Ўғил бўлиб гўрига бир сиким тупрок ташламаган эдинг. Ишқилиб адашган бўлайнин, хар

холда қайтганингдан кейин ҳам мозорбошига бормагандирсан?

Коравой бу аччик ҳақиқатга дарров икрор бўлмади. Сукут сақлади. Кейин хўрсинди:

– Адашмадингиз...

– Анави куни «сен ўлик одамсан», десам аччикландинг...

– Илтимос, мени ҳозир сўкманг, мозорга бориб келайлик. Онамга сиз кўп яхшиликлар қилгансиз. Отам ўлганидан кейин ўн ой ўтиб туғилганимни ҳам биламан. Онамни уятдан куткариш учун «шунақаси ҳам бўлади, баъзан бола бачадонга ёпишиб қолади», деганингизни ҳам одамлардан эшитганман. Ҳақиқий отам кимлигини онам айтмаганлар, сиз ҳам..

Абдураҳмон табиб унинг таънасини эшитиб: «алваладу сирру абиҳ», деб пичирлаб қўйди. Коравой унинг лабидан учган сўзларни эшитди-ю, англамади:

– Нима дедингиз? – деди ажабланиб.

Абдураҳмон табиб «бола отасининг сиридур» деган ҳикматни унга тушунтиришни истамай, гап маромини бурди:

– Мендан сўрамагансан. Сўраганингда ҳам жавоб берса олмас эдим. Бу сир Худога-ю яна онанг билан чин отангга маълум эди.

– Онам кўзимга кўринганларида аввал сиз томонга бошлияптилар, кейин мозорга... Балки ўша ерда бир сир бордир?

– Буни Худо билади. Бугун ичганмисан ё наша тортганмисан?

– Йўқ...

– Мозорга бормокчи бўлсанг, аввал ичкари кир, таҳорат қилиб, покланиб ол, бу ҳолатингда қадам босма у жойга.

Коравой билганича, чала-пулча поклангач, йўлга тушдилар. Бу вактда тўлин ой терак бўйи кўтарилиб, атроф гўзал нурга бурканга бошлаган эди. Коравой ярим қадам орқада борарди. Абдураҳмон табиб орка-

сига ўгирилиб каради – Ой нури Қоравойга чирой бахш этишга ожизлик қилган, юзи ўликники каби совук – нурсиз, ифодасиз эди.

– Кўзингга кўринган шарпа қайси кўчалардан олиб ўтганини эслайсанми? – деб сўради Абдураҳмон табиб. У «онангнинг арвохи» демокчи эди, юмшокрок гапириш мақсадида «шарпа» деб кўя қолди. Ҳолбуки, арвоҳни тилга олган тақдирда ҳам Қоравой кўркиб, лабига учук тошмаган бўларди.

Қоравой саволга жавобан бош ирғаб, тасдик ишорасини қилди.

– Унда олдинга ўт, – деб буюрди Абдураҳмон табиб.

Қоравой бугун арок ҳам ичмаган, наша ҳам чекмаган эди. Бирок, кеча ҳар иккисининг кайфида ўтирганида кўзига онаси кўринганди. Кайфи тарқалганда «мозорга хаёлан бориб келдим», деб ўйлаганди. Аслида эса ўзига-ўзи гапириб, худди тунги ойпараст бемор талвасасида бориб келганди.

Мозорнинг кунботар томонида Дев аканинг хужрасига нисбатан ободроқ бир уйча бор эди. Уй соҳиби Дев акага ўхшаган девонаваш бўлмаса-да, одамларга қўшилмасди, оила ҳам курмаган эди. Барчага «Гўрўғли» деган ном билан танилган бу одам, Абдураҳмон табиб тахминича, ёш жиҳатдан қишлоқнинг улуғи эди. Исмининг келиб чиқиши ҳакида турли миш-мишлар юрарди: бирорлар «онаси ҳомиладорлигига ўлиб, кўмилгач, лаҳадда туғилган, гўрков боланинг йифисини эшитиб, кавлаб олган», дейди, бошкаси: «очарчилик пайтларида қўшни қишлоқлик хотин боласини боқолмай гўрковга ташлаб кетган», деса, кўпчилик унинг касби – гўрковлигига ишора қиласи. Унинг неча йиллардан бери гўрковлик килишини бирор ҳисоблаб кўрмаган. Гўрўғли эса эллик йилнинг нари-берисида кимнинг қаерга ва качон кўмилганини аник кўрсатиб бера олади. Унга қабристоннинг яна айрим сирлари ҳам маълумки, бу

ҳакда бирорга гапирмайди. Факат Абдураҳмон табиб билан сұхбат қурғанда айримларидан уни вокиф қилиб қўяди. Сир иккинчи одамга айтилса, сирлигидан чикади, дейишади. Бирок, гўрковнинг Абдураҳмон табибга айтган сири маҳфийлик чегарасини ҳатламаган, Коравойнинг онаси ва ҳақиқий отасига тааллуқли сир ҳам шулар жумласидан эди.

Абдураҳмон табиб факат бир марта Гўрўғидан эшитган маҳфий гапни ошкор этишга мажбур бўлганди. Ўшанда Гўрўғи Исматнинг арвоҳи безовталанаётганини айтиб, сабабини англаёлмай гаранг бўлаётганини билдирганди. Арвоҳнинг безовталиқ сабабини Абдураҳмон табиб тахминан биларди. Исмат янги уй солаётганида ўзининг ҳовлиси кенггина бўлишига қарамай, қўшниси еридан бир қисмини эгаллаб олган эди. «Кенгга кенг дунё» деб яшовчи қўшни норози бўлса ҳам жанжал қилмаганди. Факат бир марта Абдураҳмон табибга дардини айта туриб: «қўшним охиратини ўйламади-да», деб афсусланганди. Абдураҳмон табиб унинг бу афсусини етказганида Исмат бўш келмай, «асли ҳовлисини таг-туги билан олиб қўйсан ҳам ҳаққим бор. Бу жойларнинг эгаси менинг катта дадам эди», деганди. Абдураҳмон табибнинг: «Ад-дунё ёвмун ва лано фиҳо савмун» – дунё бир кундек ва биз унда рўзадормиз. Иним, бу ерларнинг, бу сувларнинг эгаси битта – раббимиз Аллоҳ! Сиз билан биз вактинча фойдаланувчилармиз. Бир-биirimiz билан жой талаша-талаша дунёдан кўз юмганимизда бизларга икки қулочгина ер насиб этади. Талашганимиз учун эса охиратда Аллоҳ ҳузурида уялиб қолишимиз мумкин», деган ўгитига парво ҳам қилмаганди. Арвоҳнинг безовталигини эшитгач, Исматнинг ўғлига бу сирни ошкор этишни мақсадга мувофик деб билди. Ўғил отасидан фарқли ўларок, бамаъни эди, табибнинг гапларини эшитгач, «шу уй хосиятсиз бўлди, бузиб ташлайман», деди. Бирок, уйни бузишга қўшниси йўл бермади. У мозорга бориб,

Исматнинг қабри тепасида розилигини Абдураҳмон табиб гувоҳлигига айтди... Ўшанда, қабристондан қайтишда Абдураҳмон табиб бир байт айтиб, маъносини тушунтириб берганда Исматнинг гуноҳини кечирган ўша қўшниси йиғлаб юборган эди. Эртасига қоғоз-қалам кўтариб чиқиб, «кеча айтганингизни ёзib беринг, ёдлаб олиб, керакли жойларда тушунтириб бераман», деб илтимос килди. Абдураҳмон табибга бу маъкул келиб, хусниҳат билан ёзди:

«Дунё эрур мазраъан фохира,
«Ад-дунё мазраъатул-охира».

Кейин кайтадан тушунтириди:

– Бу байт ҳазрат Навоийники. Илоҳий ҳикматни назмга солиб, деганларки: кўзимизга кўриниб турган дунё чиройли, фаҳрланса арзигулик экинзорга ўхшайди, аслида зса «бу дунё у дунёнинг полизидур». Бу дунёда яхшилик экинини эксанг, у дунёда жаннат меваларини терасан. Бу дунё полизига ёмонлик уругини қадасанг, Қиёматда дўзахнинг оташ тошларини ютасан...

Қабристон худудига етганда Қоравой чўчиб, бир неча нафас тўхтаб колди. Абдураҳмон табиб «юрмайсанми?» деб зўрламади. Бир кадам нарида тўхтаб, сабр килди. «Бирорнинг молини ўғирлаётганда, молига кўшиб жонини олаётганда қўллари титрамаган бўлса керак, – деб ўйлади Абдураҳмон табиб. – Наҳот, ўликлар оламидан қўрқаётган бўлса? Ҳа... қўрқаётгандир. Ўзини бирон хавфдан асраш учун тирикни ўлдириши мумкин. Ўлик таъкиб килса-чи?..»

Абдураҳмон табиб хаёлидаги саволга жавоб топмай туриб, Қоравой дўмпайиб турган гўрлар орасидаги ёлғизоёқ йўл бўйлаб юриб кетди. Ичкариликтаги белгисиз, ташландик кабр олдида тўхтаб, ўгирилдиди, «бу жойда ким ётибди?» дегандай табибга қаради. Табиб бу карашнинг маъносини англамагандай инда-

мади. Бир неча нафас тургач, Қоравой яна юриб кетди. Сўнг яна бир ташландик гўр олдида тўхтади.

— Онанг шу ерга кўмилган, — деди Абдураҳмон табиб унинг савол назарига жавобан.

Қоравой чўкди. Абдураҳмон табиб тик тураверди. «Худонинг инсоғ бергани рост бўлсин», деб ўйлади.

Икки-уч дақиқадан сўнг Қоравой қаддини тиклаб:

— Мармартошнинг энг зўридан ўрнатиб қўяман, — деди.

Абдураҳмон табиб «мармартош қўйиш ўрнига ҳидоят йўлига кирганинг аълороқ», демоқчи бўлди-ю, бу гапнинг ўрни ва мавриди эмаслигини билиб, индамай қўя қолди. Қоравой эса яна кабрлар оралаб юриб, Гўрўғлининг кулбасига яқинлашди-да, «энди нима қилай?» деган маънода қаради.

— Шу ерда тура тур.

Абдураҳмон табиб шундай деб, пастак эшикни ғижирлатиб очгач, эгилиб ичкари кирди-да, кулба соҳибининг уйғонганига ишонган ҳолда:

— Менман, aka, — деб овоз берди.

— Сенлигингни билиб турибман, — Гўрўғли шундай деб кўлига гугурт олди-да, қорачироқ пилигини ёқди. — Шўртумшук бошлаб келдими? Кеча ҳам ивирсиб юрувди. Изғиб-изғиб, тонгга якин кетувди. Кеча бошқача эди. Бугун бошқачароқ.

— Кўзига онаси кўрингандишиш.

— Кўринади-да... Бу хотин кўмилганидан бери тинчигани йўқ. Сен унинг ёнини олиб, бекор килгансан. Шармандалиги учун тириклигига роса азоб чекканидайди, ўлганида бунчалик рухи қийналмасмиди... Ўғлининг рангига қараб «Қоравой», деб сен исм кўйган эдинг. Аслида бу валади зинонинг юраги қора эди, ўшандаёқ билганман...

Гўрўғли бу дашномни авваллари ҳам бир неча марта такрорлаган эди. Шу боис Абдураҳмон табиб ўзини оклашга киришмади.

Рост, ўшанда бу жувоннинг бадном бўлишини

истамаганди. Чунки унинг суюкоёк эмаслигига ишонарди. Суюкоёк бўлган тақдираидан ҳам, зрининг гўри совимай, бегона тўшакка кириши мумкинлигига ишонмасди. Зинонинг асл сабабини аёл бирорга айтмади. Ҳатто Абдураҳмон табиб хузурида ҳам ўзини оқламади. Гуноҳини бўйнига олгандай, бош эгиб жимгина ўтираверди. Ҳатто йиғламади ҳам. Бу воқеага қадар қўп йиғлаган эди, эҳтимол, кўз ёшлари қуриб битгандир?..

Аввал эридан ажралди, кейин отасидан. Автомобиль ҳалокатида эри нобуд бўлди, унинг кир ювдиси куни отасини қамоқка ташладилар. Машинани отаси бошкаргани учун ҳалокатга асосий сабабчи деб билдилар. Отасини куткариб олиш имкони бор экан... Ўша одам озодлик эвазига озгина пул талаб қилганида уйига пул олиб борган эди... зўрланиб, номуси топталган, хорланган ҳолда қайтди. Гарчи айбсиз бўлсада, ўзидан ўзи ирганди. Ўзини осмокчи ҳам бўлди. Қўлига аркон ҳам олди, аммо ўлишдан қўрқди. Агар келажакда шармандалик билан ўлишини ўша онда билганида эди, аркондан сиртмок ясаётганида қўллари қалтирамаган бўларди. Қўрқоклиги ўз бошига бало бўлди. Ҳомиладорлигини билганида ўз эридан ёдгорлик деб ўйлаб, ҳатто кувонди. Ҳалокатдан бир тун олдин кўшилишларидан аввал эри Худога ёлвориб, ўғил фарзанд тилаган эди. Гинекологга биринчи боришидаёқ, адашганини билиб, ўзини яна ўлдирмоқчи бўлди, яна қўрқди...

Боши узра ёғилган ташвиш дўлларининг ҳисоби унинг ўзигагина маълум. Унинг бегуноҳлигига оз одам ишонади. Агар ўша дамларда арзини айтганида қишлоқ ахли унга ишонган бўларди. Лекин айтмади... Оқибатда хотинлар орасида «жуvonмарг бўлгур эри тириклигига ҳам ўйнашган, бўлмаса кирки чиқмаёқ иккиқат бўлиб колармиди?» деган висир-висир гап айланди. Ғийбатчи хотинлар Абдураҳмон табибининг гапига қарши чиқишга журъатлари етмагани сабабли

бу ҳақиқатни баралла айтиб, уни шарманда қилишга журъат эта олишмасди.

Абдураҳмон табиб жим тургани учун Гўрўғли гапини давом этди:

— Бу хотин кўмилган куниёқ гўри устида арвохининг чиркиллаб турганини кўрганман: Кўкшапка тириклигида безовта арвоҳи ўшаникига тинимсиз катнарди. Кўкшапка ўлганидан кейин унинг гўри атрофига айланадиган бўлди. Кўкшапкани карғармиди, билмайман...

Гўрўғли «Кўкшапка» деб атаётган одам шаҳардаги «НҚВД» идорасида каттароқ лавозимда ишлаган, Сталин замонида кўп бегуноҳларнинг шўрини қутиби, етимлар ва беваларнинг карғишига колган, кейинчалик бу ердагиларга номаълум бўлган сабаб билан хизматдан ҳайдалиб, қишлоққа қайтган эди. Хизматдан мосуво бўлса-да, бошига кўк фуражкани қўндириб юришни канда килмасди. Бу қилиқ унга отамерос эди. Отаси ўттизинчи йилларда шундай юрарди, ўнлаб дехқонларни узок ва совук ўлкаларга сургун қилганидан керилиб яшарди. «Кўкшапка» деган лақаб ўшангага тақалганди. Кейинчалик бу лақаб ўғилга ўтган эди. Кўкшапка, гарчи амал чавкари устида бўлмаса ҳам, қишлоқдагилар ундан ҳайиқиб туришарди...

Хотира селидан кутулмокчи бўлган Абдураҳмон табиб: «Зоҳир ўлуб «буъсира мо фил-қубур», жилва қилиб «хуссила мо фис-судур», деб пичирлади.

— Бир нима дегандай бўлдингми?

— Ҳа... Қабрдагилар қайтадан чикарилсалар, дилдагилар ошкор қилинса эди...

— Нима деяпсан? Одам тушунадиган қилиб гапир.

— Балки энди отасининг ким бўлганини айтиб кўйиш керакдир? — деди Абдураҳмон табиб.

— Ҳеч кераги йўқ, — деб эътиroz билдириди Гўрўғли. — Отаси билан ўша гўрда топишади. Шу билан бу лаънатиларнинг зурриёти батамом курийди.

Ўшандан кейин кишлоққа маълум килиб қўясан, токи бошқаларга ибрат бўлсин.

Шундай дегач, чирокни пуфлаб ўчирди. Абдураҳмон табиб кесакига бошини уриб олмаслик учун эгилганича чикиб, эшикни ғижирлатиб ёпди. Коравой унга умид билан бокди:

– Нима дедилар?

– Ҳеч нима... Сен қўркма, кўзга кўринган нарсанинг зарари йўқ. Эрталаб масжиднинг имомига борсанг, дам солиб қўяди, тинчийсан-коласан.

– Ўзингиз ўқисангиз-чи?

– Менинг бунақа одатим йўқ.

– Онам сизникига бошлаб бордилар мени...

– Тушда одамга ҳар нарса кўринаверади.

– Ухламаган эдим.

– Сенга шундай туюлган. Бир дакиқага кўзинг илинса ҳам, оламжаҳонга татийдиган воқеаларни тушингда кўраверасан.

Абдураҳмон табиб шундай деб олдинга тушди. Коравой то унинг уйигача жимгина эргашиб борди. Остонасига етгач, табиб «бўлди, изингга қайтанер», дегандай ўгирилиб қаради.

– Мен сизга бир гапни айтиб қўйишим керак, – деди Коравой хавотирли овозда.

– Айтгинг келса, айт... – деди Абдураҳмон табиб.

– Бизнинг хужрага бекорга келмагансиз. Юрагингиз бир нарсани сезган.

– Бир шумликни сезяпти, – деб аниқлик киритди Абдураҳмон табиб.

– Балки шунакадир. Биз аслида қамоқда ҳали кўп ўтиришимиз керак эди. Бир хизмат қилиб беришимиз эвазига чикариб, бу ерга олиб келишди.

– Қанақалигини вақти келганда айтамиз, дейишган. Менинг билганим – бу атрофларда биздақалардан яна бор. Сизга айтганимни билиб колинса, мени ўлдиришади.

– Унда нима учун айтдинг?

– Билмадим... онам буюрдилар шекилли... Сиз мени ёмон кўрасиз... шерикларим мендан ҳам баттар. Ёмон ишлар бўладиганга ўхшайди. Бола-чақангизни олиб, бошқа жойда тура турганингиз яхшимикин?..

– Мени ўйлама, мени Аллоҳим асрайди. Сени «ўликсан» девдим, сен тирилишингни ўйла. Тирилсанг-тирилдинг, йўкса, жувонмарғ бўласан.

Абдураҳмон табиб шундай деб, остонасини ҳатлаб, ичкарига кадам босди. Зулфни илмади, эшик қия очик қолди. Қоравой бир оз харакатсиз турди-да, изига қайтди. Лекин ҳужрага кирмади. Ҳарсангтош устига ўтирганича кўзига онаси кўринишини хавотир билан кутди. Тонг отгунига кадар уни ҳеч қандай шарпа безовта қилмади. Тонготарда шерикларидан бири уйғониб чикиб, унинг ёнига ўтириди-да, газета парчасига ўралган нашани тутатди. Ундан чиккан тутун Қоравоюга ҳуш ёкиб, қўлинни узатди. Шериги қулоғига қистириқлик ўрамни олиб берди. Қоравой уч-тўрт марта чуқур-чуқур тортгач, ташвишлардан фориг бўлди-ю, ҳужрага кириб, то кечга кадар котиб ухлади.

I б о б

1

– Менинг бу дунёда ҳали ҳаким кўп, – деди Асадбек, бошини кўтармай, – ҳакимни тўлатиб олмагунимча кетмайман, бу дунёдан. Сен яшаш учун туғилган бўлсанг, мен қасос олиш учун келганман.

Зулм учқунлари сачраб турувчи бу гап Жалил учун янгилик эмас эди. Эллигинчи йилнинг биринчи кунида дўстининг совукдан кўкариб кетган лабларидан учган: «Мен уларнинг ҳаммасини ўлдираман!» деган аҳдни у унутмаганди. Ўшандан бери қасос олажаги ҳакидаги гапни Асадбекдан кўп эшигтан, бир куни

ҳатто «Сен баҳт излаб умр кечирмадинг, қасос умидида яшадинг, ўч илинжида нафас олдинг», деб дангал айтган ҳам эди. Аввалгиларидан фарқ этувчи хозирги гап оҳангидаги ёвузлик Жалилнинг вужудига минглаб игна каби санчилиб, сескантириб юборган бўлса-да, дўстининг руҳиятини инобатга олиб, жавобдан ўзини тийди. «Мен бир нарса десам оловга мой қуйгандай бўлиб қолмай, ўзингиз насиҳат қилиб қўйинг» деган каби Муҳиддин отага қаради. Муҳиддин ота бу карашнинг маъносини англади, бирок дарров суҳбатга кўшилмади. «Гапининг давоми бордир», деган ўйда Асадбекдан садо кутди. Асадбек бошқа гапирмади.

Муҳиддин отанинг назарида Асадбек фарзандининг вафотидан кейин тилидан учайтган сўзларига эътиборсиз бўлиб қолгандай эди. Гёё бу фожиа зарбаси биринчи галда сўзларга посбонлик қилувчи аклни янчиб ташлаганди. Шунинг натижасидами, у айтажак сўзларига хожа эмас, айтилганларига кул бўлиб қолган эди. Айниқса, Асадбекнинг «Худо билан шартномам бор: энди мен унинг уйига қадам босмайман, у меникига кирмайди», деган гапи ўшанда Муҳиддин отанинг юрагига бигиз бўлиб санчилган, орадан бир неча ҳафта ўтганига қарамай, тиф азоби ҳалигача кўтарилимаган эди. Асадбек-ку тавба қилди, лекин Худо кечирдимикан? Албатта, Муҳиддин ота меҳрибон Аллоҳнинг тавбани қабул этишидан умидвор. Тавбанинг тилда айтилиши кифоя қилмаслиги, амалда ҳам гуноҳлардан тўхташи лозимлигини билгани учун ҳалби хотиржамликни йўқотган. Ҳатто учтўрт марта саждага бош қўйган пайтида Асадбекнинг ўша гапи ёдига тушиб, танасидан жон чикиб кетгандай туюлган эди. Кечалари таҳажҷуд намозини ўкиб бўлгач, кўзларида ёш билан Яратганга илтижо қилиб, дўстининг зурриётини авф этишини сўради...

Асадбекнинг хозирги гапи аввалгиси каби куфрона тарзида жарангламади. Жарликка қулаётган одамни билагидан ушлаб толикқан киши жисмонан қийналса,

Муҳиддин ота рұхан азобда әди. Ҳозир дардига банди Асадбекка ачиниш билан қараб, Абдурахмон табибининг гапини беихтиёр эслади. Түй арафасида боришиганды, намоздан сўнг табиб: «Худди шу ерда ўтириб, инимиздаги рух хасталигининг чекинмоғига умид қилиб әдик. Умидимиз сароб бўлиб чикибди. Инимиз зулмни аввалгидан кучлирок ҳолда касб қилибдилар. Ожиз иймонлари янада ожизлашибди», деганда Муҳиддин ота «Замон буларнинг тилини ҳам, дилини ҳам тош қилиб қўйган... На илож... ҳархолда Аллоҳдан умидимиз бор...» деб жавоб қайтарган әди. Бу гап Абдулҳамидинг ўлимидан олдин айтилганди. «Отамлатсанг отамлатгин, бўтамлатмагин», деб кетганлар бу айрилиқнинг иймонни янада сустлаштириши мумкинлигини ҳам инобатга олганмидилар? Айрилик синовига дуч келганда Аллоҳга интилмай, юз ўғирганларни эртага нима кутяпти?

Муҳиддин отанинг юраги қизиб, беихтиёр ўрнидан турмокчи бўлгандай қимиirlаб қўйгач, Асадбек унга қаради. Муҳиддин ота ичидан ёнаётган вулқон оловига чираб, одатига хилоф килмай, охисталик билан, худди ўзига-ўзи насиҳат килаётгандай сўз бошлади:

– Ҳаёт – бешик ва тобут орасидаги тор бир йўл ва йўлчиликдир. Дунё ҳаёти сўнгсизлик ичидан бир совун кўпиги кабидир. «Инсонлар идрок қилган ҳаёт нимадан иборат?» деган саволга ернинг захи ва қабр тошлирининг каттиклиги энг тўғри жавоб бўлур әди. Шундай экан, нафсоний орзулар ва вужуд йўлида ўтган умрнинг маъноси нима ҳам бўлур әди? Бўтам, касос деганингиз нафсоний умиднинг бир кирраси, холос. Кирраси кескир тошни кўлга олсангиз, ҳеч бўлмаса бармоқларингизни қонатади...

– Китобларда зўр нарсаларни ёзишади-ю... лекин китобнинг гапи бошка, ҳаётнинг ҳикмати бошка.

– Фикрингиз ғалат бўлди, бўтам. Сизга карши баҳс очмайман, чунки сиз ўзингизни ҳаётда кўп адолат-

сизлик кўрганлардан бири деб ҳисоблайсиз. Сизга ўхшаганларнинг фикрини ўзгартириш кийин. Лекин бошларига адолатсизлик дўли ёғилган фақат сизгина эмассиз, буни ҳам ҳисобга олишингиз керак. Бу дунёда текин нарса йўқ. Ҳамма нарса учун ҳақ тўлаш керак. Хусусан, киши ўзининг роҳати ва фароғати бадалига ҳамиша тўлов тўлаб туриши зарур. Сиз учун бу кунларда бу тўловнинг номи – сабрдир, бўтам. Одам боласи қасос олгани эмас, Аллоҳ белгилаб қўйган синовлардан ўтиш учун туғилиб, яшайди. Сизу биз яшаётган олам қасос эмас, синов дунёси. «Қасос – Ҳақдандир», дейилган улуғ Китобда.

– Китобда нима деганини билмайман, лекин менинг тақдиримга қасос ёзилган экан.

Бу гапдан кейин Жалил чидаб туролмади. Муҳиддин отанинг насиҳатомуз хилм оҳангига қайсар дўстини инсофга келтира олмаслигини англаб, ўзининг синаланган одатини ишга солди: аввал курагига енгил шапати урди. Фам юкидан эзилиб ўтирган Асадбек кутилмаган бу шапатидан чўчиб тушди. Дўстига «Жиннимисан!» деган маънода қаҳрли нигохини қадашга улгурмай, Жалил гапини бошлади:

– Тақдирингга қасос ёзилганини сенга бирор айтдими?

Асадбек ошнасининг ташланишидан осонроқ кутулиш максадида «Ха, айтди», деб қўя қолди. Бошқа мавзу бўлганида Жалил эҳтимол, шу жавобга қаноатланиб, гапини бас қилиши мумкин эди. Лекин кандайдир балолардан огоҳ этаётган қасос аҳди сабрга ўрин бермади.

– Қайси аҳмок айтди шу гапни? – деди бу сафар овозини сал баландлатиб.

– Сенга ўхшаб ишларимга бурнини тикаверадиган аҳмок камми бу атрофда?

– Қани, ўша аҳмоқнинг биттасини айт-чи? – Жалил шундай деб дўстининг курагига яна бир шапати туширди.

– Танимайсан, битта фолбин айтган.

– Сен... ҳали фолбинга бордингми?

Асадбек ўйламай гапириб юбориб, арининг иини кавлаб кўйганини англади. «Ёлғон айтдим», деса яна гапчувалашишини билиб: «Манзура борган экан», деб кўя колди. Жалил Мухиддин отага қаради:

– Гапини эшитдингизми? Хотини фолбинга борибди, – Мухиддин отадан жавоб кутмай Асадбекка қаради: – Ростдан борибдими?

– Ростми ё ёлғонми, ана, ўзидан сўра.

– Агар ростданам фолбинга борган бўлса, ишинг чатоқ ошнам, хотининг талок бўлибди, бошқатдан никоҳ ўқитишинг керак.

– Бўлди қил, аклингни ўша домлаларингга бориб ўргат! – деди Асадбек кескин тарзда.

– Ота, бу бўтангизга бир нима денг. Эсини йигиб олсин. Оркалаб юрган гуноҳлари ҳам етарли, энди никоҳсиз хотин билан...

– Бўлди қил, деялман!

Икки ошнанинг баҳси чукурлашиб, жанжалга айланиб кетиш эҳтимоли борлигини сезган Мухиддин ота гапга арапашди:

– Фолбинга бориш дуруст одат змас, бўтам, фолбинга ишониш иймон сустлигидан.

– Дангалига «кофирлик», деяверинг. Бунингиз «иймон сустлиги»ни тушунмайди.

– Бутунлай кофирга чикарманг, – Мухиддин ота шундай деб, Жалилга норози караганича бош чайқади. – Айнан мана шу ишлари кофирларга хос бўлибди. Агар астойдил тавба қилсалар, инша Аллоҳ, гуноҳлари кечирилади.

– Никоҳ-чи? – деди Жалил бетокатлик билан.

– Никоҳми?.. – Мухиддин ота нимадандир истихола қилдими ё ўзи ҳам бу масаланинг ечимини аниқ билмасмиди, дарров жавоб бермади. Бундан ажабланган Асадбек унга тикилганича жавоб кутди: – Ҳамонки, банда кофирнинг ишини қилган бўлса,

никохи бузилади, деган ҳукмни эшитганман. Аммо фатвога ожизман, уламолардан сўраб билиш керак. Агар улар «никоҳ қайта ўқилиши керак», деган ҳукмга иттифоқ қилсалар, начора, бўйсуниш лозим. Бу бир адашиш холос, фожия эмас.

– Сиз шунака дейсиз-у, бунга ўхшаган калта-фаҳмлар фолбинларга тинмай бориб юришибди-да, сал бошқачароқ туш кўришса ҳам югуришади. Бунинг гуноҳлигини сиз билан мен айтиб турмасам, бошлиғиға балолар орттириб олишади. Булар фолбин нима, сеҳр нима билармиди? Ҳатто Сулаймон алайҳиссалом ҳам сеҳргару фолбинларнинг шўрини куритганлар, тўғрими?

Жалил бу гап билан нимани назарда тутаётганини яхши англамаган бўлса-да, Мухиддин ота унинг шаштини қайтармаслик учун аста бош иргаб қўйди. Жалил буни тасдик ишораси сифатида қабул қилди, гўё ота «Гапираверинг бўтам, айни ҳақ сўзларни баён киляпсиз», дегандай бўлиб, Асадбекка тикилганича ваъзхонлигини давом эттириди:

– Уша замонларда Сулаймон алайҳиссаломнинг атрофларини сеҳргарлар ўраб олишган. Сенга ўхшаган довдир-совдирлар Худога ишонмай, ўша шайтонларнинг найрангларига эргашишган. Шунда Сулаймон алайҳиссалом сеҳргарларнинг китобларини кўлларидан тортиб олиб, тахтларининг тагига кўмдириб ташлаганлар. Сулаймон алайҳиссаломнинг ўлимларидан кейин жинлар тахт тагини кавлаб китобларини олволганлар. Нодонларнинг уларга сигиниши камлик қилиб, Бобил шаҳридаги икки фариштанинг сеҳрларига амал қила бошлашган. Улардан биттасининг оти Ҳорут, иккинчисиники Морут бўлган. Ота, тўғри гапиряпманми? Янгишсам, ўзингиз тўғрилаб қўйинг. Ҳорут билан Морут фаришта бўлгани тўғрими, ё малоика бўлишганми?

Мухиддин ота бу савонни эшитиб, Асадбекка бир караб олгач, мийиғида кулимсиради.

– Бўтам, «фаришта» ҳам «малоика» ҳам бир маънода. Унақа десангиз ҳам, бунақа десангиз ҳам маъкул, адашмайсиз. Фақат Ҳорут билан Морутнинг фаришталиги хусусинда уламолар орасида баҳс бор. Кўпчилик уламо фаришта, деган фикрга иттифок қилишган. Биз каби илмсиз бандаларга шуни билиш кифоя.

– Буни ўзим ҳам билардим, лекин бир пайтавафаҳм мени енгмоқчи бўлди-да.

– Илм саёзлигидан кутула олмаган биз каби бандалар учун баҳслашиш дуруст змас, окибатда кулгига колишимиз мумкин. Шунинг учун, бўтам, сира баҳслашманг.

Мухиддин ота Жалилни таниганидан бери унинг одатларини зимдан кузатиб, феълини тушуниб колган эди. Қаердадир, кимдандир эшитган ривоятми ё афсонами ўзига манзур бўлиб қолган бўлса, охиригача айтмагунча тўхтамаслигини билгани учун ортикча гапдан ўзини тийди. Асадбек эса «бу чала мулланинг гапи отага ёқиб қолди шекилли», деб ўйлаб, ошнасини гапдан тўхтатмади. Унинг сукут сақлаши Жалилга илҳом бериб, гапини давом эттириди:

– Ҳорут билан Морут одамларнинг гуноҳ ишларини кузатиб, уларга таъна тошлари отганларида Худо уларга қараб «Инсонларга берилган нафс сизларга ҳам берилса, сизлар ҳам ўшаларга ўхшаб исёнда бўласизлар», деди. Иккала фаришта ҳам Худонинг бу гапига қўшилмай: «Агар бизга нафсни ғолиб қилганингда ҳам биз ҳаргиз исён этмасмиз», деб катта кетишиди. Шунда Аллоҳ таоло уларга нафсни ғолиб килиб, синамоқ учун ерга туширган экан. Улар ерга тушиб олишгач, халкнинг тепасига қози бўлиб, ҳукм сураверишган. Шунда Аллоҳ таоло синаб қўриш максадида бир аёлни шикоят билан уларга юборди. Бу аёл ниҳоятда соҳибжамол экан. «Нафсни берсанг ҳам исён қилмаймиз», деб катта кетган Ҳорут ҳам Морут ҳам унга маҳлиё бўлиб, ваъдаларини унутди. Хотин билан қўшилгилари келди. Хотин уларнинг талаби-

ни эшитиб, «партим бор», деди-ю, арок ичишлари-ни талаб этди. Арокни ичиб, хотинга яқинлашмокчи бўлганларида бир одам пайдо бўлиб, йўлларини тўсди. Бу одамни шартта ўлдирдилар. Ўлдирдилар-у, хукумат олдида жиноят килганларини билиб, жазоланишдан қўрқдилар. Талвасага тушиб турганларида шайтон хукумат одами киёфасида пайдо бўлиб: «Агар бутга сиғинсаларинг сенларни жазодан кутқариб қоламан», деди. Улар жонларини сақлаб қолиш учун бутга сажда килдилар. Ўшанда Аллоҳ таоло уларни фаришталик мартабасидан туширган. Кейин ё бу дунё ё у дунё азобидан бирини танлашни айтди. Улар гуноҳлари учун бу дунёда азоб чекишини танладилар. Улар Чохи Бобил деган жойда соchlаридан осилган холатда азоб чекарканлар.

Шу ерга келганда Асадбек чидаб тура олмади:

– Бориб кўриб келдингми уларни? Раҳминг келмадими, азобдан кутқариб қўя қолмабсан-да! – деди заҳархандалик билан.

– Худонинг ишлари гапирилаётганда бунақа майнавозчилик қилма. Мен домлалардан эшиганимни айтяпман.

Жалил нафсга тааллуқли ҳикмат Асадбекка ҳам тегишли эканини ўйлаб кўрмай, бу гаплар эсига тушиб колгани учунгина айтган эди. Жалил ўйламагани билан Асадбек ўзини исён қилганлар қаторида кўриб, ғашланди-да:

– Ҳа, ўзи шунака бўлади: кўр ушлаганини, кар эшиганини қўймайди, – деб минғирлади.

– Кўр десанг ҳам майли, кар десанг ҳам, чала мулла десанг ҳам кўнавераман. Мен арабча ҳарфлардаги эски китобларни ўкиёлмаганимдан армон қиласман. Ўкиёлганимда...

– Ўкиёлмаганинг ҳам яхши, – деди Асадбек унинг гапини узиб, – бўлмаса мияларимизни ачитиб ташлардинг.

– Сен...

- Энди бирпас жим тур, отам билан маслаҳатлашадиган гапим бор.
- Бўпти, мен кетдим.
- Бирпас жим ўтири, дедим!

Кўнгли оғриб ўрнидан турмокчи бўлган Жалил дўстининг бу жеркишидан сўнг амрга итоат эта қолди. Асадбек эса Мухиддин отага караб гап бошлади:

- Сабр килиш керак, деяпсиз, тўғри, бундан бошқа чорам ҳам йўқ. Сабр киляпман. Лекин барибир кўнглим тўлмаяпти. Ойимнинг бир ёnlарида Самандар, яна бир ёnlарида Ҳамид ўғлим. Ўзим боргунимча адамни олиб келиб қўйишим керак. Шунда жамулжам бўлиб ётамиз. Илтимос, мусулмончиликка тўғри келмаса ҳам мени бу йўлдан энди қайтарманг.
- Бўтам, агар кўнглингиз тўлмаётган бўлса, на чора, бориб олиб келиш керак.

– Мусулмончилик йўл берадими, ахир?

– Мусулмончиликнинг қаршилиги йўк... Марғилондаги маҳалламиизда бир авлиёнинг кабри бўларди. Йигирма тўққизинчи йилнинг кузида эди шекилли, кайси бир большевик бадбахтнинг бузук бошига шу зиёратгоҳни бузиш ишқи тушган экан. Халқ кўтарилса ҳам тракторини тираб қўйди. Шунда ақли одамлар маслаҳатлашиб, мурдани кўчиришга иттифок қилишди. Дурадгорлар алоҳида тобут ясашди. Суякни лаҳаддан олиб, яна қайта кафанлашди. Кейин қайта жаноза ўқилиб, қабристонга кўйилди. Тумонот одам тобутни бир марта кўтаришга илҳақ бўлган эди. Жанозанинг биринчи сафида турғанларни битта қўймай олиб кетишди. Жанозани дадам раҳматли ўқиган эдилар...

– Биз ҳам шундай қиласиз бўлмаса... Факат... тумонот одам бўлмайди, биринчи сафдагиларга бирор даф килолмайди.

– Аҳдингиз қатъий бўлса, бирга борамиз... Абдужалил ошнангиз билан учовлон бориб кела қоламиз.

Бу тадбирда ўзининг иштирок этишини Мухиддин ота тилидан эшитгач, Жалил эътироз билдира олмади.

Бу режани амалга ошириш пайсалга солинмади. Асадбек ўша куниёқ Козловга қўнғирок қилиб ниятини билдиргач, йўлга отланишди. Хонгирейнинг ўлимидан сўнг Красноярга қайтган Козлов лозим бўлган барча ишларни амалга ошириб кўйган эди. У насороларнинг одати бўйича ялтиллаб турган тобут ясаттиргани билан, мусулмонлар одати бўйича кафаник шартлигини ҳисобга олмаган эди. Асадбекку, бунака одатлардан бехабар, ҳатто барчага ақл ўргатувчи Жалил ҳам буни ўйламаганди. Мухиддин отанинг тугунча кўтариб олгани иккала ошнани ажаблантирган бўлса-да, «ўзларига керакли бирон нарсадир», деб кўя қолишганди. Тугун ичида кафаник борлиги маҳкумлар қабристонига борилганда маълум бўлди.

Йигитлари кабрни ковлашаётганида Козлов Мухиддин отани четга чорлаб секингина: «Тобутга солиб кўмишганмиди?» деб сўради. У пайтларнинг хожалари «халқ душманлари» деб хорлаётган одамларига тобутни раво кўрармидилар? Насоролар тобутсиз, мусулмонлар кафансиз ва лаҳадсиз ётибдилар бу ерда. Мухиддин ота биродарининг юзини дараҳт пўстлоғи билан ёпиб, хашак билан кафандаган эди. Ёнидаги малла йигитга буларни гапиргиси келмади. Саволига жавобан аста бош чайқаб, «йўқ» ишорасини қилди. Козлов янада пастроқ овозда: «Суякни олаётганимизни Беск кўрмай кўя колсин», деди. Мухиддин ота ҳам шуни ўйлаган эди. Маъқул ишорасини қилиб, Асадбекка яқинлашди-да, кўлидан ушлади:

– Бўтам... – деб максадни англатмоқчи эди, лаблари титраб, гапдан тўхтади.

Асадбек ўгирилиб, унинг намланган киприкларига кўзи тушди-ю, нима демокчи бўлганини англади.

– Мени қайтарманг, – деди йиғламсираб. – Жон берётгандарнида ўғил бўлиб ёнларида ўтиргмаган эдим, лаҳадга кўёлмаган эдим. Энди йўлимни тўсманг, ўз кўлим билан олай...

Жалил ҳам дўстини четрекда туришини истаган эди. Асадбекнинг гапидан кейин у ҳам жим қолди. Йигитлар сүякка қадар ковлашгач, юкорига кўтарилишиди.

Асадбек пастга тушди. Отасининг сүякларини гўё кўз ёшлари билан ювди. Сүяклар юкорига олингач, Мухиддин ота авайлаб ювиб, кафанлади...

Юртга кайтишгач, Асадбек айтганидай бўлиб, одам тўпланмади. Лаҳадга ўзи тушиб, кафанланган сүякларни қўйди... Кўя туриб нимқоронғи лаҳадга олазарак қараб олди. Гўрковга иш буюраётганда «лаҳадни кенгрок кавла, вақти келганда мени ҳам шу жойга қўясан», деб тайинлаган эди. Лаҳад асли қандай ҳажмда кавланишини билмаса ҳам, назарида гўрков буйрукни бажаргандай туюлди. Узининг якин орада шу жойда ётишини тасаввур килди-ю, кўркувдан юраги тўхтаб қолгандай бўлди. Баданига муз югорди. «Бу дунёда ҳеч кимдан ва ҳеч нимадан қўркмайман, қасос олмагунимча ўлмайман», деб катта кетадиган одам бу онда қўркди. Одам зотининг табиати ажабтовор: ҳар қадамда хавотир ва зулм таъкиб этадиган ёруғ дунёда қўркмай яшайверади, ҳеч қандай таҳдид йўқ лаҳадда тинчгина ётишдан эса қўрқади... Чувриндини кўмишганида «Бу ер менинг жойим эди, Махмуд укам. Сен келдинг. Ёнингда яна бир жой бор...» деб ўйлаганида ҳам, ўзига мўлжалланган жойга ўғли қўйилаётганида «бу жой меники эди!» деб фарёд урганида ҳам ҳозирги даҳшатни ҳис қилмаган эди. Юкорида турган Жалил дўстининг харакатсиз туриб қолганидан хавотирланиб, меҳрибонлик оҳангода «Асад!» деб чақирди. Пастдан овоз бўлмагач, баландрок овозда чакириб, «Бўлди энди, чиқакол», деди. Дўстининг овози Асадбекнинг жонини қайтаргандай бўлди. Хушига келиб, кафан устини меҳр ва ўқинч билан силагач, тепага кўтарилди. Унинг окариб кетган, тер қуйилаётган юзига қараб Жалил қўркиб кетди. Пешонасига боғланган ок сурп рўмолни олиб,

дўстининг бетларини артди. Асадбек худди ёш боладай муте ҳолда турди. Кейин эгилиб, лаҳад оғзини гувалалар билан ўзи ёпмоқчи эди, Жалил елкасидан ушлаб тўхтатди:

– Бу ёғи гўрковнинг иши, сен тепага чиқ.

Шундай деб аввал ўзи юкорига чиқди-да, кўлини Асадбекка узатди. Асадбек унинг амрига сўзсиз итоат этди. Қабр айвони бўшашини кутаётган гўрков шу заҳоти сакраб тушиб, ўз ишига киришди.

Тупрок тортилди. Абдулҳамиднинг қабри бобоси ва бувисининг гўрлари орасида қолди. Мухиддин ота «Таборак»ни тиловат қилиб, фотиха ўқигач, ўринларидан туришиб, оғир-оғир қадамлар билан юра бошлилди. Жимгина чиқиб кетаверишни маъқул кўрмаган Жалил гап бошлади:

– «Ўлим – кутилмаган меҳмон», дейишади. Вақти соати етганда меҳмонни кутиб оламиз-у, биллалашиб шу ерга келаверамиз.

Бу гапни эшитган Мухиддин ота унга ажабланб каради:

– Кутилмаган меҳмон, дедингизми? Йў-ўк, аксинча, кутилган меҳмон. Факат биз уни кутишга, каршилашга яхши тадорик кўриш лозимлигини унубиб яшаймиз. Биз унинг ташрифи мукаррарлигини унумасак, қадамларига пояндоз солиб кутсак, азиз меҳмон каби кутган бўламиз. Пояндоз деганим бу дунёдаги яхшиликларимиз. Кутилган меҳмон шоҳу гадога бир хилда муносабатда бўлади. Унда бу борада айирмачилик иллати йўк. Жон бергувчи банде меҳмонини каршилагач, унинг учун энди фоний дунёда фожиа йўқдир. Фожиа – мархумнинг ортида колаётган тириклар учундир...

Мухиддин отанинг ҳикматга тўла бу гапига эътиroz ҳам билдирилмади, жавоб ҳам берилмади. Қабристондан чиқишгач, Жалил яна тилга кирди:

– Шу ерда хайрлашамиз. Ҳамма уй-уйига.

Асадбек унинг бу қилиғидан ранжиб, Мухиддин отага илтимос назари билан қаради:

- Келинингиз бизни кутяпти.
- Яна зиёфатми? Мен бормайман, – деди Жалил.
- Жириллайверма. Қанака зиёфат? Ярим косадан мастава. Ичсанг ичарсан, ичмасанг жим ўтирасан. Ярим соат жим ўтира оларсан, а?

Жалил дўстига жавобан жаҳл билан қўл силтади. Муҳиддин ота қулимсираб, икки ўртокни муросага келтирмоқчи бўлди:

– Мастава бир баҳонаи сабаб, сухбат ғанимат, бўтам, бора қорайлик.

– Биласиз-ку, бидъатларга тоқатим йўқ.

– Талабни жуда тор олиб юборманг, бўтам, диннинг бағри кенг. Биродарнинг кўнглини олиш сизнинг фикрингизча бидъат бўлса ҳам – бидаъти ҳасана, яъни ёқимли одат.

2

Кунлар ўтгани сайин Асадбек Муҳиддин отанинг насиҳатлари бўйича янгича ҳаёт кечира олмаслигига тобора ишониб борарди. Хос йигитларга жавоб бериб юборгани билан болохонасига кўзи тушганда пойлокчилар «хизмат борми, Бек ака?» деб караётгандай бўлишарди. Уларга рухсат бериб юборганида уйда келинлар борлигини баҳона қилган эди. Кесакполвонга: «Сен билан мени Худо асрایман, деса шу пойлокчиларсиз ҳам асрайди. Худонинг жонига теккан бўлсак, атрофимизни икки минг қўриқчи билан юз қатлам қилиб ўрасак ҳам Азроил уларнинг орасидан бемалол ўтиб келиб, жонимизни сұғуриб олаверади», деганида дўсти: «Худонинг жонига тегмаслик учун одам ўзини эҳтиёт қилиши керак. Бу баҳонанг ўтмайди ошна, кўчангта битта уйча курдириб, пойлатаман...» – деб эди. Келинлар кетишид... Уйча курдириб, қўриқчи қўядиган Кесакполвоннинг танаси Москванинг қайсидир ахлатхонасида ириб-чириб ётиби. Калласи эса Асадбекнинг марҳамати билан

лаҳадга қўйилган. Ўшанда «илдизимиз битталигини унутаётганга ўхшайсан. Билиб кўй: сенинг тинчлинг – менинг тинчлигим, сенинг обрўйинг – менинг обрўйим», деганди.

«...илдизимиз битталигини...»

Шу гапини кўп ўйлади. Илдизнинг битталиги кисматнинг бир эканлигими?

Хонгирейнинг ўлими ҳақидаги хабарни эшитганидан кейин кўнгил хижиллиги янада ортди. У Хонгирейнинг шунчаки ўлимини эмас, унинг юрагига ўз қўли билан ханжар санчишни истарди. Шунчаки ханжар санчиш билан қасос шаробидан маст бўла олмаслиги ни биларди. Хонгирей ўзига душман санаган одамининг бошини кесиб, кутига солиб, яқинларига «совға» килишдан лаззатланарди. Асадбек учун қасоснинг лаззати нимада? Дунёдаги энг ёвуз одам қилмаган ваҳшийликларни қилса: Хонгирейнинг кўзларини ўйиб ташласа, кўкрак кафасини ёриб, юрагини суғуриб олса, танасини майда-майда қилса ҳам кўнгли ором ололмаслиги ўзига маълум. У бир нарсани аниқ хоҳларди: ўлим билан рўпара келган Хонгирейнинг кўзларида талvasани кўришни истарди. Асадбекка яхшилик истаган дўстлари уни бу лаззатдан ҳам маҳрум қилдилар.

Хонгирей қандай ўлим топганини билмайди, бироқ, бу ўлим энди осойишта ҳаётга эмас, янги фожиалар жарлиги томон йўл очганини фаҳмлаб турарди. Бу жарликка ўзи ёлғиз қулайдими ё йигитларини тўплаб, қулфатдан қутулиб қоладими?

Асадбек Красноярга бориб келгач, биринчи галда шу масалани ечиш режасини пишита бошлади.

Муҳиддин ота билан Жалилни кузатгач, ҳайҳотдай меҳмонхонасига кириб, диванга чўзилганида Манзура эшикни қия очиб:

– Ҳали овсиним телефон килувдилар, – деди.

Асадбек Кесакполвоннинг хотини нима мақсадда кўнғироқ килганини фаҳмлаган бўлса-да, сир бой бермай:

- Нима иши бор экан? – деб сўради.
- Билмадим, Ҳайдар акадан дарак йўқмишми? Каерга кетаётганларини айтмаган эканлар.
- Каерга кетарди? Юрғандир дунё ташвишларидан кутули-иб, у ёқда ошналари кўп...

Асадбек буни худди ўзига-ўзи гапираётгандай паст овозда айтган эди. «У ёқда...» деганини Манзура бирорта курортдадир, деб тушуниб бош ирғаб кўйди. Асадбек қаддини кўтарди-да, телефон симини ушлаб, ўзига тортди. Сўнг ракамни териб, нотаниш овозни эшиттач, ажабланди:

- Сен кимсан? – деб хотинига караб олди.
- Манзура эри телефонда гаплашаётгандага қулок со-лишга одатланмаган эди. Шу сабабли орқасига кайтиб, эшикни ёпди. Телефондаги овоз «Мен сартарошман», дегач, Асадбек сўкиниб кўйди-да, дағал оҳангда:

- Кеннайингни чакир! – деб буюрди.
- Кесакполвоннинг хотини сартарошнинг якинида экан шекилли, дарров овоз берди:
- Ҳа, ким бу?
- Ҳа, сингилжон, одам танимайдиган бўлиб қол-дингми? – деди Асадбек пичинг билан.
- Вой, Бек ака, сизмидингиз? – Хотин шундай деб салом берди-ю, бидирлаганича ҳол-аҳвол сўрай кетди. Гал Манзуранинг аҳволини сўрашга келганда Асадбек унинг гапини бўлди:

- «Опажоним», дейсану холидан хабар олмайсан. Сендақа сингилларни бобовларга бериб юбориш ке-рак.
- Вой, ҳар куни телпон қилиб турибман.
- Телпоннинг кимга керак? Бу дунёда сендан бекор-чироқ одам йўқ, келиб тур.
- Вой, шунака дейсиз-у Бек акажон, уйдан чиқолмай қолдим. Куёвим килиқ чиқарган, юрагим ҳар куни така-пуга.
- Нима бўлди?
- Шунча йил индамай яшаган йигит ўлгур, энди хотинини рашқ қиласидиган бўлиб қолибди.

- Яхши-ку! – деди Асадбек кулимсираб. – Куёвинг энди эркак бўлибди. Сен индама, қўйиб беравер.
- Вой, шунака дейсиз-у...
- Эринг қани?
- Тусатдан берилган саволдан хотин гангиб қолди. Аслида бу савонни у бермокчи эди.
- Сиз биласизмикин, деб ўйловдим, – деди у мужмаллик билан.
- Мен эрингнинг коровулимани? Уйдан чикаётганида «Қаёқка кетяпсиз?» деб сўрасанг бирон жойинг камайиб қоладими?
- Вой, шунака дейсиз-у мен сўраганим билан укангиз жавоб берармидилар?
- «Худо бу хотинни ақлдан кисиб, ўрнига ўрин икки карич тил берган», Асадбек шундай деб ўйлаб, яна унинг гапини кесди:
- Эринг Московга иш билан кетувди. «Иш биттдан кейин денгиз бўйларига бориб уч-тўрт кун айланаб келаман», девди, телпон килмадими?
- Йўқ.
- Телпон килса, мен билан хабарлашсин. Шу эр ҳаппаи ҳалол ўзингники, эрта-индин ўзингга қайтиб келади, хавотир олма.
- Қайтиб келмай, гўрга борармиди, Бек ака...
- Бу гапни эшитгач, Асадбек хайрлашмаёқ гўшакни жойига қўйди-да, овоз чикариб сўкинди.
- ...қайтиб келмай, гўрга борармиди...
- «Эрининг боши гўрда эканини билганида нима дерди? Танаси ахлатхонада ириб ётганидан хабардор бўлса-чи? Бундай бефаросат хотин билан яшагандан кўра гўрга боргани ҳам дуруст...» Москвага кетиш арафасида бир бева танишларининг уйланишни истамаётганини айта туриб, «қип-қизил аҳмок у! Хотиндан осон қутулганига Худога шукр қилиб, битта момақаймоқни олволмайдими! Агар хотиним ўлса, қўмиб, мозордан қайтишимдаёқ уйимга уйланиб келардим», деган эди. Хотинига ўлим истаган эди, мо-

зорда қолишиң үзиге насиб этди. Хотини эридан аж-
ралганини билса, бир-икки кун йиғлаб-сиқтагандан
кейин нима қиласы? Битта лақма зер топиб, тегволиш
харакатига тушадими... Эрининг ўнларча ёки юзларча
ўйнаши борлигини билган хотин умрининг охиригача
аза тутиб ўтирармикин?

Асадбек шуларни хаёлидан ўтқазиб, күнгли
ғашланганича ўрнидан турди. Алҳол беихтиёр ра-
вишда Манзураси билан бу хотинни тақкослаб, ўзини
омадли эрлар каторига қўшиди. Эр-хотиннинг ўзаро
бурчларини тўғри англаганда эди, ўзини шунчаки
омадли ҳисоблабгина қолмай, баҳтли деб билиб, бу-
нинг учун Яратганга шукрлар қилган бўларди. Шукр
қилмаса ҳам, хотинига бўлган меҳри жўшиб, қўшни
хонага чиқди. Деразага яқин қўйилган хонтахта ёнида
ўтириб китоб ўқиётган Манзура эшик очилиши билан
ялт этиб қаради-ю, эрини кўргач, шошилиб ўрнидан
турди.

– Ўтир, ўтиравер, – Асадбек шундай деб унга
яқинлашди-да, лўла болиш ташланган томонга ўтириб,
хотини ўқиётган китобни қўлига олди. Муқовасига
карамай, тагига чизиб қўйилган сатрларга кўз ташла-
ди:

«Худога ва Унинг расулларига ихлос билан иймон
келтирган ва амрларини бажо келтирган ана шу жа-
моалар сиддиқлардир. Парвардигор наздида марта-
балари улуғлар – шахидлардир. Аллоҳ таоло уларга
комил ажр ва иймон нури ато қилган. Аммо коғир
бўлганлар ва Бизнинг оятларимизни инкор қилганлар
дўзах асхобидирлар. Эй мўъминлар, билингларки,
дунёning тириклиги ўйин-кулгидир ва зеб-зийнатдир,
бир-бирларингиз билан фахрланишдир, молларингиз
ва фарзандларингизни кўпайтиришдан иборатдир. Бу-
нинг мисли шунга ўҳшайдики, осмондан ёмғир ёғиб,
ерлардан гиёҳ кўкарса, дехқонлар хурсанд бўладилар
ва «кўп ҳосил оламиз», деб умид қиласилар. Кейин
бир совук шамол келса, ҳаммасини куритса, бас, бар-

глари сарғайиб қурий бошлаганини кўрасан, кейин хаммаси синиб, майдаланиб, сомонга айланади. Дунёнинг нашъу намоси ана шулардан иборатдир. Аммо охиратдаги аҳвол икки ҳолатдан ташқари эмас: бири – каттиқ азоб, иккинчиси – Аллоҳнинг мағфирати ва розилигидир. Дунё ҳаёти одамни алдайдиган лаззатдан бошқа нарса эмас...»

Асадбек саҳифани охиригача ўқигач, хотинига каради:

- Тагларига сен чиздингми? – деб суроди ажабланаби.
- Мендан олдин ўқиганлар чизишибди.
- Ақлли гаплар экан: одам умид қилган ҳамма нарса майдаланиб, сомонга айланиб кетади... Ким ёзибди?
- Адаси, сиз Куръони Каримнинг маъносини ўқидингиз шекилли...

Асадбек Манзурада диний китоблар ўқишига кизиқиш кучайганини, икки қўча нарида яшайдиган отинойидан дарс олиб, савод чикараётганини биларди. Манзура бу ҳақда маълум қилганда у «Куръон ўқишини ўргансанг сени сўкишим мумкин бўлмай коладими?» деб ҳазиллашган ҳам эди. Абдулҳамиднинг вафотидан сўнг у кўпроқ Манзурадан хавотирда эди. «Боласининг ғамида ўзини еб, адо қилмасайди», деб чўчиётган эди. Отинойиникига чика бошлаганини билгач, Манзурунинг фарзанд ҳажри азобини енга олишига ишониб, кўнгли бир оз хотиржам тортди.

Манзура эрининг китобдан яна ўқишини истади. Лекин Асадбек китобни унга узатиб, кўшиб қўйди:

- Бу гапларни овсининг ўқиши керак экан, одами алдайдиган лаззатлардан роҳатланиб юрибди, эртаниндин хор бўлиши мумкинлигига калласи ишламайди.
- Адаси, унақа деманг, яхши нафас қилинг, ҳеч ким хор бўлмасин бу дунёда, – деди Манзура китобни қўлига авайлабгина олиб. У тагига чизиб қўйилган сатрларни ўқиётганида «бизнинг туриш-турмушимиз

ҳакида экан, адамизга ўқиб берсам бўларкан», деб ният килувди. Нияти тезгина амалга ошди-ю, лекин Асадбек ўқигани билан ўзига тегишли хулоса чикара олмади.

Бу он ташқаридан овоз эшитилиб, Манзура ўрнидан турди-да, дераза оша ховлига каради.

— Вой ўлмасам, иккита милиса турибди, — деди Манзура хавотирланиб.

— Менинг уйимда милисага нима бор экан, чикиб сўра, гапи бўлса айтсин, — деди Асадбек. Манзура эшик томон юрганда ташқаридан йигитлар йўқлигини эслаб, қаддини кўтарди. «Ўзим чиқаман», деб уни оstonада тўхтатди. Асадбек ташқарига чиқкач, Манзура эрига эргашди. Йигитлардан бири салом бергач, эҳтиромдан холи совуқ ва расмий оҳангда «Асадбекнинг прокуратурага чакирилаётганини» маълум килди.

Белидаги энли камарга кишан осиб олган милиса йигитнинг беодоблигидан ғазабланган Асадбек бу чорловдан максад нима эканини билолмай ўйланиб колди. Аниқ бир тўхтамга келишга фикри ожизлик килиб:

— Бўпти, кетаверларинг, вактим бўлса эртага ўтарман, — деди.

— Эртагамас, сизни хозир етказиб боришими керак.

— Мени сенлар етказиб борасанларми, кейин-чи, кейин қамайсанларми?

— Бу бизнинг ишимиз эмас, биз сизни олиб бориб топширишимиз керак, — деди иккинчи йигит шеригини кувватлаб.

— Мени танийсанларми, кимлигимни биласанларми? — деди Асадбек уларни жеркиб.

— Танисак-танимасак, биз буйрукни бажаряпмиз. Хозир олиб кетмасак бўлмайди.

Манзура бир эрига, бир милиса йигитларга караб йиғини бошлашга тайёр бўлиб колди. Асадбекка тек-

канидан бери уйларига милица бунақа бостириб кирмаган эди. Манзура эрини ҳимоя қилиб милица йигитларга бир нима демокка оғиз жуфтлаган эди, эрининг қаҳрли қарашига кўзлари тўқнашди-ю, нафасини ичига ютди.

Кўнгли бир ғаламисликни сезиб, ғашланган Асадбек уларни сўкиб ҳайдашни ҳам, талабларига итоат этишини ҳам билмай гарангсиди. Болохонада бунақа милица йигитларнинг саробини бир дакикада тўғирлаб юборадиган шотирлари бўлмаса-да, у ҳали Асадбек – «ўқ илон» мартабасидан тушмаган эди. Шу мартабасида турган ҳолда энди дағдага килди:

– Мени сенлар олиб кетасанларми? Кетаверларинг, изларингдан ўзим етиб бораман.

– Йўқ, биз билан бирга боришингиз керак.

– Бормасам-чи? – деди Асадбек кайсарлик билан. – Ҳозир погонингни юлиб ташласам-чи!

– Ўзингизга қийин бўлади. Куч ишлатишимиизга хукуқ берилган. Ҳозирги гапингизни ҳам етказамиз, протоколга киритиб қўйишади.

– Шунақа дегин? – Асадбек гапираётган милица йигитни уриб юбориш касдида унга яқинлашди. Эрининг бу ҳайбатидан чўчиган Манзура беихтиёр «Вой, адаси!» деб юборди. Асадбек ғазаб оловидан кизарган кўзларини хотинига тикиб қаради-да: «Нари бор!» – деб ўдағайлади. Манзура аста орқасига чекинаётганда «Жамшидни топ!» деб буюрди. Шундан сўнг ғўдраниб сўқинди-да, олдинга тушди. Белидаги камарга икки ҳалқали қишанни савлат билан осиб олган милица йигитлар унинг икки ёнидан жой олдилар.

Икки милица ҳамроҳлигида милица машинасига ўтқазиб олиб кетилаётган Асадбекни битта қўшни кўриб колган эди. Асадбек прокуратурадан кайтгунича ўтган бир ярим соат вақт ичидаги шахар бўйлаб мишиш тарқалишига шу қарашининг ўзи кифоя килди.

Прокуратура терговчининг муомаласи милица йигитларницидан фарқ килмади. Идора расм-русум-

ларига амал этгани холда, исм-насабни сўрашдан бошлаб, Асадбекнинг қаҳрли жавобини эшилди:

– Ҳали исмимни билмай туриб чакиртирдингми бу ерга? Эҳтимол сенга Асадбек эмас, Аҳадбек керакдир?

– Ёшингиз катта бўлса ҳам мени сенсираманг, чақалоклигимда бешигимни тебратиб қўймагансиз. Саволларимга аник жавоб беринг, – деди терговчи бўш келмай.

«Ҳавоси баланд-ку, буларнинг, – деб ўйлади Асадбек. – Менга бекорга бундай ташланишмаётгандир... Оркаларида ким турибди?» Асадбек арконни узун ташлаб, терговчининг талабига итоат этишни маъқул кўриб, саволларига оғриниш билан бўлса-да, жавоб бера бошлади.

– Эслаб кўринг: бир минг тўққиз юз тўқсонинчи ийл иккинчи апрелда каерда эдингиз?

Эслашининг хожати ҳам йўқ. Аввал Тбилисига, ундан Москвага ўтгани билан булар нима учун кизикиб қолиши? Буларга Илико керакми ё Хонгирейми? Москвадаги прокурорларнинг тиши ўтмайдиган одамларга бу тиранча нимага қизиқяпти? Асадбек шу саволларга жавоб топмок истагида бир оз сукут саклади.

Терговчи йигит эса «канигини айтасиз, алдашингизга йўл қўймайман», дегандай унга тикилиб олди. Асадбек бунака нигоҳлардан чўчидиган одамлардан эмасди. У ҳам терговчига каттиқ тикилиб, бу «нигоҳлар тўқнашуви»да енгди.

– Эсладингизми? – деди терговчи кўзини қоғоздаги сатрларга қаратиб.

– Нимани? – Асадбек шундай деб киприк коқмай тикилиб тураверди.

– Иккинчи апрелда қаерда юрганингизни? – деди терговчи унга яна бир қараб олиб.

– Иккинчидан бу ерларда нима фалокат юз берганини билмайман, аммо мен ўша куни Тбилисида эдим. Дўстларим Сулико билан Иликонинг боболарини тўйга таклиф қилгани борган эдим.

- Гувоҳларингиз борми? – деб сўради.
- Гувоҳми? – деб сўради Асадбек, сўнг телефонни кўрсатди: – Ана, гувоҳ, Аэропортга телефон кил.
- Мени сенсираманг, – деб яна танбеҳ берди терговчи.

«Сендақаларнинг жонини Кесакполвон киргизиб кўяр эди. Бахтингга у ўлиб кетди», деб ўйлади Асадбек, унга ғазаб билан тикилиб. Алхол терговчи яна бирон нима деб танбеҳ берса, Асадбекдан ширин гап эшиитмаслиги аниқ эди. У гапга оғиз жуфтлаган пайтда эшик очилиб, прокурор ёрдамчиси кириб келди. Асадбек уни танирди. Винзавод директори Қилич Сулаймонов тақдирига боғлиқ масалаларни Чувринди шу одам билан ҳал қиласарди. У дамларда бу одам Асадбекнинг номини эшиитгандаёқ кўлинини кўксига қўйишга тайёр туарди. Энди-чи? Асадбек «Энди сениям димогинг куртладими?» деган маънода унга хам ковокуюб каради. Ёрдамчи Бек акасининг кайфияти ёмон эканини шу қарашданоқ сезса-да, сир бой бермасдан жилмайди-ю, салом бериб, кўшқўллаб сўрашмок учун унга яқинлашди. «Дуруст, ҳали ўзингдан кетмабсан», деб ўйлаган Асадбек тундлик либосидан дарров чиқа колмади.

– Мен акахонни хонамда кутибман, бу ерда нима килиб олиб ўтирибсан, чой-пой хам килмабсан? – ёрдамчи шундай деб тергаб, Асадбекка хижолатомуз каради: – Ҳали ёш-да, булар, салом-аликни ҳам яхши билишмайди.

– Салом-аликни билиш учун одам таниши керак, бу... – Асадбек «тирраки», деб сўкинмокчи эди, ҳакоратланганини ошкор килиб, ўзини ерга ургиси келмади.

– Мен сенга нима деган эдим? – деди ёрдамчи овозини бир парда кўтариб.

– Олдириб кел, дедингиз... – Терговчи «буйруғингизни бажарсам ҳам айборманми?» дегандай елка кисди.

— Вой галварс! Мен-а? Мен Бек акам билан маслаҳатлашиб кўриш керак, деганман!

Асадбек айтган гапидан тониб, «кўрккан олдин мушт кўтарар», кабилида иш юритувчи каззобларнинг одатини яхши билгани учун бу томошани шу ерда узиб, сўради:

— Қанака маслаҳат?

— Омади юришган бир ашулачи ўлдирилибди, яна биттаси изсиз йўқолибди. Шунга маслаҳатингиз керак бўлиб қолди.

— Мен ўлдирмабманни ишқилиб? — деди Асадбек пичинг билан.

— Йўғ-е, йўғ-е! Худо асрасин! Иккала ашулачи куёвингиз... Элчин акамларга шогирд эканми...

— Элчин акангнинг аҳволини биларсан?

— Биламиз, биламиз, ўзларидан сўраб кўрайлик, десак, яхши гапиролмаётган эканлар. Балки ўша йигитларни сиз биларсиз, деб ўйлабмиз-да.

— Отарчиларнинг асбобини кўтариб юрганимни кўрганмидинг? — Асадбек ўрнидан турди. — Ахмоклик ҳам эви билан бўлиши керак. Бек аканг яхши ашулачининг елкасига тўн ёпади, кафанликка ўрамайди, билиб кўй.

Асадбек хонадан чикишга отланганида эшик очи-либ, Жамшид кўринди. У ҳеч бир мулозаматсиз ичка-рига бир кадам кўйиб, хавотирли нигоҳини хожасига қадаганича:

— Бек ака, тинчликми? — деб сўради.

— Тинчлик, — деди Асадбек ижирғаниб. — Укахонлар бир пиёла чойга таклиф килишган экан, ивирсиб етиб келгунимча чой ҳам совибди. Ҳайдар аканг Кора денгиздан қайтганида унга айтгин, укахонларни меҳмонга чакириб, би-ир сийласин.

Асадбек шундай деб прокурор ёрдамчисига маънодор караб кўйди. Ёрдамчи Кесакполвонни биларди, аммо унинг танасидан жудо бўлган калласи бир неча кун аввал Ҳосилбойвачча ётган лаҳадга кўйилганидан

бехабар эди. Буни уч кишигина – Асадбек, Жамшид ва гўрков билардиким, меҳмонга чорланиш ҳакидаги хозирги гапдан мақсад не экани ҳам шу хонада турган икки кишигагина аён эди. Асадбек «эртами-кечми Ҳайдарнинг изсиз йўқолганидан шубҳаланиб ковлаштиришни бошлашганда шу гапим аскотади», деган мақсадда айтган эди. Меҳмонга чорлаш ҳакидаги гапни Жамшид аввалига айнан англади – «буларни Ҳайдар акамнинг ёнига жўнатиш керак экан-да, шунақа гуноҳ иш қилишибдими?» деб ўйлади. Хожасидан топшириқ олганда «нима учун?» деб сўрашга одатланмагани сабабли «хўп», деб қўйди-ю, Асадбек-ка эргашиб кўчага чиқди. Машинага ўтириб вазифасини ойдинлаштиришга уринганида Асадбек унинг бу соддалигидан кулиб «Хе, эси йўқ, уларга тегиб бўладими! Уларни аҳмок десам, сен ўтиб тушдингку!» деб мақсадини тушунтириди-да:

– Эски шаҳардан жой тайёрладингми? – деб сўради.

– Ҳайдар акам вассажуфтли бир уйни мўлжаллаб кўйганидилар. Савдо пишмай турибди. Уйнинг эгаси кариrok одам экан, феълига тушуниб бўлмаялти: бир сотмоқчи бўлади, бир «котамдан қолган жойга ўлганимдан кейин кирасанлар», дейди. Пулнинг ярмини бериб кўйганимиз...

– Кўнмаётган бўлса... индамай қўя колларинг. Эски жойимизда ўтира турамиз... – Асадбек шундай деди-ю, карорининг боисини айтмади. Чувринди ўлганидан кейин бу идорага киришга юраги бетламаётганди. Бошқа жойга кўчишни шунинг учун ихтиёр этганди. Энди ўйлаб караса, кимнингдир кўзларини ўйнатиб ҳавасини келтираётган, кимнингдир юрагига ваҳима solaётган идорадан воз кечиб панароқдан жой излаши ожизлигидан дарак бериб қўйиши мумкин экан. «Бу ердан кўчсан, эрта-индин оёқости қилиб ташлашади», деган ўй аввалги карорини ўзгартиришга баҳона бўлди. Шаҳар марказидаги уч қаватли иморат

ертўласидан жой олган видеобар никобидаги идораси унинг назарида энг оғир зарбаларга ҳам дош бера оладиган метин калъя эди.

— Йигитларингни бир эла-эла қилиб, саралаб олсанг бўларди, — деди Асадбек ўйчан тарзда.

Жамшид кейинги хафталар ичи «ўнг кўл вазир» макомида юрган бўлса-да, «йигитларингни» деган сўзга алоҳида урғу берилганини сезиб, хожасига қаради. Бу сўз фармон мақомида айтилиб, вактинчалик топширилган мансаб тахтининг энди тўла ва узил-кесил инъом этилганига ишора эди.

— Тарзанга нима дейсан? Юриш-туриши қанақа?

— Ёмон эмас, — Жамшид шундай деди-ю хожасининг «мен топган болани менсимаяпсанми?» деб қолишидан чўчиб, тезгина изоҳ берди: — Сиз одамни бир кўришдаёқ кимлигини билиб берасиз. Бекорга назарингизга тушмаган.

— Акаларингдан қайси бирига ўхшайди?

— Махмуд акамга. Ўйламасдан бир иш қилмайди.

— Кўп ўйлайверишнинг ҳам зарари бор-а?

— Ҳали сизнинг тарбиянгизни олмаган-да. Урганиб кетади.

— Ҳайдар акангнинг ўрнини босадиганлари ҳам борми?

— Бор.

— Ўйлаб ўтирмай дангалига «бор!» деяпсан, бирор тасини мўлжаллаганмисан?

— Тарзаннинг ошнаси бор. Гавдаси ҳам, қиликлари ҳам ўхшайди. Тарзаннинг режаларини ўша амалга ошириб беради.

— Ҳайдар акангнинг қаҳри қаттиқ эди.

— Бу ҳам худди шунаقا. Юмшок кўнгил бўлиши сирам мумкинмас.

— Нега?

— Айтувдим-ку, қамоқда туғилган аламзадалардан. Тарзан билан гаплашган кунингиз уни ҳам кўрувдингиз-ку?

– Эсимда... Ҳозир топ уни. Гаплашиб күрай-чи. – Асадбек буйрукни бергач, хазин оҳангда – Ақаларингнинг ўрнини тўлдириш керак, – деб қўйди.

Чувринди билан Кесакполвон унинг икки қаноти эди. Энди янги қанотларга эҳтиёж сезди. Ҳозир «акаларингнинг ўрни билинди», демокчи бўлди-ю, ўзининг бу ондаги ҳимоясиз бечораҳоллигини ошкор қилиб қўйишдан тийилди. «Ақаларингнинг ўрнини тўлдириш керак», дегани билан бу икки ўринни аввалгидай койилмақом тарзда тўлдира олиш мумкин эмаслигини биларди. Кесиб ташланган икки қанот ўрнига янгисини улаш қийин эмас, бироқ бу янги қанотларнинг танага аслидай ўрнашиб кетиши амри маҳол. Айниқса, Чувриндининг ўрнини ҳеч ким, ҳатто Жамшид ҳам боса олмайди. Кесакполвон охирида хиёнат кўчасига ўтиб олган бўлса-да, унинг Асадбек учун кадрли томонлари кўп эди.

Жамшид хожасининг амрини тез бажарди: Тарзанинг шериги икки соатдан сўнг Асадбекнинг рўпарасида ўтирап эди. Қамоқхонада туғилиб, уч ёшига қадар онаси ётган қамоқхонада катта бўлган, сўнг болалар уйига ўtkазилган Ахтамнинг саргузаштларини Жамшид топширик олган кунлариёқ аниқлаб, хожасига кисқа тарзда баён қилган эди. Қамоқхонада туғилгани учун бола айбдор эмас, лекин икки марта майда ўғирлик билан қўлга тушиб қамалиши Асадбекка маъқул келмаган, шу боис ўзига яқинлаштиrmай турганди.

Асадбек унга ўткир нигохини қадаб, сўз бошлашга шошилмади. Ахтам ҳам «майли, обдон тикилиб олинг», дегандай жим ўтираверди. Йигитнинг кўзлари ўйнаб туриши Асадбекка ёқинқирамади. «Чакиртириб бекор қилдимми, изига қайтариб юбораверайми?» деб ҳам ўйлади. Кейин «қанот бўлолмаса, калта дум бўлишга яраб колар», деган тўхтамга келди.

– Мени қаерда кўрганинг эсингдами? – деди Асадбек, ундан кўзини узмай.

– Сизни кўп жойда кўрганман. Лекин сиз мени бир жойда кўргансиз, – деди Ахтам.

– Эсинг жойида-ку, – деди Асадбек кулимсираб. – Лекин... шилта ишлардан ҳазар қилмас экансан.

– Ҳар қанақа ишнинг ўз ўрни бўлади, ўз ўрнида қилинган ишнинг мазали роҳати ҳам бўлади, – деди йигит, дадил оҳангда.

Жамшид, ҳатто Чувринди ҳам Асадбек билан бундай оҳангда гаплашишга журъат қилган эмас. Бунака бетгачопарлик фактат Кесакполвонга хос эди. Рўпарасида йигирма йилга ёшарган Кесакполвон ўтиргандай бўлиб, Асадбек ғашланди.

Ахтам рўпарасида ким ўтирганини биларди, лекин у қимтиниш ёки тортиниш каби фазилатлардан холи эди. Асадбекка рўпара бўлган энг дадил ва жасур йигитлар ҳам тиззалари қалтираб қолмаса-да, ҳархолда эҳтиромлари юкори эканини ҳеч бўлмаганда кўл ковуштириш билан аён этиб қўярдилар. Бу йигит эса... Асадбек унинг дадил ўтиришини кузатиб: «Қамоқхона мактабини аъло баҳога тутатибди», деб ўйлади.

– Лақабинг нима? – деб сўради Асадбек.

– «Мурда».

– Каёқдан топасанлар бунақа лақабларни. Безбетлигинг учун шундай дейишганми?

– Йўқ, бошқа сабаби бор.

– Ҳамманинг олдида шунақа сўррайиб ўтирасанми?

– Бўлганим шу.

– Мендан чўчимайсанми?

– Ҳозир чўчимайман. Чунки чақиришингизни билардим, – деди Ахтам.

– Тушингга кирдимми? – деди Асадбек киноя билан.

– Мен туш кўрмайман.

– Йўғ-е?

– Ресторанда менга тикилиб караган эдингиз.

Кўнглингиздан бир гап ўтганини сезганман. Эртаси-га Жамишид aka суриштирганларини ресторандагилар айтишган.

– Сезинг жуда-а ўткирга ўхшайди. Қани айт-чи, кўнглимдан қандай гап ўтган бўлиши мумкин?

– Мен сизга керакман.

Кўзлари ўйнаб турган йигит шундай дегач, Асадбекнинг ўткир нигоҳига тик каради. Ундан бундай дадил гапни кутмаган Асадбек бир оз гангиб ҳам колди. Уни йигитнинг дадиллиги эмас, кўнглидаги яширин ниятни англай олгани ҳайрон қолдирди. Асадбек ҳам мард ва дангалчи эди. Бирок, бу онда: «Қойил, ўғил бола, дилимдагини топибсан!» деб тан бермади. Аксинча, кўзлари муғомбирлик билан кулди:

– Менга керакмисан? – деб сўради пичинг оҳангода. – Чой куйиб узатадиган мулозимга ҳожатим йўқ. Эҳтимол мен сенга керакдирман?

– Мени ўша куни кўрдингиз: чой сузиб ўтирадиган сўтакка ўхшайманми?

Хаддида туриш нималигини билмайдиган Ахтам бу гапи билан Асадбекнинг сабр косасини чайқатиб юборди.

– Сен баҳоингни ўзингча оширворибсан, бола! Сенга ўшаган тиррақи бузокларнинг аллақанчаси баланд дорга осиламан деб ўлиб кетганини эшитмаганмисан? – деди Асадбек зардали оҳангда. Унинг кўзларидан сачраган ғазаб учқунлари ҳатто ўзига яқин аёнларни ҳам саросимага соларди. Бу йигит эса пинагини ҳам бузмади.

– Мен бу дунёга осонгина ўлиб кетиш учун келмаганман, – деди кўзларини чакчайтириб.

Шу безбетлиги Асадбекка Ҳосилбойваччани эслатиб, ғазаби оловига мой сепди.

– Сен катта кетаверма, бола! Кўрпангга қараб оёқ узат. Яна чатаноғинг йирилиб кетмасин!

Даврасига олишни мўлжаллаган йигитлар билан Асадбекнинг ўзи гаплашарди. Билаги кучга тўлган,

бироқ калласи бўм-бўш йигитлар онда-сонда бўлса ҳам учраб коларди. Кимнинг ҳузурида турганларини фаҳм этмай ҳурмат доирасидан чиққудай бўлсалар, Кесакполвоннинг бир-икки тепкисини еб, келган жойларига кетаверар эдилар. Асадбекнинг ғазабдана бошлаганини дарров сезиб, чора кўрадиган Кесакполвон энди йўқ.

«Энди ҳар қанака тирраки менга тик қарайверадими? Ҳар қанака палид мени оёкости қила-верадими?!» Шу савол хаёлини яшин нури каби ёритди-ю, баданига муз югурди. Захрини сочишга шайланганида Ахтам «Бек ака!» деб мурожаат қилди. Асадбекнинг назарида бу сафар унинг овозида ҳам меҳр, ҳам илтижо оҳанги сезилгандай бўлиб, газаб алангаси сал пасайди.

– Бек ака, – деди яна Ахтам, – мендан жаҳлингиз чиқмасин, турган битганим шу. Мен камоқда туғилганман.

– Биламан.

– Мен камоқда ўладиган одамман, буни ҳеч ким билмайди.

– Худо билади.

Асадбек бу гапни эътиқод сохиби тили билан эмас, одамларга одат бўлиб колган шунчаки бир гап сифатида айтди. Ахтам ҳам буни жиддий ҳакиқат ўрнида қабул қилмади. Ҳидоят хусусида жиндеккина тасаввур бўлганда ҳам «Албатта Худо билади», деб кўйиши мумкин эди. Лекин бу гап айтилмади.

– Худо мени яратишга яратиб кўйиб, унутиб юборган. Қаерда ўлишимни ўзим биламан. Одамлар «Худо! Худо!» деяверишиади. Лекин мен қойил эмасман, уларнинг худоларига. Менинг айбим нима эди? Ҳўп, қамоқда туғилибман, онам темир панжаранинг у томонида, мен бу томонида бигиллаб ётилман. Уч ёшимгача қамоқнинг сассик боғчасида сассик ўйинчокларни ўйнаб ўтирадим. Бундан кўра ўлдириб юбора қолганлари яхши эмасмиди? Нима учун ўлмай

қолганимни кейин билдим. Мен бу дунёга қасос олгани учун келган эканман. Қамок боғчасидан болалар уйига чикаришганда қасам ичганман: мен уларнинг ҳаммасини ўлдираман!

Бу аҳдни эшитган Асадбекнинг эти жимирилашиб кетгандай бўлди.

Дадасини камоқка олиб кетишганда у ҳам шундай деган эди. Қирқ тўққизинчи йилнинг ўттиз биринчи декабрида уйларига бостириб кириб, ҳамма ёкни титиб ташлаган, сўнг дадасини «халқ душмани» деб ҳакоратлаб олиб кетган икки кишининг қиёфаси ҳали ҳам кўз ўнгидаги: бири новча, иккинчиси паст бўйли одамларнинг сурати кўз олдига муҳрланиб колган. Ётса ҳам, турса ҳам, бири паст бўйли, иккинчиси новча одамдан қасос олишни ўйлаб яшади. Қасос олди ҳам. Бироқ, кўнгли барибир таскин топмади. Асадбек баъзан ўзи ҳам ҳазар килиб кетадиган бу оламга «қасос туфайли кирганман», деб ўзини ўзи ишонтироқчи бўлади. Ана шундай пайтда қандайдир овоз «ўч мақсадида кирган бўлсанг, қасос олганингдан кейин нима учун чикиб кетмадинг?» деб нидо қилиб вужудини титратар эди. Тасодифми бу: бир неча кун олдин Мухиддин ота билан Жалил бу дунёning қасос эмас, имтиҳон дунёси эканига уни ишонтироқчи бўлишган эди. Рўпарасидаги йигит ҳам қасос олиш учун яшаб юрибди. Агар унга Мухиддин отанинг гаплари айтилса, нима деркин, тушунармикин?

Асадбекдан тап тортмай безбетларча турган йигит ҳам қасос олмоқчи... Қасос шунчалар ширинми? Ширин қасоснинг оқибати нима? Ширин ўлимми? Асадбек унга ҳаёт фалсафасидан дарс ўтиш нияти йўқ эди, шу боис «Ҳали кўп нарсаларга аклиниг етмайди», деб кўйди. Ахтам унинг бу гапини ҳам ўзига олмади. Киприк қоқмай тикилганича:

– Мен сиз ўйлагандан кўпроқ нарсаларни биламан, – деди.

– Дўзахда куяётган бир йигитчадан «бу ерга нима

учун барвақт тушиб қолдинг?» деб сўрашганда, кўп нарсаларни билиб юборган эдим, деган экан.

— Мен унақалардан эмасман. Уч ойлигимда ўлди, деб камокхонанинг ўликхонасига ташлашган экан. Каравса тирик эканман. Демак, мен бир марта ўлиб бўлганман. Балки ҳозир тирик одаммасдирман, арвоҳдирман. Арвохни осонлик билан ўлдириб бўлмайди, мендан кўнглингиз тўк бўлсин.

Асадбек унга қараб ўйланди. У Ахтамни Кесакполвоннинг ўрнида кўришни истаган эди. Бу бола ўнта Кесакполвонга дарс берадиганга ўхшайди. Яхши ҳамки, уни қаноти остига олди. Йўқса, қайси бир овлоқларда писиб, пайт пойлаб, эртами-индин кутилмаганда ўзига сапчиши тайин эди. Лекин... бугун бўлмаса эртага барибир сапчиди. Факат тўғридан тўғри Асадбекка сапчидими ё аввал Тарзани, сўнг Жамшидни янчиб ташлашга уринадими? Жамшид билан Ахтамга Ҳайдар билан Маҳмуднинг тақдирини насиб этадими? Энди бир-бирларини ғажиб адо этиш навбати буларга келдими?

Кўнглини ғаш қилган бу фикрларни ошкор этмади. Ахтамга «боравер», деб синов сухбати якунланганини маълум килди. Йигит ўрнидан тургач:

— Лакабингни ўзгартир, мен атрофимда мурда ила-кишиб юришини ёқтирумайман, — деди.

— Ўзингиз қўйиб бера қолинг.

— Башарангга караган одам сурбетлигингни дарров билади.

— «Сурбет» демокчимисиз? Унда айтишга осонрок килиб «Сур» деб кўя қолайлик. Билган одам «Сурбет» деб ўйлар, билмаган одам «душманларини йўлдан суриб ташлайдиган азамат», дер?

Унинг бу гапи Асадбекка маъқул келиб кулимсиз ради:

— Яхши, лекин ҳозирча биринчи маъноси тўғри, — деди.

— Ичимда яна битта гапим бор, колиб кетмасин, айтиб олай: сиз шахмат ўйнашни биласизми?

– Хўш, билсам нима эди?

– Қамоқдалигимда бир одам айтган эди: бу дунёнинг ҳаёти шахмат ўйинига ўхшаркан. Сиз ҳозир мени ўзингизнинг ўйинингизга тортмоқчисиз, тўғрими?

– Хўш, тўғри ҳам дейлик, нима демоқчисан?

– Шахмат таҳтаси устида ҳар хил доналар бор, мен кайси бири бўламан? Пиёдами?

– Қай бири бўлишни хоҳлардинг? Фарзинми?

– Мен от юришни ёқтираман. От ёмон тепади, фарзинни ҳам пачоғини чикаради.

– Максадинг яхши. Лекин от иккита бўлиши керакку?

– Ҳа. Биттаси – Тарзан-да.

– Тепсанг тепавергин-у, аммо ҳаддингдан ошма.

– Ҳаддимни биламан: сиз шоҳсиз. Тўғрими? Мен шоҳларга ачинаман.

– Нега?

– Шоҳ ёлғиз, бечора ҳамиша ҳимояга муҳтож. Вақти келса, битта пиёдага кучи етмайди. Битта пиёда сурилиб келиб, мот килиб қўйиши мумкин.

– Ақлинг шунга етса, билиб ол: нодон шоҳ мот бўлади. Сен ўйнайдиган ўйинда ахмок шоҳ йўқ!

Асадбек – ўз оламида от суреб юрган ғурурли инсон, эшак аравага осилиб бу оламига кираётган бир тирранча билан отидан тушиб гаплашгани учун ғашланди. Айни чоғда сўнаётган гулхан яқинидаги чўғ аланга олиши мукаррарлигига ишончи борлигини маълум килиб қўйган эди. Бири кенгайтирган зулм сўқмоғига иккинчиси ибтидонинг ўзидаёқ безбетларча қадам босгач, интиҳоси нима бўларди?!

Яхши ҳамки, буларнинг иккови ҳам: «Эй Одам фарзанди, мен Аллоҳдирман, бандаларни Ўз кудратим билан яратдим, бас, кимларгадир Мен яхшиликни ирода килиб, яхши хулқни бериб қўяман, кимларгадир ёмонлик бўлишини ирода қилсан, унга ёмон хулқни бераман», деган илоҳий қалимадан бехабар. Билганларида эди, бу ҳикматни ўзларича нотўғри

талқин этиб, аввал қилған зулмлари ва эндиғиларини «хаётнинг ўзгармас қонуни» деган аҳмокона тушунчалари билан оқлаган бўлардилар. «Бирорга азоб беришни, ҳатто ўлдиришни менга Худо буюрган», деб даъво қилишдан қайтмасдилар. Аллоҳ ҳар банданинг қаршисида икки йўл очиб қўйганини, шайтон йўлидан юз ўгириб, Раҳмон йўлига бурилиши учун унга акл ва заковат берганини эса ҳатто ўйлаб ҳам кўрмасдилар. Атрофдаги ҳамма нарсани шайтон кўзи билан кўриб, шайтон қалби билан ҳис этиб, шайтон қулоғи билан эшитиб, шайтон ақли билан фикр қиласверишгач, улардан нимани кутиш мумкин?

II б о б

1

Орадан кунлар, ҳафталар ўтиб юз беражак яхши ёки ёмон воқеани кўнгил олдиндан сезиши аник. Факат одамзод ўз кўнгли хитобига қулок солмайди, «Бошга тушганни кўз кўрар», деб юраверади. Бўрон бирданига қўзғолмайди, жала бирданига куймайди. Бўрондан олдин шабада эсади. Одам боласи ҳадемай атрофни ағдар-тўнтар килиб юборадиган бўрон бошланишини тасаввур ҳам килмай, шабададан роҳатланади.

Хонгирейнинг ўлими ҳакидаги хабар Асадбекка ёқимли шабада роҳатини бериши керак эди. Лекин қасос лаззати бўлмагани учун бу хабарда роҳатбахш шабадани ҳис килмади. Аксинча, кўнгли бўлажак ёвузликни сезди. Афсуски, сезги инсон вужудига давомли равишда ҳукмронлик қила олмайди. Кўпинча огоҳлантирувчи сезги чақмок нури каби тезоб бўлади. Асадбек Краснояр сафарини режалаштираётгани учун кўнглини хижил қилған сезигига етарли аҳамият бермади.

Кўнгли алдамаган эди. Красноярга учишидан бир

кун олдин Москвада янги зулм дарахти экила бошлаганди.

Шайтанат дунёсида вакт шайтоннинг ўзи сингари ҳамиша бедор ва сергак бўлади. Милиция ухлаши мумкин, лекин кўча ҳамиша уйғок – киприк қокмайди. Айниқса, ўғрилар оламини бир нафас ҳам ғафлат босмайди. Тўданинг ярми қирилиб кетса ҳам, ҳатто биттагина ўғрининг юраги уриб турса ҳам бу олам тирик хисобланади. Хонгирейнинг шериклари ва тобелари унинг ўлимини фожия деб эмас, балки душманлардан шафқатсиз равишда ўч олишга чақириқ сифатида қабул қилишди. Хонгирей жон таслим қилган оннинг ўзида «унинг ўрнини ким эгаллайди?» деган савол туғилган эди. Бу савол Асадбекнинг хаёлини ҳам банд этганди. Аввалига Маматбейни кўз олдига келтирди. Лекин Полшага олиб ўтилмай қолган корадори машмашасида унинг ҳам иштироки борлиги катта марта бани эгаллашига монелик қилиши аниқ эди. Хонгирей Кесакполвонни ўлдиртириб, Маматбейга марҳамат қилган бўлса-да, ўзидан четлаштириши аниклигини Асадбек тўғри тахмин қилганди.

Полшага корадори олиб ўтилган тақдирда ҳам Хонгирей Маматбейни ўзига ворис деб тайин қилмаган бўларди. Маматбейда князлик мавқеини тутиб тура оловчи қобилият йўқлиги Хонгирейга маълум эди. Шу боис унинг яхши ва беминнат дастёр мақомидан ташқарига чиқишига йўл қўймасди.

Москва атрофида хукм юритувчи тўдалар орасида Хонгирейнинг давраси химоя нуқтаи назаридан энг ишончлиси хисобланар, ҳатто «Горбачёв ўзини химоя қилишни княз Хонгирейдан ўргансин», деган хазилнамо гаплар ҳам юради. Мақталган ўша кучли химоя калконлари орасидан битта ўқ учун кичкинагина тирқиши топилиб қолишини Хонгирей билмасмиди? Унинг ўзи бирорни ўлдирмасди, ёнида тўппонча олиб юрмасди. Ўзини ўлимдан қўрқмайдиган қилиб кўрсатарди атрофидагиларга. Аммо... ёвузликни касб

этгани билан, тирик жон-да, барибир ўлимдан кўркарди. Кўркмаганида атрофини кўрикчилари ҳалқаси билан ўраб олармиди?.. Башкаларни ўлим даҳшати билан кўркитишдан лаззатланувчи одам «мен ўлимдан кўркмайман!» деб жар соглан тақдирда ҳам у билан баҳслашиб ўтиrmай, кулиmsираб қўя колгани маъкул.

Бирон хатардан огоҳ бўлса-ю, юрагида кучли хавотир уйғонмаса, ҳовлиқмаса, ўлим шарпасидан чўчимасди. У юрагининг алдамаслигига ишонарди. Ўзи тобе бўлган олам аҳлининг узок умр кўрмаслиги, ажалини кутиб тўшакда ялпайиб ётмай, биттагина дайди ўқ, биргина томчи заҳар ёки бир қулочгина чилвирдан иборат сиртмоқдан ўлим топишини тан олгиси келмас, ҳаёт шоми хабарчиси бўлган тушларига ҳам, таъбирчиларнинг гапларига ҳам ишонмасди. «Ҳали ўлимимга кўп вақт бор, бугун менга кафанди бичаётганларнинг ўзлари ажалим етгунига қадар гўрда суюклигача чириб кетади», деб ҳисобларди.

Ҳар кандай тўдабоши сингари Хонгирей ҳам ёнида ишончли одамлар бўлишини истарди, бирок бу ишончли йигитлари орасида ўзидан кучлирок, ўзидан акллирок ва эпчилроғи бўлишини хуш кўрмасди. Қачондир, кимнингдир қўлидан ўлим топганидан сўнг ўзининг ўрнини ким эгаллашини ўйларди. Вакти келганда Хонгирейнинг таҳтига ўтирадиган одамга хожасининг васиятномаси кифоя қilmайди. Бу одамни атрофдаги тўдалар тан олиши шарт. Гўрда ётадиган Хонгирейга бунинг аҳамияти йўқ. Унинг учун энг муҳими – тўдасининг обрў-эътибори сусаймаслиги зарур. «Хонгирей» деган номни эшитганда одамлар унинг ўлимидан кейин ҳам титраб туришлари керак. Нотавон банда! Қиёматга қадар қабр азобига гирифтор этилган, танаси лаҳад куртларига ем бўлиб ётган одамга бу шуҳратнинг нима зарурати бор экан?!

Дўзах азоби нима эканини сал-пал эшитган, бирок, Қиёматга қадар давом этадиган қабр азоби нимадан иборат эканидан мутлақо хабарсиз Хонгирей ўлимни

ўйлаганда энг аввало ўлимидан кейин шухрати сўнмаслигини режа қиласди. Қанчалаб одамларнинг шўрини куритиш эвазига тикланган қонли шухрат саройи унинг назарида узок йиллар қад ростлаб туриши керак эди. Бу қонли саройдаги қонли тахтда ўтиришга эса унинг назарида фақат Ахвердил ҳақли эди. Спорт аҳли орасида халқаро миқёсдаги самбо устаси Ахвердилнинг шухрати ҳали сўнмаган, ўғрилар олами эса уни ўликхоналар эгаси Моргаш деб билгани учун иззат қилмас, юкори мартабаларга ҳам лойик кўрмас эди. Спортда омади юришиб турган кезлари, навбатдаги ғолиблиқ қувончини ресторонда нишонлаб, кайфи ошиб қолган Ахвердил нимадандир норози бўлиб шовқин кўтарганида танбех берган милиционер йигит кўзига ёмон кўриниб, биттагина мушт туширган эди. Спортдаги мартабасининг барбод этилишига, бир неча ой Москвада хору зор бўлиб юришига шу мушт кифоя қилди. Агар Хонгирейнинг назари тушмаганида шу биргина мушт учун неча йиллик умри қамокнинг исқирт хоналарида ўтмоғи ҳам мумкин эди. Хонгирей Ахвердилнинг кўшни овулдан эканлигини билгач, уни канотига олди. Ахвердил милиционерни ургани учун ўғрилар оламида қадрланишини у дамда билмасди. Хонгирей собиқ чемпионни синамок учун кичикрок бир ўликхонани унинг ихтиёрига топширди. Ахвердил оғриниб, норозилигини яшимаганида Хонгирей унга бир гап айтди: «Сенга топшираётган ишимнинг яхшилиги шундаки, ўликхонада хизмат қиладиганларни бошқалар ўлдирмайди. Агар бу ишнинг қадрига етсанг, меровлик қилмассанг, зартага, ҳатто индинга ҳам тирик юришингни аник биласан». Ахвердил бу гапни ҳикмат ўрнида қабул этиб ишга астойдил киришди. Оқибатда ҳатто Хонгирейни ҳам таажжубга солиб, бир йилда шаҳардаги барча ўликхоналарни ўз қўл остига олди. Спортда шухрати сўна бошлаган ёки омади юришмаётган бақувват йигитлар ўликхоналарда «санитар» деган вазифадан ҳазар қилмай ишга ёлланиш-

ди. Ўликхоналарда ҳар куни неча минг долларлаб пул айланишини бу ерга иши тушмайдиган одам қаердан ҳам билсин? Шаҳардаги пуллик ҳожатхоналарнинг эгалари ҳам бойлар қаторида савлат тўкиб юришганда ўликхона эгаси хорланар эканми? Одам пуллик ҳожатхонага кирмаса ҳам тирикчилиги ўтаверади. Аммо ўликхонага тааллукли ишини бошқа жойда бажара олмайди. Ҳукумат пуллик ҳожатхоналарни ёпиб кўйса ҳам, ўликхонага даф қила олмайди. Ҳуллас, барча ўликхоналар Ахвердилнинг назоратига ўтгач, ўғрилар олами унга «Моргаш» деган лақаб берди.

Хонгирей бу чапдаст ва қўрқмас йигит билан кўп ишларни амалга оширмокчи эди...

Асадбек Краснояр сафарига тадорик кўраётганида Моргаш Москвадаги «Лебединая песня» деб номланмиш ресторонда меҳмон кутарди. Аслида у тождор ўғрилар тўплантисини чорлашга ҳақсиз эди. Ечилиши мураккаброк муаммони ҳал қилиш учун одатда эътиборли ўғрилар тўпланардилар. Баъзи тўплантида биринки юз ўғри иштирок этса, айримлари беш-олти ўғри билан чекланарди. Шу боис Моргаш ресторанга факат Кофқазга тааллукли тождорларни таклиф этишини маъқул кўрди. Баҳона: «Улуғ княз Хонгирей руҳини шод қилиш». Тўпланти «Хонгирейнинг ўрнига фалончи бўлсин», деб карор чиқармайди. Мухими – бу марта бага даъво қилаётган Моргашни улар тан олишлари лозим. Дарров тан олмасликлари ҳам мумкин. Лекин ҳурматлари юзасидан маълум қилиб кўйиши шарт.

Таклиф қилинган меҳмонлардан фактат биргина кипи – Ҳамзатбей ҳаяллади. Вактида етиб келган меҳмонларнинг ҳар бири ўзига яраша обрў-эътиборга эга бўлса-да, мезбонни шошилтиришмади. Дастурхонга кўл узатмай, сигарет тутатиб ўтиришди. Ӯши олтмишларни коралаган бўлса-да, адл коматини йўқотмаган, кўзлари бургутники каби ўткир, ҳаракатлари кескин Ҳамзатбей ярим соат кечикиб келди. Осто-

на ҳатлаши билан салом бергач, икки қадам босиб тўхтади-да, дастурхон устига норози киёфада бокди:

– Насронийчасига аза очяпсанми? Хонгирей насрониймиди?

Насронийлар дафн маросимидан сўнг дастурхон атрофида йиғилиб, ароқ ичиб, гўё мархумни эслаган, руҳини шодлантиргандай бўлишади. Ҳамзатбей дастурхон устидаги ичкиликларни кўриб шу одатни эслатган эди. Ҳаётлик пайтида Худони танимаган одам ўлганидан кейин ароқ ичиб эсланадими ё ароқсизми, аслида фарқсиздир. Ҳамзатбей ҳам, бошқалар ҳам, гарчи ўзларини насроний ҳисобламасалар-да, уларнинг яхши-ёмон одатларини беками кўст бажараётгандарини тан олгилари келмайди. Ҳозир мусулмонликка риоя қилиб «Аллоҳ, бу бандангнинг гуноҳини кечир», деб ароқ ичмаганлари билан, бир соатдан кейин бошқа ресторонда бўкиб ичишлари қайси динга мансуб эканини ҳеч ўйлаб кўрмаганлар.

Ҳамзатбейнинг ҳозирги танбеҳи ўтирганларни хижолатга солмади ҳисоб. Шунчаки гап сифатида қабул қилишди. Лекин Моргаш мезбон сифатида муносабат билдириши лозим эди, шунинг учун ўрнидан туриб, меҳмонни кучоқ очиб қаршилади:

– Хуш келдингиз, ардоқли Ҳамзатбей! Нималар деяпсиз? Қанақасига насроний, қанақасига аза? Ахир Хонгирей ўлдими? Сиз бизнинг устозимизсиз, ўзингиз айтинг: кадрдонимиз Хонгирей ўлдими? Йў-ўқ! Хонгирей хали ўлгани йўқ! Факат кимдир шунчаки аҳмақона миш-миш тарқатибди. У қисқа муддатли хизмат сафарига кетди. Аникроғи... отасини кўргани кетди. Кўради-ю, қайтади.

Моргашнинг бундай дейиши ҳамма учун кутилмаган эди. Шу сабабли бир-бирларига саволомуз караб олдилар. Факат Ҳамзатбейгина ундан қаҳрли нигоҳини узмади.

– Хонгирей ўлмаган бўлса, нега унинг ўрнида

Крим хонига ўхшаб ялпайиб ўтирибсан. Факат «билимай ўтириб кўйибман», дема, пичокқа илинадиган баҳона топ.

– Ҳеч қанака баҳонам йўқ. Хонгирейнинг ўрни мен учун муқаддас бир жой. Қандайдир абраҳ довдираб-совдираб кириб келиб, эгаси борлигини билмасдан ўтириб кўймасин, дедим холос. – Пичинг аралаш тагдор гапларнинг хотимаси яхши бўлмаслигини билган меҳмонлар энди бир-бирларига маънодор караб олдилар. Моргаш эса ўзини соддаликка солған ҳолда манзиратини давом эттириди:

– Мухтарам устоз, Хонгирей узок сафарда эканида жойи совимасин, бу ерда ўтириш факат сизга ярашади.

Ҳамзатбей бундай лаганбардорликка алданадиган лақмалардан эмасди. Асли кашкир бўлган Моргаш шу топда тулки либосида турган бўлса, Ҳамзатбей аслини ўзгартирган – кўзлари йўлбарсники каби ёнарди. У дадил юриб бориб, тўрдаги ўринга эмас, ёнидаги бўш жойга ўтириди-да:

– Агар Хонгирей сафарга кетган бўлса, албатта кайтади. Унинг бу «муқаддас жойи»га ўтиришга ҳеч ким ҳақли эмас, – деди кескин оҳангда. «Муқаддас жойи» деган таъкидда киноя оҳангни мавжудлиги ўтирганларга аниқ сезилса-да, зътибор берилмади. Факат Моргаш бу лутфдан кувонгандай енгил таъзим билан деди:

– Сиз бизнинг пиrimизсиз, бундай аклли гаплар факат сиздан чиқади.

Моргаш Ҳамзатбейнинг рўпарасидан жой олди. Хонгирейнинг устози хисобланса-да, ҳеч качон тўрга чиқмаган Байгильдиндан Моргашнинг юкорироқда ўтириши Ҳамзатбейни ғашлантиргани билан, индамади. Хизматдаги йигитлар ичимликлардан қуишишгач, Моргаш ўрнидан турди:

– Азиз меҳмонлар, таклифимизни ерда колдирмай ташриф буюрганингиз учун миннатдорлигимизни

билдирамиз. Нихоят, «тож гули» жамулжам бўлди. Аввал дастурхонга қарайлик, гапни кейинрок гаплашаверамиз.

– «Тож гули» дедингми? Бу ердагиларнинг хаммаси «тож гули»га алоқадорми? Мен бегоналарни хам кўряпман шекилли? – деди Ҳамзатбей Моргашга тикилиб.

Моргаш унинг максадини англаб, айбдор одам каби кулимсираб, бошини эгди:

– «Бегона» деганда мени назарда тутяпсиз, билиб турибман. Тўғри, мен тождор ўғри эмасман.

– Ҳа, билар экансан! Билсанг, кўрпангга қараб оёқ узат. Сен ҳатто «дайди», ҳатто «ялангоёқ» ҳам эмассан. Сен шунчаки «йўловчи» бўлишинг мумкинdir. Йўловчи эса эл бўлмайди, истаган бекатда тушиб колаверади.

– Бу гапингиз ҳам тўғри... Лекин... – Моргаш талмовсирагандай бўлиб, худди меҳмонлардан нажот истагандай уларга қараб олди, – муҳтарам Ҳонгирей аввалги тўплантida менга тож кийдиришни таклиф килган эди.

– Қанақа тож! – Ҳамзатбей шундай деб ўрнидан туриб кетди. – Сенинг бу пўк каллангта қайси ахмок тож кийдиради? Тож кийиш учун ҳеч бўлмаса биринки марта камоқда ўтириш керак. Умрида ўғирлик килмаган одами тождор ўғрилар қаторига ким кўшади?! Бу сенга компартиями, ариза берган ҳар кандай довдирни қабул қиласерадиган!

Унинг ғазабдан лаблари титрай бошлаганини кўрган ўғрилар «гапингиз маъкул», дегандай бош ирғаб қўйиши.

Ҳамзатбей Зелихон-Академик, Байгилдин, яқинда Соликамскдаги камоқда сирли равища жон берган Петка-Жавҳар ва яна Монгол каби ўғрилар қаторида бу оламнинг «мўйсафид»ларидан саналарди. Ҳонгирей сингари нисбатан ёшрок ўғрилар билан бу «мўйсафид»лар орасидаги фарқ факат ёшда эмас, ўз

оламларида қарор топган қонунларга бўлган муносабатда ҳам мавжуд эди. Ҳамзатбей ва унинг тарафдорлари ўғрилар оламининг қонунларига ўзгартириш киритишига мутлако қарши эдилар. Бу соҳада Зелихон, айниқса, каттиккўл эди. Ҳамзатбей кандай масалага дуч келса, унга суюнарди. Академикнинг ўлимидан сўнг Петка-Жавҳар бу оламни кўлда тутиб турган эди. Олтмиш йиллик умрининг қирқ йилини турмада ўтказган бу чўнтаккесар ўғридан Хонгирей ҳам ҳайикиб турарди. Байгилдин табиати юмшок бўлгани учун маслаҳат бериш билан чекланарди. Конунларнинг дахлсизлигини ҳимоя қилишда бўшлиқ қиласарди. Тождор ўғриларнинг муқаддас қонунларидан бири – уйланмаслик, оила қурмаслик, фарзанд кўрмаслик талабларига бўйсунмасликни Ҳамзатбей Худога қарши жанг қилиш билан баробар кўтарди. Ўтган йилги тўплантида «ўғрининг уйланиши мумкинмас», деган қонунга содик колган ҳолда «фарзанд кўриши мумкин» деган изоҳнинг кабул этилишига у чидолмай, Хонгирейни ҳакорат қилмаган бўлсада, шунга яқин гапларни айтишдан тап тортмаганди. Кўпчиликни ташкил этмаган бу йилги тўплантида ўзларини «ишбилармон тадбиркор» деб атовчи одамлар билан ҳамкорлик қилишта ижозат этилишини ҳам қонунни бузиш деб хисоблади. Ўша одамларнинг оладиган фойдадан ўн фоиз тўлаб туришлари эвазига ўғрилар ҳимоясида бўлишларини Ҳамзатбей ўғрилар оламига иснод деб билди. Тўплантиларда у ёшлар даврасида ёлғизлик қилиб қолаётганди. Ёшлар унинг ўжарлигини қарилек инжиқлиги деб билиб, гапларини малол олишса-да, ёшини, ўғрилар оламидаги хизматлари ва мавқеини хурмат қилиб, чора кўришдан ўзларини тийишарди.

Ҳар бир соҳада ҳам кекса авлод билан ёшлар орасида доимий келишмовчилик мавжуд бўлади. Катта авлод ҳаётдаги ўзгаришларни дарров тан ола қолмайди, ёшлар талаб қилаётган янгиликларнинг

ҳали мавриди келмади, деб қаршилик қилишади. Қирк-эллик йил мукаддам, урушдан олдинги ҳаёт тақозоси билан вужудга келган ўғрилар оламининг қонунлари эскириши мумкинлигини Ҳамзатбей тасаввур ҳам кила олмасди. У «агар зарур бўлиб колса динимни ўзгартиришим мумкин, лекин ўғрилар конунини ўзгаришига йўл қўймайман», деб очик айтарди. Ўғирлик қилиш усуллари ўзгаргани, изни усталик билан ёпиш маҳорати ошганини тан оларди, милициянинг иш услуби ҳам энди ўзгача эканини биларди-ю, қонунларнинг эскириши мумкинлигини, ислоҳга муҳтож бўлиб қолишини эса рад этаверарди. Охирги тўплантида Моргашга тож кийдириш масаласининг кунтартибиғига қўйилиши ҳам Ҳамзатбейнинг назарида қонунларга юзсизларча ҳамла қилишнинг бир кўриниши эди.

Моргаш унинг ҳозир ғазаб билан айтган гапларидан ранжимагандай босик оҳангда деди:

– Утган сафар ҳам шундай деган эдингиз. Мен сиздай азиз инсонларнинг ёнидан теппа-тeng жой олишга дъявогар эмасман. Бу таклиф менинг илтимосимсиз, Хонгирейнинг шахсий ташабbusи билан айтилувди. Мен ўғриларга холис хизмат килганидан қувониб юрувчи бир хокисор одамман.

– Ҳа, билар экансан, хизматингни индамай қилиб юравер. Хонгирей сени ахлатлардан арzonгаровга сотиб олган эди. Иzzатингни шунга қараб билавер.

– Мен иззатталаб эмасман. Кўчада қолган кунларимни унуганим йўқ. Хонгирей мени одам қилди, десам унинг хизматини камситган бўламан. Хонгирей мени ўликларнинг кироли қилди. Ҳа, «ўликлар кироли!» Ҳамзатбей оға, бу унвонни менга ўзингиз берган эдингиз, эсингиздами? Хонгирей княз эди, тирикларнинг кироли эди! Мен эсам ўликларнинг кироли бўлганимдан фахранаман.

– Тан олганинг яхши. Хонгирейнинг ёрдами билан сен ўликлар оламига эга чиқдинг. Тўғриси, сенга баъ-

зан қойил қоламан. Пойтахтдаги барча ўликхоналарни бу кадар тез муддатда қўлга олишингга тан бериш керак. Яна тан берадиган бир масала бор: ҳаммамиз эртами-кечми ўликхонангга меҳмон бўламиз. Тириклигимизда аламингни ололмасанг, ўлигимизни хорлаб хумордан чиқарсан.

– Ундей деманг, Ҳамзатбей оға! Яна шайтонлар «омийн» деб юборишмасин-а! Худо сақласин сизларни, ўликхонага сирайм ишларингиз тушмасин. Энди... кискарок айтадиган бўлсам, Хонгирей мени яхши кўради. Ие, нималар деяпман, «яхши кўради», эмас, яхши кўради!

– Яхши кўриши тўғри, – деди Ҳамзатбей муроса оҳангига кўчиб.

– Ҳа, ана, ўзингиз тасдиқлаяпсиз: Хонгирей яхши кўради, лекин сиз негадир мени ёқтирумайсиз. Бу ҳам ҳакиқатми?

– Нега ажабланасан? Дунё ўзи шунаقا яралган: кимдир сени яхши кўради, кимнингдир эса сени кўрарга кўзи йўқ. Мен сени яхши кўриш учун яшаб юрганим йўқ. Яшашдан менинг мақсадим бошқа. Мен сени ёмон кўрсам ҳам яшаб юраверасан. Лекин мен ўғрилар оламига бир дақиқа беэътибор колсам, ҳаммамиз ҳароб бўламиз.

– Бу гапингиз ҳам тўғри. Менам кимларнидир ёқтирумайман. Менга энг маъкули – ўлик одамлар.

– Ҳаддингдан ошма, оғзингни юм, дайди!

Ҳамзатбей шундай деб беихтиёр равишда қўлини ҳаволатди. Моргаш яқинроғида турганида тарсаки уриб юборишдан қайтмаган бўларди. Моргаш унинг ғазабланганини сезмагандай осойишталик билан гапини давом эттириди:

– Хонгирей сафарга кетмасидан олдин иккаламиз ака-ука тутиниб, дилдан сухбатлашиб бир ишни режа қилган эдик. Хонгирей тириклар салтанати билан ўликлар кироллигини бирлаштиrmокчи эди.

Бу ғоя Ҳамзатбей учун янгилик эмасди. Кундан-кун кучайиб бораётган Моргашни жиловини тортиб

туришни унинг ўзи Хонгирейдан талаб қилган эди. Хонгирейнинг Моргашга тож кийдириб, ўғрилар оламидаги эътиборли зотлар каторига тортишдан мақсади ҳам шу эди. Моргашга тож кийдирилиши озгина муддат ижобий самара бериши мумкин, яъни у бир йилми ё икки йилми олий зотлар хурматини сақлаб юриши эҳтимоли бор эди. Кейин эса кутура бошларди. Ит кутурса биринчи галда эгасини копишини Хонгирей биларди. Лекин ит кутуриш арафасида отиб ташланиди, деб хисобларди. Ҳамзатбей Моргашнинг бирлашиш ҳакидаги гапини энди эшитиб таажжубланган кишидай чимирилди:

– Яхши-ку! Демак, бирлашгач, сен подшох, Хонгирей эса содик вазиринг бўлармиди?

– Нима деяпсиз? Хонгирейнинг қандай аклли эканини ҳаммангиз мендан яхширок биласиз. Подшоҳлик тугул, мен вазирликка ҳам арзимайман. Мен Хонгирейнинг вафодор ити эдим, ўлгунимча ҳам шундай бўлиб коламан. Фақат... Хонгирей сафардалиги вактида юзага чиқадиган масалаларни хал этишда иккала қиролликни бирлаштириб туришни хоҳлаган эдим. Карасам, Хонгирей сафарга кетганидан кейин бир-икки муаммолар пайдо бўлиби. Ўйлай-ўйлай, Хонгирейнинг режасини амалга оширдим. Байгильдин оғамизга маслаҳат солган эдим, маъқуллади. Хонгирейнинг салтанатига бир-икки кўзларнинг ола қараётгани менга ёқмай қолди. Бирлашишдан мақсад ўша кўзларни ўйиб олиш. Ахир биз ҳаммамиз биродарлармиз-ку? Бугун қайси бир қанжик Хонгирейнинг салтанатига панжа урса, эртага сизга караб акиллашдан тоймайди. Мен уларнинг панжаларини синдираман, акиллайдиган тилларини кесиб оламан. Ана шунда ҳаммаларимизнинг уйларимиз осойишталик роҳатидан баҳраманд бўлади. Айтмоқчи, Хонгирей сафарга кетмасидан олдин уч-тўртта тобут ясатиришимни буюрган эди. Тобутда кимлар ётишини ҳам айтган, бизнинг ишимизда тобутлар узок вакт

бўш ётиши мумкин эмас. Бунинг учун менга сизларнинг ёрдамларингиз шарт эмас. Энг муҳими сиз азизлар, айниқса, сиз муҳтарам Ҳамзатбей устоз – менга ҳалакит бермасаларингиз бас. Бирдан-бир илтимосим шу, устоз, мени яхши кўришингиз мутлақо шарт эмас, факат йигитларингиздан бирортаси оёғимиз орасида ўралашиб колмасин. Билмасдан босиб олсак, сиз айбламасангиз ҳам ўзим куйиб адо бўламан.

– Қичкирифинг оламни бузадиган-ку, а, жўжахўроз! Сен аввал тобутларингга эгаларини жойлагин-да, кейин ноғора коқ! Менинг бошқа гапим йўк!

Ҳамзатбей шу гапларни асабий тарзда айтиб, бошқаларга «хайр» дегандай бир-бир бургутқараш килиб чиккач, эшик томон юрди.

2

«Жўжахўроз» дейилиши кечириш қийин бўлган ҳакорат саналса-да, Моргаш индамади. Уйғонганин газабини заҳарли илжайиш билан жиловлади. Бу заҳарли илжайиш чодири остида адovat туғилганини бирор билди, бирор билмади. Зиммасига Ҳамзатбейнинг уруғини куритиш вазифаси юкланган бу адovat шу ҳақорат айтилмаса ҳам барибир туғиларди. Ўз харакатлари, ўз талаблари ва даъволари билан ўғрилар олами даҳолигига талабгорлик килаётган Ҳамзатбей русларнинг «ўзганинг чанасига ўтирма», деган мақолини унугтаётганди. Тўғри, унинг ёши бошқаларникига нисбатан улуғроқ эди, ўғрилар оламида эътибори юкори эди. Бироқ, хар бири ўзини Худо деб хисобловчи бу оламга катталик килиш учун шу эътиборнинг ўзи кифоя килмасди. Бу мартабага Зелихон эришмоғи мумкин эди. Лекин у тўдалашиб юришни ёқтирамасди. Академикдан кейин Петка-Жавҳарнинг сўзи кескир эди. Буларнинг олдида Ҳамзатбей ким бўлибди? Орада қофқазликларга хос кексаларни иззатлаш одати бўлмаса, ўзини катта олаётган бу одамни славянлар янчиб ташлашади.

Ҳамзатбейнинг изидан бошқалар ҳам туришди. Кўполлик килмай, тавозелик билан хайрлашган бўлсалар-да, уларнинг кўзларидан «Хонгирейнинг ўрнида сени кўришни истамас эдик», деган маънони уқиш мумкин эди. Агар бу фикрни тилларига чиқаришса-ю, улардан «Хўш, кимни кўришни истардиларинг?» деб сўралса, жавоб бермай елка қисиб кўйишилари аник эди. Моргаш буни зиёфатга чорламасидан олдин ҳам биларди. Буларга қолса, Хонгирейнинг ўрнини ҳеч ким эгалламаса-ю, салтанатини ўзаро бўлиб-бўлиб олишса.

Мехмонлар кетишгач, Моргаш тўрдаги бўш ўринга ўтирди. Байгилдин унинг ўнг томонидан, Маматбей эса сал куйироқдан жой олди. Моргаш арок куйиб кўйилган қадаҳни кўлга олди-да, бир кўтаришда бўшатди. Байгилдин билан Маматбей ҳам ичиши. Икковининг қарашларида ҳам «энди нима қилдик?» деган хавотир сезилмасди. Улар ҳам янги хожалари каби тўплантининг шундай якун топишини олдиндан билгандай хотиржам эдилар.

— Байгилдин, — деди Моргаш бир неча нафаслик сукутдан кейин, — мен уларнинг маслаҳатига муҳтоҷ бўлиб чакиртиргани эдим. Ниятимни маълум қилиб кўйишим шарт эди, шунинг ўзи уларга етарли. Битта каллага битта маслаҳатчи етарли. Хонгирей сени хурмат қиласди. Менам хурмат киласман. Менга маслаҳат бераётганингда ўғри эмаслигим эсингда турсин. Ўғриларингнинг қонун-понунларини сарик чақага олмайман. Тожини кийишга кўзим учуб тургани ҳам йўқ. Уришгиси келганлари билан уришаман. Маматбей, Хонгирей сени яхши кўради. Полшага қорадори етиб бормагани учун сени ўлдириши керак эди. Мен сенга атаб тобут ҳам ясатиб кўйган эдим. «Нега ўлдиртирмади?» деб кўп ўйладим. Энди билсан, ўзининг ўлимини сезиб, сени қарздор қилиб кўйган экан. Энди бу қарзингни менга тўлайсан. Сен Ўрта Осиёни яхши биласан. У бизники бўлиши керак.

Энди хато килсанг, нима бўлишингни ўзинг биласан. Сенинг тобутингни алоҳида меҳр билан ясаттирган эдим. Бирорга бериб юборганимча йўқ.

Унинг аҳди муҳокама талаб этилмасди. Шу боис маслаҳатгўй ҳам, итоаткор ҳам эътиrozга оғиз жуфтлашмади.

Моргашнинг сўздан амалга ўтиши орасидаги ма-софа жуда кисқа эканлиги эртасигаёқ маълум бўлди. Хонгирейнинг ўлими ҳақида газетага хабар берган мухбирнинг ўлиги ҳожатхонадан топилгач, бу оламга алоқадор одамлар Моргашнинг иш бошлаганини англашди. Мухбирнинг жасади пойтахтнинг қок маркази – Ленин мавзолейи рўпарасида жойлашган катта дўконга кираверишдаги пуллик ҳожатхонадан топилгани тасодиф эмасди. Мухбирнинг оғзига ўша газета тикиб қўйилгани ниманинг эвазига ўлим топганига ишора эди.

Баъзи жаллодларга одамнинг дўпписини олиб келиш топширилса, юксак санъатини намойиш этиш ниятида ўша одамнинг бошини ҳам кесиб келаркан. Бу замонда ундан жаллодлар колмаган бўлса-да, шу зайлда иш кўрувчи мухбирларнинг уруғи кўпайиб кетган эди. Ўқувчиларининг дикқатини жалб этиш учун ақл бовар қилмас бемаъниликларни ҳам тўкиб ёзадиган бўлиб қолишганди. Хонгирей аслида ҳожатхонада чавақлаб ташланмаган, балки ҳаммомдан чиқаётганида ўлдирилган эди. Жиноят оламида юксак мартабага эга бу одамнинг хорлик билан ўлим топганини бўрттириш ниятида мухбир «ҳожатхонада чавақлаб ўлдирилди», деб ёзган, бу ёлғони учун жазо ҳаялламаслигини хаёлига ҳам келтирмаганди.

Одамлар доимий равишда покланиб туришга эҳтиёжлари бўлгани сабабли ҳаммомни ўйлаб топишган. Йигирманчи асрнинг то сўнгги чорагига қадар ҳаммомнинг вазифаси биттагина эди. «Неча минг йиллар мобайнида яшаган одамлар содда бўлишган эканми, ҳаммомда ювинишдан ташқари кайф-сафо ҳам

килиш мумкинлигини билишмаган», дейилса, авомга мўлжалланганлари назарда тутиладиким, подшоҳу боёнлар саройи, касридаги ҳаммомлар назардан соқитдир.

Московдайин дабдабали шаҳардаги дабдабали уйларда покланиш учун ҳамма шароит мавжудлигига қарамай, ҳаммомларга бўлган эҳтиёж сусаймади. «Красная пресня» даҳасидаги машхур рус ҳаммомларининг асл вазифаларига ҳам ўзгартиришлар киритилди. Ҳаммомнинг буғхонасида чўмилгиси келган ишчими ё профессорми бу жойга келишини орзу қилмай, уйидаги душхонада бошидан илиқ сув куйиб ювениб олишга одатланган. Туркларга алоқаси бўлмагани ҳолда «Турк ҳаммоми» деб номланувчи ҳаммом Хонгирейнинг ихтиёрида эди. Бунга келувчиларнинг максади сувда чўмилиш эмас, таъбир жоиз бўлса, гуноҳлар балчиғига янада баттар булғаниб кетиш эди. Бу ерда ақл бовар қилмас мураккаб масалалар ҳам бир зумда ҳал қилиб ташланарди. Ҳаммомнинг эшигидан марҳамат истаб кириб келган икки дўстнинг бири ложувард ҳовузчада нозанинлар курсовида чўмилиб роҳатланиши, иккинчиси эса Моргашнинг ўлихонасини четлаб ўтиб тўрга кириши ҳам мумкин эди. Ҳовузда майшат килган ўша биринчи одам кетар вактида «менинг ёнимда дўстим бор эди-ку?» деб сўраб ўтирмасди.

Кимнингдир яшаш ёки яшамаслиги, яна кимнингдир иши юришини ёки юришмаслиги ҳал қилингач, албатта дам ҳам олинарди. «Дам олиш» ёш нозанинлар иштирокидаги майшат билан якунини топарди. Асадбек Хонгирейнинг ўзига хос мана шундай «қабулхонаси» борлигини, катта-кичик амалдорларнинг ҳам «хизмат юзасидан» келиб туришларини эшитган, аммо ўзи келиб кўрмаган эди. Катта-кичик амалдорлар айрим зарур хужжатларга шу ҳаммомда имзо чекишгач, шунга яраша мукофотларини олардилар. Мансабдорлар Хонгирейнинг «Интурист» меҳ-

монхонасидаги шохона идорасига киришдан чўчирдилар. Орқаларидан хуфялар кузатиб юришган бўлса, балога учраб қолишдан ҳайиқармидилар ё нафсларига банди бўлиб, гуноҳ ишга қўл уришгач, шу ернинг ўзидаёқ покланиб чикиб кетишни хаёл килармидилар, Худо билади. Эҳтимол, уларнинг назарларида сув ҳар кандай гуноҳни ювса керак-да.

Ҳаммомда доимий бўлмаса-да, вакти-вакти билан киморбозлар катта ўйинларга тўпланиб туришарди. Сулико ҳам кўп келган, бир марта чўнтағидаги борини ташлаб, кейингиларида тўкилганини тўлдириб олганди. Тикилган пул ярим миллиондан ошган пайларда атрофни ўлик сукунат қоплаб оларди. Бирор ҳам молини, ҳам жонини ютқизиб, тақдирга тан берарди, яна бирор кулоғига қадар карзга ботиб, бу ташвишдан кандай қутулишни ўйлаб коларди. Ютқизганларнинг қайғуси тушунарли. Лекин ютганлар ҳам ташвиш билан таркардилар. Улар ташқарида ўзларини нима кутаётганини билмасдилар. Ютганлар таланганд кунлари «ё укаси Иликога ё бошқа ўғрилар тўдасига маълум қилиб қўйган», деб Суликодан гумонсирашарди. Унинг ўлимига айнан шу гумон сабаб бўлганди. Кайси аламзода киморбоз кимни ёллаганини Хонгирей билмайди. Лекин Илико шубҳаланаётган одамлар орасида ўзининг номи борлигини тахмин қиласди. Катта ишлар орзусида канот ёзаётган дамларда Иликонинг ўзига душман бўлиб қолишини сира истамасди. Бу оиласа қадрдон бўлган Асадбекка тўғридан-тўғри ташланмай, «патларини» киши билмас тарзда юлишига сабаб ҳам шу эди.

3

Моргашнинг Хонгирей билан ака-ука тутингани, ўликлар ва тириклар қироллигини бирлаштириш масаласи ҳаммомда ҳал қилингани ҳақидаги гапи лофт эмас, ҳакикат. Сўнгги учрашув чиндан ҳам ҳаммомда бўлиб ўтган эди.

Момақалдиrokли тонг Москва ахли учун ажабтовор янгилик эмас. Хонгирей эрталаб осмон гумбуридан уйғонганида ажабланмади. Ўрнидан туришга эриниб, чап томонига ўгирилди. Юрагига нимадир ботиб, нафаси қайтди. Ётолмай, қаддини күтарди. Кейинги пайтларда бундай ахвол такрорланиб турарди. Ўзини врачга кўрсатганида тунги майшатлар вактини кисқартириши лозимлиги ҳақида маслаҳат олди. Врачлар ҳам баъзан нодонлик қилишади-да: майшат кишига лаззат берадиган дақиқаларда эрталаб юраги безовта бўлишини ким ўйлар экан?

Хонгирей бу кунги юрак безовталигини ҳам тунги майшат сабабидан деб билди. Бундан кейин бу тўшакда эмас, лаҳадда ётажагини, момақалдиrokли тонг суруридан энди баҳра олмаслигини юраги хис қилган эди, акли сезмади.

Туришга эриниб ётганида Томскдан Балабуха кўнғироқ килиб, ҳол-ахвол сўради. Кейинги хафтада нишонланиши мўлжалланаётган туғилган кунига таклиф этди. «Сендай улуғ княз дастурхоним тўрида ўтиrsa, мен учун шараф. Шу зиёфат баҳонасида иттифоклигимизни мустаҳкамлаб оламиз», деди. Ўзи Томскда яшаса ҳам, Москва атрофидаги славян тўдаларига сўзи ўтадиган Балабуха авваллари ҳам Хонгирейга кўнғироқ килиб турарди. Москва ва унинг атрофларига хукмронлик қилувчи Қофқаз гурухлари билан Славян гурухлари орасида келишмовчилик чиққудай бўлса, албатта Балабуха аралашарди. Красноярда ғойиб бўлган Козловнинг Балабуха каноти остига келишини Хонгирей таҳмин килган, лекин изини топа олмаётган эди. Агар таҳмини тўғри чикса, Балабуханинг албатта боғланишига ишонарди. Тонгги кўнғироқ унга шу хушхабарни етказгандай бўлди. «Демак, Козёл Томскда, демак, унинг тақдирини Балабуханинг зиёфатига қадар ўша ерда ҳал қилиниши керак», деб ўйлади.

Одати бўйича ҳаммомга келганида ҳам хаёли шу ўй билан банд бўлди.

Уни Моргаш кутиб олиб, хос хонага бошлади. Хожасининг кайфиятсиз эканини сезиб, ахвол рухиятидаги ўзгариш сабабини аникламоқчи бўлгандай ўйчан кўзларига боқди. Хонгирей буни сезиб, пешонасини тириштириди. «Менга бунака тикилма», деб ғўлдираганича диванга чўкди. Сўнг «Наполеон»дан куй», деб буюрди. Тўлдирилган қадахни бир кўтаришда бўшатиб, Моргаш узатган газакка қарамай, лабини билагига артди. «Хўжайнин, нима бўлди, айтинг, дардингизни олай», дегиси келса ҳам Моргаш жим ўтиришга мажбур эди. Дарди бўлса, айтишни лозим кўрса хожасининг ўзи гапиради. Ундан сўрашга бу атрофда фактат Байгилдин ҳакли. Бирок, одамнинг кўзларига қараб, ичидаги дардни сезиш қобилиятига эга Байгилдин бу хукукидан деярли фойдаланмайди. У ҳам шогирдининг гап бошлишини сабр билан кутади. Байгилдиндай одам кутганида Моргаш бетоқатлик қилсинми? Нихоят, Хонгирей тилга кирди. Аъёнига айёrona боқиб, деди:

— Моргаш, Москвадаги ўлиқхоналар сенга камлик килмаяптими?

Кутилмаган бу саволдан максад нима эканини англаёлмаган Моргаш жавоб ўрнига елка кисиб кўйишни маъқул кўрди.

— Бошқа шаҳарлардаги ўлиқхоналарни қўл остингга олишга нима учун уринмайсан? Нега бунча лаллаясан?!

— Қайси шаҳарни айтяпсиз?

— Масалан... Томскни. У ердаги ўликларнинг хўжайнини ким, биласанми?

— Биламан. Сигизмунд деган гиёҳванд бола. Ёшлигига тош кўтариб юради. Россия биринчилигига бронздан нарига ўтолмаган.

— Ўша наркоманга кучинг етмайдими?

— Етади.

— Етса нимани кутиб юрибсан?

— Қачон тинчитай?

– Кеча тинччишиң керак эди. Э, ландавур!.. –
Хонгирей шундай деб сүкинди-да, жим колди. Сүнг
яна бир нохуш воқеани эсладими, сўкишни давом эт-
тириди. Газаб олови шу сўкишлар билан чиқиб, оташ
босилгач, яна сўради: – Ўша наркоманнинг Балабуха
билан алоқаси қанака, биласанми?

– Чурраси тушиб, хор бўлиб юрганида Балабуха
уни одам қилган, дейишади.

– Балабуха одам қилган бўлса, унга тишинг ўтиши
осонмас. Катта кетма. Сен... ёмон бола эмассан-ку, ле-
кин битта айбинг бор, биласанми?

– Айбим кўп, тан оламан, – деди Моргаш ўлимга
хукм қилинаётган гуноҳкор қиёфасида. Унинг бу ту-
ришини кўриб, Хонгирей истеҳзо билан кулимсиради.

– Айбинг кўплиги ҳеч кимга сир эмас. Ҳар бир
айбинг учун ўлимга хукм килинсанг биласанми,
нима бўлади? Кунда икки марта сени отиб ўлдириб,
яна икки марта тирилтириш керак. Айбинг тамом
бўлгунича Худонинг ҳам силласи қуриб кетади.

Бунақа гапни фариштадай покиза, гуноҳсиз одам
айтса ярашарди. Моргаш ҳар куни икки марта тирил-
тирилиб, икки марта ўлдирилса, Хонгирей ҳар соатда
шундай жазога лойик кўрилиши керак эди. Моргаш
ҳазил тариқасида бўлса ҳам шундай дегиси келарди,
лекин бу ҳазили эвазига қандай мукофот олишини
яхши билгани учун «Қойил гапни айтдингиз!» деган-
дай жилмайиб қўйишни маъқул кўра қолди. Хонгирей
эса давом этди:

– Майдо-чуйда айбларинг учун Худо билан ўзинг
келишаверасан. Мен учун битта энг катта айбинг бор:
ўғри эмассан! Мен мана шундан афсусланаман. Ўғри
бўлмаганинг учун калланг яхши ишламайди, доим
калта ўйлайсан. Агар ўғри бўлиб қамоқхона яғирини
ялаганингда атрофга кўзларингни катта-катта очиб
каардинг. Бизга даф килиши мумкин бўлган энг кич-
кина, энг заарсиз хасни ҳам кўра олардинг.

– Менинг қамалишим ҳечам мумкинмас, – деди
Моргаш ҳазил оҳангода.

- Нега энди? Орқангда ой кўринганми?
- Агар бир йилга қамалсан ҳам, чиққанимда бу атрофни сўтак болалар босиб кетган бўлади.
- Бу гапингда жон бор. «Ўғри қамоқда ўтириши керак», деган қонун ҳаётга тўғри келмай қолди. Мен охирги марта қамоқдан чиққанимда кўчаларнинг эгалари мишиқи болалар эди. Уларнинг гердайган гарданларини буқкунимча онамни кўрай дегандим.

Хонгирей тўғри айтди. «Кўчага мен хўжайинман» деб керилиб юрганларнинг бурнини ерга ишқаши осон бўлмаганди. Бу «хўжайин»лардан унинг гапини қулоғига олиб, йўриғига юргани одам бўлди, эгилишни истамагани кўчанинг унутилган тарихига сингиб кетди.

Моргаш бу тарихни озми-кўпми эшитгани учун «ўшанда сизга чиндан ҳам кийин бўлган, бечорагина хўжайиним», дегандай маъюс кўзларини унга қадаб тураверди. Хонгирей «куй» деган маънода қадаҳга ишора қилди. Моргаш бу амрни дарров бажарди. Хонгирей қўйдиришга қўйдирди-ю, ичишга шошилмади. Қадаҳни чироқка тутиб, конъяқ таркибини текширгандай бўлди. Унинг бу қилиғидан Моргашнинг юраги пича ҳовликди: агар конъяқда зарра қадар нимадир бўлса унинг шўри курийди. Моргашнинг хавотири ортиқча эди. Хонгирей конъякни чироқка тутиб, унинг тиниклигига маҳлиё бўлаётганди. Ўз ишидан қониккач, икки хўплам ичиб, колганини Моргашга узатди. Моргаш қадаҳни эҳтиётлик билан олиб курси устига кўймоқчи эди «Ичиб қўй!» деган амрни эшитди-ю, ўша нафаснинг ўзидаёқ буйрукни адо этдида, бу лутфдан нақадар қувонганини билдириш учун хожасига миннатдор кўзлари билан боқди.

– Агар конъяқ заҳарланган бўлса, иккаламиз баравар ўламиз, – деди Хонгирей ўткир нигоҳини унга қадаб.

Бу гап ҳазилми ё чинми эканини билмаган Моргаш довдираб қолди. Ҳазил деса, хожаси ғазаб билан тики-

либ турибди. Чин деса, бу ёрда гумонга сабаб бўлувчи хавотирли харакатнинг ўзи бўлиши мумкин эмас. Хонгирейнинг чиғириғидан ўтган хизматчиларнинг барчаси содик қуллар каби эдилар. Хонгирей Моргашга тикилиб қарай-қарай охири кулиб юборди:

– Ўлимдан шунчалик кўркасанми, э сўтак! Ўликларнинг ичидагурувериб без бўлиб кетишинг керак эди.

– Мен ўзимдан эмас... – Моргаш хожаси учун жон фидо қилишга ҳам тайёр эканини изҳор этмокчи эди, Хонгирей гапини узди:

– Мендан хавотирландингми? Хавотирланганингда аввал ўзинг ичардинг.

Бир марта шундай килганида Моргаш нафси бузукликда айбланиб, балога колган эди. Кўнгли хира бўлиб турган Хонгирейга бугун иссик ҳам, совуқ ҳам ёқмаслигини англаған Моргаш айбдор бола сингари бўйинни кисиб тураверди.

– Чўк, – деди Хонгирей рўпарадаги юмшок стулни кўрсатиб. Моргаш лозим пайтда сапчиб туришга шай ҳолда бўлиш учун, омонатгина ўтириди.

– Эрталаб Балабуха кўнғирок қилиб, меҳмонга айтди. Ўши кирққа бориб қолибди, у шохи йўқ хўқизнинг. Кирк йиллик умр битта хўқизга кўплик қилмайдими?

– Жуда кўп, – деди Моргаш кулимсираб.

– Кирк йил яшаш, нима дегани биласанми? Билмайсан. Бу хаётда кирк йил азоб чекишига мен айборман. Бу азоблардан кутулишига олдинроқ ёрдам беришим мумкин эди. Нега пайсалга солдим? Меҳрибонлик қилдимми? Ҳа... меҳрибонликнинг ҳам ёмон томонлари бор. Энди... яна беш йилми ё ўн йилми азоб чекишига йўл кўймаслигим керак. Унгача туғилган кунини койилмақом қилиб ўтқазиб олсин, а? Эрталабдан бери «нима совға қилсан экан?» деб бошим котялти. Ҳиндистондан она-бала фил олиб келти-

раймикин? Тепасига жавхару ёкут кадалган гиламча ташласам, а? Шунака совғага арзийдими үзи? Арзимайди! Ўша филнинг тезагига ҳам арзимайди. Красноярлик Козёл нима бўлди? Балабуха билан қалин ошна эканидан хабаринг борми? Сенлар Козёлнинг изини йўкотдиларинг... – Козловни қидириш ишларига аралашмаган Моргаш тухматдан ўзини химоя килишни ҳам ўйламай индамасдан ўтираверди. Хонгирей эса гап оҳангини ўзгартирмай давом этди: – У ҳаромини мен ўзим топдим. Ақлим билан топдим! Балабуха Томскда Козёлни тиззасига олиб, бошини силаб ўтириби. Туғилган кунига силаётган ўша бошни совға қиласман. А, нима дединг? Бунака алламбало совғани тушида ҳам кўрмаган. Караб турасан, сенинг кўлингга келгунича жиннихонага тушиб чиқади. Агар менинг ёнимда юраман, десанг, доимо каллангни ишлат. Ҳар ишдан лаззат олишни ўрган. Шаргта отиб кетишни кўчадаги ҳар канака аҳмок ҳам бажараверади. Гап ўлдиришда эмас, гап роҳатланишда! Қани, куй.

Моргаш қадаҳга конъяқ қўйга, узатишни ҳам, аввал тотиб кўришни ҳам билолмай гарангсиди. Сўнг таваккал қилиб, лабига олиб борган эди, хожасининг қаҳрли овозини эшилди:

– Нима, мен сенинг сарқитингни ичаманми?

Моргаш қўлидаги қадаҳни шошилганича курси устига кўйди-да, бўш қадаҳни конъяқ билан тўлдириб, узатди. Бу сафар Хонгирей чўқишириб ичди.

– Асадбекнинг кўзларида ёпи кўриб қанчалик роҳатланганимни сен билмайсан. Мен унинг ҳам жиннихонага тушишини кутган эдим. Дийдаси қаттик экан энағарнинг. Аслида иккала ўғлини гумдон қилишимиз керак эди. Яна меҳрибонлигим панд бериб, роҳатим яримта бўлди. Бу хатони тузатиш кийин эмас. Яқинда роҳатим бутун бўлади. Мен битта хато килдим: Ҳайдарни ўлдирмаслигим керак эди. Асадбекни факат ўша аҳмок янчиши мумкин эди. Жамшидга ишонганим чаток бўлди.

– Ишончни окламаса, менга беринг уни.
– Йў-ўк, сенинг кўлингга тушишига ҳали вакт бор. Уни менга Академикнинг ўзи тавсия этган. Устозим одам танлашни биларди. Жамшид хиёнат қилмайди. Фақат... ғўрлиги бор. Шу кунларда Асадбек билан олишишга кучи етмайди шекилли. Шунинг учун уни мен сенга бермайман, сени унга бераман. Асадбекни гумдон қилишда Маматбей ҳам иш беролмаса керак. Эсингда турсин: зарур бўлиб қолган пайтда бу ишни ўзинг қўлга оласан.

Хонгирей бу онда келажак режаларини баён килаётгандай эди. Бир неча соатдан сўнг режанинг васиятга айланишини буларнинг иккови ҳам билмас эди.

Хизматчи йигитлардан бири эшикни қия очиб, Ҳамзатбей келганини айтди. Хонгирей бу ташрифдан норози бўлса ҳам, уни худди кутилган азиз меҳмондай карши олди. Ҳамзатбей ўтиргач, дастурхон тузаш учун кирган хизматчи йигитни изига қайтарди-да, «шошиб турибман», деб изоҳ берди. «Шошиб турибман»нинг тагида «зарур гапим бор», деган маъно ҳам яширин эди. Моргаш буни англаш, хизматчи йигитга эргашмокчи эди, Хонгирей кўз караши билан «ўтиравер», деб амр килди. Тождорлар билан яккамаякка гаплашишини ёқтирувчи Ҳамзатбейга «дум» иштирокида сухбатлашиш малол келса-да, меҳмонлик иззатига хилоф қилмай, индамай кўя қолди.

– Эшитдингми, Петка-Жавҳарни ўлдиришибди, – деб Моргашга бир караб олди.

Хонгирей бу нохуш хабарни бошқачарок тарзда эшитган эди. Шу сабабли ажабланиб сўради:

– Ўлдириб кетишибдими? Ким?
– Сенга «ўзини ўзи осди», дейишувмиди? Шунга ишондингми? Петка-Жавҳарни Соликамскка жўнатишгандаёқ кўнглим бир бало сезувди. «Оқкуш» Петка-Жавҳар борадиган жой эмас.

Соликамскдаги қамоқ лагерига ким ва нима учун

«Оккуш» деб ном берганини ҳеч ким билмайди. Балки «Бу ерга келганлар узок яшамайди, тез орада жони оқкуш каби парвоз этади», деган маънода қўйилгандир бу ном. Хонгирейнинг ўзи у қамоқ лагерида ётмаган-у аммо довруғни эшигтан. Бир-бирига муҳаббат билан караб турган икки оккуш сурати байроқ каби деворига илиниб турадиган бу лагерда инсоний муҳаббат, меҳр деган фазилатлар йўқ эди. Ҳукуматга ёкмаган маҳкумлар кўпинча шу лагерга юбориларди. Бирон акллирок одам топилса-да, бу қамоқ лагери номини ўзгартириб, «Оккуш» ўрнига «Кирасану чикмайсан», деб кўйса мантиққа муносиб иш қилган бўларди.

— Петка-Жавҳар ўлиши шарт бўлгани учун ўша ёкка «этап» қилинган. Унинг ҳукуматга ёмонлиги йўқ эди. Чўнтаккесар ўғридан ҳукумат кўркмайди. Петка-Жавҳар ўзини осадиган ахмоклардан ҳам эмас. Умрининг кирк йилини қамоқда ўтказган ҳалол ўғри эди у! Қайси бир қанжикнинг бир тепкиси билан ўзини осадиганларнинг тоифаси бошқа.

— Ҳукуматнинг чўнтаккесар ўғридан кўркмаслиги тўғри, — деди Хонгирей ўйчан тарзда.

— Чайналмасдан очикрок гапир.

Ҳамзатбейнинг кўрслиги ғашини келтирса-да, Хонгирей сир бой бермади. Фикрини очикрок баён этишга ҳам шошилмади. Хонгирейнинг узок ўйлаб сўнг гапирадиган тоифадан эмаслигини Ҳамзатбей жуда яхши биларди. Зелихон-Академик унинг баъзи телбатескари гапларидан аччиқланиб, «калта ўйлама!» деб танбех берганларига бир неча марта ўзи гувоҳ бўлган. Хонгирейнинг ҳозирги ўйчан кўриниши никоб эканини Ҳамзатбей сезмаса яна ким сезсин? Сезса-да, шошилмади, тоқат билан кутди.

— Ҳукуматнинг чўнтаккесар ўғридан кўркмаслиги тўғри, — деб қайтарди Хонгирей, тусини ўзгартирган ҳолда, — лекин... у сиз учун оддий ўғри. Биз учун эса тож гулига сўзи ўтадиган юкори эътиборли ўғри. Петка-Жавҳарнинг уйи ҳам биз, оиласи ҳам биз,

болалари-ю қариндошлари ҳам биз эдик. Барча унга сўзсиз бўйсунарди. У тож гулини истаган томонга буриб юбориши мумкин эди. Ҳукумат эса буни биларди.

— Ҳа, яхши биларди, — деб бу фикрни қувватлади Ҳамзатбей, — чунки ичимиздаги айрим қанжиклар ҳукуматни доимий равишда огоҳлантириб турарди. Ҳукумат билан биздаги қанжиклар тил биритирган пайтда ҳалол ўғриларнинг ўлим топиши осонрок бўлади. Петка-Жавҳарни ҳукумат одамлари ўлдирмади, ўлдиришга шароит яратиб берди. Уни ўзимизнилар ўлдирди. Петка-Жавҳар охирги учрашувда менга бир сир айтган эди: Академикнинг ўлими тўғрисида унда етарли маълумот бор экан. Зелихон Фарғонадаги турклар билан бўлган жанжални Москва одамлари уюштирганини билгани учун ўлдирилган. «Ҳукумат одамларига Академикни топишда ёрдам берган ўзимизнинг қанжикларни камоқдан чиқканимдан кейин тўплантida фош қиласман», девди. Академик билан Петка-Жавҳарнинг қисмати бир бўлди.

Ҳамзатбей бу янгилик қандай таъсир этар экан, деган хаёлда Хонгирейга қаттиқ тикилди. Хонгирей эса тусини ўзгартирмади, қоши сал учгандай бўлди-ю, сир бой бермади:

— Менга ҳам айтган эди шу гапини, — деди босик овозда.

— Айтган бўлса... Академик жонингни саклаб, сени одам қилган эди. Шу пайтгача нега қотилини қидириб топмадинг?

— Қидиряпман, лекин бу менинг зиммамдаги қасос, шунинг учун сизга ҳисоб беришим шарт эмас.

— Академик сенинг устозинг эди. Петка-Жавҳар билан менга эса ардокли дўст эди. Биз дўстнинг қадрини унутмаймиз. Сендақа ёшлар бизнинг ишимизда дўстлик бўлмайди, деб валдирайверасанлар. Биз ҳалол ўғрилигимизни унуганимиз йўқ. Дўстни ҳам эсдан чиқармаймиз. Бугун Пермга кетяпман. Эрта ё индин жасадини олиб келиб, кўмамиз. Мен билан

бирга бормаслигинг аник. Лекин кўмишга тайёргарлик қўриб қўй. Маросим олий макомда бўлсин. Петка-Жавҳар славянлардан бўлса ҳам, бизга яқинлиги бор эди. То олиб келиб кўммагунимизча славянлар билан нари-бери гап қилиб юрма.

— Жасадини беришарканми, суриштирдингизми? Ё одамларимни ишга солайми?

— Сен айтилган вазифани бажар. Бу ёгини менга қўйиб бер. Битта ўлик топиб, Петканинг жасадига алмаштириш қўлидан келмайдиган ландавурга айланиб колганманми??

Ҳамзатбей аҳдини шу тарзда баён қилгач, шашт билан қаддини ростлади. Хонгирей жойидан кўзғолишни истамаса ҳам, ўзини ўзи мажбуrlаб ўрнидан туриб, меҳмонни кузатди. Ҳамзатбейни кузатиб, жойига қайтгунича хаёли унинг кейинги гаплари билан банд бўлди. Хонгирей «Менга ҳам айтган эди», деб ёлғон гапирди. Петка-Жавҳар у билан бу хақда сира гаплашмаганди. Хонгирей Академикнинг ўлимига ким алоқадор эканини яхши биларди, шу боис қотилни қидиришнинг ҳожати ҳам йўқ эди. Ўғрилар орасида «ўз оламинг ахли ҳузурида ёлғон гапирма», деган конун мавжуд бўлса-да, Хонгирей бу конунни бузишдан тап тортмади. Сири очилай деб турган маҳалда қайси аҳмоқ ёлғон ишлатмайди? Ёлғон ишлатиш бир масала, бу ёлғонга бошқаларнинг ишонишлари янада муҳимроқ масала. Ҳозир Ҳамзатбей унинг ёлғонларига ишондими ё йўқми – Хонгирейга маълум эмас. Хонгирей бир нарсадан ҳадиксиради: Ҳамзатбейнинг гапларида «Академикни ҳукумат одамларига сен рўпара қилганингни Петка-Жавҳар билиб қолгани учун уни ҳам йўқотдинг», деган маъно яширинмаганмиди?

Академикнинг ўлимидаги хизмати бор, бу гуноҳини одамлардан яширгани билан, Худонинг қачондир жазо беришини ҳис килади. Лекин Петка-Жавҳарнинг ўлимига алоқаси йўқ. Ҳамзатбейга ўхшаган «мияси айниб колганлар»ни бунга қандай ишонтиrsин?

Ишонтириш қийинми ё... ишонмаганларни Петка-Жавҳарнинг изидан жўнатиш осонроқми?..

Бу иккинчи навбатда ечиладиган масала эди. Биринчи галда Балабуха билан Козловнинг тақдирни хал этилиши шарт эди. Ҳамзатбей «славянлар билан нарибери гап қилиб юрма», дегани билан бу вазифани оркага суриш хатарни яқинлаштиражагини Хонгирей англаб турарди. Шу боис Ҳамзатбей билан хайрлашгач, унинг гапларини чукур мулоҳаза қилиб ўтирмай, ўзининг асосий максадига кўчди:

– Кечаги ўйин қандай бўлди? – деб сўради Моргашдан.

– Кротнинг иши пачава, иштонигача ечиб олишди. Сулико ўлганидан кейин анча гердайиб, сувюкмас бўлиб қолган эди, яна пачаги чикди, – деди Моргаш.

– Сенга индамадими?

– Кечаси олдингизга бормоқчи эди, тўхтатдим.

– Ҳозир каерда?

– Каерда бўларди, сизни кутиб аза тутиб ўтирибди.

– Чакир.

Кеча ўйин кизигандан кизиганини, Кротнинг каттага тушганини эрталаб эшиттан Хонгирей унга мос вазифани тайин қилиб кўйган эди. Насаби Кротский бўлган Андрей исмли йигитча қиморбозлар оламига кириб келган пайтларда унга лақаб излаб бош котиришга ҳожат бўлмаганди. Насабидаги ҳарфларни кискартириб «Крот» деб қўя колишганди. Крот қиморни жону дили или яхши кўрса-да, каллани ишлатиб эмас, ҳаяжон билан ўйнагани учун омадсизликдан кутулиши қийин бўларди. Ютқизиқни тўлашга қурби етмай қолганида Хонгирейнинг паноҳига қочарди. Үғрилар олами қиморбозларни ёқтираслигига қарамай Хонгирей у каби омадсизларни каноти остига олишдан чўчимасди. Уларнинг қарзини тўларди-ю, ўзларини бирон-бир балога рўпара қилиб, мушкул ишларини бажартириб оларди-да, ўзининг жонини хатардан, номини эса шубҳалардан куткариб оларди.

Икки йил мукаддам айни шу ҳаммомда Сулико-га рўпара келган Крот бор-йўғини ютқизиш камлик қилиб, устига-устак тўрт юз минг рубл қарз бўлиб қолди. Агар йигирмата «Волга»си бўлганида бозорда пуллаб, белгиланган муддатда қарзини тўлай оларди. Крот чакана одамлардан эмасди, ўзига яраша тўдаси, жиноят оламида эътибори ҳам бор эди. Лекин қофказлик ака-укаларга teng келолмаслигини биларди. Ўтган йили Суликова эллик минг рубл ютқизганда, бир амаллаб узилганди. Эндиғи қарз!.. Ўшанда Хонгирей қаршисида тиз чўкканди. Бу оламда бир томон тиз чўкса келишмайдиган иш йўқ. Хонгирей унинг илтижосини рад этмади. Крот эса бу қарзни бир-икки қалтис ишдаги иштироки орқали узадиган бўлди.

Бу марҳаматдан кўнгли тўлган Крот Москвада анча эътиборли саналган «Прага» ресторанида синглисинг туғилган кунини нишонлаётган эди. Майшат авжига чиққанида унга икки бақувват эркак ва бир аёл яқинлашди. Крот уларни танирди: эркакларнинг бири – оғир вазни мажхур боксчи Копитов, иккинчиси маҳсус кисмнинг собиқ офицери, каратэ усулларини мукаммал билувчи Потапов эди. Крот уларни танигани учун ҳам нима учун келишганларини тахмин қилди-ю, бироқ, айрим кинофильмларда кўрсатилгандек кочиб кетишга ёки бирон найранг ишлатишга уринмади. Аксинча, дастурхонга лутфан таклиф этди. Крот Копитовни Хонгирейнинг «Турк ҳаммом»ида бир-икки кўрганди. Потапов билан учрашуви эса ўзгачароқ бўлганди. Бир йил аввал «Салтиковка» ресторани ҳожатхонасида нотаниш йигитлар унинг нақ бўғзига тўппонча тираб ўттиз минг рубл талаб қилишганда Потапов уни қутқариб колган эди. Потаповнинг бундай қалтис пайтда тўсатдан пайдо бўлиши тасодифиди ёки атай уюштирилганмиди, Крот аниқлай олмади. Хонгирей юборган бу икки элчининг вазифаси ҳожаларининг гапини етказиш эмас, балки қарз эвазига буюриладиган вазифанинг

бажарилишига Кротнинг ё розилигини, ё жонини олиб қайтишлари шарт эди. Крот буйрукни ҳеч бир мулоҳазасиз қабул этди. Чунки, гарчи киморбоз бўлсада, бу вазифа унинг учун янгилик эмас, демак, мураккаб ҳам эмасди. Сартарош соч-соқол олишни одатий иш деб билгани каби ўғрилар йўлини танлаган Крот ҳам бирор тўплаган бойликни шилиб олишни шундай оддий юмуш деб биларди.

Хонгирейдан зарур йўл-йўриқни олгач, ишончли йигитларига бош бўлиб Латвияга караб жўнади. Риганинг машхур ибодатхонаси рўпарасидаги беш каватли уйда йигирма беш йилро роҳатда яшаб, энди янада фароғатлироқ ҳаёт кечириш илинжида хорижга кетишга шай турган Самовичнинг уйига бостириб кириб: «Сенга Хонгирей салом деб юборди. Қарзингни вактида тўламай номардлик қилибсан», – деганида у бечора ақлдан озиб қолаёзди. Самович бу ёруғ дунёда Хонгирей деган одам борлигини ҳатто зшитмаганди. Танимаган, билмаган одамдан канакасига қарз бўлишини тушуниб етиши учун кўп вакт талаб этилмади. Хорижга кетишга тайёрланаётган танишларидан бир нечасининг уйини талончилар босиб, топган тутганларини кўтариб кетганларини эслади-ю, бошига кулфат тоғи ағдарилганини фаҳмлаб, айёрикка хос ниманики билса, барчасини бирин-сирин ишга кола бошлади. «Хонгирей деганингни танимайман, ҳеч кимдан қарзим йўқ», деган гапига бостириб кирганлар киприк ҳам қокишимагач, ўзининг камбағаллигидан нолиб йигламсирай бошлади. Кротга бу ҳолат янгилик бўлмагани учун аввалига қўйиб берди.

Самович газли сув сотиб, мол тўплаган эди. Сабртоқати туфайли томчи сувлар тилла буюмларга айланганди. Энг арzon кийим-бош кийиб юрувчи бечоррасифат кўринишдаги бу одамни босқинчиларга ким сотиби экан? Ахир унинг четга кетишини жуда оз одам биларди-ку? Айёрик усулларини бир-бир ишга колаётган Самович айни чоғда бу саволга ҳам жавоб

топишга уринарди. Жавоб топган тақдирда ҳам чорасиз эканини эса ўйламасди.

Хонгирейдан салом олиб келган Крот бу хона-дон ахли кўзига Азроил бўлиб кўринаётгани билан аслида худди Самович сингари тақдири қил устида турган бир нотавон эди. Агар буни билганида Самович балки «ўзинг ҳам мендан баттар ночор экансан, кел, яхшилик билан тил топишайлик. Сенга пулимнинг ярмини берайин-у, у муттаҳамлар кўзидан нари бўлиб беркинишингга кўмаклашай», деб таклиф қилган бўлармиди? Мол аччиғида қақшаётган Самович бойлигининг бир қисмини беришга тайёр эди. Лекин кўзлари косасидан чиккудай бўлиб тикилиб турган Крот бу марҳаматга кўна олмасди. Чунки Хонгирей бу хонадон тўплаган бойликнинг микдорини айтган, бир сўм бўлса-да камроқ олиб бориш Кротни ўғриларнинг умум пулига хиёнат қилишда айблаш учун кифоя киларди. Яхшики, бу ўйларнинг жони йўқ. Бўлгандами, эгаларига қўшилиб титрай бошласа, ён-атрофни қиёмат тўзони босарди. Алҳол, ажал тарозусининг бир палласига мол талаб қилаётганнинг, иккинчисига тийинлаб тўплаган тиллаларини кўзи қиймаётган бойлик эгасининг жони кўйилган эди. Шу боис ҳам Кротнинг Москвага қуруқ қўл билан кайтиши ҳечам мумкин эмасди. Самович «Менда ҳеч қандай бойлик йўқ», деб туриб олгач, аввал ўзи, сўнг кўркувдан ранги оқариб кетган куёви обдон дўйпосланди. Бу ҳам иш бермагач, ортиқча ади-бади айтиб ўтирмай, табобатнинг энг охирги ютуқларига мурожаат қилинди – Самович аклий жараённи фалаж қилиб қўювчи дори билан эмланди. Оқибатда салкам бир миллион нақд пулга қўшиб янга бир талай олтин буюмлар билан изларига кайтишиди.

Вазифани ортиғи билан бажариб кўнгли шодланган Крот бу ўлжадан улуш олишга умидвор эди. Чарм жомадонни стол устига қўйиб, очганда Хонгирейдан «Боплабсан, яхши хизмат қилдинг, ўлжанинг ярми

сеники», деган марҳамат кутди. Лекин Хонгирей арзимаган матоҳга менсимасдан караб қўйгандай қўз кирини ташлади-ю, аъёнига «олиб қўй», деган маънода имлади. Рига сафарининг тафсилоти билан қизиқиб ҳам кўрмади. Крот жонини хатарга қўйиш эвазига карзидан кутилишдан ташқари Хонгирей қўлидан бир қадаҳ конъяк ичиш билан кифояланди. Алами ичини куйдирса-да, сир бой бермади. Хонадан чикишда Хонгирей тўхтатиб, дўстона маслаҳат берди:

– Бундан бу ёғига ақлингни ишлатиб ўйна!

Ўшандан бери ютқизмай ўйнаётган Крот бу муваффақиятини ўз аклу фаросатининг маҳсули деб ўйларди. Хонгирейнинг марҳамати туфайли омад қувончидан роҳатланаётганини эса ўйлаб ҳам кўрмади. Кеча тунда Хонгирейнинг марҳамат булоғи куримади, аксинча, яна бир қармоқ ташлаб Кротнинг кекирдагидан илиб олди.

Кадим Римнинг Каликула деган султони бўларди. Ўз синглиси билан ўйнашишдан ҳам кайтмагани учун бузуклик тарихида, синглисининг ҳомиласини ўз қўли билан суғуриб олгани учун ваҳшийлик бобида тенгсиз ҳисобланган бу бадбаҳт билан Хонгирейни тенглаштириш балки инсофдан эмасдир. Ҳархолда бузукликнинг барча турларини татиб кўргани билан синглисига тажовуз қилмаган. Каликуланинг яна бир одати бўлган: ҳар ҳафтада биттадан кулни озод этган. Озодликка эришувчи қул кўлига қилич олиб ҳукмдори билан олишишга мажбур бўлган. Оч-нахор, силласи қуриган қулнинг олишуви нима бўларди? Каликула танадан учган бошни кўриб ҳузурланарди. Хонгирейда ҳам шундай одат бор эди. Ўзига тобелардан бирининг кўнглида норозилик ёки шумлик сезса, унга озодлик инъом этарди. Озодликка чанқоқ аъёни ўз ихтиёри билан яшаш баҳтига эришиш учун Римдаги қул сингари сўнгги олишувнга чорланарди. Бу олишувда Хонгирей майдонга тушмасди. Ҳатто майдон ташқарисидан кузатмасди. Озодлик илинжидағи

одам Хонгирейнинг душманларидан бирига рўпара бўларди. Душманни маҳв қила олса, орадан кўп ўтмай ўзи ҳам ўша қурбонининг изидан жўнарди. Буни билган аъёнлар унинг марҳаматидан чўчиб туришарди.

Бу кеч Хонгирей Кротга ҳам шундай марҳаматни лозим кўрганди. Кечаги ютқизик аламидан дунё кўзига тор бўлиб кўринаётган Крот чорловдан мақсад айнан шу эканини фаҳм этмай унга рўпара бўлди.

Саломлашганларидан сўнг чўкишириб ичдилар-у, кечаги ютқизиқдан гап очмадилар.

– Суликога ютқизиб кўйганингда ёнингни олганим учун Илико мени ёмов кўриб қолган. Энди акасининг котиллари каторида мени биринчи ўринга кўйяпти шекилли. Сен Қофқазнинг одатини билмайсан: «қонга – қон, жонга – жон!» – бошқача ҳукм йўқ. Майли, Илико билан тил топишиш учун ўзимнинг бошим оғрий қолсин, – Хонгирей «гапларимга тушуняпсанми?» дегандай Кротга тикилиб қолди. Чорловдан асл мақсадни билмаган Моргаш эса бир хожасига, бир омадсиз қиморбозга қараб, гапга аралашмай тураверди. – Ригага бориб келганингдан кейин сенам мендан ранжиган эдинг, тўғрими?

– Йў-ўқ... – Крот бош чайқаб эътирозини бошлаган эди, Хонгирей гапини давом эттиришга йўл қўймади.

– Топиб келганингнинг учдан бирини сенга берсам ҳам бўларди. Лекин яна ютқизиппингни кўнглим сезиб, улушингни эҳтиётдан олиб қолган эдим. Кўнглим алдамаган экан, яна расвойинг чиқиби. Энди ўша ҳақингни берганим билан қарзингни қоплай олмайсан. Мендан ёрдам кутаётган бўлсанг, мен ёнингдаман, ошналаримни хор қилиб қўймайман. Факат... сен ҳам менга ошначилик қиласан. Оёғимнинг тагини қичитаётган бир хас бор, шуни олиб ташлаш керак. Уни Самовичга ўхшаб қийнаб ўтирамайсан. Менинг салом ўқимни пешонасига қадайсану изингга кайтасан.

– Княз, сен иш буюрганингда мен ҳеч қачон йўқ демаганман. Ўл, десанг ўлишим мумкин.

— Сен ўлма, мен учун тирик юравер. Ҳаётнинг лазатли онларидан маст бўлиб яша. Агар Азроилга ўлик етишмаётган бўлса, оёғимиз остида ивирсиб юрган падарлаънатлар тикилиб ётибди. Битта-битта териб бераверамиз. Унга қадар сен Моргаш билан бир жойга бориб келасан. Қаергалигини айтайми?

Хонгирей худди синаётгандай Кротга синчковлик билан тикилди. Унинг ўткир қарашига кўнишиб қолган Крот бу сафар сабабини ўзи ҳам билмаган ҳолда бир оз ўнғайсизланди. «Хоҳласанг айт, истамасанг гапирма», дегандай нигоҳини ерга қадади. Хонгирей эса саволига жавоб кутди. Сўнг:

— Қизиқиб ҳам кўрмайсанми? — деди нигоҳини узмай.

— Мен сен отган ўқман. Ўқ «қаерга бориб санчилай?» деб сўрамайди. Ўқ учун тепки босилиши кифоя.

Крот «жавобим маъқулми?» дегандай Хонгирейга қараб, унинг юзини мамнунлик ели силаб ўтганини кўрди.

— Агар қиморга аралашиб аҳмоклик қилиб юрмаганингда сендан зўр ўғри чиқкан бўларди. Бу каллага ўғриларнинг тожи ярашади, тўғрими, Моргаш?

Кротга бу шарафнинг лозим кўрилиши Моргашнинг ғашини келтирган бўлса-да, хожасининг кўнгли учун жилмайиб қўйди.

— Томскда ҳеч қимор ўйнаганмисан? — деб сўради Хонгирей. Крот бу саволни эшитиб, юзига муздек сув томчилари беҳос урилгандай сесканди. Аммо сир бой бермаслик учун кўзларини олиб қочмади. Худди саволга тушунмагандай қараб тураверди. Хонгирей гўё унинг оғир мушкулини енгил қилмоқчидай саволни ўзгартириди: — Ютганмисан ё ютқизганмисан?

— Қиморда хар қанақаси бўлади. Томск менга ёқмайди.

— Дишимиз бир хил экан, менга ҳам ёқмайди у лаънати шаҳар. Шаҳар ёқмаса ҳам танишларинг бордир?

— Бор: Яшка-Валет, Заргар...

– Менга қиморбозларинг керакмас. Ўғриларини танимайсанми?

Эндиғи савол совук сув эмас, гүё қайнок ёғ томчи-си бўлиб томиб тепакал бошини кўйдирди: «Нега гапни айлантиряпти? Арқонни узун ташлаб, кейин бўғиб ташламоқчими? Сездими? Ким сотди?»

Хонгирей уни мавҳум ўйин билан қийнамоқда эди. Крот унинг қўлида қандай карта борлигини билмай гарангсиди. Хонгирей ютуқли карталари билан ҳужум қиляптими ё курук пўписами – буни билиш қийин. Лекин ўзининг қўлидаги карталар билан фақат ўлимни ютиши мумкин, буниси – аник! Уч кун олдин Яшка-валет билан «Арагви» ресторанида кўришиб, Балабуханинг таклифини қабул қилганди. Балабуханинг вазифасини амалга оширишга уриниши шарт эмас, ўлим топиши учун таклифга кўнганининг ўзи кифоя... Яшка-валет ишончли одам, унда ким хоинлик қилди? Крот узоқ ўйлашга ҳакли эмасди. Хонгирейнинг қўлидаги карталар ютуқли эмас, шунчаки ваҳима, деган тўхтамга келиб, «ўйин»ни дадил давом эттиради:

– Балабухани танийман.

– Балабухани? Танийсанми, номини эшитганмисан ё кўрганмисан, ё ачомлашганмисан?

– Бир марта кўрганман. Томсклик ғирромлар қилиқ қилганда катта жанжал чикувди. Ўшанда Балабуха келиб тинчитган.

– Демак, адолат қилганми?

– Шунака бўлган.

– Сенга адолат қилибди, демак сен ундан хурсандсан? Пулингни ундириб берганми?

– Бу ўтиб кетган воқеа.

– Шунака дегин... Сенга адолат қилган одам менга номардлик қилса ажрим қандай бўлиши керак?

– Мен тушундим, княз, оёқ остини қичитаётган хас йўқотилиши шарт.

– Қачон йўқотилади?

— Аслида кече йўқотилиши керак эди. Лаллайиб, озгина кечикибмиз.

— Озгина эмас, анчагина кечикдинг. Шунинг учун бугуноқ жўнайсан адолатли одамнинг хузурига!

Хонгирей шундай деб амр эттак, Моргашга қараб «қуй» деб ишора қилди. Крот конъякни ичиб «тўймадим» дегандай аввал хожасига, сўнг Моргашга қаради. Хонгирей кулимсираб қўйгач, шишани ўз қўлига олиб катта қадаҳга тўлдириб қўйди-да, «ишимиз ўнгидан келсин», деб симириди.

Ҳаётда тасодифлар кўп учрайди. Бирок Крот ҳозиргина рўпара келган тасодиф тарихда сира юз бермаган бўлса керак. Кечагина Балабуха Хонгирейнинг ўлимини истаганди. Бугун Хонгирей унинг пешонасига ўқ қадамоқчи. Бу ўқни Крот ўз қўли билан қадаши керак! Балабуханинг топшириғи осонроқ – Крот тўппонча отмайди. Хонгирей ҳаммомдан чиқаётганида олдинда келаётган соқчисини чалғитса кифоя. Колганини рўпарадаги мерганинг ўзи қойиллатади. Хонгирейнинг топшириғини эртага бажариши керак. Балабуха эса бу кечга мўлжаллаган...

Кротнинг бахтига Хонгирей ҳаммомда узоқ колмади. Крот кузатиш мақсадида унга эргашиб қўчага қадар чиқди. Чиқди-ю, рўпарадаги такси машинасигинг кўк чироғига кўзи тушди. Бу мерганинг шай турганига ишора. Крот шошиб қолди. Ўзини мастиликка солиб чайқалди-ю, қоқилиб кетгандай олдинда бораётган соқчига урилди. Соқчи қанчалик зийрак бўлмасин, бу кутилмаган зарба туфайли оёқда тура олмади.

Ўша заҳоти ўқ узилди. Пешонасидан ўқ еган Хонгирей нима бўлганини билмай ҳам қолди.

Эртасига унинг ҳожатхонада отилгани ҳақидаги хабар газетада эълон килинди...

Бўлиб ўтган воқеанинг асл тафсилоти кўпчилик қатори Асадбекка ҳам сирлилигича қолди. Балабуха ҳам, Козлов ҳам бу қасоснинг тафсилотини унга маълум қилишни лозим кўрмадилар.

Моргаш ҳам нима бўлганини аниқ билмасди. Лекин Кротнинг бекорга қоқилмаганига гумони бор эди. Тож гулини йиғиши арафасида уни ўликхонага чакиртирди:

– Нима учун қоқилиб кетганингни суриштирмайман. Энди менинг ўйинимни ҳалол ўйнаб бермасанг, турмайдиган бўлиб қоқиласан. Хонгирейнинг топшириғи ўз кучида қолади. Фақат буни менсиз бажарасан. Режани ҳам бир оз ўзгартирамиз. Аввал Козлов, кейин Балабуха... Князнинг битта тилла бошига икки аҳмок калла узилмаса, тарих бизни кечирмайди! – деган марҳамат билан унинг хаётини бир оз узайтириб берди. Крот вазифасини англаб, орқасига ўгирилганида Моргаш ўзича «аслида уч аҳмок калла», деб минғирлаб кўйди.

III б о б

1

«Истеъфодаги майор Солиевни зиёрат килиб келмаймизми?» деган гапни эшлитиб, Зоҳиднинг кўнгли бузилди. Бу аччиқ ҳақиқат эсланмагани дуруст эди. Тўғри, хеч ким фоний дунёга устун бўлолмаган. Туғилган одам борки, аввал ерни таталаб эмаклайди, кейин бора-бора одамларнинг бетларини таталайтаталай, мансаб пиллапояларидан юкорилайди. Пиллапоянинг энг юкорисига чикқач, бўшлиқни кўради-ю, алам оташида ёниб, ўтган кунларини лаънатлади ва қайдандир пайдо бўлган афсуснинг темир тирноклари ўз қалбини тимдалай бошлайди. Кейин эса не-не ҳунарлари эвазига эгаллаган чўққисидан пастга қараб думалайверади. Юкорига чиқиб кетаётганида «бировлар менга орқа томонимдан даф қилмасин», деб эҳтиёт чораси сифатида экиб кетган тиконлари энди баданига санчилиб, жонини суғуриб олаверади.

Гарчи Максад Солиев бу тоифа одамлардан бўлмаса-да, қачондир истеъфога чиқиши, умрини

бағишилаган ишидан кетиши аниқ эди. Фақат унинг бу ҳолатда, «хизматга яроқсизлиги учун», «мажруҳ» тамғаси билан хайрлашуви Зоҳидга оғир ботган эди. У Ҳамдам билан учрашган онда «истеъфо ҳақида иккинчи сўз очманг», деб танбех беришни кўнглига туғиб, йўлга чиқди. Лекин Ҳамдамнинг биринчи гапиёқ хаёлини чалғитиб юборди:

- Устознинг олдига белни бақувват қилиб борадиган бўлдик, – деди у чўнтагини силаб қўйиб.
- Маошларини олволдингизми? – деди Анвар содалик билан.
- Ҳой прокурор, совет милициясининг маоши чўнтақни шундай қаппайтириши мумкинми?
- Агар ҳаммаси бир рублликдан бўлса қаппайтирап?
- Зеҳнингга қойилман. Лекин чўнтағимдагиларнинг энг майдаси «қизил сўлкавой». Қолгани йигирма бешталик. Элликталик, юзталик ҳам бор. ОБХССдагиларда майда пул йўқ экан, тантилик қилиб юборишиди.
- Тушунмадим?
- Шу тушуниш қийин масалами? Устозга белгиланган пенсия пулинни эшишиб, капалагим учиб кетди. Ёрдам қилмасак бўлмайди, деб ҳамкаслардан тўпладим.
- Пенсиялари... қанча экан?
- Мен айтмай, сен эшишиб куйма. Совет милициясига бизнинг хизматимиз ҳалол, ўзимиз... – Ҳамдам шундай деб алам билан қўл силтади. – Агар майор Солиев ушлаб қаматган ўғрилар унинг оладиган пенсиясини эшитишса, орқаларини очиб кулишади.
- Фақат ўғрилар эмас, бошқалар ҳам кулиши мумкин.
- Тўғри, лекин ўгрининг кулиши бошқача бўлади. Мен уларнинг феълини яхши биламан. Улар масхара қилиб кулишга куладилар-у, лекин майорни бу ҳолда ташлаб қўймайдилар. Пенсиясига ўн хисса қилиб нафақа тўлаб турадилар.
- «Обшак»данми? Шу ерда ошириб юбордингиз.

Агар қариганимизда бизларга ҳомийлик қилиб сийлашса, ҳозир «ахлат» деб ҳақорат қилишмас эди, бу – бир. Иккинчидан ва энг муҳими – Мақсуд ака бундай садақанинг бир тийинини ҳам олмайдилар.

– Сен дўстларинг билан ҳам прокурорчасига гаплашадиган бўлиб қоляпсан, бу бир. Иккинчидан, сенга мисол тариқасида ҳам бир гап айтиш амри маҳол, учинчидан, агар улар шу ишни қилсалар билки, мақсад меҳрибонлик эмас, балки ҳақоратлаш, «бу кунингдан ўл!» деган маънода тупроқ билан тенг қилиш. Тўртинчидан ва энг муҳими, агар гаров ўйнасанг, мен ўзим қаматган ўғрилар билан гаплашиб, ҳазилни чинга айлантириб беришим ҳам мумкин.

– Буниси қўлингиздан келади, – деди Зоҳид кулимсираб.

– Гап кўлдан келиш ёки келмаслигида эмас, ўғри зотини ҳамма ёмон кўради.

– Тўғрироғи – ҳамма улардан қўрқади, – деди Зоҳид аниклик киритиб.

– Айниқса, прокурорлар, – деб янада аниклик киритди Ҳамдам.

У ҳазил оҳангода гапирган бўлса ҳам, беш кун аввал шаҳар прокуратураси ҳовлисидан икки «Волга»нинг ўғирлаб чиқиб кетилганига ишора қилаётганини анлаган Зоҳид эътиroz билди. Мўлжални аник нишонга олганидан қувонган Ҳамдам эса бу жимлиқдан фойдаланиб давом этди:

– Ҳаммани қўркувда ушлаб турувчи... – Ҳамдам кейинги сўзларга ургу бериб, ҳамроҳининг кўзларига тикилди, – ўғриларнинг тўғриларга ўрнак бўладиган фазилатлари ҳам бор. Масалан, улар дўстларига хиёнат қилмайдилар.

– Шерикларига, – деди Зоҳид унинг гапини бўлиб.

– Хўп, сен айтганча бўла қолсин: шерикларига хиёнат қилмайдилар.

– Чунки хиёнат ўлим билан жазоланади. Демак, уларнинг ўзаро садоқати онгли ва холис эмас, ўлим

кўркуви остида яшагани учун инсоний фазилат саналмайди.

– Гапингни мантиқан тўғри, деб ҳисобласанг, унда жавоб бер: ўлим кўркуви бўлмагани учун тўғрилар бир-бирларига хиёнат қиласерадиларми ёки бошқа сабаб ҳам борми?

– Сабаблар кўп, буни ўзингиз ҳам яхши биласиз.

– Бир мен эмас, ҳамма билади. Барча бало ҳам айнан шунда. Тўғрилар ҳаётида шахсий манфат биринчи ўринда туради. Ўғрилар, сен айтгандай, кўркув остида бўлса ҳам ўз давралари манфаатини баланд қўядилар. Шунинг учун ҳам уларга қарши курашишимиз кийин кечади. Сен ўғриларга кўп рўпара бўлмагансан, шунинг учун уларнинг феълини билмайсан. Тасодифий қотилликларни очиш бошқа, ҳар бир ҳаракати ўйлаб амалга оширилган ўғирликни фош қилиш бошқа. Тасодифан қотиллик қилган одам иккинчи бу жиноятга қўл урмайди. Лекин ўғри эканидан фахрланувчи абраҳни кийма-қийма қилиб ташлаб, сўнг қайтадан тикласанг, барибир ўша йўлидан қайтмайди. Нега шунақа? Уларнинг мияси чатоқми ё юрагида бир иблис борми?

– Чиройли савол. Буни ҳозир Мақсаду акамдан сўраймиз.

– Сўрасанг сўрайвер, мен нима дейишларини биламан: жавоб кейинги саволнинг ичиди – уларнинг юрагида бир иблис бор!

2

Баҳорнинг тотли нафаси билан ёзниңг беҳаловат ҳарорати табиатга эгалик қилиш учун олишаётган паллада хаста одамлар оромларини йўқотадилар. «Қассоб»дан эсдалик бўлиб қолган хасталик туфайли уйга ипсиз боғланган Солиев шогирдларини кўриб кувониб кетди. Ҳамиша кўчада юрган одамнинг уйда ўтиравериши ҳам ўзига яраша азобдир. Кўз кўча

эшигига кадалган, авваллари ёқтирмаган одаминг кириб келса ҳам юрагингда бир чироқ ёқилгандай бўлаверади. Собик майор тез-тез хабар ололмаётган шогирдларидан гина қилмайди, уларнинг ҳар бир дақиқалари ҳисобли эканини билади. Ўзи ҳам шундай эди. Баъзан яқин қариндошларини йўқлашни галга соларди. Сўнг беоқибатлиги учун улардан уяларди. Мана энди эрталабдан кечгача бекор, қани эди кўчага чикиб, қариндошлариникига бора олса! Доктор «секин-секин юраверинг», деб ижозат берган. Аммо аҳли аёлининг ҳукми қатъйирок: яна бир-икки ойсиз кўчага чиқишини ўйлаши ҳам мумкинмас. Солиев «мехр кўзда», «одам тафтини одам олади», деган ҳикматларнинг қадрини боши ёстикқа етгач англади. Тағин ҳам қариндошлари, биродарлари тирноқ остидан кир кидиришмайди, «саломга яраша алик бўлади» ёки «мен касал ётганимда йўқламаган», деб бемехрлик қилишмайди. Касалхонада хушига келганидан бери барчалари атрофида парвона.

Зоҳид билан Ҳамдам учрашиб, устозникига отланишганда гала-гала булутлар осмон юзини тўла қоплаш қасдида изғишарди. Қора булат ок ва қўнғир галалар билан бирлашишни истамай бағрини яшин билан чоклаб сузарди. Ана шу гала Солиев яшайдиган маҳаллани майда дўл доналари билан савалаб ўтибди. Ҳамдам билан Зоҳид олдинма-кейин ҳовлига киришганда муз парчалари ҳали тўла эриб битмаган, пайҳон бўлган атиргуллар матьюс бош эгиб қолган эди.

Айвонда ўтирган Мақсуд Солиев табиатнинг бу зулмидан озор чеккан гулларга ачиниб қаради.

Мехмонлар билан кўришгач, ачинишини баён қилди:

– Осмондан ёғилган нарса неъмат ҳисобланади-ю лекин табиат ҳам баъзан адолатсизлик қилиб қўяди, – деди гулларни кўрсатиб.

– Бу адолатсизлик эмас, бу яшаш учун кураш! – деди Ҳамдам.

— Эҳтимол шундайдир... — Солиевнинг баҳслашишга хуши йўқ эди, шу боис Ҳамдамнинг фикрига қарши чикмади. Устознинг кайфиятини сезган Ҳамдам сұхбат мавзуини бурди:

— Зерикмай ўтирибсизми, ишқилиб? — деди меҳрибонлик билан.

— Беминнат сұхбатдошим бор, зерикишга вақт йўқ, — деди Солиев айвон тўрида турган телевизорга ишора килиб.

— Сұхбатдошингиз соқовми? — деди Ҳамдам кулиб.

— Бу сұхбатдошнинг яхши томони шундаки, мен эшлишини истаган пайтда гапиради, хоҳламасам — соқовга айланади.

— Ҳозир соқовликка ҳукм килинганми? Бечоранинг жинояти нимадан иборат экан?

— Жиноятими? — Солиев кулимсиради. — Тилининг бесуяклиги-да.

Телевизор Москвадаги депутатларнинг мажлисини кўрсатарди. Овозиз тасвирдаги ҳаракатларни кузатган киши юзида беихтиёр кулги пайдо бўларди.

— Томошанинг зўрини топибсиз. Чарли Чаплин ҳам бунақа кино ишлаёлмаган бўларди, — деди Ҳамдам.

— Бу томошага «СССР Олий Советидаги масхара-бозликлар», деб ном қўйганман.

— Сал ошириб юбормаяпсизларми? — деди Зоҳид бу кинояларга қўшилмай.

— Прокуроримизга ҳазил ёкмайди. Бу укахонимиз мутойибалар улашиб бўлингандан кейин түғилгандар, — деди Ҳамдам кинояларини давом эттириб. Зоҳид унга жавобан кулимсираб қўйди-да:

— Гап ҳазилда эмас, бу мажлисда жиддий гаплар ҳам айтиляпти. Янги ҳаво оқимини хис қилиш мумкин, — деди жиддий тарзда.

— Бу ёғи сиёсатлашиб кетди, — деди Ҳамдам унга норози киёфада караб. — Энди «демократияга етишдик», дерсан?

— Бу демократия эмасми?

Савол Ҳамдамнинг гапига эътиroz сифатида берилган бўлса-да, жавоб ундан кутилмай, икковлари ҳам устозларига карашди.

– Мана шу мажлисда мингта депутат ўтирган бўлса, минг хил демократия, минг хил ҳақиқат бор. Ҳар бири ўз демократияси билан сафсата сотади. Ўзининг ҳақиқатини ҳимоя қиласди. Битта демократия, битта ҳақиқат бор, деган фикр хаёлларига келмайди. Сен тўғри айтдинг, – шундай деб Зоҳидга қаради, – жиддий гаплар ҳам айтиляпти. Лекин «куруқ гап қулоққа ёқмас», деган мақол бор. Бизниклардан биттаси чиқиб, куйиб-пишиб гапириб Орол денгизининг қуриб бораётганини билдириди. Эшигтан бўлсанг, унинг чиқиши сенга ёқкан, албатта. Катта минбардан ҳақиқатни айтиш балки сен учун қаҳрамонлик бўлиб туюлгандир. Лекин бу қаҳрамон аканг айтган гаплар ҳаммага маълум-ку? Йигирма-ўттиз йилдан бери тинмай гапирилади-ку? Унинг Сибир дарёлари сувини Оролга буриш ҳақидаги эски таклифини бир рус ёзувчиси чиқиб рад этди. «Шимолий муз океанига салбий таъсир қиласди», деди. Козоқ чиқиб, «Сибир дарёларининг суви Ўрта Осиё ерларидаги тупроқ таркибини бузади», деди. Бу ҳам зўр гапларми? Аввало бу сафсатабозлар сиёсий мажлисда илмий муаммони ҳал қилишмокчи. Ҳолбуки, учовида ҳам илм йўқ. Мен бу масалаларни ўн беш йил олдин матбуотда ўқиган эдим. Сени маҳлиё қилаётган бу қаҳрамонларингнинг битта мақсади бор: минбарга чиқиб ўзини кўзкўз қилиш. «Азага келган хотин ўз дардини айтиб йиглайди», деган мақолни биларсан-а? Буларинг ўшанақа хотинга ўхшашади. Лекин мен бу бечораларни қораламайман. Буларда сиёсий кураш, сиёсий баҳс тажрибаси йўқ. Менинг назаримда кимдир бирор арининг уясини чўп билан кавлаб-кавлаб, ўртага микрофон кўйиб кўйганга ўхшайди.

– «Азага келган хотинлар» ҳам бор, лекин Болтиқбўйидан келганлар унақа эмас-ку?

— Зийраклигингта қойилман. Менам асосан ўшаларни эшитаман. Уларнинг аниқ режалари, аниқ мақсадлари бор. Шу кетишда мақсадларига етадилар.

— Мақсадлари... ажралиб чиқиши? — деди Ҳамдам иккиланган оҳангда.

— Ўзгача бўлиши мумкин эмас.

— Уларни бўш қўйишдан балки бошқа мақсадлари бордир. Осоинликча эркинликка қўйиб юборишмас?

— Ит қуруқ сукни ҳам қизғаниб, ириллайди. Тўкин дастурхоннинг бир улушкини ажратиб олинишига ким индамай қараб турар экан? Менингча, уларнинг дадил гапларни айтишга йўл қўйиб берилиши бежиз эмас. Москва уларга ким эргашишини билиб олмоқчи.

— Шароит туғилса, ҳамма эргашади, бунинг нимаси коронгу?

— Гап ким биринчи эргашади ва қайси йўл билан боради? Корабоғ билан Бокудаги қонли воқеалар, ўзимизнинг Фарғонадаги фожиалар нимага уюштирилди? Энди навбат кимга?

Солиев саволга жавоб кутгандай сукут сақлади. Сиёсат бобидаги бундай дангал гапларни ҳар ким, ҳар ерда айтавермас эди. Айниқса, улар хизмат қиласиган соҳада бу ҳакикатга дуч келингандан кўз чирт юмилиб, четлаб ўтишга харакат қилинарди. Солиев билан бирга бўлинган йилларда сухбат мавзуи асосан жиноят бобида бўлиб, сиёсат оламига камдан-кам ҳолларда назар солинарди. Бир марта чой устида ҳалқаро ахволдан гап очилганда Солиев буларга «бошларингни оғритмаларинг, бизнинг ечадиган масаламиз жиноят оламида, бошқа оламга мўраламай, жим юраверларинг», деб танбех берганди.

Бир дакикалик сукутни Ҳамдам бузди:

— Телевизор сизга беминнат сухбатдош эмас, сиёсий устоз бўлиб колибди-ку? — деди кулимсираб.

— «Устоз» дейсанми? Ўргулдим бунақа «устоз»дан. Ҳамма нарсани айқаш-уйқаш қилиб ташлади. Булардан кула-кула, ўзимиз ҳам ўшаларга ўхшаб коляпмиз. Кўй, бу гапларни, ўзимизнинг сиёсатдан гапир.

Сұхбат мавзуининг жиддийлашганини сезган Солиев шундай деб, жилмайди.

– Бу сиёсатчилар сафсата сотаётган дамларда жиноятчилар ўз сиёсатларини қойилмаком килиб бажарып юрибдилар, – деди Ҳамдам истекゾ оҳангода. – Бугунги асосий масала: бир ашулачи ўлдирилган, унинг қадрдан дўсти эса изсиз йўколган. Бир занжир ҳалкаси бўлмаса, буни оддий жиноятлар сирасига киритиш мумкин эди.

– Қандай ҳалқа экан?

– Иккала ашулачи ҳам Элчиннинг шогирди экан. Элчин эса Асадбекнинг күёви.

– Бу занжирни ўзинг ўйлаб топдингми? Билишимча, Элчин ҳали касалдан ўнгланмаган.

– Ҳа, ўнгланмаган. Қотилликка алоқаси йўқлиги аниқ. Лекин гумоннинг бир учи барибир Асадбек томонга бошлайди.

– Бошламаслиги ҳам мумкин.

– Бошлаб бўлган. Асадбекни шу масалада шаҳар прокуратурасига чакиришган. Кейин узр сўраб, кузатиб кўйишган.

– Қизик... – Солиев афсуслангандай бош чайқади. – Шошилиб-шошилиб, оқибатда ковун тушириб кўйишади-да. Тепадагилар билишадими буни?

Зоҳид ўзига қарата айтилган саволга «хабарим йўқ», деб кўя колди. Ҳозир тилга олинган жиноятга доир ишни олиб бориш икки соатдан сўнг ўз зиммасига юкланишини билганида жавобни бундай қисқа қилмаган, йўл-йўрик суриштирган бўлармиди...

Яна бир неча дакиқа давом этган сұхбатдан сўнг устознинг толика бошлагани сезилгач, ишлари кўплигини баҳона қилиб, хайрлашдилар. Улар кетгандан сўнг Солиевнинг хотини қоғозхалтани бўшатаётиб, бир ўрам пулга кўзи тушиб, аввалига ажабланди. Буни эрига айтмасликка қарор қилиб, «кейин келишганда қайтариб берарман», деган ўй билан жавонга яшириб кўйди.

Асадбек янги қўшқанотлари билан янада баландроқ учишга ҳозирлик кўра бошлади. Аввалги аҳдидан воз кечиб, ўзи жорий этган салтанатидаги конунқоидаларни бирин-сирин қайта ўнглади. Бунинг натижаси ўлароқ, болохонада йигитлар яна пайдо бўлди, Асадбекнинг атрофидаги зирхли кўрғон ҳам тикланди. Гарчи жудолик азоби озаймаганини юзидаги ажинлар ошкор этиб турса-да, у ўзини бошқалар олдида тетик тутишга ҳаракат қиласди.

Абдураҳмон табибинида даволанаётган кезлари унинг қалби бир оз юмшагандай бўлиб эди. Кейин яна аслига қайтди. Чунки у тавба йўлини танламаган, балки бу хайрли амал томон шунчаки бир назар ташлаб қўйган эди. Дунёга муккасидан кетган, унинг алдовларига ишониб, шахватлар оғушида колган кишининг қалби, шубҳасиз, тавба амалидан ғофил, бу неъматдан бебаҳрадир. Бундай одам ўлим жари ёқасида турган бўлишига қарамай, ўлимни эсга олишни ёктиримайди. Эслаган тақдирда ҳам дунёси қолиб кетаётганига афсус қилиб, бунга ўлим сабабчи бўляпти, деган бемаъни хаёлга боради. Ўлимни бу тарзда эслаш яқинлик ҳосил бўлишига эмас, балки Аллоҳдан узоклашишига сабаб бўлади. Ўғлининг ўлими уни баттар узоклаштириди. «Ким Аллоҳ билан учрашишни хоҳламаса, Аллоҳ ҳам у билан учрашишни хоҳламайди», шарафли хадиснинг ҳаётдаги исботи Асадбек ҳаётида ўз аксини топди. Асадбек ғофил эди, жоҳил эди. У ҳаётда ўз хоҳиши бўйича яшашни истарди. Яратган ва тарбиячи бўлган Аллоҳ буйруқларига итоат этиши шартлигини эшишган бўлса-да, бу ҳикматдан кўз юмиб юраверарди. У оламлар Роббисининг «Эй Одам фарзанди, ўлим келмасдан бурун ўзинг учун яхши амаллар қилиб ол. «Бу дунёда килган гуноҳларим охиратда жазосиз қолади»,

деб кибрланма. Чунки яқин кунда Аллох хузурига са-фар қилурсан ва қылган гунохларингдан сүрөт берур-сан. Ҳаётлик даврингдаги орзу-ҳаваслар сени савоб ишлардан колдирмасин. Агар бу ўғитларни рад этсанг, пушаймонлар фойда бермайдиган кунда – қиёматда афсус қиласан», деган хитобидан бехабар эди. Ҳа-бардор бўлган тақдирда бу огохлантиришни қулогига оларми? Ғофил кўзлари очиларми? Дадил равиши-да «Ҳа!» дейиш мушкул. Қалбини шайтонга топшири-ган кимсани ғафлат уйқусидан уйғотиш ғоят қийин...

Асадбек ўз ташвишлари билан банд, Манзура эса эрининг салтанатига бутунлай зид бўлган янги олам-га кириб борарди. Ўғлининг хотирасига бағишлиланган маъракада мавлуд ўқиган Отин ойи унга ёқиб қолган эди. Орадан кунлар ўтгани сайин уни кўргиси келавер-ди, юпанчни айнан шу аёл берадигандай бўлаверди. Сабр қалъаси, тоқат қасрининг калитини шу аёл инъ-ом этадигандай калби ўша томон интилаверди. Келин-лари билан Абдусамати хорижга қайтиб кетишгач, у олам аро ёлғиз қолгандай азобланаверди.

Ўлим – қисмати, қабр – қароргоҳи, тупрок – тў-шаги, Мункар ва Накир – сухбатдоши, курт-ку-мурскалар – улфати, ер ости – хос хонаси, маҳшар-гоҳ – ваъдалашган жойи, жаннат ё дўзах сўнгги ман-зили бўлган ҳар бир кишининг фикру-зикри ўлим, тадбиру тадориги ҳам ўлим учун бўлиши табиий. Манзура ҳам бошқалар каби ўлимдан кўрқади. Лекин у ўзининг эмас, эри ва фарзандларининг ўлимидан кўрқади. Эри тузалмас касалга йўлиққанини билгани-да тунлари билан кўз ёшлари тўкиб, Худодан шифо тилади. Ўғли ётиб қолганида қон ёшлари тўкиб илти-жо қилди. Қанча муножот қилмасин, ўлим уйларига кириб келди. Аммо Манзура эрига ўхшаб Аллоҳ билан ҳақ таланимади. Асадбек шифо толганида шукр қилди. Ўғлидан жудо бўлганида эса ўзига сабр, фарзанди-га жаннатдан жой сўради. Ўзига маълум бўлмаган

қандайдир гунохлар учун ҳақ тўланганини ҳис этиб, ўғлининг рухи олдида тавбалар килди.

Манзурага бу ҳовлидаги барча нарса ҳам бегона, ҳам шумшук кўринадиган бўлиб қолди. Ҳатто бу уйни сотиб, бошқа жойга кўчишни эрига таклиф қилмоқчи бўлди. Лекин ўғлининг сўнгти нафаси чиккан уйдан узоклашишини ўйлаганда жон таслим қилаёгандай туюлди. Мутелик билан умр кечирган аёл энди ёлғиз яшай олмаслигига ишонч ҳосил килди. Отин ойи билан учрашиш ниятида уйдан чиқди. Мавлуд ўқитганда уни кариндошлари таклиф килиб келишганди. Сўрабсуриштириб, шаҳарнинг кунботар томонидаги янги маҳаллада жойлашган уйни топиб борди. Эшик қия очик эди. Кўнғироқ тутмаси йўқлиги учун ичкарига иккиланганича қадам босиб «Овсин!» деб чакирди. Овози паст чикқани учун айвонда меҳмони билан сұхбатлашиб ўтирган Отин ойи чақириқни эшитмай, сұхбатини давом эттириди:

– Не-не баҳодирлар ер тишлади, «дунёга устунман!» деган сонсиз ботирларга, кисрою қайсаларга въяда ҳақ бўлди! Аллоҳ уларни тубсиз чоҳга кулатди. Бас, улар қасрлардан кабрларга, нур балқан бешиклардан коп-коронғу гўрларга кўчдилар. Аёллар ва болаларни эркалаш лаззатидан маҳрум бўлиб, ҳашарот ва очофат қуртларга ем бўлдилар. Таом ва шароб неъматидан кесилиб, қаро тупроққа қорилдилар. Улфатларнинг ҳузурбаҳш базмидан узилиб, даҳшатли ёлғизлик, сўнгсиз безовталик ичра қолдилар. Устоз Газзолий бу китобда шу маъноларни очиб бериб, гўё бизга шундай хитоб қиласилар: айтинг-чи, дунёда ўлимни сақлайдиган бирор қальъа ёки куч борми?! Бор бўлса, у билан ҳимояланинг, қани, ўзингизни ўлимдан тўсиб кўринг-чи? Ҳа, ҳеч ким тўса олмайди. Ҳасан Басрий ҳазратлари шундай деганлар: «Сабрли бўлинг, белни маҳкам боғланг. Кунлар ўткинчи. Сиз гўё карвонсиз. Манзилга оз қолди. «Тўхта», дейилса, бас, чақириқка жавоб берасиз. Кўчяпсиз, манзилга энг яхши нарсалар билан боринг».

Отин ойи шундай дегач, жим қолди. Бундан фойдаланган сұхбатдош аёл ғап бошлади:

– Китобдан шу маңноларни тушуниб, ақлим лол қолди.

– Тушуниб ўқиганингиз, сүңг уққанингиз яхши. Тушунгандарингизга амал қылсангиз янада аъло! Аллоҳни факат илм билан таниш мумкин. Ҳозир илм олишга имкон берилди. Бу имкониятдан фойдаланылмаса, ғоғиллик ботқоғига ботилади. Тўртта хотин йиғилиб миш-мишу ғийбат гуноҳига беланмай, илм саодатидан баҳраманд бўлса, охират саройини курган бўлади. Китобни ўқиб яна нималардан хайратландингиз, тушунгандарингизни айтинг-чи?

– Абу Мусо Ашъорий ўлимларига яқин қолган кунларда ибодатга қаттиқ берилган эканлар. Шунда у кишига «Сал дам олиб, нафсингизга енгиллик бермайсизми?» дейишибди. Шунда у зот бош чайқаб шундай жавоб қайтарибдилар: «Чопаётган отлар маррага етай деб қолганларида бутун жон-жаҳдлари билан ташланыб чопмайдими?! Менинг ажалимга бундан ҳам оз вақт қолди». Кўп ўтмай жон берибдилар. Менга яна халифалардан бирининг минбардаги гапи қаттиқ таъсир қилди, ҳатто ёдлаб олдим.

– Қани, айтинг-чи?

– «Эй Аллоҳнинг бандалари! – деб хитоб қилган экан ўша халифа. – Қувватингиз борича Аллоҳдан кўркинглар. Билинг! Дунё фонийдир, ўлим бошингиз узра соя соляпти, сафар тадоригини кўринг. Қисқагина муддат учун яралган бу дунё лаҳза сайин кемтилиб, соат сайин емириляпти. Кун ва тун аталмиш ғойиб шарпа уни еб битиряпти. Бу майдонга кирган инсон ё зафар қучади ё мағлуб бўлади. Демак, инсон доимо сафарбар туриши шарт. Нафсиға насиҳат этган, тавба қилиб, шаҳватдан ғолиб бўлган киши Парвардигорига ёруғ юз билан йўликади. Ажал качон йўликишини инсон билмайди. Орзу-хаваслар инсонни алдайди. Шайтон унинг ёнида туриб, тавбани кечиктиришга,

гуноҳ килишга ундаиди. Гуноҳ амалларни чиройли кўрсатиб, ўлимдан ғофил қолдирмоқ қасдида бўлади. Огоҳ бўлинг! Сизлар билан жаннат ё дўзахнинг орасида факат ўлим бордир. Вож! Ўлим келса-ю, сиз бундан ғофил бўлсангиз, ўтган умрингиз ўзингизга карши ҳужжат бўлса, кунлар сизни бадбахтлик сари судраса, бу қандай ҳасрат!»

Сухбатдош аёлнинг овози титради.

— Аллоҳ сизни ва бизни Ўзининг неъматига шукр килгувчи, тоатида бардавом этсин, — деди Отин ойи, сўнг бир неча нафас тин олгач қўшиб кўйди: — Ўлимдан сўнгги ҳасратдан асрасин. Шу ёд олганинг гизга қўшимча килиб, Ҳасан Басрий ҳазратларининг сўнгги нафасда айтган гапларини ҳам ўрганинг: «Шошилинг, нажотга шошинг, — деганлар ҳазрат. — Қаён юз буряпсиз?! Каъбанинг Эгаси ҳаққи, билинг, ўлим ёнгинангизда, сиз билан баробар турибди. Парча нонга қаноатланган, ямоқ кийимга рози, ерга ёпишиб ибодатга берилган, хатолари учун йиглаган, укубатдан кочиб, раҳматидан умидвор бўлган кишига Аллоҳнинг раҳмати бўлсин». Шундай деб жон берган эканлар. Минг йилнинг нарисида айтилган бу гапни биз ҳам бир васият ўрнида қабул этиб, амал қилмоғимиз жоиз.

Ховли томон бир неча қадам қўйган Манзура оқ бўз парда билан тўсилган ичкари томон юришдан истиҳола қилиб тўхтади. Парда ортидаги айвондан эшитилаётган бу сухбатга беихтиёр кулок тутди. Кейинги хитобларни эшитди-ю, бадани жимирлаб кетди. Йўқ, ўлим тилга олингани учун қўрқмади, орзуҳавасларга алданиб яшаётган инсонлардан бири эканини яна бир марта англаб, афсусланди. У сухбатнинг давомини эшитишни истарди. Лекин ўғриларча тинглашдан уялди. Шундай туравериши ҳам ноқулай эди. Шу боис бу сафар баландроқ овозда, энди «Отин ойи!» деб чакирди.

Сухбат узилиб, Отин ойи «Лаббай, ҳозир!» деганиччи ўрнидан турди. Сухбатдош аёл ҳам қўзғалиб,

кетишига изн сўради. Парда сурилгач, мезбон билан хайрлашди-да, Манзура билан сўрашиб, чиқиб кетди. Отин ойи Манзурани таниди. Шаҳарга донғи кетган одамнинг хотини ўзи келиб, келганда ҳам ичкарига киришига ийманиб туришидан ажабланди. Лекин бу таажжуб сониялари узоқ давом этмади. Очиқ юз билан яқинлашиб, саломлашди-да, меҳмонни айвонга бошлади. Манзура ҳозиргина сухбатдош аёл ўтирган жойни эгаллади. Фотиҳа ўқилгач, Отин ойи ҳол-аҳвол сўради. Сунг Манзуранинг келиши сабабини билиш учун сукут саклади.

– Мавлуд куни сизни яхши кутиб ололмадим, хафа бўлмадингизми, ишқилиб? – деди Манзура айбдор одам овозида.

– У кун чорловингизни қабул қилишдан муддао зиёфатда еб-ичиш эмас, жаноби Расули акрамнинг муборак ҳаётларидан сўзлаб бермоқлик эди. Меҳмонларингиз бу ҳикоялардан ўzlари учун бир ибрат олган бўлсалар кифоя. Колган иззат-икромлар бекорчи ҳаракат хисобланади.

– Яна бир борармикинсиз, деб таклиф қилгани келувдим.

– Яна мавлудми?

– Йўқ... бу сафар мушкулкушод ўқитмоқчийдим...

Бу гапни эшитиб Отин ойи унга тикилганича жим қолди. Манзура бу қарашни рад жавобига ишора деб ўйлаб, энди ялиниш оҳангига илтимос қилди:

– Отин ойи, йўқ деманг, кунини белгиламадик, айтган вақтингизда ўтказамиз.

Отин ойи чиндан ҳам бу таклифни рад этмоқчи эди. Бирок, бунинг сабабини қандай тушунтиурсам экан, деган мулоҳаза билан ўйга толганди. Манзура ялиниш оҳангига ўтгач, ўзини гўё нархини ошираётган ашулачи ҳис қилиб, хижолат бўлди.

– Опа, илтимос, мени «Отин ойи» деманг. Исмим Афруза. Мен бир кун мавлудга, иккинчи куни мушкулкушодга қатнайдиганлардан эмасман. Кўпчиликка

акл ўргатадиган даражада илмим бўлганида «Отин ойи» деб иззат қилсангиз ярашарди. Ёшлигимда кимё соҳасида ўқиганман, ҳозир шу касбим бўйича ишлайман. Яқинларимнинг илтимосини ерда қолдиргим келмай, зеҳним етганича сухбат қилиб бераман. Сизни кига ҳам шу боис бориб эдим.

Афруза Москвада аспирантурада ўқиётган кезлари бир татар аёлникида ижарада туриб, ундан Ислом илмини ўрганганини айтиб ўтирмади. Ўз ҳаётига доир маълумотларни баён этмоқликка ҳожат ҳам сезмади. Унинг учун ҳозир энг муҳими – бу аёлнинг кўнглини оғритмаган ҳолда илтимосини рад этиш эди. Кўриниб турибдик, бу аёл Ислом илмидан анча узок. Кескин гапириб юборса, шубҳасиз, ранжийди.

– Опа, нима учун мушкулкушод ўқитмоқчисиз? – деди у суюмли сингилнинг меҳрибонлиги билан.

– Биласиз-ку...

Манзура ўғлининг вафотини тилга олишга қийналди.

Афруза унинг ахволини тушунди. Рўпарасида ўтирган аёл шунчаки илтимосчи эмас, фарзанд доғида куйиб адо бўлаётган ОНА эди! У ўз дардини енгиллатиш учун мушкулкушод ўқитмоқчи эмас. Асло! Она-нинг мақсади – фоний дунёни навжувонликда тарк этган фарзандига бокий дунёдаги фароғатни тилаш. Шундай тилакдаги онанинг кўнглига озор етказиш мумкинми? Лекин... кўнглига қараб, гуноҳдан асрараслилк ундан-да ёмонроқ...

– Мушкулкушод ўқитишни ўзингиз ўйлаб топдингизми ё бирор ўргатдими? – деб сўради Афруза ўйчан тарзда.

– Одамлар қилишади-ку...

– Опа, хафа бўлмасангиз, бир-икки нарсани тушунириб кўярдим.

– Вой, нега хафа бўларканман, тушунтираверинг.

– Сизнинг дардингиз менга бегона эмас, чунки, мен ҳам онаман... Ёлғиз ўғлимни Афғонистондан те-

мир тобутга солиб олиб келишган. Жонсиз танасини кучоклаш ҳам насиб этмаган менга. Аллоҳнинг иродасига кўра боқий дунёга кетган яқинларимиз биздан тўкин дастурхон тузаб, зиёфат беришимизни кутишмайди. Улар – дуоталаблар. Ҳар бир яхши ишимиздан ҳосил бўлган савоблардан уларни баҳраманд этишини сўраб Аллоҳга ёлборишимиз керак. Тўғри, бу фарзандларни биз тукқанмиз. Лекин уларни бизга Аллоҳ берган эди. Ўзи истаган вақтда олди. Фарзанд берганида етарли шукр қилдикми? Буйрукларини бажардикми? Энди-чи? Сабрда, каноатда ожиз эмасмизми? Шукр қиляпмизми? Бу гапим сизга ғалати туюлди, а? «Ўғли ўлган одам ҳам шукр қиласидими?» деб ғашланаётгандирсиз? Ҳа, опажон, мен адаш гап айтмадим, бу қисматга ҳам рози бўлиб, шукр қилишимиз шарт. Гиёҳвандлик ёки бошқа бузукчилик билан жон беришса, бизларни иснодларга қолдириб кетишса нима қиласидик? Додимизни кимга айтардик? Аллоҳ жаннатда фарзандларимиз билан бизларни қовуштириш учун оғир синовни берди. Аллоҳим мен билан сизга ўхшаганларга қаратса айтади-ки: «Эй Одам фарзанди, сабрли бўл ва ўзингни паст тут, ўзим сени олий даражага кўтараман. Истиғфор айтгил, мағфират қиласай. Ҳарна сўрагил, мен уни берай. Менга тавба қил, қабул қиласай. Молингдан садака қил, токи молингга барака берай. Қариндошларингга яхшилик қилиб қўшилиб юр, умрингни узун қиласай». Яна «Эй бандаларим! – деб хитоб қиласиди. – Мен бандаларим ичиди бир мўъмин кишини бирон мусибат етказиб имтиҳон қилсан, у менга ҳамд айтиб, менинг имтиҳонимга сабр қилса, у ўша жойидан турганида ҳатодан – гуноҳлардан онаси тукқан кунидек пок бўлиб туради». Тушуняпсизми, опа, биз сабр ва шукр билан бу имтиҳондан ўтамиш, кетма-кет дастурхон ясатиш билан эмас. Лекин эҳсон ҳам яхши, савоб амаллардан хисобланади. Факат эҳсонни тушуниб, тўғри ҳолда, исрофсиз амалга ошириш керак. Тўқ одамларни чор-

лаб, беш-үн хил таом билан сийлаш хайрли эхсон салмайди. Эхсону садақалар мухтожларга аталған бұлсагина савобдан умид қилиш мүмкін. Аллох ана шу савобдан ўтганлар рухини баҳраманд этади. Агар неъматлар исроф этилса, гуноҳ-ку?! Ўтганлар рухига шу гуноҳларни тортиқ қиласызми? Сиз ўқитмокчи бұлаётган мушкулқушоднинг мукофоти гуноҳдан бошқа нарса эмас. Кичикроқ гуноҳ бўлса ҳам майли эди. Бу амал ширк бўлгани учун олимлар уни гуноҳи кабира, яъни жуда катта гуноҳ деб аташади. Ширк – қайси бир ҳолдадир Аллоҳнинг шериги бор, дейишнинг ўзиёқ гуноҳ. Мушкулкушод ўқилганда мушкулларни осон қилиб бериш қандайдир Биби сешанбадан тиланадими?

Афруза шу саволни бериб, жавоб кутмаса ҳам сукт қилди. Манзура бир-икки марта мушкулкушод ўқилган маросимда иштирок этган, аммо ўқилган сатрларнинг кўпи қулоғига кирмаган эди. Эшитгандарини ҳам унугаётганди. Эсида колгани бир етимча қизнинг оғир аҳволију бир хотиннинг мўъжизалари...

– Ҳар қандай ёрдам фақат Аллоҳдан тиланади. Ҳатто пайғамбардан ҳам тиланмайди. Жохиллигимиз учун баъзан азиз-авлиёлардан фарзанд тилаймиз, дарахт шоҳларига латта-лутталаар боғлаб келамиз. Мушкулкушод ҳам ана шунга ўшаган хурофотларнинг бири. Агар мадфун фарзандингиз учун яхшилик тиласангиз, илм олинг, Исломни ўргансангиз савоб топасиз. Илмсиз одамнинг гуноҳ кўчаларига кириб кетиши осон.

– Бир-иккита китоб ўқидим...

– Илм олиш учун бир-иккита китоб етарли эмас. Китобни ҳам танлаб, билиб ўқиши керак.

– Биз... энди... қўлимизга тушганини ўқийверамиз-да, – деб ўзини окламоқчи бўлди Манзура.

– Ундай қилманг. Агар дилингизда илмга мойиллик уйғонган бўлса, мен аклим етганича ёрдам берай.

– Вой... канийди! Сўрашга тилим бормай турувди... вақтингиз бўлармикин?..

– Илм олмоқчи бўлганларга вақтимни эмас, жонимни ҳам фидо қилгим келади.

Афруза шундай дегач, Манзурага диннинг моҳияти ҳакида қисқа тушунча берди-да, кейинги келишига китоблар олиб қўядиган бўлди.

Хайрлашишдан олдин айтиб берган ривоят эса Манзуранинг қалбига муҳрланиб қолди. Уйига қайтаётганида хаёли факат шу ривоят билан банд бўлди: «Барчага ибрат ва маслаҳатгўй бўлган бир орифнинг ўғли вафот этди. Таниш-нотаниш – барча бу фожиадан қайғурди, йиғлади. Бироқ, ориф одам кўз ёши тўкмади. Аҳли аёли бундан ранжиб дедики:

– Фарзандимиз кисмати учун ҳатто бегоналар ҳам зор йиғлаб турса-ю, сиз нега йиғламайсиз? Шунчалар бағритошмисиз? Қалбингиз шунчалар котган бўлса, маҳшар куни қандай килиб инсонларга Аллоҳнинг изни илиа меҳр-шафқат кўрсатиб, шафоат қиласиз?

Улуғ зот аёлига дедики:

– Эй ҳаётимнинг вафоли йўлдоши, йиғламаганимга мени марҳаматсиз, юраги тош котган, деб ўйламагин. Менинг коғирларга ҳам раҳмим келади, уларга иймон насиб этсин, дея дуо киламан. Кўппакларга ҳам ачинаман, ҳатто мени тишлиған кўппакка ҳам. «Ё Раббий, бу бечоранинг феълини ўзгартиргин, одамлардан калтак емасин, унга тош отишмасин», деб дуо қиламан.

Бу сўзларни эшитган аёли:

– Қалбингиз шунчалар шафқат ва марҳаматга тўла экан, нега ўғлимиз учун йиғламаяпсиз? – деб яна гина қилди.

– Инсон бир нарсани йўқотганида ёхуд ундан айрилганида йиғлайди, ранжийди. Ўз фасли ҳеч қишиғаслига ўхшайдими? Фарзанд ўлсин ёки тирик юрсин – улар кўнгил кўзидан йўқолмайди-ку?! У шундок кўз ўнгимда кезиб ўйнаб юрар экан, нега энди сенга ўхшаб йиғлайн, хафа бўлайн? Ўғлимиз бу замон даврасидан чиқди, холос. У йўқолмади, атрофимизда айланиб юрибди, ахир!

Сүнг у ориф одам яна дедики:

— Йиғи ё аламдан, ё айрилиқдан келар экан, мен севганларим билан биргаман. Табиий, ўлган болам билан вуслатдаман. У билан югуриб юрибман. Одамлар уларни тужида курса, мен уйғоқ ҳолда, очик-равшан күрятпман. Бу дунёда ўзимни яширганимда ҳам, борлық дарахтидан туйғу япроғини силкитганимда ҳам у билан биргаман...»

Нече күнларки, Манзуранинг елкасидан нимадир босиб тургандай бўлаверарди. Афрузаникidan қайтишда бу юқдан халос бўлганини сезди. Зулмат ихтиёридаги қалбига ёқилган чироқдан кўнгли равшанлашди. Ана шу равшанлик билан уйига қайтди. Дарвозаси яқинида турган нотаниш аёлга кўзи тушиб, машина ҳайдовчисига тўхташни буюрди. Асадбекнинг амрига кўра, Манзура машинага ҳовлида ўтириб, ҳовлида тушиши шарт эди. Аёлни кўрганда эрининг бу буйруғини биларди. Шу боис тўхтатмади. Дарвоза очилиши билан ичкари кирди. Манзура бундан аччиқланса-да, йигитга гапирмади. Машинадан тушиби билан орқага қайтди. Дарвозани ёпаётган йигит унга савол назари билан қаради-ю, тўхтатишга журъят этмади. Манзура кўчага чиқиши билан нотаниш аёл тез-тез юрганича унга яқинлашди-да, салом берди.

— Худойимга шукур, сизни бугун ҳам учратолмай қайтиб кетармикинман, деб қўрқаятувдим, — деди у Манзура алик олиб, куришгач.

— «Бугун ҳам» дедингизми? Унда... кеча ҳам кутувдингизми?

— Ҳа...

Манзура икки кун кўчага чиқмаган эди. Ўзини кимдир интиқ кутиши мумкинлигини ўйлаб ҳам кўрмаганди. Демак, бу аёл кеча келган... ялингандир, йигитлар қўйишмагандир. «Шунчалик ноинсофлик бўлиши мумкинми?» Манзура кўнглида туғилган бу саволга жавоб қайтаришга ожиз эди. Журъати етиш-

са, буни эридан сўрарди. Эрининг нима дейишини эса билади...

– Опа, менинг уст-бошимга, кўринишими га эътибор берманг. Гапни чўзмай, тўғрисини айта қолай: мен ўтган куни қамоқдан чиқдим. Болаларимнинг ташвишида ўзимга қарагим ҳам келмай, нажот тилаб, тўғри сизнинг олдингизга шошавердим.

– Нажот... Мендан? – ажабланди Манзура. Шу топда Афрузанинг гапини эслади: – Нажотни Худо беради, синглим...

– Худо нажот бериши учун ўзим елиб-югуришим керак-да. Ўзимнинг қўлим калта, кўп ишларга ақлим ҳам етмайди. Агар сиз ёрдам бера олмасангиз... билмадим... ўлимдан бошқа нажот қолмаса керак...

– Болаларингизга нима қилди?

– Ўғирлаб кетишибди.

– Ким?

– Қиморбозлардан гумоним бор. Болаларимни зерим ютқизиб қўйган экан...

Бу гапни эшитиб Манзура титраб кетди. Эрга текканидан кейинги ўзининг аҳволини, кўркувда ўтган кечаларини эслаб, баданига муз югурди.

– Отингиз нима, синглим? – деб сўради бир неча нафаслик сукутдан сўнг.

– Отим Фазлия.

– Фазлияхон, кўчада гаплашмайлик, юринг, ичкари киринг...

Асадбек йигитларига «Мен йўғимда бу ховлига ҳатто бегона пашша ҳам учиб ўтмасин», деб амр қилган эди. Манзура Фазлиянинг елкасига қўлини ташлаб, ичкари бошлагач, улар ноилож қолишли.

2

Султон Маҳмуд ибни Сабуктагин вафотидан юз йил ўтгач, подшоҳлардан бири туш кўрди: қабрда Султон Маҳмуднинг бадани чириб, тупроқка айлан-

ган, аммо икки кўзи тириклигидагидай назар қилиб турарди. Ҳукамолар бу туш таъбирини айтолмасдилар. Шунда бир дарвиш келиб деди-ки: «Мулк, салтнанат бошқаларга қолганидан ҳануз кўз ногирондир»...

Бу ҳикматни Асадбек билмас эди. Кесакполвон ҳам эшиитмаган, эшиитган тақдирида ҳам оддий гап каби қабул қилган бўларди. Чунки унда ҳикмат мағзини чақиш қобилияти йўқ эди. Лукмони Ҳакимдан: «Ҳикматни кимдан ўргандингиз?» деб сўраганларида у муҳтарам зот: «кўзи ожизлардан ўргандим, чунки улар оёқ қўядиган ерни билмагунларича одим отмаслар», деган эканлар. Кесакполвон, гарчи басир бўлсада, оёқ қўядиган жойига қараб олмаган эди. Хўроз қанчалик шиддатли жанг қила олса ҳам, темир панжа бургутга ҳеч қачон teng кела олмаслигини у ўйлаб кўрмаганди. Мушук сичқон тутган онда ўзини шер фаҳмлагани каби у «Асадбекнинг мулки икки кишига эмас, бир кишига колиши керак», деган ўз қонунини яратди. Чувриндининг ўлими бу қонуннинг ғоят тўғри эканини тасдиқ этгандай ҳам бўлди. Лекин у нотавон банда ҳаёт қонуниятини маҳлук эмас, Ҳолиқ яратишини фаҳм этмас эди. У она қорнида ҳам шошилганди – муддатидан эртароқ туғилганди. Асадбек мулкига эга чиқишига ҳам шошилди – ҳаётдан эрта кетди. Ўзининг ҳавасини келтирган тилла-ю жавҳарлари энди кимнинг кўнглини шодлантиради? Яширин темир сандиқдаги бойлик тўплаган кишисига садоқат килмагани ҳолда энди кимга ёлғон саодат ваъдасини берар экан?

Кесакполвоннинг хотини кечаги оқшом қўнғироқ қилганида Асадбек «Ҳадеб бошимни қотираверма, эринг Масковда сап-сариқ жононга уйланиб олган, энди ундан умидингни уз», деган эди. Бу эзма хотинга битта гап камлик қилишини Асадбек фикрлаб кўрмаганди. Нонушта пайти телефон жиринглаганда ҳам кечаги хархаша давом этишини кутмаганди. Гўшакни Манзура кўтариб, «айланай овсин, яхши

ўтирибсизми», деб гап бошлаганида хотинларнинг ўзаро вайсаши бошланди, деб ўйлади. Аммо вайсаши кўпга чўзилмай, Манзура «Ҳа, борлар, ёнимда ўтирибдилар», деб гўшакни узатгач, «яна нима балони бошламоқчи», деб ажабланди.

Кесакполвоннинг хотини салом-аликни киска қилиб, муддаога ўта қолди:

– Мулла ака, кеча ҳазиллашувдингизми ё сариқ мегажинга уйланиб олганлари ростми?

«Ҳазиллашувдингизми?»

Бу сўз Асадбекка малол келиб, қошларини чимирди. «Мен сен билан ҳазиллашадиган эрманми?» деб бобиллаб бермоқчи бўлди-ю, ўзини тийди:

– Ҳа, нима, рашкинг келяптими? Кечаси билан ухломай чиқдингми?

– Бо Худо! Рашк килиб зарил кептими?! Феълини сезиб юрардим. Бир марта «агар ўлсанг, сени кўмиб, мозордан қайтишимда уйланиб келаман. Сенга жаноза ўқиган мулла ярим соатдан кейин мени ўн саккиз ёшли жононга никоҳлаб қўяди», деган. Мегажинни Московдан топган бўлса, у ёқда никоҳ ўқилмайди, мулланинг пули ҳам ёнига қолибди. Уйланса ундан нарига, факат келиб, сейфнинг калитини қўлимга тутқизиб кетсин. Жувонмаргга бу уйдан битта чўпни ҳам бермайман.

Ҳар бир одам калласига келган гапни айтишга ҳақли. Айни чоғда бу гапни эшитган ҳар бир одам бу каллага мушт туширишга ҳам ҳақли. Ҳозирги гапларни Кесакполвоннинг хотини эмас, бошка эр киши айтганида Асадбек муштлашдан қайтмаган бўларди. Бу хотинга эса гап топиб бериши қийин. Шу боис Асадбек кескин равишда:

– Калитни менга бериб кетган, уйингда ўтириб, ҳали бораман, – деб гўшакни жойига ташлади. Сўнг бир зум ўйланиб турди-да, гўшакни яна кўтариб, лозим рақамни терди. Жамшиднинг овозини эшитгач:

– Сейф очадиган уста топ, – деб буйруқ берди.

Мартабаси анча юкорилаганига қарамай, Жамшид ҳамон «хўжайнин «нимага?» деган саволни ёмон кўрадилар, «хўп бўлади»ни ёқтирадилар», деган қоидасига хилоф қилмасдан иш юритарди. Агар ҳозирги топшириқ Кесакполвонга берилганида унинг «банкни ўмармокчимисан?» деб сўраши тайин эди. Эшитадиган жавоби ҳам шунга яраша бўларди: «Сенга ўхшаган майдага ўғриманми, банкни урадиган?»...

Асадбек шаҳар марказидаги уч қаватли иморатнинг ертўласига «видеобар» никобида жойлашган идорасига етиб келганда Жамшид вазифани деярли бажарган эди.

– Уста бир соатдан кейин бўшар экан, – деб хожасининг кўнглини хотиржам қилди.

– Ишонарли одамми? Гуллаб қўймайдими?

Асадбек аъёнининг ишни пухта қилишини билса ҳам, шубҳа булутини ҳайдаш учунгина шундай деб сўраган эди.

– Маҳмуд акамнинг сейфлари бузилиб қолганида очиб берган эди. Қўли гул уста.

– Бунака қўли гулларнинг харидорлари сероб бўлади. Ўғрилар билан олди-бердиси йўқми?

– Бу томони ҳам пишиқ. У нозик идоранинг рўйхатида туради. Ўғрилар якинлашишолмайди унга.

– Ҳайдар акантникига борамиз. Сандигини очиб, бойлигини олиб бермасак, хотини юрак ўйноғи бўлиб қолади. Мен «Эринг Московда уйланиб, ўша ерда қолди», деганман. Уйланган одамнинг ўша ёқда ўлиши ҳам осон. Маржасининг ўйнаши бир ёқлик қилиб кетар, а?

Жамшид хожасининг муддаосини англаб, кулимсираб қўйди:

– Московда аҳмакона ўлим топадиган эркаклар канжиқларининг ўйнашлари қўлида жон берар экан.

– Ҳайдар акантга шуниси ҳам насиб этмади. Аглаҳ бўлса ҳам, уйида жон бериб, одамга ўхшаб кўмилгани яхши эди. Туриб-туриб ачиниб кетаман унга...

Уста келгач, ортиқча гап-сўз қилиб ўтирасдан йўлга тушдилар. Жамшид «тилингга маҳкам бўласан», деб пухталаб қўйгани учун уста «қаёққа, нимага?» деб суриштирмади.

Кесакполвоннинг уйига кириб келган Асадбек пастак думалоқ стол атрофидаги карта ўйнаб ўтирган нотаниш йигитни кўриб, ғашланди. Қошлирини чимириб «ким бу тавия?» дегандай уй бекасига каради. Бу савол назарини англаған хотин дарҳол таништириди:

– Бу Гогик, миравой мастер, бизнинг личний парикмахеримиз.

– Между прочим, Гогик Ленинграддаги международний конкурсда приз олди, – деб онасиға қўшимча қилди Моника.

Кўпни кўрган Асадбек бир қарашидаёқ, «личний парикмахер»нинг бошқа хизматлари ҳам борлигини фаҳмлаб, баттар ғазабланди. Агар хозир ёнида Кесакполвон бўлганида барча ғазаб ўқларини унга караб отган бўларди. Чунки, унинг фикрича, хотиннинг ёмонлиги учун факат эр айбдор. Осмоннинг устуни бўлишни мўлжаллаб юрган одамнинг уйидаги бу аҳволга чидаш мумкин эмасди. Асадбекнинг хаёлига «баттар бўлларинг!» деган ўй ҳам келди. Лекин баттар бўлишига у йўл қўя олмасди. Чунки, Кесакполвон бу дунёдаги мукофотини олиб, ўликлар оламига кетган бўлса ҳам, номи қолган эди. Агар бу оиласдаги бузуклик ҳақидаги хабар эртага кўчага тарқалса, «Асадбекнинг кадрдони Ҳайдарнинг хонадони балчик экан», дейишлари аник.

– Менга қара, «миравой мастер»мисан, яна нима балосан, шаҳарда сартарошхонанг борми?

– Личний ўзимники эмас-ку, но, зачислит қилинганман.

– Энди ўша «зачислит қилинган» жойингда ишла. Буларнинг сочига бит тушса, ўша жойда тараб қўяверасан.

- Вой, муллакажон, унака деманг.
- Сен ўчириб тур! – Асадбекнинг қаҳрли овози баландлагач, хотиннинг нафаси ичига тушди. – Эринг Масковдан телпон килиб, «Гогик деган хотинчалиш остонамни хатлаб ўтадиган бўлса, тумруғидан осиб кўй», деди.
- Ну-у, бу энди жуда через чур не культурна! – деди Моника лабини буриб.
- Сен жикиллама, отанг бунчалик талтайтириб юборганини билмаган эканман. Эринг каерда?
- Юргандир, где попало.
- Эрингни топ. Бугун сенларни бу уйга кўчириб кўйишади. Онанг билан бирга яшайсан.
- Асадбек Мониканинг ҳар куни шу ерда эканини билмасди. Шунинг учун она-боланинг кўз уриштириб олишлари унга ажабланарли туюлди.
- Сейфинг каерда? – деди хотинга қовок уюб караб. Асадбек бу уй битганда «муборак бўлсин»га бир мартагина келган, хоналарнинг вазифалари, ашёларининг ўрни унга номаълум эди.
- Калити кани?
- Калит кўчада пойлаб турибди.
- Хотин бу гапга тушунмасдан талмовсираб турдиди, сўнг Асадбекни эрининг хос хонасига истамайги на бошлади. Дераза рўпарасида чарм диван. Кесак-полвон шу диванда чўзилиб ётиб, деворга чизилган гулларнинг расмига маҳлиё бўлишни яхши кўради. Наққош уста деворни беназир тарзда гулга буркагани учун пўлат сандикнинг ўрни билинмасди. Хотин кўли билан кўрсатмаганида Асадбек бойликни бағрига сиғдирган жойни тополмай турган бўларди. У осто на хатлаб тўхтаган Жамшидга қаради. Жамшид хожасининг амрини шу кўз карашиданок англаб, оркасига кайтди. Икки-уч дақика ўтмай устани бошлаб кирди. Устанинг фақат «кўли гул» эмас, кўзи ҳам ўткир, зийрак экан. Сандик каерда экани айтилмаса ҳам, деворга бир назар ташлашда аниқлаб, яқинлашди-да, портфелидан керакли очқичларини олди.

Асадбек чарм диванда ўтириб, унинг харакатларини жимгина кузатди.

Якингинада бу жойда шу бойликнинг эгаси яйраб ўтиради. Баъзан пулларни олиб санаб, тилла, жавохир буюмларни бир-бир силаб, қалби роҳатланарди. Зайнаб ўғирланган кезлари Асадбек рухи синик, маъюс оҳангда «Топган-туттганларимиз невара-чевараларимизга ҳам етиб-ортади. Бизга яна нима керак?» деганида Кесакполвон унга ўша заҳоти жавоб қайтармаганди. Уйга келиб, шу диванга ёнбошлаб ўйлаганди: «Бизга яна нима керак?» дедими? Тентак! Бу дунёда нима қилиб юрибмиз ўзи! Бой бўлмасанг сени бирор одам ўрнида кўрмайди. Худо бериб турган пайтида тўплайвермайсанми! Невара-чеварангга етадими ё йўқми, санаб нима қиласан? Санаб адогига етадиган бойлик бойликми?! Тарозида тортадиган бўлганингда керилсанг арзиди...»

Ўқилоннинг яқин орада чувалчангга айланаяжаги, тахтга ўзи ўтиражаги ҳақидаги ширин умид ҳам шу диванда ётганида туғилган эди.

Москвада ўлдирилган одамнинг арвоҳи ўз уйига келиб, сарсари кезадими ё йўқми – буни ҳеч ким билмайди. Агар шундай бўлиши мумкинлиги тасаввур этилсами...

...ширин орзулатири туғилган диванда Асадбекнинг хон тахтини эгаллаган каби ўтиришини кўрган Кесакполвоннинг арвоҳи қанчалар азобланар экан? Яна бир неча дақиқа ўтиб, пўлат сандиқ очилгач, бойлигининг хотини қўлига ўтганини кўраётib арвоҳ қанчалар нолалар қиласан...

Уста ишини бажариб, эшикни салгина қиялатиб очди-да, ичкарига разм ҳам солмай, орқасига чекинди.

– Шу қулфга мослаб калит ишлаб берайми? – деб сўради у, асбобларини портфелига жойлаётib.

– Йўқ, йўқ! – деди хотин шошилганча. – Янги сейф буюриб қўйганман.

Хотиннинг шубҳаланганини сезган уста, оғринса-да, индамади. Асадбек унинг кўнглини оғритмаслик

учун «Калит кейинроқ керак бўлади. Ўшанда чақирамиз яна», деб қўйди.

Жамишид устани эргаштириб, изига қайтди. Хотин «Асадбек ўрнидан туриб келиб, сандик ичини бир тафтиш қилар», деган хавотирли ўйда унга савол назари билан қаради. Асадбек ўрнидан турди. Аммо пўлат сандик томон эмас, эшикка қараб юрди. Остонаяга етгач, тўхтаб, унга ўгирилди. «Отлар топиб, эшаклар ейди» деган мақолнинг исботи шу бўлади» деб ўйлади. Бирок тили бошқа гапни айтди:

– Эрингни қарғайверма, шунча бойликни сенга илиниб йиққани учун дуо кил. Орқа-олдингга қараб сарфлассанг, етти пуштингга етади.

– Бо Худо, ётиб еганга тоғ ҳам чидамайди, мулла ака!

– Сен ётиб ема, юр, бирни ўн қилиш харакатида бўл. Хоҳлассанг, эрингнинг соғин сигирларини ўзингга хатлатиб бераман.

– Қанака соғин сигир?

– Эринг кооперативларини шунаقا дейди. Такси кооперативи бор, яна чойхонами, хуллас, алланима балолари бор. Шу ишларни юритолсанг юрит, бўлмаса, фойдаси Масковдаги кундошингта оқиб кетаверади.

– У мегажин заҳаргинани ютсин. Ўзингиз бир ақллирок одам топиб берсангиз, куёв билан биллалашиб амаллаймиз.

– Ҳа, амаллайсан... Сен бундаги бойликдан озгинасини эрингга атаб олиб қўй. Балки қайтиб келар?

– Мегажини билан ўша ёқда кўшмозор бўлсин. Укангиз... «карғама» дейсиз-у, гўрсўхтани қарғамасам юрагим ёрилиб кетади-да...

– Ўзинг биласан. Қарғишинг уриб, ўша томонларда ўлиб кетса, кейин пушаймон ейсан.

Асадбек шундай дегач, чиқиб кетди. Хотин пўлат сандик ичига бош сукишни ҳам, меҳмонни кузатишни ҳам билмай гангиг қолди. Асадбекнинг кадам товушлари узоқлашгач, сандик эшигини ланг очди.

Кесакполвоннинг аҳмок қиликлари кўп эди. Бирок, ўғрилик кўчасида улгайгани учун эхтиёт чораларини ҳам унутмасди. Ўғриларга хос эҳтиёткорлиги туфайли яна бир жойга бойлик яширганди. Бунинг сирини ҳеч ким билмагани сабабли ер остида қолиб кетди – ҳеч кимга насиб этмади...

3

Асадбек ёмон хотинлар хақида турли гап-сўзлар эшитган, лекин бунақаларга ўзи рўбаро бўлмаган эди. Кесакполвоннинг хотинини эси пастроқ, тилига эътиборсиз бир вайсаки деб биларди. Унинг бу даражада bemexр, тошбағир эканини тасаввур ҳам этмаганди. Уйдан чикар маҳалида «Кесак бу хайвонни аллақачон уриб ўлдирвориши ё уч талоқми, саккиз талоқми қўйиб, йўқотиши керак эди», деб ўйлади. Мирзо Бобур Хусайн Бойкар оиласи хақида сўзлай туриб, «биринчи хотини шу даражада ёмон эдиким, ул гўё бул дунёдаги дўзахнинг айнан ўзи эрди, Хусайн уни қўйди ва дўзах азобидан кутулди», деганини Асадбек билганида «Ҳайдар бу дунёдаги дўзахига у дунёдаги дўзахни улаб кетди», деган бўлармиди...

Уч қаватли бино ертўласидаги ҳашамдор хонасига киргунига қадар ҳам Жамшидга индамади. Идорани бошқа жойга кўчирмасликка карор қилганидан кейин бу ер тезлик билан таъмирланган, ҳатто деворларнинг ранги ҳам ўзгартирилиб, барча жиҳозлар янгисига алмаштирилган эди. Хонада Чувринди билан Кесакполвонни эслатувчи ҳеч нима колмаганди. Бўтқанинг ўрнига қўйилган йигитни топиш осон бўлмади. Оёқ-қўли чакқон, тили тиш ҳатламайдиган одамни топиш унча қийин эмас. Лекин садоқатда барчага ўрнак бўла оладиганини бирданига аниқлаш қийин. Жамшид тавсия этаётганларнинг барчаси садоқатли бўлишга қасам ичишга тайёр. Лекин тилда айтилгани қалб қасами билан кувватланадими ё йўқми – буни ҳеч ким аниқлаб

беролмайди. Узок вакт текшириш, йигитни ҳамиша шубҳа остида назорат қилиш ҳам яхши натижа бермаслиги мумкин. Шу боис Жамшидга кариндошлиги бор йигитни танлаб, қошлари қалинлигига ишора килиб, унга «Қорақош» деб лақаб берди.

Қорақош Бўтқага нисбатан сезгирроқ ва чақконроқ эди. Ҳожасининг кайфияти бузук ҳолда қайтганини фахмлаб, буйрукни кутмаёқ чой кўтариб кирди. Асадбек «сен айтдингми?» дегандай Жамшидга қаради. Ҳожасининг жаҳли чикиб турганида бақириб юбориши мумкинлигини билган Жамшид бу савол назарини англамагандай индамади. Қорақош чой куйиб узатгач, оркага тисарилиб «буюринг, ҳожам», дегандай қўл боғлади. Гарчи буйрукни Асадбекдан кутаётган бўлса-да, Жамшиднинг имлаб қўйганини қўриб, изига кайтди.

– Уйланадиган бўлсанг, қизнинг етти пуштини сўраб-суриштири. Кошу қўзига хумор бўлсанг, ана шунақасига учрайсан. «Кўзини сузиб, қийшанглаб турадиган бу жононинг сенга икки дунёда хотин бўлмайди», деб Ҳайдар акангга бошида айтганман. Ҳайдар аканг бу тавия билан ётмай қўйганига минг йил бўлгандир. Шунинг учун ҳам бунга эри тирикми ё ўликми – барибир. Вакти келиб, «Ҳайдар акамни Москвада ўлдириб кетишибди», деб хабар берганингда башарасига яхшилаб караб ол: тарикча ачинишни кўрмайсан. Одамлар айб қилмасин, деб ёлғондан кўз ёши килиб берар, лекин юраги йигламайди. Юраги йигламайдиган хотиндан Худо асрасин! Сени Маҳмуд тарбия қилгани билан, Ҳайдар акангга ўхшаб кўп бевош юрасан. Эҳтиёт бўл, шунақасига илиниб қолма.

– Хўп, Бек aka... лекин... менинг уйланадиган ниятим йўқ.

– Қаматворган хотиннинг алами ҳали ҳам борми? Уйланмайман, дейишинг нотўғри. Одамлар тушунишмайди, маломатга қоласан. «Бу йигитнинг хотин зотига нафрати бор экан», дейишмайди, «майдақадам

бўлса керак», деб ҳукм чиқариб кўяверишади. Йигит кишига ёмон от бир ёпишмасин, кейин қутулиш қийин. Агар ёнимда юришни истасанг, оила куриб, бола кўришинг шарт.

Жамшид жавобга оғиз жуфтлаган пайтда эшик қия очилиб, Қорақош кўринди:

– Бек ака, Масковдан телефонда сўрашяпти, – деди ичкари кирмай.

– Кимлигини сўрамадингми? – деди Асадбек, норози оҳангда. Унинг талабига кўра, Коракош тўлик маълумот бериши керак эди. Коракош дарров хатосини тузатди:

– Сўрадим, «Хонгирейман», деди.

Бу гапни эшитиб Асадбек билан Жамшид бирбирига ажабланиб қаради.

– Адашмадингми, аниқ шунаقا дедими? – деб сўради Жамшид унга яқинлашиб.

– Адашмадим: «Хонгирейман, хўжайнингга «княз Хонгирей чакиряпти», деб айт», деди.

Асадбек гўшакни олиб, кулоғига тутгандан кейин хам дарров гапирмади. Қандайдир товуш эшитишни истагандай пича кутди. Кейин бўғиқ овозда «Алло», деди.

– Саломатмисан, Бек, эшитишимча йўталмай қўйганмишсан, а? Одамнинг йўталмай қўйиши баҳти кулганидан даракми ё бирон кулфатнинг хабарими бу? Сен нима деб ўйлайсан?

Овоз таниш туюлди, лекин кимлигини аниклай олмади. Унинг учун бир нарса аниқ бўлди: «Мен Хонгирейман», деб телефонга чакирган бу одам асти Хонгирей эмас. Сурбетлик билан гап бошлишига караганда ўз кучу қудратига ишонадиган тоифадан. Асадбек Хонгирейнинг ўлимини эшитган онда қасосдан маҳрум бўлгани учун алам ёғида коврилган, айни дамда, ғанимнинг ўлимидан сўнг, хотиржамлик курсисига ўтиргмаган ҳам эди. Чунки у ўтни ўчириб, чўғини қолдириш, илонни ўлдириб, боласини сақлаб

қолиши донишмандлар иши эмаслигини яхши биларди. «Үрмонни кимсасиз деб ўйлама, қайси бир бута орқасида оч қоплон ётгандир», деганларилик, Асадбек ўша қоплоннинг ириллаб товуш беришини кутаётган эди. Ҳозир унга қоплон терисидаги ўша ваҳшийнинг ким эканлиги номаълум эди, холос. Ўзини «Хонгирей» деб таништирган одам унинг хавотирланишини ёки ҳаяжонланишини, ҳеч бўлмаганда ажабланишини кутганлиги аник. Асадбек буни тушунгани учун ҳам сир бой бермай, менсимаган оҳангда сўради:

– Ким бу?

– Бизларни унутиб кўйдингми, Бек? Ўғри биродарлар сени ҳали эсларидан чиқаришганича йўқ.

– Ўзинг кимсан?

– Оббо, ошнам-е, овозимдан танимадингми? Йўталинг тузалиби-ю, кулок кетибди-да, а? Агар Худо эсингни ҳам олиб қўйган бўлса, аҳволингга ҳавас килмайман. Энди Москвани, «Оккуш кўшиғи» ресторанини кўз олдингга келтир: уч киши ўтирибмиз – Хонгирей, сен ва мен.

Асадбек энди таниган бўлса-да, дарров жавоб бермади. Чунки бу одамнинг Хонгирей номидан гапира олишга журъат этишини кутмаган эди.

– Ҳали ҳам эсламадингми?

– Эсладим: Моргашмидинг? Ҳа, Моргаш, «ўликлар кироли», тўғрими?

– Тўғриликка тўғри, лекин қўполликни сал оширвормадингми?

– Қўполлик қилаётганим йўқ. Хонгирей шундай деб таништирган эди. Бопқача исминг борлигини мен билмайман.

– Бу гапинг ҳам тўғри. Хонгирей ҳар хил номларни тўкиб, ҳазиллашишни яхши кўрарди. Эшитгандирсан-а: Аллоҳ уни ёнига чакирди, лекин у ўлгани йўқ. Хонгирей ўрнига унинг сояси Гирейхон қад ростлади. Англадингми? Гирейхон – менман! Сен менга бир нарсани яширмай, очик айт: Хонгирейнинг ўлими

муносабати билан бошлаган байраминг адогига етди-
ми ё хали ҳам давом этяптими?

— Мен бирорнинг ўлимидан шодланадиган маҳлук
эмасман. Сен ҳозирча шунинг ўзини билиб қўйсанг
етарли.

— Сен мени билмайсан, лекин мен сенинг калланг-
даги ўй-хаёлларгача биламан. Мени шу пайтгача ҳеч
ким лақиллатиб кетмаган. Сен ҳам ҳозирча шуни би-
либ қўйсанг етарли. Хонгирей оддий одам эмас эди.
Янгишмасам, у сенга ука қатори эди, а?

— Вакти келганда буни Худонинг ўзи ажратиб ола-
ди. Сен гапни аччик ичакдай чўзмасдан мақсадингни
ўғил болачасига очик гапир, бекорга қўнғирок
қилмагандирсан?

— Мақсадимми? Менинг ҳеч канака мақсадим йўқ.
Хонгирей ўладиган куни сени кўп эслаган эди. Ни-
магалигини ўзинг биларсан. Ҳархолда сен мендан
қўрқма.

— Шунақами? Хонгирейнинг ўзидан қўрқмаган
одам соясидан чўчир эканми?

— Тилингни тий! Сен бир нарсани унутма: Хон-
гирейнинг ўлими сенинг ғалабанг эмас! Сенинг
Москвадаги қашқирларинг шодланишни жуда эрта
бошлаб юбориши. Ўрисларнинг «Ғолибларни айб-
ламайдилар» деган маколи бор, а? Сен ҳам, бу ер-
даги қашқирларинг ҳам ғолиб эмассанлар. Шунинг
учун сенларни айблаш мумкин. Сен, Бек, саломатли-
гингни эҳтиёт қил, яна йўталиб юрмагин. Худодан
сўрайсанми ё йўқми, барибир иккаламиз учрашамиз.
Мени «Ўликларнинг кироли» деб атадинг. Оқ сурпга
ўралиб, кироллигимга меҳмон бўлиб келишдан олдин
мен билан дўстона равишда, тирик ҳолингда учра-
шишни ният қилавер.

Шу пўписадан сўнг у томондаги гўшак қўйилди.
Асадбек унга жўяли жавоб беришга ҳам улгурмади.
Бир томондан шундай бўлгани ҳам дуруст эди. Гўшак
қўйилмаса, ўзаро пўписалар давом этаверарди. Теле-

фондаги қурук гап билан эса ҳеч қандай ҳақиқат юзага чиқмайды.

Асадбек гүшакни жойига қўйиб, ўйга толди. Жамшид «ким экан?» деган саволдан тийилиб, сабр қилди. Уч-тўрт дақиқалик сукутдан сўнг Асадбек унга қараб, сўради:

– Хонгирейнинг кўлида юрганингда «ўликларнинг кироли» ҳақида эшитганмидинг?

– Моргашми? – деб ажабланди Жамшид. – Эшитганман. «Хонгирейнинг ўнг кўли» дейишарди. Москвадаги ҳамма ўликхоналар шунинг назоратида экан. У ёқда ўликни ювиб, кийинтириб, тобутга солиб бериш ҳам даромадли ишга айланиб қолибди. Ҳозир ўша билан гаплашдингизми?

– Ҳа. Хонгирейнинг ўрнини эгаллаганга ўхшайди.

– Пўписа киляптими?

– Пўписа дейсанми? Менга пўписа қила оладиган одам ҳали отасининг белида юрибди. Энди бир ўлаксага таъзим қилишимиз колувди... Тинч яшаб, тинчлик билан ўлиш пешонамга ёзилмаган шекилли. Жамшид, акаларингнинг хатоларини биз тақрорламаслигимиз керак. Тарзан билан Сурнинг юриш-туриши қанақа?

– Уларга bemalol ишониш мумкин.

Асадбек «бунака ҳолатда мен ўзимга ҳам ишонмайман», демоқчи бўлди-ю, аммо фикрини ошкор килмади. «Ишонганинг яхши», деган маънода бош ирғаб кўя қолди.

V б о б

1

Абдураҳмон табиб тунни бедор ўтказди. Озми-кўпми илми бор, ҳаёт тажрибалари ҳам етарли бўлсада, бу кечдаги воқеадан аниқ бир хулоса чиқара олмади. Кўнгли бир шумликни сезиб, безовталанарди-ю,

аммо буни шайтон васвасаси деб билиб, хаёлини бошқа томон буришга ҳаракат қиларди. Бомдодни ўқигач, Ўшга тушиб, яқинларини зиёрат этмоқ аҳдида тайёргарлик кўрди. Зиёрат аслида бир баҳона, асл мақсад ўша томонларда бирон янги гап эшишиш эди. Агар бу атрофларда бир кулфат олови ёқилишга тайёргарлик кўрилаётган бўлса, унинг назарида, марказдагилар буни билишлари керак эди. У йўлни тұғри автобус бекатига олмай, қабристон томон бурилди.

Гўрўғли уни кутаётгандай, хужраси ёнида йўлга кўз тикиб турарди.

– Ҳа, кечаси пайтавангга қурт тушиб қолдими? Саҳармардонда қайга отландинг? – деди у, саломга алик олгач.

– Қадрдонларни бир йўқлаб келай, – деди Абдураҳмон табиб.

– Қайдаги қадрдонларингни айтяпсан: бу ерда ётганларними ё бундан наридагиларними?

– Ўшдагиларни...

– Ҳар ерда йўқлашга арзийдиган қадрдонларнинг бўлгани яхши. Яккамоховликдан Худо асрасин. Ўшнинг йўли бу ердан ўтмайди, мендан сўрайдиган гапинг борми? Дардинг бўлса ёрила кол.

– Кеча Коравой бир шумликдан дарак берди. Ўйлай-ўйлай нималигини билолмадим. Эҳтимол, сиз сезгандирсиз?

– Мен валий эмасман. Ўликларга яқин бўлганим учун кўнглим бъузан бир нималарни сезади. Бошқасини билмайман. Шумқадамнинг қадамидан ёмонликдан бошқа яна нима кутиш мумкин? Кўнглим бир нарсани сезиб турибди: шу икки-уч куннинг ичida валади зино ўлса керак. Унга янги гўр кавламайман. Кўкшапканинг лаҳадини очаман-у суюкларини суриб, шунинг ёнига қўяман. Икки фосик биргалашиб ётаверади... Сенам... – Гўрўғли Абдураҳмон табибга синовчан тикилди: – «жаноза ўқиймиз», деб хархаша қилмайсан.

– Мусулмоннинг боласига жаноза ўқиш керак, –
деди Абдурахмон табиб ишонкирамаган оҳангда.

– Қанақа мусулмонликни айтасан? Ким эди мусулмон? Кўкшапками? Унга ҳам жаноза ўқиган эдиларинг. Қанчадан-қанча иймон эгасини қуритди? Ўша ҳам мусулмонмиди?

– Кўйинг бу ўтган гапларни, гуноҳларига ўзи жазо олади у дунёда.

– Ўтган гаплар, дейсанми? Гўрга киргач, ҳаммаси унугиладими, тупрок ҳамма абллаҳликларни кўмиб ташлайдими?

– Китобда «Нажо ал-махфуфун ва ҳалакал масқулун», дейилган...

– А? Нима дединг?

– «Юки енгиллар нажот топади, гуноҳи оғирлар ҳалок бўлаверади».

– Тушумадим? Қаерда ҳалок бўлади?

– «Ҳалок бўлаверади» дегани дўзахга тушишини билдиради.

– Бу гапинг тўғри.

– Бу менинг гапим эмас, мен илми йўқ бир одамман...

– Илмим йўқ, деб паст кетма. Ҳар балога аклинг етади. Домлаларга ҳам баъзан гапинг ўтишини мен билмайманми? Фақат ҳужжатинг йўқ сенинг. Лекин ўша катта домлаларга айт: Кўкшапка тоифасидагиларга жаноза ўқилмаса, унга ўҳшаганларнинг кўзлари очиларди. «Менам шу кўйга тушмай», деб гуноҳдан тийилишарди. У дунёдаги жазо қанақа бўлишини ким билиб ўтирибди?! Бу дунёдагисини ҳам кўрсатиб туриш керак. Сен нима десанг деявур, Коравойга ўзим кўрсатаман. Унинг бу ерга келишига яқин қолди. Аслида унга бу ердан жой бермаслик керак...

«Бу дунёдагисини ҳам кўрсатиб туриш керак...»

Гўрўғлининг қўлидан келганида кўрсатишдан тоймас эди. Афсуски, унинг ўликларни кўмишдан ўзга иши йўқ. Бундан бошқа масалаларда ундан би-

ров маслаҳат ҳам сўрамайди. Кўчада кўрганида саломлашгиси келмайдиган, қўл бериб кўришишдан ҳазар қиласидиган одамлар яқинларидан бири ўлганда қабристонга келиб у билан қадрдонлар каби омонлашади. Кейин дардини айтиб, «қаердан тузукрок гўр қазиш» бўйича маслаҳат сўрайди. Кўчада назарга илмаганларидан Гўрўғлиниң жаҳли чиқмайди, бунга кўнишиб кетган. Одамлар майит учун жой танлай бошлишганида ғаши келади. Баъзан дуч келган ерни кўрсатиб «Энг яхши жой шу. Худди шох Жамшиднинг кўшкида ётгандай мазза қилиб ётади», деб пиchinг қилади. Феъли айниб турган бўлса, «яхши жой талашиш кибрли тириклар орасида – ер тепасида бўлади, ернинг таги бир хил: яхши-ёмон жой йўқ, каерда ётса ҳам барибир лаҳад қуртлари еб адо қилади», деб тўнғиллаб қўяди. Бу дунёда кўп ёмонликлар қилиб ўтган одамга гўр кавлагиси ҳам келмайди. «Бунақаларга жаноза ўқиш керакмас», деб фақат Абдураҳмон табибга айтган. Азбаройи юраги кон бўлиб кетгани учун шундай деган. Аслида дунёдаги ғаламисликларга эътибор қилмаса ҳам бўлади. Унга нима! Битта қорнидан бўлак ғами йўқ. Дунёда ким гўрковларнинг подшоси бўлибди-ки, у буни орзу қилса! Қишлоқнинг бир чеккасида, дунё ташвишларидан нари яшаётгандай туюлгани билан бир қавмнинг иккинчи қавмга зулм қилишига бефарқ қараб тура олмасди. Бу зулмга ўзи жазо ҳам ўйлаб топган, бу жазо усули ҳатто Абдураҳмон табибга ҳам сир эди. Майит лаҳадга жойланганда юзи очилиб, боши қиблага мояил қилиб буриб кўйилади. Кўкшапкага ўхшаганлар кўмилаётганда Гўрўғли бу одатга хилоф қиларди: «Умрини куфрда ўтказгандан кейин ётиши ҳам шундай бўлсин, Каъба томонга қараб ётишга арзимайди» – унинг ҳукми шу эди. Ёмонлар ҳакида гап кетганда бир куни у Абдураҳмон табибга: «бунақаларга лаҳад кавламай фақат белдан пастини кўмиш керак, чириб йўқ бўлиб кетгунича одамлар унга тупуриб

ўтсиналар», деганди. Абдурахмон табибга унинг бу гапи ғоят шафқатсизлик, ҳатто ваҳшийлик бўлиб туюлиб, уни анча койиганди. Аллоҳ томонидан белгилаган кабр азоби ҳакида гапириб, унга танбех берганди. Ҳозир бу гапни айтмаган бўлса-да, ота-болани бирлаҳадга қўймоқчи бўлиши унга малол келди. Ота ёки она қўйилган лаҳадга орадан йиллар ўтиб, фарзандни қўйиш одати бор. Бундан ҳеч ким оғринмайди. Ҳатто баъзилар «отам ётган лаҳадга қўйинглар», деб васият ҳам қиласидилар. Аммо Гўрўғлининг ҳозирги гапидаги оҳангдан жазо ҳукмини англаш мумкин эди. Абдураҳмон табиб малоллангани билан ҳозир баҳслашгиси келмади.

«Демак, Коравойнинг хавотири бежиз эмас», деб ўйлаган Абдураҳмон табиб бу ҳақда бошқа сўзламай, «Ўшдан сизга нима олиб келай?» деб сўради.

– Мен димоғига қурт тушганлардан эмасман, бир чеким яхши нос билан қўнглимни олиш мумкинлигини ўзинг биласан.

Абдураҳмон табибга унинг одати яхши маълум: носдан бўлак ҳар қандай совға-саломни қайтаради. Совғанинг оқибатини миннат деб билади. Мусулмон биродарларнинг бир-бирларига ҳадя қилишлари яхши фазилат эканини айтиб, тушуниришга ҳаракат қилса ҳам, ўз билганидан қолмайди.

Абдураҳмон табиб автобусда кетаётганида кулогига чалинаётган йўловчиларнинг гапларига диккат қилди. Хавотирга арзирли сўз эшиитмади. Шаҳарга тушиб ҳам атрофни зийраклик билан кузатди. Ҳамма ўз ташвиши билан банд. Чойхоналарда ошхўрларнинг гурунги авжида – зулм олови ёқилишидан дарак йўк.

Сой бўйидаги чойхонада хордик чиқаргач, изига қайтавериши ҳам ўйлади. Бироқ, кўнгил хотиржамликка бегоналигича қолавергач, киз ўртоғиникида бир кеча қолишга қарор қилди. Болаликда ялангоёқ кўча чангитган ошналарининг қатори анча сийрак-

лашиб қолган. Ўн тўрт дўсти қишлоқда бўлса, биттаси – Мирзаали Ўшда. Аслида унинг бу шаҳарда қиладиган юмуши йўқ. Қишлоқда туғилиб улғайган одам танлаган касб шаҳардан бошқа ерда бўлмаса, иложсиз. Мирзаали муаллимлигини қишлоқда қилса ҳам бўлаверарди. Аммо у тақдир ипини хотини тақдирига шунчалар қаттиқ боғлаганки, узиб келолмайди. Хотинининг тайин ҳунари йўқ. Аввал комсо-молда ишлаб юриб, сўнг каттами-кичикими амалларни эгаллади. Осмони фалакда учган дамлари ҳам бўлди. Мирзаали ўшанда оддий муаллим эмас, «раҳбар хотиннинг эри» деган мартабада юрди. Яхшики, Эсини йўқотмади – таклиф этилган мансабларнинг биронтасини кабул қилмади. «Осмонда учәётган хотинимнинг эрта-индин ерга қўниши бор. Эплаб қўнса – хўп-хўп, патлари юлиниб тушса, менам знамни кўраман. Хотинимга қўшилиб учсан, мен қўнишнинг уддасидан чиқолмайман. Самоворхонага чиққанимда бирор менга чой узатмай ҳам қўяди», деб тўғри ўйлаган экан. Хотини комсомолда ишлаб юрганида бир киз туккан эди. Кейин «космонда учишимга халал беради», дебми туғишдан ўзини асраганди. Ўзининг ҳаётини таҳлил этиб тўғри хулоса чиқара олмаган хотин энди қизини парвозга тайёрларди. Осмондаги қизининг қаноти соясида хузурланиб яшашни истарди. Она-боланинг бу ҳаракатларидан энсаси қотган Мирзаали уйда камрок бўлиш учун ҳам мактабдаги ишини ташламаган эди. Мактабда эр ўқитувчилар деярли қолмагани сабабли бу кариянинг ишдан бўшаб кетмаслиги директор учун муддаонинг ўзи эди. Аввалги директорлар «амалдорнинг эри мансаб курсимни олиб қўймасайди», деган хавотирда юришарди. Энди бундай хавотир ҳам йўқ. Мактаб – Мирзаалининг жони-жаҳони бўлиб қолган. Самоворхонадаги гурунглари эса уни ортиқча ташвишли ўйлардан ихота қиласиди. Қишлоқдан дўстлари ёки қариндошлари келиб қолган кун – у учун байрам.

Абдураҳмон табиб уникига кўпам келмайди.

Келиб-кетиб турдиган ошналари оркали унинг ахволидан хабардор бўлиб турди. Камқатнов дўст меҳмонга келса, бошқаларга нисбатан азизроқ туюлади. Шу туфайли очиқ эшик остонасида Абдураҳмон табиб кўрингач, Мирзаали шодланиб кетди. Гарчи икки ҳафта илгари қишлоқдаги тўй баҳонасида кўришишган бўлса-да, дўстининг меҳмон мартабасида ўз уйида кўришдан кувонди.

— Кўнглим сезган эди, — деди у фотиха ўқилгач. — Бугун имтиҳоннинг охиригача ўтиргим келмади. Имтиҳон деса, энсам қотадиган бўлиб қолган. Ўкувчиларнинг ота-оналарига солик солишган — тогора-тогора таом келади. Имтиҳон тугагач, зиёфат бошланади. Бирор рози бўлиб юборади, бирорининг кўнгли оғрийди, бошқаси «еб тўймагурлар, тешиб чиқсан-а!» деб қарғаб қолиши ҳам мумкин. Шуни ўйлаб, томоғимдан бир тишилам нон ҳам ўтмай қолади. Тушликни самоворхонада қиларман, деб келавергандим. Уйга ювиниш баҳонасида кирувдим, яхшиям кирганим, кўнгил яхши одамнинг тафтини сезади-да! Энди сен жижжа ўтириб турасан, мен дарровла жизбиз қилиб ташлайман. Ё самоворхонага чиқамизми? Ош сузиладиган вақт яқинлашиб қолди. Текинга емаймиз, ҳар куни тўкма бўлишини биласан-ку?

Кейинги таклифни ишончсиз оҳангда айтди. Самоворчининг ҳар куни бирор буюрса-буюрмаса пешинга ўн кишилик палов дамлаб қўйишини, насибаси қўшилганлар таомни еб, ҳақини тўлаб кетишлирини Мирзаали аввал ҳам айтиб, дўстини чорлаган эди. Шундай чорловларнинг бирида Абдураҳмон табиб «Кўй, ўша ғийбатхонангни, бир сўрида ароқхўру бир сўрида намозхонларнинг ўтириб ошхўрлик қилишларини кўришга токатим йўқ», деб кескин рад этган эди. Таклифнинг ишончсиз оҳангда айтилишига сабаб шу. Бу сафар Абдураҳмон табиб нишини санчиб олмади — таклифни бош чайқаб рад этди.

— Сен оёғи куйган товукдай питирлайверма. Кумғонингни кўйиб, чойга сув қайнатсанг бас. Тугун-

ни очгин-чи, иккита чолнинг тушлигига етарли нимадир бордир?

Тугунда икки эмас, ўн кишининг майшатига етиб ортадиган қимиз, қайнатиб пиширилган гўшт, патир, сомса бор эди. Чой дамланиб, бир пиёладан ичиб, сомсага кўл узатишганда кўча эшиги очилиб, дипломат кўтарган гавдали одам кириб келди. Кутилмаган меҳмонга кўзи тушган Мирзаали ўтирган ерида «Ие, Насриддин, ризқли йигитсан-да, кел, келавер», деб унинг яқинлашишини кутди. Эшикни тақиллатмай, киришга изн сўрамай ғўддайиб кириб келаверган бу одамни танимаган киши уни ё безбетликда, ё одобсизликда айглаши мумкин эди. Абдураҳмон табиб уни олдиндан билгани, айникса, касб-коридан хабардор бўлгани учун унинг қилиғидан ғашланмади.

Насриддин ҳамма жойга ҳам бу каби мулозаматсиз кириб келавермасди. Мирзаалининг оиласига кўп йиллик қадрдон бўлгани учун ҳам бу ерни ўз уйидай кўрарди. У йигитлик чоғида Мирзаалининг хотини билан бирга ишлаб, опа-уқадай бўлиб кетганди. Никоҳ тўйига ҳам Мирзаалининг оиласи бош-қош бўлган эди. Кейин ўқишига кетди. Мирзаали олий маълумотли йигит аспирантурада ўқиб, олим бўлиб қайтар, деб ўйлаган эди. Йўқ, ўқиши бошқача экан. Аввал Фрунзеда ишлаб юрди. Кейин хотини билан ажрашиб, Ўшга қайтди. Мирзаали бунинг сабабини сўраганда «Пойтахтнинг ҳавоси ёқмади», деб маъюс кулимсираб кўйди. Йигитнинг тақдирига доир саволларга Мирзаалининг хотини «у билан ишингиз бўлмасин», деб тўмток жавоб қайтарди. Мирзаали бировнинг сирини билишга ишқивоз одамлардан эмасди. Насриддиннинг бирон тайин ерда ишламаётганидан ажабланса ҳам, бошка сўраб-сурештирумади. Ўша дамларда Насриддин бу хонадонга камқатнов бўлиб қолганди. Мирзаали билан кутилмаган жойларда учрашиб қолганда ниманидир яширишга урингандай, ҳатто саросима тўрига тушгандай бўларди.

Мирзаали муаллимларнинг йигини баҳонасида Фрунзега борганда Насриддинни ресторанда учратаман, деб ўйламаганди. Бу сафаридан икки кун олдин у Таласга кетаётганини айтиб эди. Насриддиннинг хотини асли таласлик эди. Йигит институтда ўқиб юрган кезлари бу гўзални севиб қолганида унинг эр кўрган жувон эканидан бехабар эди. Билгандан кейин ҳам севгисидан кечмади. Европаликларга ўхшаб, «муҳими кизлик номуси эмас, муҳими – муҳаббат», деган ақидада маҳкам турди. Танлаганининг жувон эканини ҳаммадан яширишга уринди. Ҳатто Мирзаали ҳам бу сирни улар ажрапиб кетишгандан кейин билди. «Мен ўқишидалигимда яна биринчи эри билан топишиб колибди. У бузук эмас, факат биринчи эрини ҳалиям яхши кўрар экан», – деб уни оклаганди. Бу гапни ўша ресторандаги учрашувда айтганди. Мирзаали кечки пайт майшат мақсадида эмас, корин ғамида кирганди бу ресторанга. Рестораннинг бир четида қандайдир таниши билан ўтирган Насриддинни кўриб, ажабланди, аммо олдига бориб сўрашмади. Насриддин ҳам уни кўрди, аммо у ҳам келиб кўришмади. Чиқиб кетаётганида у томон бир қараб қўйиш билан чекланди.

Мирзаали меҳмонхонага қайтиб, ётишга чоғланган пайтда навбатчи аёл эшикни тақиллатиб, ҳовлида бир киши йўқлаётганини билдириди. Бу шахарда Мирзаалининг танишлари ҳам бор эди. Шулардан бири келгандир, деган хаёlda ташкарига чиқиб Насриддинни кўрди-ю, таажжуланганини яширмади. Насриддиннинг таклифи билан кўчанинг нарига бетидаги бокка ўтишиди. Үриндикка ўтиришгач, у кўлтиғидаги газета ўрамини очди. Ғижимланган газетани дастурхон ўрнида ёйиб, бир шиша арок, битта пиёла, паррак-паррак қилиб кесилган колбаса ва нонни ўртага кўйди-да, айбдор одамнинг овозида «Хафа бўлмайсиз, ака, бунақа ўтиришимиз жуда-а хунуг-у, омма бошқа чорам йўқ», деб кўйди. Мирзаали яхши даврада бўлса оз-оз иcharди. Ҳозир бу аҳволда ичгиси келмаса ҳам,

Насриддиннинг кўнглига караб, бир-икки хўплаган бўлди. Ширакайф ҳолда келган Насриддин эса икки пиёлани тўлдириб ичгач, чулдираш даражасига етиб, арзи ҳолини айта бошлади.

— Сиз мени ҳар жойда кўриб ажабланардингиз. Бугун ҳам ҳайратландингиз. Таласга кетяпман, деб сизга ёлғон гапиргандим. Мен бу ерга бир одамнинг изидан келдим. Ишим шунака. Ҳа... – у шундай деб хўрсинди, — ишим шунака. Мен номининг ўзиёқ кишини хуркитиб юборадиган идоранинг хизматини қиласман. Одамларни пойлайман, одамлардан сир оламан. Менинг бунақа ишда ишилашимни ота-онам ҳам билмайди. Билишга ҳақлари ҳам йўқ. Мен аспирантурада эмас, шуларнинг ўқишида ўқиган эдим. Аълога ўқидим. Лекин менга шу паст ишни беришди. Нимагалигини биласизми? Чунки мен ўз фикрига эга бўлган одамман! Ўз фикрига эга бўлган инсон ўз илдизига ўзи болта уради, — у яна хўрсинди. — Лекин мен бошқача яшай олмайман. Буларга ур деса урадиган, от деса отадиган одам керак. Мен унақа эмасман, ака!

— Унақа бўлмасанг, ишингни ташлай қолмайсанми? — деди Мирзаали соддалик билан.

Насриддин афсус билан бош чайқади. Яна бир оз арзи ҳол қилгач, «жон ака, бу гапларимни бирор билмасин», деб хайрлашган эди.

Орадан уч ҳафта ўтгач, самоворхонада тасодифан учрашиб колган каби сўрашиб, «ака, ҳар хил жойларга бормай, эҳтиётроқ бўлиб юринг, сизни кузатиш топширилди», деди.

— Ўқитувчини ҳам кузатасанларми? — деб ажабланди Мирзаали.

— Мақсад — опанинг изларига тушиш. Агар сиз сал чакки юриб қўйсангиз, бу ҳам бир баҳона бўлади-да.

Гапини шу тарзда қисқа қилди-ю, кетди. Мирзаалининг «чакки юрмаслиги», тўғрилиги хотинини амал курсисида ушлаб қололмади. Амал курсисига

бировнинг кўзи тушмасин, тушдими, юлиб олмагунча кўймайди.

Ўшандан кейин Насриддин Мирзаалининг уйига аввалгидай серкатнов бўлиб колди. Курук келмасди, ёнида бир шиша ароқми ё конъякми бўларди. «Мендан бўлак бошқа ҳасратдоши йўқ, бечоранинг», деб Мирзаали унинг раъига қаради. Шундай ўтиришларнинг бирида Абдураҳмон табиб келиб қолиб ғашланганида Мирзаали Насриддиннинг кимлигини, дардини унга айтиб кўйганди.

Ҳозир Насриддиннинг мулоzиматсиз кириб келиши шу сабабли ҳам Абдураҳмон табибининг ғашини келтирмаганди. Уни кўриб, «бир нима бўлса, аввал шулар билади», деб кўйди.

Насриддин «Раҳмон акам келиб қолибдилар-да», деб сўрашганда, дипломатини очиб бир шиша ароқ, икки шиша пиво чиқариб қўйганда аччикланса ҳам сир бой бермай ўтирди. Насриддинда оз бўлса-да, инсоф, уят бор эди. Аммо шу оз инсоф ва уят уни ичкиликдан тутиб тура олмасди, фақат узр сўраб қўйишга кифоя қиласди.

– Раҳмон ака, гунохимни кечириб, бу сафар рухсат берасиз-да, – деди.

– Гуноҳни кечирадиган мен эмасман. Буни мен ҳаром қилмаганман, рухсатни ҳам мен бермайман, – деди Абдураҳмон табиб кескин оҳангда.

Нафс китиқлаб тургани учун Насриддин Абдураҳмон табибининг аччикланганини сезса ҳам, аҳамият бермади. Унга «дастурхонга марҳамат қилсинлар», деган лутф шарт эмасди. Мирзаали «яна уришиб ҳайдаб солмасин», деган хавотирда дўстига қараб қўйди. Абдураҳмон табибининг лаблари сал титрагани билан, ўзини хотиржам тутишга интилишини сезгани учун хавотиридан кутулмади.

Насриддин ҳали тоғдан, ҳали боғдан гапириб ўтираверди. Ароқ шишиаси яримлаб, бир шиша пиво ичилгач, муштими билан кўкрагига уриб-уриб қўйдида, Мирзаалига қараб ҳасратини бошлади:

— Ака, мана бу ерим ёниб кетяпти! Офат ёғилиб келаётганини индамай кузатиб туришга энди курбим етмайди.

Мирзаали бу гапдан сергакланиб:

— Қанақа офат? — деди-да дўстига қараб кўйди.

Кутилмаган бу гап Абдураҳмон табиби хам зътиборсиз қолдирмади. Иккала чолдаги ўзгаришни сезмаган Насриддин эса ҳасрат оҳангидаги гапларини давом эттирди.

— Жой талашиб тўпланаётганларни эшитмадингизми?

— Тўпланишаётган бўлишса, ижроқўм дардларини эшитар, — деди Мирзаали.

— Эшитмайди, — деди Насриддин алам билан бош чайқаб. — Эшитмайди. Ўша тўданинг ичидаги бизнинг одамларимиз бор, уларни ўшалар қўзғаяпти. Буни фитна дейдилар... — Насриддин бошини қуи солиб жим бўлди. Кейин шу алпозда ўтирганича давом этди: — одамлар фитна қаердан чиқишини билишмайди. Қирғин бошлангандан кейин дод-вой қилиб юраверишади. Ҳамза Ҳакимзодани биласиз-ку, диндорлар ўлдирди, деб руҳонийларни кириш бошланган эди. Аслида уни ўзимизнинг азамат чекистларимиз ўлдириб беришганди. Бу чиройли уюштирилган фитна эди. Бу фитнанинг бошида турган одам кейинчалик каҳрамон раис бўлиб донг таратди. Аслида у фитна каҳрамони эди. Сизлар бунака гапларни билмайсизлар...

— Ер талашишдан фитна чиқаришмоқчими? — деб сўради Абдураҳмон табиб, қизиқишини яшира олмай. — Бундан мақсад нима?

— Максадми? Раҳмон ака, сиз телевизор кўрасизми, газит-пазит ўқийсизми? — Абдураҳмон табиб «йўқ» деган мазмунда бош чайқади, буни кўриб Насриддин аянчли жилмайди. — Шунақасизлар-да! Дунёни сув олса, тўпикларингизга чикмайди. Кейин эса вой-войлаб юраверасизлар. Ўрис Европанинг ярми-

ни бўшатиб берди, дарё-дарё кон тўkkани билан ба-
рибир Афғондан айрилди, Болтиқбўйи ҳам кўлдан
кетай деб турибди. Кавказ билан Ўрта Осиё қалкиб
қолса, шўри курийди. Кавказда армани билан озарбай-
жонни бир-бирига қайраб кўйди. Энди бу ишни биз-
да ҳам қилиши керак. Бултур Фарғонада катта машқ
қилишди. Шу баҳонада Европадан ҳайдалган аскарла-
рини биз томонларга олиб келиб жойлади. Булар мас-
хара томошаларни кўяверади, биз эса мириқиб томо-
ша қиласкеради. Бугун бизга олтинчи июнда сергак
бўлиб туриш топширилди. Эҳтимол, яна бир томоша
бошланиб қолар...

– Томошада қамоқдан чиқарилганлар катнашмай-
дими?

Бу саволни эшитиб, Насриддин Абдураҳмон та-
бига ажабланиб қаради:

– Буни қаердан билдингиз?

– Газит ўқимасак ҳам, қулоқ эшитади.

Бу гап Насриддиннинг кайфини тарқатгандай
бўлди. Сергак тортиб, Абдураҳмон табига узок ти-
килди. Кейин шишаларни дипломатига жойлади.

– Бу ҳаром нарсалар сизникида турмасин. Менинг
тушлигим тугади, кета қолай, – деб ўрнидан турди.

Абдураҳмон табиб ўзи учун керакли гапни олган
эди. Шу боис, кўп ўтирмай, шаҳарда бошқа ишла-
ри ҳам борлигини баҳона қилиб, кетишга чоғланди.
Уйига қайтгач, Жўлон қирғизнинг кутиб ўтирганини
кўрди.

VII б о б

1

«Сиз бош ўғилсиз, қасос олиш керак!»

Дунё наҳот факат қасосдан иборат? Инсон наҳот
кулогига аzon айтилган дамдан бошлаб, то сўнгги
нафасигача қасос учун яшashi керак? Отанинг то-

мирларидан қонгина эмас, қасос ўти ҳам фарзандга ўтадими? Сўнг... қон билан кирган – жон билан чиқадими?..

Синглисининг талабидан кейин Абдусамад шу каби саволлар гирдобида қолган эди. Бу гирдоб қаршисида у ўзини бир ҳас каби ҳис этарди. Саволларга жавоб излагани каби гирдоб уни қаърига торта-верарди. Бу гирдобдан кутулиш баъзан унга имконсиз бўлиб туюларди.

«Адамни ёлғиз қўйиш мумкинмас...»

Зайнаб айтмаса ҳам бу ҳақиқатга ақли етади. Тақдир ёзуғи бўтамлатиб қўйган отасининг аҳволини билади, дардига шерик бўлиш нима экан, барча ғамандухларини ўзига олмокликни истайди. Аммо отаси ўзига дардкаш истайдиган тоифадан эмас. Айникса, «ўзимгагина берилган» деб ҳисоблаб, дардига фарзандининг шерик бўлишини истамайди.

Кўнглида Олмон ўлкасига қайтиб бориш умиди бўлса-да, Абдусамад дилидагини тилга чиқаришга қийналиб юрганида мушкулини отаси осон қилиб берди. Асадбек фарзандларининг чет юртларда бахт то-пишини истарди. Истаги ҳақиқатга айлананаёзган дамда бошига бу кулфатнинг тушиши уни гангитиб қўйгани билан, умидидан узиб юбора олмади. Абдусамадга ёки келинларига кўзи тушиши билан Абдулҳамидининг гоҳ қулимсираган, гоҳ маъюс чехраси кўринаверарди. Ўғлининг кўзларидан «менинг ўлимимга сиз сабаб-чисиз», деган маломат учкунлари сачрагандай бўлди, бу учкунлар юрагини куйдира-куйдира адо қила бошлади. Шу азобда юрганида доктор Худоёр кўнғирок қилди...

Асадбек қарорини хотинига маълум қилишда ўғли билан келинларнинг ўқишлигини баҳона қилди. Ишонтириш учун «Ҳамид ҳам айтувди», деб изоҳ берган бўлса-да, ўзининг кўнгли Манзураникidan баттарроқ хижил эди. Манзура «Вой адаси...» деб ҳасратини бошлаётганида «Хоҳлассанг бирга бор»,

деди-ю, «яна гапимга кўнса-я!» деган хавотирда юраги ўйнаб кетди. Хотинининг кўз қарашидан «ўғлимнинг арвоҳини чирқиратиб ташлаб кетаманми?» деган мънени ўкиб, кўнгли хотиржам тортди.

Ўғлининг вафотидан анча илгари тушида Кесакполовоннинг тобут олдида ўйнаб бораётганини кўрган эди. Ўша манзара гарчи тушида кўринган бўлса-да, хотирасига мудхиш чизгиларини чизиб кўйганди. Кесакполовоннинг «Менга тўй, сенга аза...» деган гапи тушида айтилган бўлса-да, ёдига михланиб қолган эди. Орадан кунлар, ҳафталар ўтаётгани билан хотира ўз кучини ўтказиб, Асадбекнинг юрагини темир тирнок каби тирнарди.

«Менга тўй, сенга эса аза...»

Кесакполовоннинг ўлиб кетиши балки ўзи учун тўйдир. Тўғри, ўлим олдидан уч-тўрт дақиқа азоб чеккандир. Аммо йиллар давом этадиган турмуш ташвишларидан, азобларидан қутулиб кетди-ку?! Асадбек эса тирик қолди. Турмушнинг азобли, эҳтимол заҳарли шарбатларидан яна ва яна ичиш учун тирик қолдими? Аста-секин ўлгандан кўра бир неча дақиқада ўлиш баҳт эмасми?

Манзура-чи? Қисмати унсиз йиглашдан иборат бўлган бу муштипар баҳтли эдими? Баҳт ўзи қанака бўлади?.. Баҳт нималигини билмай туриб, Худога «ҳеч бўлмаса баҳтнинг ушоғини бер», деб муножот қилиши кўп ажабли ҳолдир.

Бу оиласа баҳт тилаш балки ножоиздир. Баҳт тилашдан олдин иймон тиламоқ зарурроқдир. Иймон тилаб қилинган дуо ижобат бўлгач, баҳтнинг ўзи келар?

Иброҳим алайҳиссалом ўғиллари Исмоил алайҳиссаломни курбонлик қилишга буюрилганлари учун фарзандларини қалб фарёди билан тоқقا бошлаган эдилар. Асадбекка фарзандларини курбон қилиш буюрилмаган эди. Бу азобни, бу жазони ўзи танлади. Шундай экан, додини кимга айтсан?!

Мухиддин ота унинг яхши томонга ўзгаришини

умид қилган, аммо бир тоифа одамнинг ҳеч қачон ўзгармаслигини, у фактат тақдирдан қочиб кутулишга ҳаракат қилишини ўйлаб кўрмаган эди.

Хар бир одамнинг кўзлари бор. Лекин бир буюмни ҳар одам ҳар турли кўринишда кўради. Бахт буюм эмас. Кўзга кўринмайди. Ажабки, ҳар одамнинг бахт ҳақидаги тушунчasi ҳар хил. Ҳатто энг яқин одамларнинг бахти турлича.

Асадбек отаси учун қасос оладиган дамни ўзи учун бахт чўккиси деб белгилаган эди. Қасос дегани ҳомиладор бўладими экан, янгилари туғилаверди.

Кесакполвон бахтини бойликда кўрган эди – ҳаммасини ташлаб кетди. Ҳатто кафанлик ҳам насиб этмади. Агар тириклигига бирор «кафанга ўралиб, жаноза ўқилиб, лаҳадда бус-бутун ҳолда чўзилиб ётиш ҳам бахт», деса уни жиннига чикарган бўларди.

Махмуд янги акаларининг бағрига кириб,чуврindилик ҳолидан чиккан дамларда ўзини бахтли деб ҳисоблаган эди. Кейинги умрини бахтми ё кулфат эканини фарқламай кетди.

Бир кориндан тушганларнинг бахти ҳам ўзга-ўзга эди.

Зайнаб бахтини отаси юрган кўчалардан излаб топмокчи...

Абдуҳамид отасининг иймон кўчасига ўтганини кўрганида бахтли бўлажагини умид қилиб эди. Шу умид билан кетди.

«Адам бунака ишларга бизларни якинлаштирамайдилар. Агар аралашишимизни истасалар бизларни ўқитмасдилар», деб синглисини қасос йўлидан қайтаришга уринган Абдусамад эса бахтини илм йўлидан топишига ишонарди. Аммо бу йўлда заҳар солишга тайёр турган илонлар борлигини хаёлига ҳам келтирмасди.

У Москвага учиб келишлари билан профессор Зиновьевга учраб кетиши шартлигини отасига билдириди. Асадбек бу одамнинг кимлигини, нима учун учрашиш

шартлигини тушуниб турган бўлса-да, ўғлини аввалинг ўқиш жойига боришини истамади. Абдусамад хорижда билим олаётгани билан эски жойидан бутунлай узилмаган, вақти-вакти билан «илмий ҳисобот» бериб туриши шарт эди. Мехмонхонага жойлашишгач, Абдусамад Иликонинг икки йигити ҳамроҳлигига университетта борди. У хорижга кетаётганида профессор Зиновьев декан эди, унинг проректор бўлганини эшлишиб, бошка бино сари юрди. Зиновьев номи «беш дақиқали мажлис» деб аталган тадбир ўтказаётган экан, икки соатга яқин кутишга мажбур бўлди. Мажлис тугагандан кейин ҳам профессор уни дарров қабул қила қолмади. Абдусамаднинг илтимосини етказган котибасига «кетиб қолмасин, кутсин», деб тайинлади. Мажлис нохушроқ ўтган шекилли, Абдусамад кирганида «энди менга сенинг дардинг етишмай турувди», дегандай норози киёфада бокди. Абдусамад таътилга келганини, Абдухамиднинг вафот этганини айтиб, энди ўкишни давом эттириш учун қайтаётганини билдирганида Зиновьев пешонасини силаб кўйди.

— Хабарим бор, таъзиямни қабул кил, — деб бир оз сукут саклади.

Абдусамад «Кимдан эшифтанийкин?» деб ўйлаб, саволига жавоб топишга улгурмай профессор гапини давом қилди:

— Сен билан бафуржга гаплашишга вактим йўқ, ранжима. Мени илмдан юлиб олиб, бу ерга михлаб қўйишиди. Аслида бу олимнинг жойи эмас, биронта темир одамни ўтқазиб қўйишиса ҳам бўлаверарди. Бу ерда ўтириш учун илм бўлиши шарт ҳам эмас. Сен мени роса кутиб, бу одам стол бандасига айланаб қолибди, деб ўйлагандирсан? Сен ўйламасанг ҳам, бошқалар шу фикрда юришибди. Мен бу ерга бирон чаласавод ўтириб, илмлиларнинг бошини гангитмасин, деб келган эдим. Шу ерга ўтиришим билан илмлилар мендан узоклашишиди. Энди пушаймон бўлиб ўтирибман... Ҳа, майли, бу сенинг бошингни

қотирадиган масала эмас. Шунчаки айтдим-күйдим. Вақти келиб, сенга шунақа лавозимни лозим күришса, яқин кела күрмә. Яхши-яхши дүстларингдан айрилиб коласан. Сенга бир гапни айтиш учун «кетмай турсин», деган эдим. Сенларнинг баҳтингга «қайта куриш» деган бетартиблиқ юзага чиқиб, ҳамма дарвозалар очилди. Бўлмаса, Германияни тушингда ҳам кўрмасдинг. Немислар битта мамлакатга бирлашгани билан, «Гарбий Германия» деган тушунча сиёсатчи-ларнинг, айниқса, анави идорамизнинг кун тартибидан олиб ташлангани йўқ. Мен отанг ўртага кўйган одамлар туфайли эмас, ўзларингда қобилият борлиги учун йўлларингни тўсмадим. Энди бир нарсани миянгга куйиб ол: биология билан физика бир нуктада бирлашиши мумкин, аммо имм билан сиёсат бир қозонда қайнай олмайди. Тушундингми?

Абдусамад унинг муддаосини англамаган эди, очик айтишга хижолат бўлиб «сал-пал тушундим», деб кўйди. Зиновьев унга муғомбирлик билан тикилиб, бош чайқади:

– Ёлғон гапирма, сен ҳали ҳеч нарсани тушунмадинг. «Қайта куриш, демократия» дегани кўлмақдаги коғоз кемага ўхшаган бир нарса. Бирпас қалқиб туриб, кейин шалвираб, пачақланиб кетади. Ҳаво ёки сув қатламларини биласан. Бир катламда кучли оқим бўлади, яна бири сокин туради. Ана шу сокинликка ишонган ёмон. Берлин девори кулагани билан, бу деворни тиклаган ғоя яшаб турибди. Хўп, фалсафани бас қилиб, муддаога кўчай: уч ҳарфли идора сенлар билан қизиқиб турибди. Тўғри, бу фавқулодда ходиса эмас, четга чиққанларнинг ҳаммаси уларнинг диккат марказида туради. Эсингда бўлса, кетишларингдан олдин икковингни огохлантирган эдим. Лекин уларнинг кейинги суриштиришлари бошқачарок бўлди. У ерда қочоқ ҳамюрларинг билан ош-қатик бўлиб юрдила-рингми?

– «Қочоқ» дедингизми? – Абдусамад ажабланиб елка қисди.

– Ҳа. Уларга «Ватан хоини» ёки «хоин» деган лаънат тамғаси Сталин замонида босилган. Замонлар ўзгарди, ҳукмдорлар ҳам бошқа, лекин бу тамғани анави идора ҳали олиб ташлагани йўқ, шунга ақлларинг етмадими?

– Биз улар билан ош-қатик бўлмадик. Доктор Худоёрни ҳисобга олмаганда...

– Доктор Худоёр бошқа масала. У сиёсатга аралашмайди. Унинг атрофидагилар-чи? Уларнинг пи-чирлаб айтган гапларини ҳам бу идорадагилар яхши эшишиб туришади. Сенлар кимнинг қизларига уйландинглар? Қайнотанг «Туркистон легиони»да хизмат килмаган бўлса ҳам, уларга хайриҳоҳлар сафида турган. Мен буни каердан биламан? Ўйлаб кўр-чи? Билиб ол: фашизм қораланар экан, минг йилдан кейин ҳам «Туркистон легиони» худди власовчиларга ўхшаб лаънатланаверилади.

– Власовчилар жангга кирганлар. «Туркистон легиони» ҳарбий ҳаракатларда қатнашмаган.

– Бу чўпчагингга мен ишонаман, чунки менга барабибр. Лекин нариги идорадагиларнинг дунёқараши бошқача. Тарих ўзгаради, тарихчиларнинг фикри ҳам ўзгаради. Лекин улар ўзаришмайди. Сен мен билан баҳслашмагин-у, агар чинакам олим бўламан десанг, сиёсатдан узокрок юр. Юртдошларингнинг даврасидан қоч. Ўқишни бил, бошқа ҳеч нарса билан ишинг бўлмасин.

Зиновьев «гап тамом!» дегандай ўрнидан турди. Абдусамаднинг «насиҳатингиз учун раҳмат», деб қўл узатишдан ўзга чораси қолмади.

Олмонияга қайтганидан кейин ҳам бу насиҳат хусусида кўп ўйланди. Аслида профессор Зиновьев унга ҳайратомуз янгиликни айтмаган эди. Буларни ўзи ҳам биларди. Ўзларининг доимий кузатувда эканликлари тўғрисида Абдуҳамид билан ҳам кўп гаплашишган. Аммо доктор Худоёр таништирган қизлар кўнгилларига ёкиб колгач, нима килишсин? Күёв

бўлишгач, бу хонадонга тез-тез тўпланиб турувчи меҳмонлардан қандай қочишин?

Кизлар кутиб олишга чиккан ота-оналари ва бошка яқинлари билан ажидиб бир сабр либосида кўришдилар. Кўзлари ёшига, қалблари зардобга тўла бўлса-да, кулфатларини ошкор қилишдан ўзларини тутдилар. Музаффархон куёвини бағрига босганича, ёноғини ёноғига теккизиб «инна лиллаҳи ва инна илайҳи ро-жиун», деб йиғламсираб пичирлаганда Абдусамад кўз ёшларини тия олмади. Коронғу осмонини ёритиб турувчи икки юлдузи – икки қизи билан кўришаётганда Музаффархон ҳам кўз ёшларини тўхтата олмади.

Ўша куни Музаффархон «кичик бир эҳсон дастурхони»га юртдошларини таклиф этиб кўйган эди. Абдусамад улар билан кўришаётуб, таъзияларига жавобан «Аллоҳнинг иродаси», деб қўйди. Таомлар тановул қилиниб, Қуръон тиловат этилгач, уларнинг одатий сұхбатлари бошланганида эшикка яқинроқ кўйилган оромкурсида даврага бегонадай бўлиб, жимгина ўтиреди. Профессорнинг насиҳатини эслаб ғашланди: буларнинг даврасидан қандай қочиши мумкин? Яна ғашланди: бу давралардаги гаплар Масковдаги идорага қай йўсинда этиб борар экан? Абдусамад саволига жавоб топмок ниятида мезбонларга бир-бир тикилди. Уларни яқиндан билмагани учун саволи жавобсиз қолди. Бирон кишини хиёнатда гумон килишдан тийилди.

Аввалги сұхбатларда бўлгани каби бу сафар ҳам баҳс икки киши орасида бошланди.

Қаҳвани ҳўплаб, хузурланган Саъдуллахон хонадон соҳибиға юзланди:

– Музаффархон, қизлариниз кўзларига бокиб, мен ота юртимни кўрган каби ўлдум. Ўнлар бу уйга ота юрт ҳавосин олиб келмишлар. Чўх ҳавас ила бокиурман ўnlара. Ҳар тун ўлмаса-да, хафта бир душимда қишлоғимни, ички ташки-бўлима бўлинмиш уйимизни кўрмакдаман. Дарвозамиз олдидин оқиб

ўтаётган катта ариқ сувидин тўйиб-тўйибла ичурмисам. Окин сув кўпригидин ҳовлимиза ўтилур эрди. Кўча томона қарамиш болохона меҳмонхона вазифасини ўтарди. Отхона, кўйхона, молхона сингари бўлимлари бўлмиш ажиб бир кўринишли ҳовли эрди... Икки айвонли бўлакли хоналар... Сузма учун осиб кўйилмиш оқ халталардин тарс-тарс зардоб томчиларининг жома тушмиш овозин ҳали-ҳали эслаймен... Узумзоримиз куз ойлари жаннатнинг чин манзарасига айланур эди... Қани энди ўнлар? – Саъдуллахон шундай деб хўрсиниб қўйди-да, дераза томонда ўтирган меҳмонга каради: – Ижоза берсалар, муҳтарам афандимиз Яквалхўжа жанобларидин сўрайдургон сўровларим вордур.

Давра аҳлидан ёшрок кўринувчи, котмадан келган, кирра бурунли киши «марҳамат қилингиз, сўрангиз», деган каби жилмайиб кўйди. Абдусамад бу кишини энди кўриши эди, шу сабабли унга караб колди. Бошқаларнинг кўзлари «нимани сўрар экан?» деган савол билан Саъдуллахонга тикилган эди.

– Америка Бирлашмиш Давлатларида истиқоматда бўлмиш ватандошлар ила тез-тез қўнишмак ёшимиз ўтгани сайин мушкуллашиб боряпти. Муҳтарам афандимизнинг бу ташрифлари кўзимиша тўтиё бўлиб, бизарни чўх сарфароз айлади. Бу кунларда бир кулогимиз бадбаҳт советлар томонда, бир қулоғимиз Америка Бирлашмиш Давлатларинда. Советлар заминида кўтарилаётган қуюн оқибатин у томонлар ғоят сергаклик ила кузатаётганидин бир оз бўлса-да, хабаримиз вордур. Бизим қалбимиз бутун вужудимиз ила юрт сари талпинмокладур. Шубха йўқ-ки, уммон ортида ҳам шундайдир?

Яквалхўжа қўлидаги финжонни оқ дастурхон устига кўйиб, юзидағи мулойим жилмайишни йўқотмаган ҳолда гап бошлади:

– Узбак кай мамлакатда яшамасин, дарди ҳам, умиди ҳам бирдир. Сизин баҳтиниз шуки, киндик

конлариниз Ватанда тўкилмишdir. Болалик хотира-лариниз банд этмиш оқин сувлар тушиниза кирадур. Мен кабилара Ватандан узоқларда туғилмоқлик насиб этмиш, Ватан хавосидин ҳали нафас ололганимиз йўқдур. Тиник сувидин ичмаклик баҳти ҳам насиб этмади, аммо Ватан туфроғин кўзга суртмак умиди или яшамақдамиз. Бу томон сафара чиқмоғимдин сал бурун Нью-Йоркда бир издиҳом тартиб берилиб эди. Бўтакўз устозимизинг лутфи или бир ажиб мусобака ташкил этилурди. Кимки Абдуллоҳ Кодирий асарла-рин ҳўб ифода или ўкуб берса, унга совға ваъда этди-лар. Шукрким, ўшал совға каминага насиб ўлди. Ки-тобнинг бир бобини ёддин ўқиб бердим. Гал Кумуш-бибининг мактубларига келиб, «Мактубни Кумушби-би эмас, Тупроқбиби ёзди», деганимда аҳли издиҳом кўзларинда ёш кўринди. Ватандин айрилган ҳар бир мардум ўзни «тупроқбиби» аламида кўрди... Мен-га бир дўппи совға килдилар. Инонинг, афандилар, агарчи менга Нобел совринини берган тақдирларида ҳам, бу даражотда кувонмаган бўлур эрдим. Агарчи, Аллоҳ насиб этиб, Ватанга борсам, туфроғини ўпсам ва ватандошлардан бири «Ватанга хуш келибсиз!» деб бошима бир эски дўппи кийгизиб кўйса, дунёдин ар-монсиз кетардим.

– Большевикларнинг тўнтариши йилларидағи аж-додларимиз бизарнинг бундай армон или яшаяжа-гимизни хис кила олганларида эди, сўнгги томчи конлари колгунича ул бадбахтлар билан жанг килган ўлур эдилармикин? – деди Саъдуллахон ўйчан тарзда.

– Бу тарих, муҳтарам афандим, уни ўзгартиб бўлмайди, – деди Яқвалхўжа. Энди унинг юзидағи му-лойим жилмайиш йўқолиб, ўрнини жиддийлик згал-лаган эди.

– Ҳа, тарихни ўзгартириб ўлмас. Аммо та-рих ҳакиндаги фикрлар-чи? Бизарнинг туфрокка корилувимиза кимлар айбдор эди? Ҳалигача ўзимиз бир тўхтама келмадик-ку? Сиз, афандим, унда жаноб

Олуорт сингари чўх донишманд олимлар ила сұҳбат қурмишсиз. Биз Боймирза жанобларининг битиклари билан ҳам танишмиз. Ҳар нечук, аниқ жавобимиз йўқдир.

Саъдуллахон шундай деб доктор Худоёр томон маъноли караб кўйди. Доктор Худоёр ўзи томон таъна тоши отилганини билиб, ўрнида бир қимиrlаб кўйди-ю, сұҳбат икки киши томонидан олиб борилаётгани учун кўшилишдан ўзини тийди.

— Талотўп йилларнинг ҳар бир куни бир жумбок, шу боис ҳеч ким аниқ жавоб бера олмас. Тўнтариш йиллари кимдир бирор қизиллардин умид килди, кимдир бирор ардокли бекларимиз канотига кирди, — Яквалхўжа ниманидир ўйлаб бир зум жим колган эди, гапни Саъдуллахон илиб кетди:

— Кимдир бирор дам у томон, дам бу томондин умид килди.

Бу пичингдан сўнг доктор Худоёр ўзини тута олмади:

— Қалбимдасиз, муҳтарам Саъдуллахон афандим, агар сиз маним амаким мулла Эгамберди аканни назарда тутиб бул гапни айтган бўлсангиз, чўх тўғри сўзладиниз. Талотўпда Эгамберди амакимга ўхшаганлар бир эмас, ўн эмас, минглаб, эҳтимолки ўн минглаб эди. Ҳамонки, сұҳбат мароми бу томон бурулмиш экан, маним томонимдин изоҳга хожат вордур. Бул хусусда сиз жаноба айтиб эдим, қаноат топмаганингиза гувоҳ бўлиб турибман. Яна шуки, ўтмиш ўшал изоҳимдин инимиз Яквалхўжа жаноблари бехабарлар. Вақти келиб, Нью-Йоркдами ё Хьюстондами, қайда бўлса-бўлсин, мавзу бу томон оғса, билиб кўйганлари жоизмикин? Гап шундаки, муҳтарам Яквалхўжа афандим, каминанинг амакилари ўлмиш мулла Эгамберди ака ғоят элпарвар одам эдилар. Ул зот аввали бекларни курол-яроғ, озик-овқат ила таъминлаб турдилар. Бул далилни инкор этгуучилар бул орамизда йўқдир. Сўнг кўрдиларки, бекларда илм

йўқ, хунар йўқ, сиёsat йўқ, ташкилотчилик йўқ, энг мухими – аҳиллик йўқ. Айтинг-чи, ўзаро иттифокқа келишмайдиган уч-тўрт бек адади йигирма ёки унданда чўх миллион ўлмиш халқни бирлаштира олурми эди? Бунга жавоб ҳар биримизда вордур, аммо нечукким, тилимиза чиқармасмиз. Ҳолбуки, чиқармоғимиз шартдир, токим, авлодлара ибрат ўлғай. Яна талотўп замонига қайтсак, мулла Эгамберди амаким яна кўрдиларки, ўлдирилаётган чўх одамлар ўз улусимиз. Шу каби номаъқулчиликларни кўргач ва яна хурриятталаб бекларнинг большевиклара карши айтарли бирор иш қила олмаслигига амин ўлгач, улардин кўмак қўлларини тортдилар. Бундан хабар топган большевиклар ўзларича хulosा чиқардилар-у, амакимни ўзлари томон оғдиришни орзу этдилар. Бунда ўтирган мухтарам афандиларим талотўп кунларидин салгина кейин туғилгандирлар. Ул бемазагарчиликларни мен бувимдин эшитганман, сизлар ҳам ота ёки оналарингиздин эшитганингиз вордир. Ул замон қишлоқлар кўзғолончи бекларин зўравонлигидин, қизил аскарларин талон-тарожидин безиб эди. Қишлоқларда киёмат барпо бўлиб, бир ҳафта беклар хукм юргизса, улар қочгач, большевиклар келиб қишлоқларни таламиш эди, шундайми? – доктор Худоёр саволига жавоб талаб килгандай даврадагиларга бир-бир қараб чиқди. Улар маънодор равишда бош иргаб қўйишгач, давом этди: – Яна бир ҳафта ўтгач, бу зулм бошқа кўринишда давом этаверган. Ҳар икки талончи ҳам ўтакетган тарбиясиз, беадаб ўлганини эшитган чиқармиз? Большевиклар бекларимизни «босмачи» деган ҳақорат сўзи или атамиш эдилар, халқ то ҳануз шу шармандали атамага қаноат қилиб келяптиkim, ҳозирга кадар инкор этувчи бирон инсоф эгаси у томонда кўрингани йўқ. Эгамберди амаким большевиклардин қурол ҳам олган, тўғри. Лекин қишлоқни ҳар икки тарбиясиздин шу қурол воситаси или ҳимоя қилган. Бу ҳам аксиома, яъниким, исбот талаб этилмас бир ҳақиқатдир.

— Аждодларимизин энг катта хатолари ҳам айни шудир, — деди Яквалхўжа. — Ҳар бирлари ўз уйларин, ўз кишлоқларин химоя этдилар. Нариги кишлок билан эса ишлари йўқ. Бу бир хасталикдир. Англаюрсизким, рус истилоси бошланган кунларда уч хонлик танга талашган уч нодон гадо каби ўз пайтавасига ўралиб яшайверган. Онг эгалари тарихдан ўрнак олмоқлари шартдир. Қани ўша онг? Азизмонлардан узриманки, мавзу юзага чиқиб колгани учун яна бир-икки сўз айтмоқни ихтиёр қиляпман.

— Марҳамат қилинг, калбимдасиз, азизим, — деди доктор Худоёр лутф билан.

— Демакким, уч хон нодонлиги туфайли ғарбий Туркистон туфроғида рус истилоси карор топди. Миллат ғафлата ўралгандин сўнг истилочилар юрт танасига зулукдек ёпишиб, қонларин сўра бошладиларми? Ҳалқ саросимага тушдими? Истиқлол талаб қилиб кўтарилиши Мұҳаммадали халифанинг тақдири не бўлгани маълум: ўлигини аввалига ҳожатхонага ташламоқни ихтиёр этдилар, аммо ҳалқ ғазабидин қўркиб, оҳакда кўйдириб йўқ қилдилар. Намозполвоннинг тақдири-чи? Озодлик талаб килган ўн мингларча, юз мингларча кўзғолончилар ваҳшийлик ила ўлдирилганин бугун Ватанда яшамоқда бўлганлар билурларми экан? Ўрта Осиё ҳалқига сўрилишдан бошқа чора қолмади. Истилочилар иштаҳаси эса чўх ва янада чўх очилаверди, талон-тарож бобида дунёдаги ўзга истилочиларни ортда қолдириш мақсадида йил ўн еттида режим ўзгартирмокчи бўлдилар. Бунинг учун рус миллатчилари Ленинни тикладилар. Йўл-йўриқлар кўрсата бошладилар. Энди бу шумлар қонуний ҳаракатлардек эл оламига ўргатиш учун Маркснинг «Капитал»ини, яна бошқа асарларини топдилар. Маркс дунёга танилган файласуф, дунёда кулдорликни йиқитиб, тинчлик қурилишини истаган донишманд эди, Ленин эса бир тоифа кулдорликни йиқиб, янги тоифа кулдорлигин ривожлантириди. Бу

сафар бизим аждодлара қофозда «козод инсон» қалбаки гувохномаси берилса-да, аслида қул ҳолида тутмишдилар, кулдорлар эса «болшевик» лақабли руслар бўлиб қолавермиш. Жамиятларига «коммунизм» деб ном қўйиб олмишлар. Назарияларин эса «марксизм-ленинизм» деб атамишлар. Маркс ва Ленин бир-биридан бошқа-бошқа одам бўлганидек, идеологийси ҳам бўлак, мақсадлари ҳам бўлакдир. Бири камбағал ишчилар ҳуқуқини химоя қилган бўлса, бири янгила қулликни барпо этмиш. Назарияларнинг ўхшашиб томони йўқ. Лекин руслар бузиб, назария ўғирлиги ила асл назарияни бир-бирига алмаситириб, Маркснинг фалсафасидин безбетларча фойдаланмишлар. Сиёсий иқтисодга бағишлиланган «Капитал»ни сиёсий мақсад ўрнида кўлланма қилиб олмишлар. Шу билан қиёфа ўзгартирилиб, иш услуби ҳам ўзгармишди. Эски тузумларда истилочилар миллатлар танасига зулукдек ёпишиб, сўраётган бўлса, янги тузумда ўнлар оч бўридек талон-тарожликни бошламишлар. Биринчи-си шу бўлдики, дон-дун ўрнига пахта экишга мажбур этдилар. Натижа – сунъий қаҳатчилик барпо этилиб, улуснинг тинкасини қуритмоқ учун харакатлар бошланди. Бойларнинг мол-мулки забт этилиб, улус ташаббускор синфидан маҳрум этилмиш. Ер тилини билувчи деҳқонлар қулоқ қилиниб, Сибирга жўнатилиб йўқ қилинмиш. Максад – сўз соҳибларини ўртадан кўтариш эди. Диний олимларни, рухонийларни биринкетин териб олиш ила ижтимоий жихатдан ҳалқнинг турмуш савиясин туширдилар. Қалам соҳибларини «халқ душмани» деб эълон қилиб, улусни миллий туйғудан ажратиб қўйиш максадида ўнларни ўлдирдилар, миллатни коронғуда колдирап бўлдилар. Мард табиат одамларни «муштумзўрлар», деб эълон қилиб, ўнларни стиб ташлаш йўли ила улусин ичидин ғайратни суғуриб ташлашди. Пичоқ суюкка етди деганларидек, вилоятларда, кишлокларда ҳар томондин ҳалқ қўлида бор куроли – кетмон, ўрок, болта кабилар

билан майдонлара тўпланмиш эди. Ҳа, ўнларда бошқа курол йўқ эди. Бори ҳам милтиқка ўхшаш қадимий куроллар, ок руслар давридаёк йиғиштириб, олиб бўлинган. Руслар эса замонавий курол ила мунтазам тартибли аскар ташлади. Сизлар «талотўп» деб атаётган мудхиш тўқнашувда ўн минглаб эмас, юз минглаб уруш кони тўкилгандир. Кўзғолон бостирилгач, «кўзғолончи душман» номи билан минглаб бечоралар ушланиб, сургун қилинди, – Яквалхўжа кейинги гапларни ички бир алам билан айтиб қўлига финжонни олди, лабига олиб борди, аммо ичмади. Тушкунрок оҳангда «Биз ибрат олишимиз керак бўлган тарих шудир», деб кўйди. Кейин худди ўзига-ўзи гапираётгандай пастрок ва хастароқ овозда давом этди:

Дарвешонро агар не аз хешонем,
Лек аз дилу жон мўътакиди эшонем.
Дураст, магўй, шохи аз дарвеши,
Шоҳем, vale бандай дарвешонем.

Издиҳомга ҳозир бўлганларнинг айримлари форсийдан хабардор эдилар. Улар тўртликнинг маъносини англаб, «чўх маъқул» ишорасида бош ирғаб қўйдилар. Яквалхўжа «гапимга сенгина тушунмадинг», дегандай Абдусамадга караб, изоҳ берди:

– «Дарвешлар, агарчи бизларга яқин бўлмасалар ҳам, лекин биз уларга жону дил билан мухлисмиз. Шоҳликни дарвешликдан узок дема, биз шоҳ бўлсанк ҳам, дарвешларнинг бандасимиз». Агарчи миллат каҳрамонларин дарвешлик мартабасинда тасаввур этсан, бизда ўнларин бандасидурмиз.

– Астағфируллоҳ! – деб юборди доктор Худоёр. – Афандим, гарчи сўзларингиз мажозий эрса-да, бундай демаклик ножоиздур, нединким, бизлар Аллоҳнинг бандалари эрумиз. Банда бандага банда ўлурми ҳеч замон? «Ҳалок мекунадаш фурқати ту, доностам, вагарна рафтан аз ин шахр метавонистам» деганлари-

дек, бек афандиларимиз ўшал замон «сендин айрилиш мени ҳалок қилишини билдим; бўлмаса бу шаҳардан кета олармидим», маъносига кўра, хаста юртни ташлаб кочмасалар эди, авлодлар армоннинг аччик суйини ичмас бўлурми эдилар?

— Қочганлари йўқ, ҳижрат қилдилар, холос, — деб изоҳ берди Саъдуллахон.

— Калбимдасиз, Саъдуллахон афандим, сиз ила қанчалар баҳс юритмайлик, ҳақикат ҳақиқатлигича қолаверажак. Яквалхўжа афандим тарихни-да, сиёsatни-да мендан дуруст билиюрлар, айтсинлар, ажрим килиб берсинлар-чи: меним ожиз фикрима кўра, миллат қаҳрамонлари ватандин кочмаслар. Ватанда шаҳид ўлмакни аъло кўурлар. Бадбаҳт совет ўзига душман деб билмиш неча юзлар, балки эҳтимол мингларча одамларни, Фарангি ерларидаみ ё ундан наридами, яширинмиш жойларидин топиб, ўлдируви тарихдан маълумдир. Савенков сингари кишиларни алдаш йўли била Русияга қайтариб ўлдириш мақсадида юзларча кишиларини сафарбар этмадими? Мингларча иғволарни ишга солмадими? Ҳаттоқи Аргентина юртига киши юбориб, Троцкий жонини суғурмадими? Советнинг шундайгина ён биқинидаги Афғонда майшат ила банд ўлмиш Сайийд Олимхон ё бўлак кипиларни ҳатто чибин ҳам чақмамиш экан, бу ажаб бир ҳол эмасми? Нечун совет ўnlара заҳмат етказмади? Чунки ўnlар советлара душман ўлароқ мартабада эмас эрдилар. Ўnlардин советлара хатар йўқ эрди. Тил ила олишувчи ракибга битта ўқ ҳам ҳайф. Советларин роҳатсиз этмаслигидин ўnlар чўх қувониб, афғон подшоҳи томонидин белгиланмиш нафакага қаноат этганлари ҳолда узоқ умр кўриш орзусинда яшайвермишлар.

Яквалхўжа дарров жавоб кайтармади. Жавобга иккиланганини ҳам сездирмади. Аксинча, ҳудди қизик гап эшитгандай қулимсиради:

— Мухтарам афандилар, бу файзли хонадонга қан-

дай сабаб ила түпланганимизни унугиб кўяёзибмиз. Бу хусусда бошқа вакт, бошқа холатда истаганча фикр олишсак тўғрирок ўлурмикин? Бу он бир оз ўзимиза эрк берувимиз сохиби хонадон хузурида уятлироқдир, деган истихоладаман.

Бу якунга ҳеч ким эътиroz билдиrmади, ҳатто доктор Худоёр ҳам «коре, рост», деб кўйди.

Абдусамад бу мавзудаги сухбатга илк бор гувоҳ бўлганида ватандошларининг қалб бойлигига, миллатпарварлик фазилатларига тахсин айтган эди. Кейинчалик уларнинг гапдан нарига ўтмасликларига амин бўлгач, қизиқиши ҳам сўнганди. Ўзи униб-ўсган мухит, хонадони атрофидаги дарду ҳасрат билан бу давранинг армони орасида ақл бовар килмас тавофут борлигини ҳам билиб турарди. Булар, майли, курук гап билан бўлса-да, миллат тақдири хусусида қайғуриб ўтирибдилар. Акасининг кетишидан норози бўлган, қасосга даъват этган Зайнабнинг дардичи? Асадбекнинг алами-чи? Бу ергагилар гап билан кифояланадилар, асадбеклар-чи? Абдусамаднинг қалбини хира қилиб, ташвиш чохига тортиб турган муаммо ҳам шу эди. Отаси ва синглисининг дарди курук гап эмас, балки кон тўкилишига сабаб бўлувчи ҳарат билан якунланишини у биларди.

Кимнинг юрак кони тўкилади?

Кимнинг кўзларидан кон ёшлари оқади?

Кимнинг умид чироғи сўнади?..

Абдусамад Фарбий Олмонияга шу ташвиш юки билан келди. Миллат дардини ўйлаб сўзлаётганлар даврасида ҳам шу ташвиш билан ўтириди. Сухбатнинг чўзилишидан ғашланди, «кичик бир эҳсон»нинг тезроқ поёнига етишини хоҳлади. Баъзан баҳсга киришгани билан, бу каби сухбатларни хушламайдиган доктор Худоёр зарур юмуши борлигини баҳона қилиб узр сўрагач, ичида «ҳайрият» деб кўйди. Яквалхўжа узрли эканини билдиргач, бошқалар ҳам турдилар.

Доктор Худоёр оилавий ташвишлар туфайли анча фурсат қўлдан бой берилганини афсус билан таъкидлаб, Абдусамаднинг зиммасига одатдаги дан кўпроқ вазифалар юклади. Шу сабабли Абдусамад кўп вактини кутубхонада ўтказадиган бўлди. Бир жихатдан унга шундай бўлгани ҳам маъкул эди. Уйда дарсхонаси бўлгани билан, таомланиш чоғидами ё бошка ҳолатдами Муштарийга дуч келса, унинг кўзларини тарқ этмаётган мунгни кўриб юраги эзилаверарди. Сўнг китоб саҳифаларидан Абдуҳамид карагандай туюлаверарди.

Қайтганининг иккинчи хафтасида кутубхонада узок ўтириб чарчади. Қахва ичип максадида емакхонага чиқди. Финжондаги қаҳвани яримлатмай, ёнига бир малла йигит келиб ўтирди.

— Салом, ҳамشاҳар, ишлар қалай? — деди у такаллуфсизлик билан.

«Ҳамشاҳар» дегани учун унга «бу одамни қаерда кўрган эканман?» деган савол назари билан каради. Ёши ўттиз бешлардан ошган, қошу кипригига кадар малла бўлган бу одамни илгари ҳеч кўрмаганига ишонч ҳосил қилиб, бош ирғаб «салом» ишорасини қилди-ю, аммо лутф кўрсатмади.

— Исмим Валерий, менам тошкентликман, — деб у кўл узатди. Абдусамаднинг кўришишдан ўзга чораси колмади.

Валерий ўзига қахва буюриб, оёқларини чалиштириб ўтириб олди.

— Ҳамшаҳарни мусофир юртда учратиб қолганингиздан хурсандмасмисиз? — деди у Абдусамадга кувлик билан тикилиб.

— Назаримда мен сизни эмас, сиз мени учратиб колдингиз шекилли? — деди Абдусамад.

— Тўғри, лекин сонларнинг ўрни алмашгани билан киймати ўзгармайди. Шахсан мен хурсандман. Келга-

нимга йигирма кун бўляпти. Бу ерда икки ҳамشاҳрим ўқиётганини эшишиб кувонган эдим. Мен докторлик ишимга қўшимча маълумот тўплаш учун келганман. Мен физикман. Сиз ўрганаётган соҳага сал-пал кўшничилигим бор. Лекин бу бизнинг танишувимиз учун аҳамиятли эмас. Ҳа, айтмоқчи, эшиздим, бошингизга кулфат тушибди, таъзиямни қабул қилинг.

Абдусамад «раҳмат» дегандай бош иргаб, «яна қанака гапингиз бор?» дегандай савол назари билан унга қаради. Бу қарашнинг маъносини англаган Валерий кулимсиради:

– Бу ер хотиржам гаплашадиган жой эмас, хўп десангиз, кечки пайт турк ошхонасида бирга тамадди қилсак яхши бўларди.

– Бугун эмас, – Абдусмад шундай деди-ю, таклифни рад этишга арзидиган баҳонани айтмади. Аслида бу окшомга белгиланган бирон юмуши йўқ эди. Таклифни қабул қилса ҳам бўларди. Лекин кутилмагандан пайдо бўлган бу одамнинг турки ёқмадими, ҳарҳолда у билан яна учрашишни истамади.

– Кутубхонада яна уч-тўрт кунлик ишим бор. Вактингиз бўлганда бир ишора килиб қўярсиз, ҳамшаҳарлар билан отамлашишга ҳамиша тайёрман, – Валерий шундай дегач, қаҳвасини охиригача ичмай, ўрнидан турди.

Абдусамад уйга қайтганида Муштарий ҳам, Гулузор бегим ҳам кўринишмади. Музаффархон зарур юмуш билан Парижга кетган эди. Шу боис кечки таом дастурхони атрофида Абдусамад билан Чўлпоной ўзлари ўтиришди. Оврупо одобига ўрганган бу хонадонда барча бир пайтда дастурхон атрофига ўтирас, таомланиш чоғи ўзаро гапирилмасди. Бундай одобга ўрганмаганларнинг сукунат огушида овқатланишлари осон эмас. Абдусамад, айникса, Абдуҳамиднинг бунга кўникишлари қийин кечган эди. Бугун хонадон соҳиблари бўлишмагани учун Абдусамад ўзини анча эркин тутди.

- Кун бўйи ўтиравериб зерикиб, кон бўлиб кетмадингизми? – деди у ҳазил оҳангода.
- Асло йўқ, – деди Чўлпоной саволни жиддий қабул қилиб. – Чин доно дўсти бўлмиш инсоннинг зерикмоққа эҳтиёжи йўқдир.
- Чин дўст? – Абдусамад ажабланди. – Ким экан у?
- Бир киши китоб ўқимок ила банд эканинда яна бир киши ўнга яқинлашди ва сўради: «Нечун ёлғиз ўтирмакни ихтиёр этиюрсиз?» Ул киши дедики: «Ёлғиз эрмас эрдим, сиз келдингиз-у, ёлғизланиб қолдим», – Чўлпоной шундай деб, эрига маънодор қаради. – Англаюрмисиз, бегим?
- Англаюрман, хоним, – деди Абдусамад унинг шевасига тақлид қилиб.
- Англамагингиз мумкин эмасдир, чунки сизнинг бундайин чин дўстингиз йўқдур.
- Агар Чўлпоной шундай деб кулиб кўйганида Абдусамад буни ҳазил деб тушуниб, жилмайган бўларди. Лекин хотинининг қарашидаги жиддийлик уни бир оз таажжубга солди.
- Нега ундан дейсиз?
- Сиз китобни дўст тутмайсиз. Уйингиза биргина китоб жавони йўқлигин айтиб эдим-а? Мусоғир юртлара отлана туриб она тилиниза чоп этилмиси биргина китоб олволганингиз йўқдир, бегим?
- Кутубхонада кун бўйи китоб ўқишлиарим-чи? Бу дўстликка кирмайдими? – деди Абдусамад ранжиш оҳангода.
- Ҳа, айнан кирмас. Ул китоблар дўстиниз эмасдир, балким ишиниздир, таъбир жоиз бўлса, ҳамкасбинниздир.
- Қизик... қизик... қани, бугунги чин дўстингиз ким бўлди, сир эмасми?
- Нечун сир бўлсин? Тошкентдин олиб келмишам китобин бу оқшом ўқиб, ниҳоясига етказдим. Аммо кўнглим тўлмади.

- Нега? Дўстингиз бемаъни чиқдими?
- Пичинг қилмоғиниза асос йўқдир, бегим. Мирзо Бобурдан ҳикоя этувчи бул китоб чўх донодир. Факат бир ўринда мухтарам ёзар оғамиз жиндак адашмакка мойил бўлибдилар.

Абдусамад бу китобни ўқимаган эди. Шу сабабли Чўлпонойнинг гапини бўлмай, жим тинглади.

– Эҳтимолки, «Бобурнома»ни мутолаасиндин йироқ бир киши учун бул адашмаклик сезилмиюр. «Бобурнома»да Ҳумоюн Мирзонинг хасталикларин баёнинда ҳазрат дейдиларки: «...ва табиблар ҳар неча дору-дармон бердилар, яхши бўлмади. Мир Абулкосимким, улуғ киши эрди, арзға еткурдимким, ушмундок дардларға дармон будурким, яхши нимарсалардин тасаддуқ килмоқ керак. Тоинки Тенгри таоло сиҳнат бергай. Менинг кўнглумга келдиким, Муҳаммад Ҳумоюннинг мендин ўзга яхшироқ нимарсаси йўқ. Мен ўзум тасаддуқ бўлайин, Худой қабул килсан... уч қатла бошидин ўргулиб, дедимким, мен кўтардим ҳар не дардинг бор. Ўшал замон мен оғир бўлдум, ул енгил бўлди. Ул сиҳнат бўлуб кўпти, мен нохуш бўлиб йиқилдим...» Англаюрмисиз, бегим? Пир ҳазрат «яхши нимарсаларни тасаддуқ килмоқ керак», деб айтганларинда қимматбаҳо олмосни назарда тутмиш эмасдилар. Айтинг-чи, дунёдин кечган ошикка дунё молининг қанчалик қадри вордир? Ҳеч қанча!

Абдусамад хотинининг жон куйдириб айтаётган гапларини эшита туриб, кулимсираб қўйди.

- Кулишиниз боиси мени айбситмоқлики, бегим? – деди Чўлпоной аразлаш оҳангига.
- Йўқ, нега айблай? Бир нарса хаёлимга келгани сабабли кулдим.
- Нима нарса, айтиниз? – деди Чўлпоной ўжарлик билан.
- Сиз... китоб ўқийсизми ё ёдлаб оласизми?
- Лозим ерлари нафақат ёдима, ҳаттоқи қалбима муҳрланиб колажак. Айтинг, бегим, Мирзо Бобур

хазратларин ўз жонларин фарзанду аржумандларига фидо килмишларин йиғламай ўкуб бўлурми экан? Айтинг, бу кунларда шундай оталар борми экан?

Бу савол Абдусамаднинг юрагига ўқдай қадалиб, яралади. Ҳатто танасига енгил титроқ югурди. Назарида Чўлпоной «Айтинг, адангиз жонларини фидо килиб, Абдуҳамиднинг жонини сақлаб қола олармидилар?» деб сўрагандай бўлган эди. Зайнаб «Ҳамид акамни адамнинг душманлари ўлдиришган», деганидан бери кўнгли беҳаловат эди. Москвадаги кутилмаган ҳибсга олинув, уйга қайтишгач, Абдуҳамиднинг галати хасталаниши... унда шубҳа уйғотган эди. Синглисининг титроқ лабларидан учган сўзлар бу шубҳани ҳакиқаттага айлантириб, уни аросат водийсига ҳайдаганди. Шу аросатда гангиб юрганида хотини бир китоб баҳонасида қалбни яна яраладигина эмас, эскисини титиб, туз ҳам сепиб қўйди.

Чўлпонойнинг омматан берган саволига хоссан қилиб, «Ҳа, бор! Менинг адам шундай қила олган бўлардилар», деб дадил жавоб бериши мумкин эди. Отасининг жон фидо қила олишига ишончи комил эди. Ўз гуноҳлари учун фарзанди жон берганини билиб, қалб азобида яшаш накадар оғир?! Абдусамад алҳол адасининг шу оғир аҳволини ҳис қилиб, ўрнидан беихтиёр туриб кетди. Уни ҳамиша бошқариб келган Манзурага хос маъсумлик тарк этиб, Асадбекка хос қасоскорликнинг бераҳм руҳи эгаллаб олди. Шу оннинг ўзида уйига қайтиб боргиси, Зайнабга «Мен келдим, қани у абллаҳлар, бир-бир бошларини узаман!» деб ҳайқиргиси келди.

Эрининг рангида ҳам ўзгариш зохир бўлганини кўрган Чўлпоной чўчиб, ўрнидан турди. Эрига яқинлашиб, елкасига бош қўйиб узрли оҳангда деди:

– Узриман, бегим, узрлидирман. Сўзларимда маъни йўқ эди. Бу ҳол энди зинҳор такрор этилмас, тавбададирман, айбимдан ўтиниз...

Тарзан билан Сурни ресторанда кўрган Асадбек «Бир зўр чиқиб, етти-саккизта йигитнинг бошини қовуштирган бўлса, ёмон эмас. Битта Ҳосилнинг ўрнига янгиси келибди. Ҳозир тизгини тортилмаса, эртага бошга чиқиб олади. Кеча ресторанда мени таниб, қочиб колишди, эртага тап тортмасдан тўғри устимга бостириб келишади-да, «йўлдан қоч!» дейишадими? Мен-чи? «Охирги нафасим қолганда ҳам сенларни уриб, гарданларингни синдираман!» дейманми? Унда бу курук гапдан ким чўчийди?!» деб тўғри ўйлаган эди. Сур билан гаплашгач, бунга яна бир карра амин бўлди.

Асадбекнинг хузуридан «Сур» лақаби билан чиккан Ахтамнинг кайфияти ўзгача эди. Бўлажак шахмат ўйинида ўзига «от» мартабасининг берилиши уни қониқтирмади. То Тарзан тирик экан, бўлажак «шоҳ» мартабасига эриша олмаслигини билгани учун, камида «фарзин» даражасини мўлжалларди. Бек акасининг марҳаматидан ранжимади. У аҳмок эмас, юкори мартабага бирданига чиқиб бўлмаслигини билади. Ҳозирча «пиёда» бўлишга ҳам рози, чунки «пиёда» акл билан юрса, тезрок «фарзин»га айланади. «От» эса қанчалик кучли юриш қилмасин, «фарзин» бўла олмайди. Нари борса, тирик қолади. Йўкса, «шоҳ»ни асраш мақсадида оддий пиёдага ҳам курбон килиб юборадилар...

Сур кўчага чиқиб, бир оз пиёда юрди. Эрталаб қибла томондан эсган шамол ҳайдаб келган қўнғир булут тўккан кўз ёшлари билан шаҳар кўчаларини ювиб, ҳавони мусаффо қилиб қўйган эди. Пок қўнгилли одам бундай мусаффоликнинг қадрига етади; сайр қилгиси келади, сухбатлашиш учун кўнгли пок қалбли дўстни истайди. Ахтам ўзга тоифадан. Табиатнинг фусун-

кор гўзаллиги уни мафтун қилган эмас. Чунки унинг қалби гўзалликни ҳис кила олиш туйғусидан маҳрум эди. Устига устак, Асадбекнинг хузуридан чиқкан дамда хаёли бошқа нарса билан банд, табиат чиройидан баҳра оладиган ҳолатда эмасди. Ёмғир яна шивалай бошлаганда эти жунжикиб, пиджагининг ёқасини кўтарди-да, икки қўлини шими чўнтақларига тикиб, кунишиб олди. Беш-ўн қадам юргач, Тарзанга айтадиган гапларини акли чиғириғидан бир-бир ўтказиб олиб, йўловчи машинага кўл кўтарди.

Анхор гугурт кутиларида терилган кўп каватли уйларни ёнлаб ўтиб, битмай колган бинодан сал нарида ўнгга бурилади. Хусусий ошхоналарга ижозат берилган йили ишнинг кўзини биладиган бир одам шу ерни обод қилган эди. Тарзан билан Ахтам бегона кўзлардан панада бўлган шу жойда вақт ўтказишни ёқтиришарди. Дастреб ошхона хўжайинига даъво қилмадилар. Очиғи, «бу ошхона бирон-бир зўрнинг паноҳидадир», янада аникроғи, «бунака зўр жойни Ҳайдар ака тинч қўймайди», деган гумонда бўлдилар. Гумонда бўлдилар-у, чўчимадилар. Сичконни пойлаётган мушук каби сергак бўлиб, кутдилар, кузатдилар. Гумон пуч эканини билгач, ошхонани ўз «паноҳларига олганларини» хўжайинга маълум қилдилар. Хўжайн Ҳайдар акасига арз қиласагини айтганида «Ҳайдар акани ўртага қўйма. Акахон кимлигингни билмайдилар, ошхона очганингдан ҳам хабарлари йўқ. Номларини сотиб юрганингни қулокларига етказиб қўйсак, шўринг қурийди», деб бир-икки тепки билан сийлашгач, уларни ўз паноҳкори сифатида қабул этишга мажбур бўлди.

Кесакполвоннинг ўз чойхонаси – козихонаси борлигини улар билардилар. Унда содир бўлган воқеалардан озми-кўпми хабардор эдилар. Бу ошхонани ана шундай козихонага айлантиришни ният қилдилар. Ниятлари амалга ошмай туриб, Асадбекнинг назарига тушдилар. Бу улар учун муддаонинг айни ўзи

эди. Максад чўқкисига айланма сўқмок оркали эмас, тикка йўл билан чиқа олиш имкони туғилганидан кувонсалар-да, сергакликни бой бермасликни маъкул кўрдилар.

Улар Бек акаларининг энг ишончли қаноти ҳалокатда жон берганини билардилар-у, аммо бу фожия сабабидан бехабар эдилар. Кесакполвоннинг кесилган боши кафансиз Ҳосилбойваччанинг лаҳадига қўйилгани ҳам уларга маълум эмасди. Шу боис ҳар иккови ҳам Бек акаларининг бу марҳаматлари боисини англай олмай, гаранг эдилар. Бек акалари яратган шайтанат оламига дадил эмас, таваккал қилиб кириб келишдан ўзга чоралари йўқ эди. Сур Бек акасига шахмат ўйинини эслатгани билан, уларнинг тақдири кўпроқ ошиқ ўйинини эслатарди. Ошиқ тепилгандага олчи турадими ё йўкми...

Тарзан ошхонанинг хос хонасида эмас, ўзига хуши ёқадиган соҳилдаги шийпонда ўтиради. Столнинг ўнг томонига қўйилган шахмат тахтасида кора шоҳ билан фарзин, икки катак нарида ок шоҳ билан бир фарзину тўра қолган эди. Шахмат масалалари ечишга ишқибоз бўлган Тарзан доналарни терган-у, масалани ечишга келганда хуши бўлмай, сувга термулганича ўйга толган эди. Стол ўртасига қўйилган икки шипса пивонинг оғзи очилмаганди. Сур уни кўриб «мени пойлаётган экан», деб ўйлади. Табиатан ичкиликни ёқтирмайдиган Тарзан пивони Сурга илиниб олиб қўймаганди. Сўрамаса ҳам, ошхона хўжайини «Бугун эрталаб Чимкентдан ўзим олиб келдим», деб лутф қилган эди.

Сур индамай келиб, шахмат тахтасидаги доналарга тикилди, ўзича нималарнидир чамалагач, сўради:

– Оклар бошлайди ва икки юришда мотми?

Тарзан унга караб қўйди-ю, жавоб бермади. Сур унинг карашига парво қилмай, доналарни у-бу катакларга суриб, йўл излади. Сўнг бош чайқаб, деди:

– Икки юришда мот қилишнинг иложи йўқ. Уч юришда...

— Мен уч юришлик ўйин ўйнамайман. Мен бир юришда мот қилишим керак, — деди Тарзан маънодор оҳангда.

— Бунга ҳали вақт бор, — деди Сур гап тагига яши-ринган маънони англаб. — Қора шохни бу туришида мот қилиш осонмас. Уч юришга сабр қилишдан бошқа чора йўқ.

Сур уч юриш килиб кора шохни бир чөргиб думалатди-да, Тарзанинг рўпарасига ўтириб шишаларнинг оғзини очди; бирини дўсти томон суриб кўйди. Тарзан шишага қараб кўйди-ю, кўлига олмади.

— Канака гап топиб келдинг? Катта аканг миянгнинг бўшаб колган мурватларини бураб кўйдими? — деди унга тикилиб.

Сур жавобга шошилмади. Пивонинг ярмини ичиб, лаззатланганини ошкор килиб, лабларини чўлпиллатиб кўйди. Кейин яна бир кўтаришда шишани бўшатиб, одатини такрорлади.

— Катта аканг меҳмон қилмадими? Юрагинг куйиб кетдими? — деб пичинг қилди Тарзан.

— Сен билан мени меҳмондорчиликка чақирмайди, жони гаровга қўйилса, хизматга чорлайди, шунга ақлинг етмадими? — деди Сур иккинчи тишани ҳам кўлига олиб.

Унинг бу килиғидан аччикланган Тарзан шишани тортиб олди. Сурнинг ҳозирги гапи унинг учун янгилик эмасди. Икки кун аввал Асадбек билан гаплашгандаёқ бу мақсадни англаб етганди. Бир неча йигитга бош бўлиб, ҳукмини ўтказа олаётганидан ҳаволанган Тарзан ўзидан зўррок одамнинг оёғи остида ўралашиб қолаётганидан ғашланган эди. Эртами ё индинга бу хорликдан шараф тожига кўтарила олишига ишончи бўлса-да, ёшлиқ ғурури бугунги тубанлини ҳазм қила олмаётган эди. Сурнинг гапи қалбини кемираётган шу ҳақиқатни тирнаб кўйгани учун ҳам аччикланди.

Гавҳар бозорида мунчоқнинг киймати, қуёшнинг

хузурида чирокнинг нури бўлмаганидек, баланд ми-
нора ҳам тоғ чўккиси этагида паст кўринади. Тар-
зан буни билади, тушунади. Асадбек хузурига қадам
кўйгач, оғиз маҳкам, кўз ва қулок очик бўлиши за-
рурлигини ҳам билади. Ахтам икковини Асадбек
йўқлади. Алоҳида-алоҳида гаплашди. Улар Асад-
бекка қўшилиб, ўз ҳаётларини йўқотдиларми энди?
Тарзаннинг фикрича шундай, аслида эса уларнинг ўз
ҳаётлари бўлмаган. Одамийликдан нарида юриш ҳаёт
эмас, ҳайвонийлик эканини уларнинг ожиз онглари
фаҳм эта олмагач, яна қандай хуросага келишсин?

— Ҳов аклли аҳмок, гапничувалаштирма! — деди
Тарзан, жеркиб.

— Гапни чувалаштираётганим йўқ. Сен билан мен-
га ўхшаган аклли аҳмоқларга кунлари қолган бўлса,
Бек акамнинг дўппилари тор келганта ўхшайди.

— Тўғри тушунибсан... — Тарзан шундай деб жим
бўлди. Кейин Ахтамга тикилган ҳолда сўради: — Сен
Худога ишонасанми?

Кутилмаган савол Ахтамни ажаблантириди. У ҳам
шеригига тикилиб қолди.

— Мен Худони кўрмаганман, кўрмаган нарсам-
га ишонмайман. Мен кўзимни очиб, қамоқхонани
кўрганман, милисани кўрганман. Уларнинг борлигига
ишонаман.

— Сен улардан кўркканинг учун ишонасан.

— Нима дединг? Мен кўркаманми? Сен ўз уйинг-
га кириб-чиқишидан кўркасанми? Мен ҳам шунақаман.
Қамоқ билан милисадан сен кўркасан, ана, Бек аканг
ҳам кўрқади. Сен билан менинг фарқимиз шунда.

— Бўпти, майдалашма, Худога ишонасанми ё
йўқми, жавоб бер.

— Ишонмайман, дедим-ку?

— Бекор қиласан, ишониш керак: Худо бор. Бўлма-
ганида бизни Бек акамизга рўпара килмас эди. Нимага
учраштириди? Ўйлаб кўр-чи?

— Ўзинг ўйлаб кўргандирсан, айтавер.

– Жойини олишимиз учун учраштириди.

– Бу фикрингга гап йўқ! Бек аканг тахтида кўп ўтириб колди. Ҳатто моғорлаб ҳам кетгандир. Ёшларга бўшатиб берса ҳам бўларди. Бу жой сенга ярашади. Тахт талашиш иккаламизга ҳам тўғри келмайди. Биз кўринмас темир занжир билан боғланганмиз. Яшасак бирга яшаймиз, ўлсак бирга ўламиз. Ёшим катта бўлса ҳам, мени «ака» дегинг келмайди, ғуруринг йўл кўймайди, сен олий ирқдансан, мен иркит бир мурдаман. Лекин сени «укам» дегим келаверади. Сени яхши кўришим шундан. Гапингни икки қилмаслигимга ҳам шу сабаб. Фақат... баъзида ақлинг жуда-а ошибтошиб кетади, шунисига доғман. Ақлинг тўлишиб кетган пайтда ҳам менинг гапимга кириб турсанг, Бек акангнинг тахти ҳаппаи ҳапол сенини. Агар шу тахтга чиқишинг учун менинг бошимни босиб кўтарилишинг шарт бўлса, калласини кўйиб бермаган – номард!

Бу гап Тарзанга хуш ёқиб, мукофот тарзида шишиани у томон суриб кўйди.

– Сенинг бошинг менга керак, мен оғайнисини курбон қиласиган номардлардан эмасман. Тахтни олсак, бирга оламиз, ололмай ўлсак ҳам бирга ўламиз. Сени кутиб ўтириб шу аҳдга келдим. Бек акамнинг таклифларини ерда қолдирмаймиз. «Қамишдек бел боғлаб» хизматни бошлаб юборамизми? – Тарзан шундай деб истеҳзоли жилмайди.

Сур пиводан бир ҳўплаб қўйиб, шеригига савол назари билан тикилди.

– Хизматни сен бошлаб тура коласан. Менинг учтўрт кунлик зарур ишим бор.

– Қанака иш?

– Кейин айтаман... – Сур яна пиво ҳўплади-да, шахмат доналарини бир-бир тера туриб, қўшимча қилди: – Балки айтмасман... Сен билан менинг ўйлаб қўядиган бир ишимиз бор: Бек акамнинг гроссмейстер эканини унутмаслигимиз керак. Ё «от» тепкисидан, ё «фил» ўкидан, агар лаллайсак, ҳатто «пиёда»нинг

аксиришидан ўлиб кетишимиз мумкин. Шунака бўлганидан кейин қанака ҳимояда ўйин бошлаймиз: сицилиянчами ё кўхна ҳинд ҳимоясидами? Жавобингни айтмасанг ҳам биламан: хужумга ишқибозсан. Мен «от»ни сур, десам, пачоғинг чиқишини билсанг ҳам, «фил»ни сургинг келиб туради. Энди бу қилиғингни кўясан, оғайни. Бек акам ресторонда қармоққа илинадиган лақмалардан эмас!

Тарзан – аклига бино кўйган, нима деса, нима қилса тўғри эканига ишонадиган йигит, бу гапларнинг ҳак эканини тан олиши қийин бўлса-да, камокхона «академияси»ни битирган шеригининг огохлантиришини қабул қилишга мажбур эди.

Сур тераётган доналарини шарт суриб ташлади-да, ўнгдаги бурчак катакка оқ шоҳни, пастрокка эса битта кора пиёда билан фарзинни кўйиб:

– Бир юришда мот, – деб иршайди.

Тахта устида қора шоҳ йўқ эди, Тарзан бунга аҳамият бермади, Сурнинг бу масаласини ҳам майнавозчилик деб қабул қилди. Ҳолбуки, Сурнинг бу харакати ўзига кўп маъноларни япирган эди...

2

Бу ёшдагиларнинг бирлари илм оламига кириб бориш, яна бирлари эгаллаган ҳунарлари билан барчани лол қолдириш умиди билан яшайди. Яна бирлари қўша-қўша ўғиллар кўришни Яратгандан сўрайди. Анҳор соҳилида ўтирган бу икки йигитга эса униси ҳам, буниси ҳам керакмас; иккови бир бўлиб, зулм оламини забт этишни истайди. Аникроғи, истак ва орзу энди ортда колган – жонларини гаровга кўйиб, харакатни бошлаганлар. Илм талабидаги киши хайрли келажагини тасаввур кила олади. Тарзан билан Сур келажаклари шарафсиз ўлим эканини билсалар ҳам, буни тан олгилари келмайди.

Ўзни зўр англагани ҳолда, атрофида ўзидан-да зўр

борлигини билиб хавотирда яшашнинг балки лаззати мавжуддир. Ҳосилбойвачча ёки Кесакполвон каби хорланиб ўлишнинг роҳати бордир балки? Биров ити ўлса, ачиниб кўмиб қўяди. Уларга ким ачинди? Ким кафандади? Ким жаноза ўқиди? Ким «Вой отам!» деб нола чекди?!

Вақти келиб, Тарзан билан Сур бир кунда, бир соатда, ҳатто бир дақиқада ажал ўқидан эмас, зулм салтанатига эгалик қилишни истаётган ўзга зўрлар қўлида жон беришларини, кафансиз кетишларини билсалар, бу онда эсларини йигиб, йўлдан қайтган бўлармидилар?..

Худо билади... танлаган йўлларидан қайтишлари кийин, жуда кийин... камондан ўқ узилиб бўлган...

...нишон эса – ўлим!

Ўлимни ўйламаётган бу йигитлар ўлим шарбатини ичганларидан сўнг «ёш кетдилар-а, бечоралар!» деб уларга ким ачинар экан?

Ҳозир буни ўйлашмайди. Балки ҳеч қачон ўйлашмас...

Сур пивони охиригача ичиб бўлгач, ўз иши билан кетди. Тарзан эса сувнинг ожиз тўлқинларига бокиб ўтираверди.

Шу онда биров келиб, ундан «сен қандай бола здинг-у, қандай йигит бўлдинг? Энди қандай одам бўлмоқчисан?» деб сўраса, нима деб жавоб берарди?

Ўн беш ёш арафасида турганда «Тарзан» лакабидан ҳали узоқда эди, якинлари уни ўз исми билан «Марлен» деб ардоклашарди. Ҳа, уни ҳамма «яхши бола», деб мақтарди, «ўғлим шунга ўхшасин», деб ҳавас қиласарди. Отаси ҳам «ўғлим ўзим истаган йўлдан юриб улғайяпти», деб шодланарди. Йигирма ёшида шахмат оламини лол колдириб, халқаро гроссмейстер шоҳсупасини згалламоғига ишончи комил эди. Бу баҳтли яқин келажакка ҳатто Марленнинг ўзи ҳам ишонарди.

...Тотли орзулар канотида сузиш дўстининг ўлимига кадар давом этди.

Дўсти...

Жаҳонгирни шунчаки «дўст» дея олмайди. Назарида Жаҳонгирнинг фазилатлари бир «дўст» доирасига сифмайди.

Жаҳонгир ҳеч маҳал соткинлик қилмайди...

Жаҳонгир дўстидан жонини ҳам аямайди...

Жаҳонгир дўстининг ҳимоясига ҳамиша тайёр...

Ўн беш яшар йигитчага шу фазилатларнинг ўзи кифоя эди. Улар синфда ёнма-ён ўтиришарди. Уйлари ҳам бир кўчада эди.

Фақат...

Оталарининг мартабалари бир-бирига мос эмасди. Бирининг отаси иккинчисиникига паст назар билан бокар, ўғлининг бу хонадондан нарида юришини истар, бу истагини фарзандидан яширмас ҳам эди. Ота «бу бола билан ўрток бўлма», деб тайинлагани сайин ундан ўзга яхшиrok дўст йўқлигига ўғилнинг ишончи ортиб борарди.

Кинохона атрофига ин кўйган тўрт-беш зўравон мактабга бораётган болаларнинг йўлини тўсиб, чўнтагини кокиб оларди. Ёнида пули йўқларга «жарима солинарди» – бугун ўн тийин билан қутулиши мумкин бўлган бола эртага йигирма тийин олиб келишга мажбур эди.

Жаҳонгир ҳам шу қармокқа илиниб, аввалига овқатланиш учун берилган пуллар билан қутулиб юрди. Кейин талаб ошавергач, бувисининг қутисидаги пулдан ола бошлади. Марлен «катта»нинг ўғли бўлгани учун уларнинг чангалига тушмаган, деб ўйлаш хато, бунинг бошка сабаби мавжуд эди. Жаҳонгир зўрларнинг дастидан дўстига арз килса, балки, масала осонрок ҳал этилармиди... Лекин «кўркок» деган лаънат тамғасидан чўчиб, индамади. Зўрлар Жаҳонгирни чақиришганда Марлен уларнинг мақсадларини англарди, лекин ўртоғининг пул узаттанини қўрмагани учун «ўзи келишиб оляпти», деб аралашмасди. Жаҳонгир дардини ичига ютадиганлар тои-

фасидан эди. У ўзича чора излади, лекин топа олмади. Отасига айтиши ҳам мумкин эди. Лекин айтолмади. «Э, латта, шуларга кучинг етмайдими, мишиғингни оқизиб юровур...» деганга ўхшаган таъна эшлишини хоҳламади; икки ўт орасида қолди. У ўзини ўғрилиги учун, кўркоклиги учун айблади. Тунлари ухламай, ўша «зўр»лар билан хаёлан олишиб чиқди. «Эрталаб бораман, «Нима қилсанг қил, ўлдирсанг ўлдир, пул йўқ», дейман», – деб қарор қилгани билан, «зўр»ларни кўргач, дами чиққан пуфак ҳолига тушаверди. Борабора бувиси пули йўқолганини билди. Жаҳонгир унинг «ўлимлигимга йиғиб қўйган пулим эди-я, кайси бемеҳр олди?» – деган гапларини эшишиб қолди-ю, ўн азоби минг бўлди. Ичга ютилган дард уни кемира бошлади. «Мен оловдим, шунақа воқеа бўлувди», деса – олам гулистон. Ота-онаси ҳам, бувиси ҳам бир оз коийиб, сўнг унтишарди. Йўқ, ташкаридан туриб шундай фикрлаш осон. Жаҳонгирнинг ғўр ғурури бошқача йўлга ундади. Бир неча сўздан иборат гапни айтишдан кўра ўлимни танламоқлик унга осон туюлди – яrim тунгача рух азобида тўлғониб, ҳовлидаги тут дарахтидан, унинг шохига ўзи ташлаган сиртмоқдан паноҳ топди. Ўз жонига қасд қилгани учун тўнғиз қавмида кетишини, жаноза ўқилмаслигини, қиёматда дўзах азоби кутиб турганини бола бечора билмасди...

Марлен дўстининг осилиб турган холатини кўрмади. Мурдани ўлихонадан олиб келиб, хотинлар уй бурчагига чимилдик тутишгач, ўртокларининг киришига ижозат беришди. Тўй кўрмай жон берган йигит-қизларга ирим килиб уйда чимилдик тутишлари, ғассол келгунига қадар мурда шу чимилдик ичидагулишини Марлен ҳам, бошқа ўртоқлари ҳам билишмасди. Гулга кўмилган ўртокларини кўргач, англашди.

Марлен ўлимнинг сабабини кейинрок билди. Билди-ю, чорасизлигидан азобланди. Вокеани баён килиб, отасидан мадад кутди. Ўғлининг Жаҳонгир

билан дўстлашишини истамаган отадан қандай мадад кутиш мумкин? Даастлаб «ўйлаб кўрамиз», деб гапни қиска килди. Уч-тўрт кун ўтиб, Марлен яна эслатгач, энсаси котиб:

– Бу мен аралашадиган иш эмас. Ўлган боланинг отаси бор, онаси бор, милисага арз қилсин, – деди.

– Милиса ўша зўравонларни ҳар куни кўради, индамайди-ку? – деди Марлен.

– Тўғри, кўради. Индамаслиги ҳам тўғри. Чунки улардан чўтал олиб туради.

– Жаҳоннинг адаси ўша чўтал оладиган милисага арз қилиши керакми?

– Ҳамма нарсага аклинг етади: тўғри тушунибсан, арз қилишининг фойдаси йўқ. Ўлган ўлиб кетди, каёққа югурса ҳам қайтиб келмайди.

Марлен «ўша зўрлар менга осилса, сиз ҳам ўша милисага арз қиласизми?» демоқчи бўлди-ю, жавобга отасидан яхши гап эшитмаслигини билиб, индамади. Отасидан нафратланиш билан чекланди.

...Марлен «Жаҳонгир ҳеч маҳал сотқинлик қilmайди», деб ишонарди ва унга ҳавас қиларди. Жаҳонгир ҳеч кимни сотмай, сирини гўрига олиб кетди. Энди унга ҳавас қилмайди...

...Марлен «Жаҳонгир дўстидан жонини ҳам аямайди», деб ишонарди. Жонини аямади... Фақат... дўстидан эмас, арзимас нарсадан аямади. Энди унга ҳавас қилмайди...

Марлен «Жаҳонгир дўстнинг ҳимоясига ҳамиша тайёр», деб ишонарди, унга ҳавас қиларди. «Мен-чи, мен дўстимни ҳимоя кила оламанми?» деб ўзига-ўзи кўп марталаб савол берган. Назарида ҳимоя қила олар эди. Маълум бўлдики, ўзига бўлган ишончи пуч экан. Дўстини ҳимоя кила олмади... Дўстни ҳимоя кила олувчи дўст эса кетди...

У Прометей ҳақидаги афсонани ўқиган эди. Олимп тоғидан оловни ўғирлаб, Одам зотига ҳадя этгани учун Зевс худоси уни кояга занжирбанд этган экан. Ўттиз

минг йил давомида, то Херакл отиб ўлдиргунига қадар, бир бургут тонгда учиб келиб, кечга қадар Прометейнинг жигарини чўкиб, азоблар экан. Жигар ке-часи билан асл ҳолига қайтиб, тонгдан яна янги азоблар бошланар экан...

Афсонавий қаҳрамонга ўхшашиб ҳам келмаган, ҳали бирорвга тайнинли бир яхшилик ҳам килмаган Марленни хотира бургути ҳар куни жигарини эмас, юрагини чўқилаб азоб берарди. Отасидан нажот кутиб эди, умиди сароб бўлиб чиқди. Унинг халоскори йўқ эди. Зотан, хотира бургутини ташқаридан маҳв эта оловчи куч ҳам йўқ. Отаси кинохона яқинига уя қурган зўравонларнинг тухумини қуритган тақдирда ҳам, Тарзаннинг қалб яраси барибир тузалмас эди. Бу ҳақиқатни англашга ожиз ўсмирлик онги ҳаётни ўзгача тушунишга мажбур этди.

У ўзи яшаетган оиланинг «бахтли» деб сифатланишига тушунолмай қолди.

Кунлар, ойлар ўтгани сайин ота-бала орасидаги бўшлиқ кенгаяверди. Улар гўё икки бегоналиқ қутбларига ҳукм килингандай, бир-бирларидан узоклашавердилар.

Ўн беш ёшга тўлган кунини ҳайратланарли тарзда нишонлаш режаси тузила бошлагандан қишлоқдан бобоси келди. Бу ташриф отасига ҳам, онасига ҳам ёқмади. Айникса онаси зиёфатга «нозик меҳмонлар» келишини қайта-қайта писанда килавергач, нозикфаҳм бобоси бевакът келганини англади. Буклоғлиқ тўнини ўнг қўлтиғига қистириб олган бобосини Марлен кўчада учратди. Аникроғи, бобоси унинг мактабдан кайтишини кутиб турган эди.

– Жоним болам, сафарим кариidi, кетяпман, – деди бобоси, унинг пешонасидан ўпиб.

– Туғилган кунимда кетиб қоласизми? – деди Марлен аразли оҳангда.

– Зиёфатларда ўтириш ёшларга ярашади. Бизда-қаларга чойхонада ёнбошлаш ёқади. Аччик кўк-

чойдан икки хўплам ичиб, гурунг килсак, жаннатнинг роҳатига етгандай бўламиз. «Таралла-бедод ялла» мени ҳоритиб қўяди, жоним болам... Туғилган кунинг уйимда ўтириб, сени дуо қиласман. Сурувдаги йигирмата сара совликни сенга атаб қўйганман. Уйлангунинггача бир дунё бўлади.

Кексалар дардларини яширишга уста бўлишади. Уларнинг кўзларига тортилган маъюслик булутини ҳамма ҳам кўра олмайди. Овозларидағи ҳазинликни ҳамма ҳам сезавермайди. Марлен бобоси калбини кемираётган дардни сезмаса-да, кетиши сабабини англаб, бошини эгди.

Бобосини кузатиб, автобус кўнағасига қадар бирга борди. Автобусни кутишга тўғри келди. Бобоси унга узок тикилди, дилидагини тилига кўчиришни истади: «Шу ёшга етдинг, улғайдинг, Худога шукур. Энди бу ёғига дунёни ўз аклинг билан тушуниб етишинг керак. Лекин... даданг бунга йўл берармикин? Даданг кайсар... Акли етарли, аммо керакли нарсаларга сарф килмайди, шундан куяман. Худо сени бергандা кувониб, отамнинг исмини қўймокчи бўлувдим. «Шербек полвон» деган ном етти иқлимга тарқалганди. Саксон ёшларида ҳам қураклари ерга тегмаганди. Сенам полвон бўлиб, дунёга танилгин, деб умид килувдим. Даданг гапимни эшитишни ҳам истамади, Маркс билан Ленинга сигиниб, «Марлен» деб қўйди. Кишлокдагиларга «неварамнинг исми Марлен», дейишга уялдим, «Шербек полвон» деявердим. Шунинг учун қишлоқка борганингда сени кўпчилик «Шербек» деб чакиради. Онанг туғруқхонадан чикканида кулогингга аzon айтмокчи бўлувдим, даданг айттирмади. «Билиб колишса, партиядан ўчирворишади», деди. Уч киши орасидаги сирни ким ҳам биларди? Бу бир баҳона-да! Ё мен парткомига бориб: «неварамнинг кулоғига аzon айтдим», деб мактанаармидим? Ушанда айттирмаганига кувонган ерим ҳам бўлди. Отингни «Марлен» дейишга Худодан уялдим... Даданг амали-

дан айрилиб қолишидан күркди, Худодан күркмади. Амални боғлаб берибдими, зартами-кечми, күшкүллаб топширади... Сенга қийин бўлишини билиб турибман, жоним болам. Пайғамбаримиз: «бола беш ёшга тўлгунича у подшоҳу сиз унинг кули мақомидасиз, беш ёшидан ўн беш ёшигача сиз подшоҳу у кул марта-басида, ўн беш ёшдан кейин фарзандингиз билан дўст бўлинг», деган эканлар. Даданг буни билмайди, билганида ҳам амал килмасди. Шунаقا кибри бор унинг. У ҳамиша подшоҳ бўлишни истайди. Сенинг ёшингдагилар ҳамиша кул бўлиб қолишни исташмайди. Мен шундан кўркаман, жоним болам...»

Бу гапларни айтишни жуда-жуда истади, аммо айтотмади. «Қишлоққа борса, бафуржа тушунтираман», деган тўхтамга келди. Индамай кетиши ҳам мумкин эмасди.

– «Инсон» дегани нималигини биласанми? – деб сўраган эди бобоси ўшанда.

Билмас эди, елка кисди.

– «Унутувчи» дегани. Одам боласи кўп яхши нарсаларни унутади, шуниси ёмон. Энг ёмони – ўзининг Одам эканини унутиб қўяди. Сен шундан эҳтиёт бўлгин, жоним болам. Бойлик билан мартаба акл билан топилади, акл хира тортса, бир зумда йўқотилади. Бойлик ва мартаба билан акл топилмайди. Бойлик билан мартаба бевафо, ҳар қандай одамни ташлаб, какшатиб кетади. Акл эса эгасига вафодор, жарликка кулашдан асрайди. Аклни халоскор десак ҳам бўлади. Энди катта йигит бўлиб қолдинг, буларни фарқлашинг керак, тушунишинг керак. Ақлдан узоқлашма, жоним болам.

Бу ҳикматли гапларнинг васият эканини ўша дамда ўйлаб кўрмаган эди. Ўн беш ёшлилар ўзларини улғайган, етуклик чўққисини эгаллаган фаҳмлаб, катталарнинг насиҳатларига беписанд қарайдилар. Насиҳатларни тоқат билан эшитаверадилар-у, аммо дарров унутадилар. Ўз билганларидан қолмайдилар.

Марлен ҳам шуларнинг бири эди. Лекин бобосининг «қақлдан узоқлашма» дейиши унга ёқди. Буни ўзига шиор, ҳатто байрок килиб олди.

...факат...

Факат аклни хайрли фазилатлар билан бойитишга уринмади, аксинча, зулм боткоғининг заҳарли суви билан суғормоқни маъқул кўрди. Бобосининг ранжиб кетиши уни зулм олами томон дастлабки қадам қўйишига сабаб бўлди. Биринчи галда отаси ва онасини жазолашни ўйлади. Жазо усулини топди ҳам. Унинг режасига кўра, туғилган куни шодиёналиқ эмас, балки ташвиш билан ўтиши керак эди. Ўзгалар тақдирига локайдлик ва беписандлик билан қарамоқликнинг бундан ўзга жазоси йўқ эди.

Адашган акл уни кинохона томон бошлади. Кечагина жазоланишини хоҳлаган йигитлардан нажот истади. Зўрларнинг каттасига бориб, зарур гапи борлигини билдириди. «Зўр» сигаретини лабида ўйнатиб, ёнидагиларга бир ишора қилган эди, улар узоқлашдилар.

– Кичкина болалардан танга йиғиш жонингизга тегмадими, гадойга ўхшаб туришдан уялмайсизми? – деди.

Бу дадиллик «Зўр»ни бир неча нафас гангитиб кўйди. Кейин ғазабланиб, унинг кекирдагига кўл юборди:

– Нима деяётганингни биласанми, хумса?!

– Биламан, – деди Марлен, хотиржам тарзда. – Мўмайрօқ пул ишлаш йўли бор, шуни айтмоқчиман.

«Зўр» киссанурлик қилгани учун икки йил болалар камоқхонасида ўтириб келгани билан бу олам учун хали фўр эди. Шу сабабли Марленнинг таклифини мулоҳаза килиб ўтирмай, унга дарров ишона қолди. «Зўр»нинг режа тузиши шарт эмас, Марлен бу ёғини пишиқлаб қўйган – режани амалта оширувчи ҳам ўзи, бу ёқдагилар эса шунчаки ёрдамчи эди. Режа амалга ошгач, тушган пулнинг ҳаммаси буларга коларди. Марлен улуш олмасди. «Зўр»га шуниси ёқди.

У Ахтам билан ўшанда танишган эди. «Зўр» режа билан танишгач, ўзидан беш-олти қадам наридаги болага қараб «Мурда!» деб чақирганди. Буни эшигтан Марлен «Мурда»нинг лақаб эканини билмай, «шунака исм ҳам бўладими, бунча хунук!» деб ўйлаганди.

«Мурда» унинг режасини диққат билан эшигти-да, дарров ўзгартиш киритди:

– Ҳар бир ўртоғингга юз сўмдан талаб килишинг инсофданмас, уларнинг нархини жуда-а ерга уриб юбординг-ку? – деди норози оҳангда.

– Сиз уларни билмайсиз, аслида сарик чақага ҳам қиммат, – деди Марлен асабийлашиб.

– Сен учун сарик чақага қиммат. Мен учун уму-ман қадри йўқ. Менга колса, ўртоқларингни нима қиласадим, биласанми? – Мурда савол берди-ю, жавобни кутмади, совуқконлик билан давом этди: – Ўлдирворардим...

Марлен буни хукм ўрнида тушуниб, қўркиб кетди:

– Йўқ, йўқ, уларга тегманг, уларни факат қўрқитиш керак, – деди лаблари титраб.

– Гапи тўғри, шилта ишни хаёлингга ҳам келтирма, – «Зўр» шундай деб Мурдани тутиб қўйди.

Марленнинг қўркиб кетгани Мурдага ёқди, шеригининг танбеҳига парво ҳам қилмай, янада совуқконлик билан қўшиб қўйди:

– Ўзингни ҳам қўшворардим. Нимагалигини биласанми? – Марленнинг гап айтишга ҳоли қолмаганди, шу сабабли бу сафар ҳам саволига ўзи жавоб қайтарди: – Сенлар ҳамманинг қонини сўрадиган канасанлар. Сенлар, ха, сенинг ўзинг ҳам, бизларни ёмон қўрасанлар. «Ўгри» дейсанларми, «йўлтўсар», «талончи», яна нима балолар дейсанларми, ҳарҳолда гўрга киришимизни хохлайсанлар. Гапимни эшитиб, ичингда «ўзинг канасан», дединг-а?

– Йўк-йўқ, бунака гап калламга келмади, – деди Марлен. У гапнинг бундай чуваланишига ҳайрон, окибатни билолмай гаранг бўлиб қолган эди.

– Ҳозир келмаган бўлса, бирпас туриб келади. Умуман, балки биз ҳам канадирмиз. Лекин фарқимиз бор: биз қонни томчилаб сўрамиз, сенлар чеълаклаб ичасанлар. Биз тўйишимиз мумкин, аммо сенлар тўймайсанлар.

Бу гаплар Марленнинг ҳамиятига тегди, ғурур кўркувни қувди:

– Беш кўл баробар эмас, – деди Мурдага тик қараб.

– Маколни ҳам билар экансан, калланг жойида, – деди Мурда ишшайиб. Энди бир нарсани ҳал қилиб олайлик: бу гапларни бекорга айтмадим. Мен сенларни ёмон кўраман, ўла-ўлгунимча эзиб-янчишга, уруғларингни куритиб юборишга ҳаракат қиласман. Сен ҳам мени ёмон кўрасан. Қўлингдан келса, сен ҳам мени янчиб ташлашга интиласан. Лекин ҳозир менга ишинг тушиб турибди. Бир-бирини ёмон кўрадиган иккита одам келишиб олиши керак. Каллангни ишлатчи, кейин нима бўлади?

– Ҳеч нима... сиз пулни оласиз, кейин юзкўрмас бўлиб кетамиз.

– Сен биладиган мақолни мен ҳам биламан: «бир кўрган таниш, икки кўрган билиш», дегани ҳам бор.

– Иккинчи кўришмаймиз, – деди Марлен ўжарлик билан.

– Сен кимлардандир қасос олмокчисан, билиб турибман. Үғил болалигининг учун сенга қойил қоляпман. Афсус укам эмассан, сендақа жигарим бўлганида бошимда кўтариб юрардим.

Марленнинг кўзларида акс этган нафрат учкуни сезгир Мурданинг назаридан четда колмади:

– Ҳа? – деди у ён томонига «чирт» этиб тупуриб. – Бу гапим ҳам ёкмадими? «Акам бўлмаганингга Худога шукур, сендақа акаларни трамвайнинг тагига ташлаш керак», демоқчимисан? «Ака» демасанг ҳам, трамвайнинг тагига ташлашга шошилма. Мен сенга ҳали кўп керак бўламан. Мен қасоскорларни яхши кўраман. Сен ҳам шу рўйхатга тушдинг...

Ўшанда Марлен бу «Мурда»нинг кўп керак булишини тасаввуринга сиғдиролмаган эди. Ўша онда бир фолбин келиб: «тез орада хаёт йўлларинг бирлашиб кетади», деса, уни телбага чиқарган бўлармиди...

Мурда, ўзи айтганидай, гапни бекорга чўзмаётган эди. У тажрибали жаллод сингари сиртмок ясаб, бу аклсиз қасоскорнинг бўйнига солаётганди. Сиртмок тайёр бўлгач, муддаога ўтди:

– Ўртоқларингнинг ҳар бири учун минг сўмдан талаб қиласиз.

– Бу кўп, жуда кўп, – деди Марлен.

– Оширворма, – деб уни қувватлади «Зўр».

– Кўп эмас, бунака арзандалар учун кам сўрасанг, ишонишмайди. Бериладиган пулни биз эмас, сен оласан.

Марлен бу гапни эшлиши билан кўркув талвасасига тушиб, бакириб юборди:

– Қанақасига? Мен фош бўламанми? Мени ўлдиришади!

– Биз бор эканмиз, сени ўлдирадиган одам ҳали туғилмайди, – деди Мурда совук оҳангда. – Агар, биз меровлик қилиб қолсагу сенинг бир тола сочинг бехуда тўкилса, уларнинг ҳаммаси ўлади.

– Йўқ-йўқ, уларни ўлдирманг...

Бу ялиниш оҳанги Мурдага мутлако таъсир этмади. Совук нигоҳини Марленга тикканича, совук оҳангда қўшиб қўйди:

– Уларга қўшилиб ота-оналари ҳам ўлади.

Кейинги ҳукм Марленни тамоман гангитди. Йиғлаб юборишига оз колди. Буни сезган Мурда муддаосига етганидан кониқиб, ҳукмни юмшатди:

– Мен тахминимни айтяпман, кўрқма. Биз одамхўр ҳам эмасмиз, котил ҳам эмасмиз. Биз бирорнинг бурнини конатмаймиз. Биз ҳам ўзингга ўхшаган қасоскормиз. Ҳаёт сенларни эркалатган, бизларни озгина хафа қилган. Хафа қилганларнинг сал-пал адабини берамиз, бошқа ёмонлигимиз йўк...

Дунёда яшаётган миллиард-миллиард одамлар ўн беш ёшга тўлган кунларини зиёфатсиз, тантанасиз ўтказганлар. Ўн беш ёшга тўлган кунларини бир тишлам нонга зор ҳолда ўтказганлари ҳам бор. Туғилган кунни тантанасиз ўтказиш ҳам мумкин. Бу кундан ўз манфаати йўлида фойдаланиш, кимлардандир нималарнидир ундириб олиш ҳам мумкин. Кўп ҳолларда туғилган кун баҳонасида дастурхон ёзилганда бу хонадон осмонида тама қуёши порлаб туради. Марлен бу қуёш нуридан ҳар йили безиллаб турса-да, унинг юзини тўсишни ўйламасди. Аникроғи, тўсиш қўлидан келмаслигини билиб, эзиларди. Бу сафар, бобосининг уйига қайтиб кетиши унинг қалбида исён ўтини ёқди. Ҳамонки, ўт ёқилган экан, кимнингдир куйиши аник...

Марлен энг яқин ўртоклари билан кундузи қахвахонада катталардан алоҳида давра куриб ўтириш нияти борлигини ота-онасига айтди. Онаси савол назари билан караб қўйди-ю, индамади. Отаси эса ўртоклари кимлар экани билан қизиқди. Шундай савол берилишини аввалдан билган Марлен исмлар рўйхати ёзилган коғозни отасига узатди. Рўйхатдаги болалар зиёфатга чорланган нозик ва мартабали одамларнинг эрка фарзандлари бўлгач, отаси нима дерди?! Зиёфат янада мазмунли ўтажагидан қувониб, ўғлининг аклига таҳсин айтиб, шаҳар марказидаги қаҳвахонадан жой ҳозирлатиб берди.

Лабига сигарет қистириб олган «Зўр» беш ўсмир йигит ва икки қиз ўтирган тўкин дастурхонли столга аста яқинлашиб, одоб билан саломлашди-да, Марлендан гугурт сўради. Марленнинг режасида «Зўр»нинг бу тарзда яқинлашиши йўқ эди, шу боис бир оз довдиради:

— Гугурт... йўқ... чекмайман...

— Йигитнинг гули чекмаса қизик-ку? — деб «Зўр» бошқа йигитчаларга каради. Уларнинг бири чўнтағидан ёққич олиб, узатди.

– Бор экансан-ку, йигитнинг гули! – деди «Зўр» жилмайиб. Кейин сигаретини тутатгач, ёққичга ҳавас билан каради: – Зўридан экан, койилман. – Ёққични эгасига узатгач, изига кайтиш ўрнига Марленнинг ёнидаги бўш стулга ўтирди. Унинг бу килиғидан ажабланган йигитчалар бир-бирларига маънодор караб олдилар. Қизлар эса «бу сурбетга индамайсанларми?!» дегандай кошларини чимирдилар.

– Братан, лимонад-пимонад куйиб берайми? – деди ёққич берган йигитча пичинг билан.

– Раҳмат, братишка, мен лимонад ичиш ёшидан ўтиб кетганман. Сенлар ҳам ўтганга ўхшайсанлар-у, лекин бунака ўтиришларингга беш кетмадим. Сенларнинг ёшларингда товонларимиздан ўт сачраб турарди.

– Бизнинг ёшимизда?.. Анча қариб колибсизда, а? – деди Марлен заҳарли оҳангда.

– Ўтиришимизнинг нимаси ёқмади? – деди ёққич узатган бола дағаллик билан.

– Айтаверайми, хафа бўлмайсанларми? – «Зўр» шундай деб уларга бир-бир қараб олди.– Сувга тушиб бўккан бўлка нонга ўхшаб ўтирибсанлар. Мазза қилиб яйраб-ўйнамайсанларми?

– Ишингиз бўлмасин, қанақа ўтиришни ўзимиз биламиз, – деди Марлен жеркиб.

– Гап йўқ, братишка, фақат... кичкина таклифим бор, ўйлаб кўрларинг. Ёқса, хизматларингда бўламан. Бир жойда, сенларга ўхшаган яхши болларга атаб кичкинагина видеобар очган эдим. Бугун кечгача бўш, Масковдан янги кинолар олганман, агар ҳафсала килсаларинг анави опангга айтасан, бошлаб боради, – шундай деб дераза томондаги столда ёлғиз ўтирган жувонга қараб қўйди. – Нархини келишамиз, яхши боллардан кўп олмайман.

«Зўр» шундай деб ўсмирлар юрагига қизикиш ўтини ёқкач, қаҳвахонадан чиқиб кетди. Ўтирганлардан айримларининг уйларида видеомагнитофон бўлгани билан ўzlари хоҳлаган кинофильмларни

кўришдан маҳрум эдилар. Шаҳардаги яширин видеобарлардан хабардор бўлганлари учун ҳам Москва-дан кечагина олинганд томошаларни кўришга кизиқиб колдилар. Бир қиз боришни истамади. Бошкалари эса тотли лаҳзалар умидида жувонга эргашиб кетдилар.

«Зўр» уларни алдамаган эди, ўн икки қаватли иморатнинг ертўласида жиҳозланган яширин видеобарда кутиб олди. Видеобар номига яширин хисоблансада, хилватда жойлашмаган, назорат қилувчи керакли одамларга вактида чўтал тўлаб турилгани учун бу атрофдан ўтган мушукни бирор пишт демас эди. Ахтам доимий мижозлардан бўлгани сабабли бу мишиштхонанинг хўжайинига сўзини ўtkаза оларди. Марленнинг таклифи ва режасини эшиштганда биринчи галда шу жой кўз олдига келди. Хўжайинга уч кунлик мишишти борлигини билдириб, ҳаққини олдиндан тўлаб кўйди. Хўжайнин мижозларини гангитиб кўймаслик мақсадида эшикка «вақтинча ишламийди» деган эълонни ёпиштириб, калитни Ахтамнинг қўлига топширди-да, тўртингчи куни эрталаб хабар олажагини билдириб, хайрлашди.

Ахтам калитни «Зўр»га бериб, ўзи сал наридаги қаҳвахонада пайт пойлаб ўтирди. Режага кўра, меҳмонларни, аникроғи, қармокқа илинганд лақма балиқчаларни хушнудлик билан кутиб олиб, ухлатиб бериш унинг зиммасида, колгани эса Ахтамнинг иши эди.

Ярим коронғи кенг хона бурчагида турган телевизор рўпарасига юмшоқ ўриндиқлар кўйилган. Ҳар икки ўриндик олдидаги пастак столча усти мишиштага лозим егулик ва ичимлик билан безатилган эди. Меҳмонлар жойлашиб олишгач, «Зўр» битта шампан виносини очиб, қадаҳларга қуйиб чиқди.

— Биринчиси менинг хисобимдан, таклифимни ерда колдирмаганинглар учун совға десам ҳам бўлади. Бундан кейин келганларингда ҳам биринчиси мендан бўлади. Қолганларининг хисоби бор. Хисобли дўст

айрилмайди, дейишади-ку, тўғрими? Бу меҳмонхонада ҳакни олдиндан тўлаб қўйиш одати бор.

– Бу масалада Марикка мурожаат қиласиз. Бугун унинг туғилган куни, роппа-роса ўн бешга тўлди, – даврадаги ягона қиз шундай деди-да, ёнида ўтирган Марленнинг юзини меҳр билан силаб қўйди.

– Ие, зўр-ку! – деди «Зўр» бу «янгилик»дан кувонгандай бўлиб, – Унда яна битта шампан мендан. Биринчисини Марикжон укамизнинг соғлиги учун оламиз. Бир юз ўн бешга кирганингда ҳам шу ерда жамоа жам бўлиб майшат қилайлик! – «Зўр» кадаҳга лабини теккизиб, хўплагандай бўлди.

Киздан бошқалари ўринларидан туриб, чўқишириб ичишди. Оёғини чалишириб ўтирган киз ичиб бўлгач, жойига ўтирган Марлен томон чўзилиб, ёноғидан ўпиб қўйди.

– Бир юз ўн беш ёшни нишонлаш учун бундан тузукрок жой танланса ҳам бўларди, – деди лабини нозли равишда буриб қўйиб.

– Жой ёқмадими, сингилжон? – деди «Зўр» унинг қадаҳини тўлдира туриб.

– Ну, бир мартага ничего, – деди қиз беписандлик билан.

– Бир мартага яраган жой иккинчи мартага ҳам бўлаверади, – деди «Зўр» унга сук билан тикилиб.

Қиз бундай тикилишнинг маънисини англаб, юзини тескари бурди.

– Братан, бўладиган ишни қилинг, лекигин роса эзма экансиз, – деди йигитчаларнинг бири.

– Зўр гап айтдинг! Бўладиган ишнинг бўлгани яхши. Қанакасини қўйиб берай: «Эммануэл»дан бошлайми?

– Между прочем, бунақа эротикани ҳозир боғчада кўрсатишади, – деди қиз кошларини чимириб.

– Ростакамидан қўйинг, – деб уни кувватлади Марлен. – Московдан янгиси келди, деб мактандувдингиз-ку?

— Шунака гапларга беш кетаман-да, — деди «Зўр» телевизор томон юриб. — Ҳакикий сексни кўрмаган йигит йигитми!

Болалар кутган беҳаё кинофильм қўйилгач, уларни эснок тута бошлади. Беш дақика ўтмай, шампанга кўшилган дори таъсир қилиб, олдинма-кейин ухлаб қолдилар.

Орадан олти соат ўтгач, бирин-сирин уйғониб, ўзларини ҳожатхонанинг хиди келиб турган заҳ ва коронғи хонада, кўл-оёклари боғланган ҳолда кўриб кўркувга тушдилар. Кўзлари коронғиликка ўргангач, бир-бирларининг қораларини кўриб, овоз чиқардилар. Кўйлаги тугмалари ечилиб, сийнабанди кўриниб колган кизнинг аҳволини кўрмадилар, кўрганларида ҳам нима кила олар эдилар? Улар «бизларни ўғирлаб кандайдир ахлатхонага ташлаб кетиши», деб ўйладилар. Ҳолбуки, майшат учун ўтирган жойларининг ёнгинасидаги қаровсиз омборхонага олиб чиқилган эдилар. Ҳаммадан кейин Марлен уйғонди. У ҳам ўзини ажабланган ва қўрқан кўрсатиб, титроқ овозда: «Нима бўлди?» деб сўради.

— Буни сендан сўраш керак? — деди киз, уни тепишга ҳаракат қилиб.

— Нега мендан сўраркансан? Бу ерга мен зўрлаб олиб келмадим-ку? — деди Марлен ўртоқларига нажот нигоҳи билан боқиб.

— Нега дарров ўзингни оқлаяпсан? Бир гап борми? — деди ўнг томонда ўтирган йигитча.

— Оклаётганим йўқ, Нилуга жавоб беряпман, — деди Марлен саросимали овозда.

— Ҳеч ким ҳеч кимни айбламасин, — деди ўнг томондаги йигитча ҳукм оҳангиди. — Ҳаммамиз баравар тўрга илиндик. Ҳароми қаёқка ғойиб бўлди?

Шу гапни пойлаб тургандек, эшик очилиб, юзига аёлларнинг юпқа пайпоғини никоб сифатида тортиб олган Ахтам кириб келди.

— «Ҳароми», деганда мени назарда тутдингми? —

деди йигитчага қараб. – Тўғри топдинг. Мен ҳаромдан туғилганман. Ҳозирча шуни билиб турганинг етарли. Қамоқхонада туғилганимни билсанг, кўрққанингдан эсинг тескари бўлиб кетади. Ҳаромдан туғилганим учун хеч канака ҳаром ишдан қайтмайман. Сенлар ҳам, ота-оналаринг ҳам ҳароми эмас, «олий зот»санлар... – Ахтам «олий зот»га кинояли ургу бериб, аламли жилмайди-да, «ҳароми» деган йигитчанинг пешонасини силамоқ учун кўл узатди. Йигитча бошини тортомокчи эди, кўл-оёғи боғлангани учун эвини қилолмади. Ахтам унинг пешонасини меҳрибон ота каби силаб, гапини хотиржам равишда давом эттириди: – Лекин ҳаромдан ҳазар килмайсанлар. Шунақа бўлгандан кейин ҳаммамиз ҳаромимиз, тўғрими? Ҳаромилар жам бўпмиз, бир иш қилайлик: мен сенларга ҳам, ота-оналарингга ҳам ҳаром ҳақида кичкина дарс бериб қўймоқчиман.

Киз бу овоз эгаси бошқа одам эканини фарқлади.

– Сен кимсан? Бизни бу ёкка олиб келган одам кани?

– Менми? – деди Ахтам қалака оҳангидা. – Мен одамхўр махлуқман, қорним очиб кетувди, сенларни бошлаб келган ҳаромини икки ямлаб ютиб юбора колдим. Яхши қилибманми? Шундай ширин болажонларни алдаб, қийнаган ҳаромининг бу дунёда яшашга ҳақки йўқ!

– Биз билан бунақа майнавозчилик ўйнама, адаларимиз кекирдагингни узиб, кўлингга тутқазиб кўяди, – деди қизнинг чап томонида ўтирган йигитча. Ахтам бу томоша бошланмасидан илгари болаларнинг кимлигини суриштириб билгани учун унинг катта кетишидан ажабланмади. Ажабланмаса-да, адабини бериб кўйишини истаб, у томон уч қадам қўйди-да, томоғига чанг солди:

– Ҳей, хунаса! Мени сенсирадингми?! Қамоқхонада киндигимни сен кесганмидинг! Билиб қўй: сен билан майнавозчилик ўйнаётганим йўқ. Адажонинг осмонга

кўл узатса, куёшни узиб олиши мумкин, лекин менинг кекирдагимга ифлос кўли етмайди. Бунака қўлни Худо ҳали яратмаган. Сен менга гапирадиган бўлсанг, ўйлаб ол. Тутканоқ касалим бор. Ёқимсиз гапингни эшитиб, тутканоғим тутиб колмасин, кекирдагингни узиб олиб, «укахон, эт-бетингиз оғримаяптими?» деб ҳол сўрашга мени мажбур килма!

Ахтам бўғилаёзган йигитни кўйиб юбориб, ўртага туриб олди. Бошқалар гап айтишга журъат килмадилар. Йигитчалардан бири пиқиллаб йиглай бошлади.

– Энди гап бундай бўлиб қолди, братишкалар: шу ўтиришларингнинг ўзи Масковдан келган янги кино бўлади. Уйингдагиларга хабар килиб кўйдим. Ҳар бирингга минг сўмдан нарх кўйдим, кўрай-чи, ота-оналаринг қимматсирамай сотиб олармикин сенларни. Уч кун вакт бердим. Уч кунгача уч маҳалдан овқат бераман сен текинхўрларга. Кейин оч ўтирасанлар. Тўртинчи куни қўлимга пул тушмаса, биттадан ўлдиришни бошлайман. Ўлдирилган оғайниларингнинг гўштидан шўрва қилиб, ўзларингга ичирман.

– Кўркитманг, вахима қиласидиган ёшдан ўтганмиз, – деди Марленнинг ўнг томонида ўтирган йигит. – Пул керак экан, олдинрок айтмайсизми, минг сўмни ўзим садака қилиб юборардим.

– Биринчидан, минг сўм эмас, ҳар бирингдан минг; иккинчидан, мен садака оладиган гадой эмасман, мен пулни ҳаппа-ҳалол ишлаб оламан. Учинчидан, тилингни тийиб, писта қилиб ўтири!

Ахтам шундай деди-да, у томон кескин қадам босиб, юзига қаттик тарсаки туширди. Йигитча ўнгланмай туриб, бу юзига ҳам тарсаки тушди.

– Агар ўғил бола бўлсанг, биз билан ўғил болачасига гаплаш, – деди киз овозини баландлатиб. – Қўл-оёғи боғлаган одамни урушга ҳажи қизларнинг ҳам кўли бормайди.

Бундай гапни, айникса, беписандлик билан сенси-рашни қиздан кутмаган Ахтам нима дейишини билол-май қолди.

– Бу гапинг ҳам түғри, – деди бүш келиб. – Ҳали тутканоғим бор, дедим-ку... шу тутиб қолди...

– Тутканоғинг тутмасин. Үйимиздагиларга хабар берган бўлсанг, кут. Пулни беришади. Факат... ёлғон гапирмаётганингга бизни ишонтир.

– Қанака ёлғон?

– Үйимиздагиларга қандай хабар қилдинг? Үйимизни қандай топиб бординг? Ё телефон қилдингми? Унда телефон ракамини қаёқдан била қолдинг?

– Сингилжон, сиз аҳмокроқмисиз ё менинг каллам айниб қолганми? Үйларингга битта-битта бориб келишим керакмиди? Ота-оналаринг ҳозир кимницида ўтиришибди? Манави галварсникидами? Үн бешга кирганини нишонлашяптими? Ҳа... мазза қилиб ўтиришувди... Бунга баҳт-саодат тилашятувди, – шундай деб, тотли нарса егандек лабини чўлпиллатиб қўйди. – Агар бу ердан тирик чиқса, баҳтли бўлиши ҳам мумкин. Мен уларга кувончли хабар етказдим. Энди улар нима қилишади? Минг сўм-минг сўмдан тўплаб менга етказишадими? Акллари бўлганда шундай қилишарди. Дунёдаги барча аҳмоклар сингари улар биринчи галда милисага арз қилишади. Йў-ўқ... шу ерга келганда ақлсиз каллам яна адашди. Ахир ота-оналаринг оддий аҳмоклардан эмас-ку?! Улар милисага арз қилишмайди. Милисанинг катталарига телпон қилиб, буюришади. У бечоралар оёғи куйган товукдай типирчилашни бошлишади. Биринчи галда сенлар ўтирган қаҳвахонанинг тит-питини чиқаришади. Бир-иккитасини одам ўғирлашда гумон қилиб, қамаб ҳам қўйишади. Ўшаларга ачинаман, емаган сомсага пул тўлаб, то сенларнинг тиригинг ё ўликларинг чиқмагунча калтак еб ўтиради. Ҳа, майли, кейин бир вакт топиб қўнгилларини оларман. Сенлар ҳам оталарингнинг кучига ишоняпсанлар. Майли, ишониб

ўтираверларинг. Муддат тугагач, биринчи бўлиб, сени сўйиб бераман. Ухлаётганингда у ер-бу ерингни ушлаб кўрувдим, биққигина экансан. Қизларнинг гўштидан зўр чучвара бўлади-да!

– Ҳайвон! Ифлос!! – Қиз ғазаб билан бақириб, Ахтам томон тупурди.

– «Ҳайвон» деганинг балки тўғридир, одамманми ё ҳайвонманми, билолмай ўзим ҳам баъзида адашман, – деди Ахтам гап оҳангини ўзгартирмай. – Лекин «ифлос» дейишинг туҳмат. Чунки мен озода боламан. Чақалоқлигимда қамоқхонада ҳафтада бир марта албатта чўмилтиришаркан. Мен шунақа озодаликка ўрганганинман. Бугун чўмиладиган куним эди, сени татиб кўрганимдан кейин опок бола бўлиб олдим.

– Ҳакикий ҳароми экансан! – Марлен шундай деб бақириб, у ҳам тупурди.

– Ие, бу жонондан сен ҳам умидвормидинг? Тушингни сувга айт! Бу жонон сени калишига патак ҳам килмайди. Бунга йигитларнинг хўррози керак! Сен кимсан? Бир сўтаксан. Чумчук ҳам сендан тузукрок босади.

– Братан, бўлди! Сенга гап йўқ, ҳаммамизни ахмок қилдинг. Энди ё овозингни ўчир, ё чиқиб кет, – деди қаҳвахонада ёққич узатган йигитча, ғазабли нигоҳини унга қадаб.

– Униси ҳам, буниси ҳам мумкинмас. Мен сенларни зериктирмай олиб ўтиришга аҳд қилганман.

Марлен қасос кўчасини танлаб, аста қадам босганида ишнинг бу қадар мураккаб ва шафқатсиз бўлишини кутмаган эди. Мурданинг қиликлари, пичингли гаплари унинг сабр косасини тўлдириб, тошириб юборди. Ғазабдан кўзларигача қизариб кетди:

– Ўғил бола бўлсанг, чиқиб кет! – деб бақириб юборди.

Ахтам унинг ҳолатини сезди. Йигитчага яқинлашиб, кўзларига тикилди. Кейин жимжилогининг ўsic тирноғини ёноғига ботириб, кичик айланада чиз-

гандай бўлди. Марлен унинг максадини англамай, кўзлари ола-кула бўлиб, талвасага тушай деди.

— Сен ҳали менинг ўғил бола эканимга ишонмадингми?

Ахтам заҳарли оҳангда шундай деб, унинг ёноғига мушт туширди. Зарба каттиқ бўлгани учун Марлен хушини йўкотди.

— Кўзи омон қолди, шунинг ўзи катта баҳт, — деди Ахтам хотиржам оҳангда. Кейин аввал қизга, сўнг катта кетган йигитчага қаради: — энди икковинг бошқа хонага чиқасанлар.

— Йўқ, охиригача бирга бўламиз, — деб зътиroz билдириди йигитча.

— Сен менга шарт қўйма, нима қилишни ўзим биламан. Сенларнинг оталаринг буларникидан баланда. Шунинг учун сенларга «люкс» хона керак. Оталаринг бу йил икковингни қовуштироқчи шекилли, а? Отангдан олдин мен қовуштириб кўя қолай, нима дейсан?

— Керакмас... илтимос, братан... — йигитча Ахтамга энди ялиниш нигоҳи билан бокди.

— Нега керакмас, дейсан, керак! Хоҳласанг ҳам, хоҳламасанг ҳам шу жононга уйланасан. Уйланмасанг, отангнинг оёғи осмондан бўлиб кетади. Уйлансанг, ўзинг ҳам баланд осмонларда учиб юрасан, уйланмасанг пачафинг чикади, бола! Булар билан ўйнашма! Агар бу тавия кечаси кўзингга алвости бўлиб кўринса, сен кўркма, битта чиройли жононни ўйнаш килиб олгин-у, даврингни суравер. Сен бундан кўркма, бу ҳам ҳар хафтада бир ўйнаш алмаштириб, сенга даъво қилмайди. Энг муҳими — сен бунинг ишига аралашма. Эммунэлни биларкансан-ку, ўшанақасига яшайверсан. Қани турларинг!

Ахтам икковининг оёқларини бўшатди-да, ўринларидан турғазиб, бўйниларига чанг соганича итара-итара бошқа хонага олиб чиқди. Ҳали мушт зарбидан ўзига келолмай ўтирган Марлен кўзларини мўлтиллатганича колаверди.

Хона чиндан ҳам ажабтовур эди. Бунда майшат учун барча шароит мұхайё этилганди. Ахтам бу сағар қадаҳларга шампан эмас, конъяк күйиб иккөни-га зўрлаб ичиргач, бехаё фильмни қўйди. Яна бир қадаҳдан конъяк ичиргандан сўнг уларнинг қўлларини ҳам ечди.

— Мен айтганини бажарадиган ўғил боламан. Шу уй сенларники! — деди-да, кизга ишрат қўзи билан караб олгач, чикиб кетди.

Бу ўйин режада йўқ эди, кейин пайдо бўлди.

Ҳамма ухлаб қолгач «Зўр» қизнинг тугмаларини ечиб, у ер-бу ерини силаб, кучоқлаб нафсини кондираётганида Ахтам кириб келди.

— Қиз бола бўлмаганда маза килиб олардим, — деди афсус билан.

— Қиз боламас, нимадан қўрқасан? — деди Ахтам.

— Қиз боламаслигини қаёқдан билдинг? — деди «Зўр» ажабланиб.

— Башараси айтиб турибди. Синаб берайми?

— Тегма! Қиз бола бўлса, «ўғрилар оламига иснод келтиридиларинг», деб оғалар бизни тинч қўйишмайди.

— Яхши, мен тегмайман, лекин исбот қилиб бераман, — деди Ахтам ўжарлик билан.

Икковлари бўлажак ўлжанинг teng ярмини тикиб гаров боғлашди. Режага бу қалтис ўзгартириш шундан кейин киритилди.

Майшат учун мосланган хос хонанинг сирини фақат оз одамларгина билишарди. Бирор лақма каттароқка тушиши керак бўлса, шу хонага киритилиб, киликлари суратга олинарди. Суратга олиш учун мўлжалланган дарча ичкаридан сезилмасди. Қиз билан йигитчани ёлғиз колдириб чиккан Ахтам сураткаш ўтирадиган тор хонага кирди. Бу ерда «Зўр» дарчага ёпишиб олганича ичкаридаги томошадан кўз узмай ўтиради.

Гаровда Ахтам ютди. Ичкаридаги йигитча «Шала-ва экансан! Сенга икки дунёда ҳам уйланмайман!» —

деб ғалва бошлагач, Ахтам кириб, унинг қўлларини боғлаб, жойига олиб чикиб кўйди-да, хос хонага иккинчи йигитчани киритди. Кейин учинчисини...

Кўркувдан титраб ўтирган йигитчалар тиззала-ри калтираганича хос хонага кириб, кетма-кет икки қадаҳ конъяк ичишгач, шерга айланишарди... Қизга бу ўйин ёқиб қолганми迪 ё тақдирига тан берганми迪, ҳарҳолда Ахтамга ғазаб билан тикилмас, ғалва ҳам килмас эди.

Эртасига Ахтам бир даста фото суратни кўтариб кириб келди. Тепадаги дарчани очган эди, хона сал ёришди.

— Кеча маза қилдиларингми? Кўрасанларми?

Шундай деб суратларни кўрсата бошлади. Йигит-чалар ҳам уят, ҳам қўркув билан аввал суратга, кейин бир-бирларига қараб олишди.

— Бу милиса тилида нима дейилади, биласанларми? Бу ашёвий далил! «Вояга етмаган бокира қизни тўда бўлиб зўрлаш», дейилади. Ҳар биринг камида ўн йилдан олиб, Магадангами, ундан наригами жўнаб коласанлар. Зўрлаш билан қамалганларнинг у ёқдаги ахволини эшигнисанлар? Мен ўзим кўрганман: қамоқдан чиккунларингтacha хотинини соғинганларга хотинлик киласанлар. Сенларни факат мен саклаб колишим мумкин: агар бу ердан тирик чикадиган бўлсаларинг ким қандай савол берса, «билмайман, эсимда йўқ», деб жавоб қайтарасанлар. Мени тушларингда ҳам кўрмагансанлар. Буларни, — суратларни баланд кўтарди, — Масковдаги прокуратурага жўнатаман. У ёқка адаларингнинг қўллари етмайди. Етса ҳам, синиб тушади. Мабодо, бир палакат бўлиб, камалиб қолсан, менга бало ҳам урмайди, камоқ ўзимнинг уйим. Лекин шерикларим... — шундай деб йигитчаларга айёrona боқди, — қўрқмаларинг, ўлдиришмайди, ўлиб осон кутулмайсанлар, сенларни битта-биттадан тутиб, териларингни шилиб, туз сепиб кўйишади. Хўп, энди бўладиган гапга ўтаман: аданг

билан гаплашдим, – ёккіч берган бола унга умид билан бокди, – аданг менга тан берди, милисадан умидини узибди. Менга шунака деди, пулни ҳам тайёрлаб күйибди. Лекин гапига ишонмайман. Пул бераман, деб құлға туширмокчи. Мен икки ёшимда қамоқда шунақа ўйинлар ўйнардим. Майли, лақиплатдим, деб қувона турсин. Пул олгани мен чиқмайман. Пулни ма-нави ошналаринг олади.

– Нега мен? Мен... бормайман... – деб бакирди Марлен.

– Чийиллама, сұтак! Мен шундай қарор килдим. Пул адангда. Аданғдан олиб, менга берасан. Агар бу сұтак сотқынлик қылса, ҳамманг ўласан. Коринларинг очгандир, бугун хотин гүштидан чучвара ейишта тай-ёрланиб турларинг.

Ахтам катъий охангда шундай дегач, шарт ўғирилиб чиқиб кетди. Ичкаридагилар бакир-чакир қылғанларича қолавердилар. Ахтам бу кеч майшатхонани эгасига топшириши керак зди. Шу сабабли тошилди, таваккал қилди.

Марлен отаси билан метро бекатида учрашди. Күчоклашиш, күп гаплашиб туриш мумкинмаслиги телефонда айтилған зди. Ҳам күркүв, ҳам уят ис-канжасидаги Марлен отасининг күзига карай олмади. Ўғлининг ёноғи күкарғани, озиб, күзлари киртайганини күрган отанинг юрагида санчик турди. Құлидаги түгунчани отиб юбориб, ўғлини бу азоб түридан күтқаргиси келди. Чорасизлигидан эзилди. Азоб түридан күтқазышнинг бирдан бир йўли – пулни бериб, сўнг кутиш балосига мубтало бўлиш зди. Атрофда ми-лиция борлигини билади. Лекин уларнинг асосий нияти бу болани ҳимоя қилиш эмас, жиноятчини ушлаш эканини ҳам билади...

Пул берилди.

Чорасиз ота кўзларини ёшлаб, унинг изидан ти-килди...

Марлен худди телба каби ҳали у, ҳали бу поездга

чиқаверди. Унинг изидан тушган милиция ходимларининг ҳам силласи қуриди. «Бу бола ё жинни, ё бизни лакиллатяпти», деган тұхтамга келишганды Марлен үзини тиқин вагонга урди. У качон, кайси вагонда, кимга учрашишини билмасди. Шу тиқинда Ахтам орка томондан қулоғига шивирлади:

– Пулни бергин-у, ўғирилмай жим туравер, охиригача бориб, кейин уйингга жұна. Бир соатда оғайніларинг ҳам уйларида бўлишади.

Бу нохуш воқеа бўйича жиноий иш қўзғалган эди, сўроқ-терговлар узок давом этди. «Ҳамма нарсани эсларидан чиқарган» йигитчалар, ҳатто киз ҳам орадан ҳафталар ўтса-да, тайинли бир маълумот бера олишмади. Шундай кунларнинг бирида Ахтам Марленнинг йўлини пойлаб, уни учратди:

– Кечир мени, сал ошириб юбордим, шундай қилмасам бўлмасди, – деб кўл узатди.

Марлен узатилган кўлни олмади:

– Бошқа кўришмаймиз, дегандим-ку? Пулни олдинг, ҳеч ким ҳеч нарса дегани йўқ.

Ахтам унинг дангал сенсирашидан ғашланса-да, сездирмай жилмайди:

– Ўрислар «дунё тор, учрашмасликнинг иложи йўқ», дейишади. Ишимиз ҳали охирига етгани йўқ. Сен эртага терговчига бориб, «ўша куни бошим оғриб турувди, пулни «Зўр» олгани эсимга тушди», – дейсан. Оғайніларинг гапингни тасдиқлаб беришади.

– Нега?

– Шундай қилиш керак. Ўртадаги битта аҳмок йўқолса, икки ақлли бирлашиб, зўр ишларни қилиб ташлаши мумкин.

Марлен бу мавҳум гапга тушунмади: «хўп, битта аҳмок ўша «Зўр»дир, иккита ақлли-чи? Биттаси ўзими? Иккинчиси-чи?» Иккинчиси ўзи эканини ўша дамда тасаввур ҳам қила олмаган эди. «Рафиқу сумма тариқ» – «аввал дўст танла, ундан сўнг йўл» ҳикматига зид ўлароқ, Марлен аввал йўлни танлаб, шу

йўлга яраша дўстга рўпара бўлди. Кўнгли оз муддат
ғашланди, лекин тақдирдан нолимади.

Шайтанат дунёсига кириш учун остона ҳатлаган
Ахтам ўзи билан Марленни олиб киришни истади.

Бу истакнинг сабаби бор эди...

Отаси чизиб, катъий чегаралаб қўйган худудни
бузиб чикиб, эркин ҳолда яшашни истаган Марленни
кўлидан ушлаб, бу олам сари тортиш қийин бўлмади.

«Зўр»ни осонлик билан йўлдан олиб ташлаши.
Орадан йиллар ўтиб, Марлен «Тарзан» лакабини олди.
Иккинчи ҳалокатдан сўнг омон колганда касалхонага
йўқлаб борган Ахтам унга шу лақабни берди. Мана
энди йўлларида асосий зўр турибди. Уни битта чакув
билан олиб ташлаш мумкин эмас.

Ахтам кетгач, анҳор бўйида ўтирган Тарзан шу-
ларни эслади. Кейин шахмат тахтасига қаради:

«Бир юришда мот», дедими? Айтишга осон...» –
деб оқ шоҳни жимжилоги билан йиқитди-да, ўрнидан
туриб, керишиди.

4

«Жоним болам, эсингда турсин, сен билан мени
бебаҳт қилган одамни улғайганингда топасан! Бу
хўрликларимиз учун ўч ол! Унинг оти...»

Онасидан қолган ёдгор сўзларни қандай унутсин?

Онаси нима деб эркаларди?

Эсламайди. Бирор «бўталоғим», дейди, яна бирор
«бахтим чечаги» дейди. Онаси нима деб эркалаган-
ди? Қамоқда ўтириб, қамоқхонанинг муҳр босилган
эски чойшабидан бошқа либосни кўрмаган боласини
бағрига босиб «бахтим чечаги» дейиши мумкинмиди?

Эркаламасликнинг иложи йўқ. Ҳар қандай шаро-
итда ҳам, ҳатто дўзах лабига келиб колганда ҳам она
қалбидаги сўнгги меҳр томчиларини боласига атай-
ди. Ҳатто сўнгги нафасини ҳам боласини эркалаш-
га сарфлайди. Афсуски, бу меҳр нурини бола эслаб

қололмайди. Ҳаётнинг турли тўфонлари унинг хотирасидаги энг гўзал кўринишларни ҳам ғуборга кўмиб юборади. Ахтам бундан мустасно эмас. Димоfiga онасининг кўкрак ҳиди эмас, қамоқхонанинг қўланса, бад бўйи ўрнашиб қолган...

Бадбахтнинг исмини айтган эди.

Уч ёшга тўлган куни у эркинликдаги болалар уйига юборилди. Онаси хайрлашув чогида бу исмни уч марта такрорлади. Уч яшар боланинг хотирасига муҳрлаб қўйиш учун шундай қилди. Сўнг... дили вайронлигича ох тортиб қолаверди. У Қиёматда боласи билан учрашажагини билмасди, билганда эди, умид билан қоларди, боласини дуо қиласарди. Дуо қилишни ҳам билмасди у бечора, ҳеч ким ўргатмаганди...

Ахтам эслаб қолди.

Исмни ҳам, ўч олишга даъватни ҳам...

Онасининг жилмайганини, кўзлари кулганини эслолмайди. Ҳар кўришганида онаси йиғларди...

Кўз ёшлари маржон-маржон онани унутиб бўларканми?!

Дардли хотира билан улғайди.

Кичиклигига қасос нималигига ақли етмасди, лекин қасос олиши шартлигини биларди.

Шу аҳд билан улғайди.

Болалар уйида улғайиб, чиройли ҳаётга учирма бўладиган вактда ўғирлик қилиб, қамалиб қолди. Ўртоқлари яхши ўқишлоналарда ўқидилар. Қамоқхона боғасида тарбия олган Ахтам улғайгач, қамоқхонада жиноят оламининг ўзига хос мактабида ўқиди. Қамоқдан чикқанидан сўнг онасини суриштирди. Озодлик ҳавосидан нафас олишга улгурмай вафот этганини билиб, дунёга сиғмай қолди. Бутун дунёни остин-устун қилиб юборгиси келди.

Вакт суви алам ўтини аста совутгач, онасининг қариндошларини излади.

Ажаб!

Бобоси ҳам, бувиси ҳам, тоғалари, холалари ҳам

бор экан. Аммо улар қамоқда туғилган болани танимадилар, танишни истамадилар. Бобо билан буви қизидан, тоғалар билан холалар сингилларидан аллақачон воз кечишган экан. Ахтамнинг онаси буни биларди, шунга қарамай, ўғли уч ёшга яқинлашіганда отасига хатлар ёзиб, «боламни олиб кетинг» деб илтижо килган эди. Бобо билан буви қизни кечиришмади, түккан боласини «хароми» санаб, бағрига олишни исташмади.

Булардан бехабар Ахтам уларни истаб топған зди...

Ахтам урф-одат, иснод, одамлар орасида бوش күтариб юролмаслик нима эканини билмас зди. Шуннинг учун қариндошларининг юз ўгиришлари унга ғалати туюлди. Уйларида яшашга ҳам, уларнинг бокишиларига ҳам мұхтож змасди. Ўғрилар оламига тобе йигит күчада хор бўлармиди!

Марленнинг режаси амалга ошиб, қулига пул тушгач, айниқса, «Зўр» йўлдан олиниб, барча пулга эга бўлгач, бобосини йўклаб борди:

— Сиз мени тан олмасангиз ҳам, онамнинг отаси бўлиб колаверасиз. Қидириб келганимда мендан бир бурда нонингизни қизғандингиз. Ўйлаб карасам, сиз ваҳший экансиз. Ваҳшийни ўлдириш керак. Лекин сизни ўлдириш мумкинмас. Онам «бобонгдан хабар олиб тур», деган, мана, хабар олгани келдим, — деб бир даста пулни ташлади-да, хайр ҳам демай, изига кайтди. У ўз кўнглида бераҳмлардан шундай қасос олган зди.

Савдо соҳасида ишлаган онаси катта миқдордаги маблагни ўзлаштириб олгани учун қамалган зди. Ахтам буни ҳам суриштириб, ҳақиқатнинг тагига етди.

Онаси савдода бирга ишловчи хушрўй йигитга кўнгил қўйиб, ота-она розилигисиз, никоҳсиз тегиб олган зди. Дўкондаги пулни ҳам ўша йигит ҳазм қилиб юборганди. «Корнингдаги боланг етим қолмасин, сенга раҳм қилишади, ҳомиладорларни қамашмайди»,

деб аврагани учун айбни бўйнига олган эди. Йигит номардлик қилиб ғойиб бўлди...

Ахтам ўшани... ўз отасини топди.

Қасос йўлларини ўйлаб юрганида у номарднинг ўғлига ҳам дуч келди.

Марлен ўша бадбаҳтнинг ўғли эди...

Бу баҳтли тасодифдан Ахтамнинг боши осмонга етди. Марленни қўлдан чиқармасликка аҳд килди ва бунга эришди ҳам. Бу янгилик кашф қилингандан ўн тўрт ёшли Марлен кинохона ёнидаги зўрларнинг бири ўзининг ўгай акаси эканидан бехабар эди. Ахтам уни тинмай кузатарди. Дастлаб йўлини тўсиб, дўппосламоқчи бўлди. Бу қасос эмас, ноҷорликнинг бир белгиси эканини тез англаб, қароридан дарров воз кечди. У ўгай укасига: «Мен етимликнинг заҳарли ошини ичиб шу ёшга етдим, сен эркатойликнинг асал чойи билан талтайдинг. Мени ҳар кадамда «ҳароми» деб таҳқирладилар, ҳатто бобом билан бувим ҳам шундай дейишди. Хўп, никоҳсиз туғилган болани «ҳароми» дейишаркан, ҳаромдан топилган нонни еб катта бўлган бола-чи? Уни нима дейиш керак? Иккаламиз бир пуштикамардан бўлганмиз. Нега мен хорман-у, сен роҳатдасан? Тенглашсак бўлмайдими?» – дегиси келарди. Лекин бу гапларнинг бефойдалигига фаҳми етиб, тилини тиярди. Жаҳонгир ва унга ўхшаш ўнлаб ношудлар йўлини тўсиб, пулини коқиб олаётган зўрларнинг Марленга тегмаслигига сабабчи Ахтам эди. Марленнинг отаси катта ишда ишлагани учун эмас, балки Ахтам «Бу бола менга тегишли», деб қўйгани учун эркин юрди.

Марлен билан тақдир ипларини боғлагани билан қасосдан воз кечмади, пайт пойлади.

Ахтам Асадбекни, унинг атрофидагиларни яхши биларди, унинг оламига киришни орзу қиласарди. Максади унга хизмат қилиш эмас, балки у бошқараётган оламга эгалик қилиш эди. Омадини қарангки, Асадбек у танда қўйган ресторонга кутилмаганда келиб қолди.

Кутилмаганда унга кўзи тушди. Кутилмаганда уни кўз остига олиб кўйди.

Анхор бўйидаги ошхонада Тарзанга «хизматни сен бошлиб тура коласан. Менинг уч-тўрт кунлик зарур ишим бор», деб хайрлашгач, кўп йиллар давомида пишиб, етилиб қолган касос режасини амалга оширишга киришди.

У болалар уйида эканида ҳам озода ва ораста кийинишни яхши кўрарди. Қамоққа тушганида бошқа болаларга ўхшамади, танасига игнада сурат солдирмади. У баданига турли суратлар солдирган, лабидан сигарет тушмайдиган, ароқдан ўзга дарди бўлмаган тоифадан эмасди. Ҳар бир олам вакти-вакти билан янгиланиб тургани сингари жиноят олами ҳам Ахтамга ўхшаш ёшлар билан янгилана бошлаганди. Ўттизинчи йиллардаги очарчилик даврида Самара томонлардан ёпирилиб келган ўғрилар билан, уруш ва урушдан кейин ўзини дунё ҳокими ҳисоблаган ўғрилар дунёкараши, иш услублари, вахшийликлари орасида катта фарқ бўлганидек, энди остона ҳатлаган ўғриларнинг онги бошқача, фикрлашлари, ўзларини тутишлари ўзгача эди. Ахтам вазиятга караб турлана олишни ўрганган эди. У керакли жойда одоб билан, бошқа ўринда киноя билан, зарурат туғилса ўғрилар тилида одобсиз тарзда сўзлай оларди. Бу қилигини кузатган Тарзан «аслида сен артистликка ўкишинг керак экан», деганида Ахтам «Бу дунёда хамма артист, битта мен тўғри япай қолай», деб маҳзун жилмайганди. Тарзан ўшанда унинг гапини майнавозчиликка йўйиб, аҳволини англамаган эди.

Тунни онасидан қолган хира хотиралар билан бедор ўтказган Ахтам тонгда чўмилиб, энг сўнгги русумдаги чиройли кийимларини кийди. Режасини яна фикр чиғириғидан ўтказиб, бадбаҳт отасининг хузурига отланди. Бу кунни узок йиллар кутган эди. Назаридан пичокни қиндан чиқариб, у малъуннинг юрагини суғуриб олиш осондай туюлган эди. Остона ҳатлаб

күчага чикканида юраги сал увишиди, бу ваҳшийликка журъати етишмагандай бўлди. Ҳатто қадамини секинлатди. Кейин ўз ҳаётининг энг тубан кўринишларидан бир нечасини эслаб, ғазаб оловига мой қўйди. Журъатсизлиги чекинди, аксинча, қасосга ундовчи қудрат бош қўтарди. Шунда ҳам пешинга қадар кўчада тентираб юрди. Пешинда ресторанга кирди. Далда бўлар, деб юз грамм арок буюрди, лекин ичмади. Ўзи яхши кўрган қовурма лағмон ҳам томоғидан ўтмади. Ресторандаги телефон тўшагини кўтариб, телевидение мухаррири номидан қўнғирок қилди-да, бадбаҳт отасининг мажлисдан соат тўртда бўшашини билди. Шу вақтда у ишлайдиган идорага яқинлашиб, кутди. У соат бешга яқин келди. Сутранг «Волга»дан виқор билан тушиб, виқор билан юриб, идорасига кириб кетди. Озгина сабр қилиб, Ахтам ўша томон юрди.

Қабулхонада попукдек гўзал қиз лабини бўяб ўтирган экан. Нима учун бу онда лаб бўялаётганини фаҳмлаган Ахтам «ҳозиргина хўжайнингга қандай ўтирганингни мен яхши биламан», дегандай маънодор жилмайиб, салом берди. Қиз унга бир караб кўйди-ю, «билсанг ундан нарига, мен уяладиганлардан эмасман», дегандай ишини давом эттириди. Ахтам кулимсираганича унга яқинлашиб, дипломатини очдида, факат Москва томонларда учрайдиган камёб шоколадни олиб, ёзув машинкаси ёнига кўйди:

– Сизни шу ерда учратишимни сезиб, олволган эдим, юрагим алдамабди, – деди кизга сук билан тикилиб.

– Қанақасига сезасиз, мени танирмидингиз?
– Танийман, сиз – Латофатхонсиз.
– Тушингизни сувга айтинг, мен Мастурман, – деди киз шоколадга қараб олиб.
– Йўқ, сиз Латофатсиз, латофатли кизларнинг исми факат Латофат бўлиши керак. Исм қўйишида адангиз адашганлар.

– Бўлди, шилқимлик қилманг, нега келдингиз?

Хўжайинда нима ишингиз бор? Айтиб қўяй, бугун қабул қилмайдилар.

— Кириб айтинг, «асли шу ерлик, лекин Красноярда ишлайдиган», йўқ, яхшиси «ёғоч билан шуғулланадиган бир одам зўр бир фойдали таклиф билан келибди», денг.

Киз шоколадни тортмасига солиб қўйиб, эриниб-гина ўрнидан турди-да, хўжайнинг хонасига кирди. Ярим дақиқада чиқиб:

— Бу масалада ўринбосарларига учрар экансиз, — деди.

— Гапим сал чаларок бўлибди: «Бу иш ўринбосар билан битмас экан, Асадбек aka шундай маслаҳат берибдилар», дент.

Котиба яна қайтиб кирайми-кирмайми, деб икканини тургач, Ахтамнинг ўткир нигоҳига дош беролмай орқасига бурилди. Бу сафар янада тезрок чиқиб, жилмайганича «Киринг», деб таклиф килди.

— Мен сизни олиб кочаман, сиз Краснояр маликаси бўласиз, — деб қизга шилқимлик қилган Ахтам остона ҳатлаши билан жиддий киёфага кирди.

Хона сохиби, Асадбекнинг номи тилга олинган бўлса-да, ўтирган ерида кўл учини бериб кўришди. Бу ҳаракати билан ўзининг юкори мавқенини таъкидламоқчи бўлди. Ахтам унинг кўзларига бокиб, «Мен Асадбекингдан кўркмайман, хурмати юзасидан сени кабул килдим», деган маънони укиб, кулимсиради.

— Қабул қилганингиз учун раҳмат, — деди у хона сохиби кўрсатган жойга ўтириб. — Ҳар ҳолда... катта фойдани ўринбосар билан тақсимлаш ақлли одамнинг иши эмас.

— Кирмасингиздан катта фойдадан гапиряпсиз, кимсиз ўзингиз? — деди хона сохиби қошлигини чимириб.

— Мен Краснояр ўлкасидаги ўрмонларнинг эртанги хўжайниман, — деди Ахтам маънодор оҳангда.

— Эртанги хўжайн? Бугун-чи?

– Бугун тахминан чорагига эга чикиб бўлдик.

– «Чиқиб бўлдик»? Ким чиқиб бўлди?

– Биз, яъни мен ва яна икки шеригим. Улар ҳам ўзбеклар. Комсомол йўлланмаси билан бориб, ўша ерда қолиб кетдик. Кичкина кооперативдан иш бошлиб, катта йўлга чикиб олдик. Катта миқдорда ва арzon нархдаги ёғочларни бу ёкка олиб келмоқчимиз.

Ахтам «катта миқдорда ва арzon нархда» деган сўзларга алоҳида ургу бериб хона соҳибидан жавоб кутди. Катта миқдордаги ва арzon нархдаги ёғоч уни кизиктирган бўлса-да, бу нотаниш йигитга ишонгиси келмади.

– Бу хом гап, – деди қўл силтаб.

– Албатта хом гап, – деб унинг фикрини тасдиклади Ахтам. – Хужжатсиз гап албатта хом бўлади. Мен ўғил бола гапни пишитиш учун келганман. Асадбек акамга биз белгилаган нарх маъкул, чўнтакка коладигани ҳам ҳисобга олинган.

– Асадбек акангиз сотиб оладиларми бу ёғочларни? – деди хона соҳиби пичинг оҳангиди.

– Йўқ, акахонга кимматли маслаҳатлари учун чўтал берамиз. Келишсак, сиз сотиб оласиз, келишмасак, бошқа харидор чикиб қолар.

– Ўтган куни кўришганимизда Асадбек акангиз менга ҳеч нима демагандилар? – деб Ахтамга синовчан тикилди.

– Ўтган куни мен йўлда эдим. Бугун эрталаб гаплашдим.

– Каерда уйларидами?

– Уйларига бормаганман. Шаҳар марказида учқаватли уйнинг пастида зўр бир оғислари бор, ўша ерда гаплашдик. Олдин келганимда Ҳайдар акам, раҳматли Маҳмуд акам билан ўтириб гаплашувдик. Маҳмуд акам гапга тез тушунадиган ақлли одам эди, бекор нобуд бўлди.

– Асадбек акангизнинг кайфиятлари канака?

Ахтам бу саволларнинг синаш учун берилаёттаганини фаҳмлаб, афсус билан бош чайқади:

– Очиғини айтсам, кайфиятлари менга ёқмади. Ўзларини анча олдириб кўйибдилар. Боланинг ўлими отага жабр-да. Мана, сизнинг биттагина ўғлингиз бор, шу тўппа-тўсатдан ўлиб қолса, нима қиласдингиз?

Бу гапни эшишган хона соҳиби, юзига совук сув сепилгандай, сесканиб кетди.

– Совук нафас қилманг-е! – деди овозини кўтариб.

– Энди бу бир гап-да! Ё ўғлингиз иккитами? – деди Ахтам меровсираб.

– Қанақа одамсиз?! Эсингиз жойидами?

– Эсим жойида, – деди Ахтам оҳангини ўзгартиришади, – сиздай йигитнинг гули қўлидан қанча ноҳзанинлар ўтгандир, наҳот яна битта ўғил пайдо бўлмаган? Подшоларнинг йигирма-ўттизтадан ўғли бўлган-ку?

Хона соҳиби кафти билан стол устини уриб-уриб кўйиб, Ахтамга ғазаб билан тикилди.

– Менга бунақа қараманг. Мехрибонлик билан қаранг: кимга ўхшатяпсиз? Эсланг... ўзингизнинг ёшлигинги засми? Эски танишларингиз менга шундай дейишди, сизга ўхшармишман. Айникса, кора кошларим... Олтмиш иккинчи йилни эсланг, Рихсияни унутмагандирсиз? Ҳа... Унутмагансан...

Учрашувнинг масхарабозлиқ қисми тугаб, ҳакиқат томонига ўтиш, қасос дарвозаларини очиш фурсати етган эди. Ахтам сенсирашга ўтиб, хона соҳибига энди ғазабли нигоҳини қадади:

– Бунақа чиройли қизни бошқа учратмагандирсан. Ўша чиройли қизга эсдалик қолдирган экансан, мана, мен ўша ёдгорлигингман. Билмаганмидинг? Билардинг сен абллаҳ! Қамокхонада туғилган ўғлинг борлигини билардинг. Ўша ёкларда ўлиб кетар, деб умид килдингми? Худо ҳаммани ҳам ўлдириб юборавермайди. Сени ўлдириши керак бўлган биттасини

олиб қолади. Худога мен маъкул келибман, мени олиб қолди.

– Сен бу ерда товламачилик қилма, ҳозир милиса чакираман.

– Чакирмайсан, чакирсанг, ўзинг шарманда бўласан. Менда сендақалардан ўнтасининг пачагини чиқариб юборадиган ҳужжатлар бор.

– Сурбет экансан!

– Тўғри топдинг. Асадбек акам ҳам шунака дедилар. «Қамоқхонада шунака туғилганман, иложим қанча», дедим.

– Орага Бек акангни тиқаверма, максадингни айт.

– Орага Бек акамни тиқаётганим йўқ. Мен Бек акамнинг яқинлариданман. Бугун кўришганим ҳам рост. Сени осонгина ўлдириб кетишим мумкинлиги ҳам рост. Лекин ўлдирмайман. Сен номард бўлсанг, мен мардман! Сен мендай ўғлинг борлиги билан фахрланиб узок яшайсан. Фақат озгина олди-бердимиз бор: мен сенга ғалати ҳужжатларни бераман, сен мен хоҳлаган нарсани берасан.

– Қанақа ҳужжат, олдин мен билишим керак.

– Биттасини айтаман: ўғлинг ўн беш ёшга тўлган куни нима бўлган эди, эсингдами? Ўша ишни ўғлинг ўюштирган эди, мен ёрдам бергандим.

– Ёлғон! Бунақа иш Марленнинг қўлидан келмайди. У бўшашган, бир латта!

Ахтам дипломатини очиб, сурат чиқариб узатди. Катта хўжайнининг қизи билан майшат қилаётган ўғлини кўриб, хона соҳибининг кўзлари олайиб кетсада, таслим бўлгиси келмади.

– Бу сурат қалбаки, – деди титрок овозда.

– Лекин қиз тирик. Никоҳининг эртасига шарманда бўлгани ҳам ҳакиқат. Ўғлинг нимага уйланмаяпти, биласанми? Шу қиз «никоҳинг куни келиб пачафингни чиқараман», деб кўйган, шундан қўрқади.

– Шартингни айт, – деди хона соҳиби тақдирга тан бергандай чуқур хўрсиниб. – Фақат... Рихсияга

тегишли масалада сен ноҳаксан... сен кўп нарсаларга тушунмайсан... Биз бир-бировимизни ростакамига севардик. Орага бошқалар ҳам аралашишган...

— Кимлар?

— Улар... ўлиб кетишган... билишингнинг ҳожати йўк.

— Билишим шарт! Гўридан суюкларини чиқартириб ёкаман!

Бу аҳд шу даражада ишончли жарангладики, суюклар шу онда, шу жойда ёқиладигандай туюлиб, кўркувдан хона сохибининг лаблари гезариб кетди.

— Йўқ, йўқ... Бундай қилма. Рихсиянинг ўғли... бундай ваҳшийлик қилмайди.

— Мен ваҳшийлик қилиш учун туғилганман, бошқа хунарим йўқ. Рихсиянинг ўғли ваҳшийлик қилмайди, деганинг тўғри. Лекин мен сенинг ўғлингман! Фарқимиз шуки, сен маданийчасига, яниринчасига ваҳшийлик қиласан. Менини очиқчасига! Айт, ўша одамларни!

— Айтолмайман...

— Сенга бир ой муҳлат. Бир ойда Красноярдаги ёғочлар ҳам тайёр бўлиб қолади. Ўрислар тахтадан зўр тобут ясашади. Бизда тобутсиз кўмилгани чатоқ. Кенгрок қилиб ясаттирадим, маза қилиб ётардинг.

Ахтам бу сухбатдан кейин бадбаҳт отасини алдаб олиб чиқиб, овлоқ жойга олиб бориши, ўша ерда жазосини бериши керак эди. «Орага бошқалар ҳам аралашишган»ини билгач, жазо муддатини чўзишга карор қилди. Қабулхонага чиқиб, котибани ресторонга таклиф этди. Нозли оҳангдаги рад жавобини эшишиб, таслим бўлгандай қўлини кўтарди:

— Таклифимни қабул этмагунингизча очлик эълон қиласман, шаҳардаги ҳамма ресторонларни тақа-так беркитиб ташлайман, — деб бир сукли жилмайиш ҳадя этди-да, чиқиб кетди. Бу хушрўй, шириңсўз йигитнинг нариги хонада хўжайинини боплаб тузлаб чиққанини

билмаган котиба унинг орқасидан умидли нигоҳини қадаб қолаверди.

«Бугун тегмаганим яхши бўлди, – деб ўйлади Ахтам кўчага чиққач. – Илоннинг думини яхшилаб босиб эздим, чакадиган тишини суғуриб олдим. Энди типирчилаб юраверсин. Юраги сикилиб, қўркувдан ўлиб қолса, яна ҳам яхши. Йў-ўқ... бунақасига ўлмайди, унда сикиладиган юрак йўқ...»

Тарзанни учратиш максадида анҳор ёқасидаги ошхонага келди. Уларнинг шийпони бўш, стол устида шахмат доналарининг сочилиб ётиши Тарзаннинг яқингинада кетганидан дарак берарди. Қорни таталай бошлагани учун пиво билан овкат буюриб, диванга ёнбошлади. Суҳбат жараёнини яна бир кўз олдига келтириб, қилган ишидан мамнун бўлди. Ошхона хўжайинидан «Марлен акасининг кечрок келишини» билгач, кутишга карор килди. Шом қоронғисида Тарзан эмас, Жамшид кўрингандан ажабланиб ўрнидан турди.

– Ҳа, зўравон, зерикмаяпсанми? – деди Жамшид унинг саломига алик олиб. – Юр, кетдик.

– Қаёкқа?

– Боргандা биласан.

– Ҳозир билсам бўлмайдими?

– Бўлмайди, етиб боргунингча қўркканингдан юрагинг ёрилиб ўлиб қолишинг мумкин.

– Менда ёриладиган юрак бор эканми? Ким айтди сизга?

– Минғирламай, тезрок юр.

Жамшид шундай деб елкасига енгилгина муштuriб қўйди. Ахтам шундан билдики, чакирув шошкич бўлгани билан масала у қадар жиддий эмас.

Машина Кесакполвоннинг козихонаси жойлашган чойхона олдида тўхтаганда «Ҳайдар акам нега чакиртирдийкин?» деб ажабланди. Ҳайдар акасининг тақдиридан бехабар Ахтамга бу кутилмаган чорлов ҳатто енгил ташвиш ҳам туғдирди. Чунки Асадбекка нисбатан Ҳайдар акасининг шафкатсизроқ экани унга

маълум эди. Агар Бек акаси воқеадан хабар топиб, масалани ҳал қилишни бу одамга топширса-ю, бу одам ғазаб отига минган бўлса, осонлик билан кутулиши қийинлигига ақли етиб турарди. Ичкари кириб тўрда Асадбекнинг ёлғиз ўтирганини кўргач, таажжуби янада ортди. Бу хонадаги кенг ва узун стол усти ҳамиша тўкин бўлар, корин ва нафс ғалвасини босиш учун зарур ҳамма нарса топилади. Энди эса гулли клеёнка тепадан тушаётган чирок нурида ялтиллаб турибди.

Ахтам бадбаҳт отаси ҳузурида Асадбекнинг номини тилга олгандаёқ ҳожасига рўпара бўлишини билган, аммо шу бугуннинг ўзида шошқич равишида чакирилишини кутмаган эди. Ҳожасига кўзи тушди-ю, «ёмон талваса босибди-ю, бечорани, дарров Бек акасидан нажот сўрабди-да», деб ўйлади. Асадбек унинг саломига алик олмай, тикилди. Ўтиришга таклиф этилмагани сабабли, Ахтам айбдор бола сингари тик тураверди.

– Жамшид, кап-катта одамларга нима бўлган ўзи? – Асадбек Жамшидга мурожаат қилгани билан Ахтамдан нигоҳини узмади: – Шу жинқарчадан қўрқиб, иштонини хўл қилибди-я! Овутиб келмаганингда баттар бўлармиди... Ҳа, зўр, кимларни қўрқитиб юрибсан, биласанми?

– Биламан, – деди Ахтам дангал.
– Нега қўркитдинг?
– Керак бўлгани учун...
– Керак бўлгани учун? Мени нега аралаштирдинг?
Нега ёлғон гапирдинг?

– Машинадан тушиб, керилиб юриши менга ёқмади, шаҳарнинг хўжайини ким эканлигини эслатиб кўйгим келди.

– Кейин-чи? Товламачилигингни бошладингми?
Канча сўрадинг?

– Бунака гап бўлмади. Сиз билан учрашмасимдан анча илгари бир одам уни топиб, у-бу деб қўйишимни сўраган эди.

— Ким экан, ўша одам?

— Кимлигини ҳеч қачон, ҳеч кимга айтмайман. Илтимосини ҳам албатта бажараман. Сизга учрашмай туриб килишим керак эди, улгуролмадим.

— Ўлдирасанми?

— Йўк. Ўзига яраша жазо бор.

— Менга тегишли одам бўлса-чи?

— Барибир... Сизга тегишли бўлса, кейин сиз мени жазолайсиз.

— Ростгўйлигинг менга ёқади, лекин дунёда ўлаётган ҳар уч одамнинг бири ростгўй эмиш, ўтириб, — деди Асадбек рўпарасидаги стулга ишора килиб.

— Бу бултурги маълумот, — деди Ахтам ўтириб, — бу йилгисига караганда ўлаётган ҳар олти одамнинг биттаси ростгўй.

— Нега? — деб ажабланди Асадбек.

— Дунёда ростгўй камайиб кетган, — деди Ахтам қувлик билан.

Асадбекка унинг топқирилиги хуш ёкиб, Жамшидга қараб жилмайиб кўйди.

— Красноярдаги ёғоч ҳакида нима дединг, лақиљлатдингми?

— Шунақа деса ҳам бўлади. Лекин Красноярдан ёғоч олиб келиш мумкин.

— Қанакасига?

— Мен Маганданда туғилиб, Красноярда катта бўлганман. Онам ҳам... ўша ерда ўлганлар. Бир-иккита танишларим бор.

— Онанг... Красноярдами? Ўлғиз ўзи ётибдими?

Ахтам Асадбекнинг бу саволидан ажабланиб, паст овозда «ха», деб кўйди-да Жамшидга қараб олди. Хожасининг ҳолини тушунган Жамшид индамай тураверди.

— Менинг адам ҳам ўша ерда эдилар. Қирк тўққизинчи йил, ўттиз биринчи декабрда тухмат билан олиб кетишган эди, — деди Асадбек синиқ овозда.

— Менинг онамни ҳам тухмат билан қамашган...

Асадбек унинг гапини эшитмагандек, давом этди:

– Уттиз етти йилдан кейин олиб келиб, хилхона-мизга қўйдим. Сенам ёлғиз қолдирма, хилхонангга олиб келиб қўй.

– Хилхона? Нима у? – деб ажабланди Ахтам.

Асадбек «шуни ҳам билмайсанми?» дегандай бош чайқади:

– Яқин қариндошлар ёнма-ён қўйиладиган жой. Онангнинг юртида бордир, шунақа жой?

Ахтам буни билмаса-да «ҳа, бор», деб қўйди. «Хилхонаси бўлмаса ҳам кишлокда мозор бор-ку? Уша ерга олиб келиб кўмиб, қора мармартош қўйдирман. Беокибат қариндошлари кўриб қўйсин!» деб ўйлади.

– Бу ўзбошимчалигингни кечираман. Ҳеч каерда, ҳеч қачон, ҳеч кандай шароитда менинг номимни тилга олмайсан. Тилга олсанг, тилинг кесилади. Анави сўтакка яқинлашма, унинг менга керакли томонлари бор. Мен сенга гапиряпман, бунча аланглайсан? Биринчи келишингми, ёкиб қолдими?

– Бир-икки келиб ишни пишириб кетганман.

– Демак, бу ерда иш қанақа пиширилишини билар-кансан. Сенга берайми шу жойни?

– Керакмас. Ўзимнинг жойим бор. Бунақа жой ҳам, бунақа иш пишириш ҳам энди эскирди.

Бу гап Асадбекка «сенлар эскириб бўлдиларинг», дегандай таъсир қилиб, ғашланди, кошларини чимирди.

– Эскиси ёқмаётган бўлса... янгиси қанақа, айт-чи?

– Янгисини бугун эшлибсиз-ку? Бу ёққа олиб келмадим, ўзим бордим.

– Янги йўлдан юраман, деб жарга юмалаб тушмагин. Жарга йикилсанг, сени тортиб оладиган аҳмок йўқ. Ириб-чириб ётаверасан.

– Бек ака, айтувдим-ку, бир марта ўлиб бўлганман, энди ўлмайман.

Сурбетлик чегарадан чиқа бошлаган эди, Асадбек

жиловни тортишни зарур деб билиб, овозини баландлатди:

– Тур ўрнингдан, жўна!

Ахтам чиқиб кетгач, Асадбек Жамшидга «Қани, нима дейсан энди?» деган маънода каради.

– Ҳали ғўрлиги бор... кўчанинг боласи-да, тарбия кўрмаган, кўп нарсага тушунмайди, – деди Жамшид айбдор одамнинг овозида.

– Ғўрликка ғўр, пишгунича бошимизни анча гангитади, ҳар бир қадамини кузат. Айниқса, сўтакни эҳтиёт кил, мен унга ваъда бердим. Каратэчи тренерларини нима килдинг?

– Милиса зотини биласиз-ку, «Қонун бўйича мумкин эмас», дегани «Чўтални вактида тўлаб тур» дегани. Эртага чиқариб оламан.

– Аралашма. Ўзлари эплашсин. Сурдан кўнглим тўқ. Ушлаган ерини узиб олади. Тренерга тайинла, Тарзанингга кўпроқ қарасин, калласи яхши ишлагани билан билаги анча бўш.

Уйга қайтаётиб Ахтамнинг гапларини, сурбетлигини ўйлади: «Нега адабини бермадим? Нега бир мишиқи менга сурлик қила олади? Кучдан қолганимни сезганми? Шу мишиқилар эрта-индин менинг ўрнимни олишадими? Жамшид нимага индамай караб турди?»

– Сурбетлигини кўрдингми? – деб сўради машина рулинни бошқараётган Жамшиддан.

– Кўрдим, – деди Жамшид, йўлдан кўз узмай.

– Ҳайдар аканг бўлганида бир сакраб жағига тепарди-ю, ахлатхонага чиқартириб ташларди. Сен сўтакка ўхшаб қараб турибсан.

– Гаплашаётганингизда жаҳлингиз чиқмади. Ғазаблансангиз мен хам уришга тайёр эдим.

– Барибир Ҳайдар акангнинг қадри ўтятти. Болларни Ҳайдар акангга ўхшаб ушла, бўш қўйма. Бизнинг кимлигимизни ҳар нафасларида билиб туришсин.

Букрот ҳаким илми ҳикматда равнак топгач, узлатни ихтиёр этибдилар. Бир куни подшоҳ хасталаниб, ул зотни хузурига чақиририбди. Букрот ҳаким подшоҳнинг даъватини қабул қилмабдилар. Шунда ул зотнинг хузурига вазирнинг ўзи келибди. Карасаки, Букрот ҳакимнинг емишлари турли гиёҳлар экан. Вазир подшоҳнинг амрини айтиб, ялинса ҳам, ҳаким кўнмабдилар. Шунда вазир аччиқланиб дебди-ки:

– Подшоҳларнинг хизматини қилишни ўрганганингда бунақа гиёҳ еб ўтирамас эдинг.

Бу дашномни эшитган ҳаким кулибдилар ва дебдилар-ки:

– Агар сен гиёҳ еб яшашга қаноат қилишни ўрганганингда жонингни хатарга қўйиб, подшоҳ хизматини қилмас эдинг.

«ЛА ҚУЛЛИ ШАЙЬИН САДОУН ВА САДОУ НУРИЛ-ҚАЛБИ АШ-ШАБАЬУ» – «ҲАР БИР НАРСАДА ЗАНГЛАШ БОР, ҚАЛБ НУРИНИНГ ЗАНГЛИГИ ТЎҚЛИКДИР», ҳикматини қўпчилик каторида Манзура ҳам билмайди. У хонадондаги тўқинлик эвазига жонини хатарга қўйиб яшади. Кунлари Худога илтижо билан ўтди: «Худойим, фарзандларимни Ўзинг панохингда асрар!..» Қалбидаги барча муножотлари шу бир неча сўзларга жо бўларди. Худо хатарлардан асрар келди, фарзандлари эмин-эркин вояга етдилар.

Камолларини, роҳатларини кўриш вақти етганда бу кўргуликлар...

Афруза билан танишгунига қадар қўлига тушган бир китобда оятлар маъносини ўқиб таъсирланган, «худди бизга хитоб қилинганга ўҳшайди», деган фикрга бориб, кайта-қайта ўқийвергани учун хаёлига муҳрланиб қолган эди: «Эй мўъминлар, билингларки, дунёнинг тириклиги ўйин-кулгудир ва зеб-зийнатдир,

бир-бирларингиз билан фахрланишдир, молларингиз ва фарзандларингизни кўпайтиришдан иборатдир. Бунинг мисли шунга ўхшайди-ки, осмондан ёмғир ёғиб, ерлардан гиёҳ кўкарса, дехқонлар, кувонадилар ва «кўп хосил оламиз», деб умид қиладилар. Кейин бир совук шамол келса, барчасини қуритса, бас, барглари сарғайиб қурий бошлаганини кўрасан, кейин ҳаммаси синиб, майдаланиб, сомонга айланади. Дунёнинг нашъу намоси ана шулардан иборатдир. Аммо охиратдаги ахвол икки ҳолатдан ташқари эмас. Бири қаттиқ азоб ва иккинчиси Аллоҳнинг мағфирати ва розилигидир. Дунё ҳаёти одамни алдайдиган лаззатдан бошқа нарса эмас...»

...ўйин-кулги ва зийнатларни ҳам кўргани рост...

...моллари кўпайгандан кўпайди...

...кимга керак экан бунча кўп мол?..

...кейин совук шамол ҳам келди...

...каттиқ азобни ҳам кўрди...

...дунё ҳаётига алданганлари ҳам рост...

Афсус шуки, алдамчи дунёдан юз ўгиришни ўйлаётганлари йўқ...

Қаердадир ўқиган эди:

«Алдамчи дунёнинг ширин тиллари

Аксиз ақлимнинг ақлини олди

ва... кула-кула лаҳадга кузатиб қолди...»

Наҳот унинг кархисида шундан ўзга йўл йўқ бўлса?

Дарвоза якинида умид билан икки кун кутган Фазлия ғам-аламларини тўкаётганда Манзура ўз дардига банди бўлиб ўтириди.

Манзура Европанинг машҳур файласуфи, узлатга чекиниб, умрини бочкада ўтқазган Диогенни билмайди, ҳатто номини ҳам эшифтмаган. Уша файласуфдан бир одамнинг бойми ёки камбағал эканлигини сўраганларида «Билмайман, унинг пули кўплигидан хабарим бор», деган экан. «Пули кўп бўлса, демак, бой экан-да?» деб ажабланиб, яна сўрашибди. Шунда

файласуф: «Кўп пулга эга бўлиш ва бой бўлиш – бир нарса эмас. Борига қаноат қилган одамгина чинакам бойдир. Ўзида бор нарсадан кўпроқ бойлик орттиришга ҳаракат қилган одам, оз бўлса-да, борига қаноат қилган одамдан камбағалроқдир», деган экан.

Бошқалар бой деб ўйлаган хонадон соҳибаси билан камбағалликда умр кечирган аёлнинг дардлари ўхшаш, даволари эса бир эди. Икковидан ҳам сабр талаб этиларди. Донолар деганлар-ки: «Модомики, ер остида қабр азоби ҳақ экан, ер устида ўша азобнинг муқобили сифатида сабр азоби ҳам мавжуд. Банда-га ё униси, ё буниси». Бу икки муштипар айнан шу сабр азобини аъло кўра оладиларми ё йўқми – ҳали номаълум, атрофдан тиланган дуолардаги чиройли сабр уларга насиб этадими ё йўқми – вакт кўрсатади. Сабр учун ўзларида иймон қувватини тўплай олсалар Куръони Каримда ваъда қилинган ажрга етадилар: «...уларнинг ҳузурларига ҳар эшикдан фаришталар кириб: «Сабр қилганингиз учун сизларга салом бўлсин! Бу оқибат диёри қандай яхши, дерлар». Афсуски иккови ҳам бу оятдан бехабар. Ҳазрат Навоийнинг: «Сабр бор ерда айрилиқ ўтида куйганларга ғам йўқ, иштиёқ эгаларига ҳажр ўтида куйишдан алам йўқ», деган ҳикматларини ҳам эшитмаганлар. Шундай экан, бошлари узра турган мусибат булутини ҳайдаши ло-зим бўлган сабр курдати ҳақида бир-бирларини нима десинлар, бир-бирларини нима деб овутсинлар?

Фазлия Манзуранинг дарду аламини эшитган, «Аллоҳнинг иродаси, бандалик экан, энди сизга сабр берсин», дейишдан нарига ўтолмайди. Унинг дардига шерик бўлолмайди, чунки ўзиники ошиб-тошган... У ҳам фарзандлари дардида келган бу ерга. Манзуранинг ўғли қайтмас бўлиб кетган... У болаларининг тирик эканидан умидвор, ҳар ҳолда шундай хабар эшитган. Лекин тирик болаларини бағрига боса оладими ё йўқми – билмайди.

Фазлиянинг дарди адогига етмай, дарвоза очилди.

Эрининг машинасини кўрган Манзура меҳмондан узр сўради-да, чаккон ўрнидан турди.

Асадбек айвонда ўтирган аёлга бир караб қўйиб, уйга кирди. Унинг кайфияти бузукроқ эди. Диванга ўтириди. Манзура эрининг ёнига аста чўкиб, елкаси ни силади. Фарзанд жудолигидан кейин Асадбекнинг жеркишлари камайиб, эр-хотин бир-бирига суяниб колган эди. Олдинги даврлар бўлгандан, Манзура шу меҳрибонлигини қилганида «Суйкалма!» деган дағал сўзни эшитиб, қилмишидан пушаймон бўлиб, тошдек котарди. Бу сафар Асадбек елкасини силаётган қўлга кафтини қўйди-да, «уф» тортди. Шу «уф» билан кишининг дарди чиқиб кетиб, енгил тортадигандай туюлади. Афсуски, кўча-кўйда, одамлар орасида эр одамнинг «уф» дейиши иснод саналади. Эрнинг дардига факат меҳрибон хотингина шерик бўла олади. Эрининг авзойи бузилгандан Манзура «Нима бўлди?» дейишдан қўрқарди. Бу сафар ҳам шундай бўлди. Асадбекнинг гап бошлишини кутди.

– Қизингнига борувдим, – деди Асадбек, – жуда ўжар, жуда ўжар-да, шу қизинг. Ҳайронман, кимга ўхшаган экан...

Бу саволга нима деб жавоб берсин, у бечора? Қиз ўжарлик бобида кимга ўхшashi мумкин? Ҳозир «Сизга ўхшайди-да, адаси», дегудай бўлса, балога қолиши аниқ. Шу сабабли жимгина қулоқ соглани маъкул. Асадбек саволни жавоб талаб қилувчи оҳангда бермаган эди. Хотинининг жим ўтиришидан ғашланмай, у томон ўгирилди:

– Тилингнинг учидаги турган гапингни айтавер: «ахмоқликда қизингиз ўзингиздан қолишмайди, ўжарлиги ҳам сиздан», демоқчисан, билиб турибман.

– Вой, адаси, унақа гап хаёлимга ҳам келмади-я! – деди Манзура сири ошкор бўлган одам сингари довдирааб.

– Хаёлингга келмайди-ю, юрагингнинг тўрида туради. Бир марта Ҳайдар ҳам айтувди... – Асадбек

Кесакполвоннинг гапини эсламоқчи бўлгандай сувут қилди. Аслида эслашга уринишнинг ҳожати йўқ, «Мардонани ўз қўли билан ўлдирди, ўч олмоқчи эди, мен ёрдам бердим», деган гапларни унутиш мумкин эканми? Асадбек бошини эгиб, ўзига ўзи гапиргандай деди: – «У сенга ўхшайди, ақлли, кўрқмас, қасоскор... у сенинг йўлингдан бормоқчи...» деганди.

Бу гапни эшитган Манзура сесканиб, қўлини тортиб олди:

– Унақа деманг, адаси... Зайнаб унақа эмас... – деди титроқ овозда.

– Ҳайдар аҳмок гапларни кўп айтарди... эътибор қилма. Менга ўхшаганидайди... эрини аллақачон бўғиб ўлдиради...

– Адаси... унақа деманг...

– Қиз бола отасига ўхшамагани тузук, – деди Асадбек енгил хўрсиниб. – Сенга ўхшайверсин. Сен... яхши хотинсан, – шундай деб вазиятни юмшатиш учунми, қувлик билан жилмайди, – Жалил айтди: эри рози бўлган хотин жаннатга тушаркан. Жалил билмаган нарсасини гапирмайди. Сен жаннатга лойик хотинсан. Бир марта Маҳмуд: «сизга чидаб келётган кеннайимга орден бериш керак», девди. Манзур, орденни нима қиласан, сенга жаннат нақд бўлиб турибди. Лекин Зайнабга қаттиқ турмаяпсан, бу айбининг ҳам бор. Қизинг кўчиб келмаса бўлмайди, шуни тушунасанми? Кўз олдимиизда турса, икковимиз ҳам хотиржам яшаймиз.

– Шуни доим айтипман, инсофга кириб қолар, адаси, яна озгина сабр қилайлик.

– Ўзи инсофга кирап-у, зри кўнмайди. Аҳмок қизинг эрининг раъийга қарайди. «Эшигингнинг тагида коровулларнинг туриши ғашингни келтирмаяптими?» десам, «Коровулингиз керакмас, бизни бўри ермиди», дейди. Сен қизингнинг кўнглига қарасанг, қарайвер, мен галга солавермайман, шарт йигитларни юбораман, кўч-кўронини кўтариб келаверишади. Күё-

вингни жияниникига олиб бориб ташлашади. Шундай қилсам, түгри бўладими?

Ялиниш, тушунтиришга уриниш Асадбекка хос эмас. Унинг услуби – айнан «шарт йигитларни юбориб кўч-кўронини кўтартириб» кўчириб келтириш. Буни яхши билувчи Манзура «тўғри бўлмайди», дея олармиди? Шу боис «кайдам», деб лабини тишлаганича муте ҳолида бошини эгди.

– Айвонда ким билан ўтиргандинг? Танимаган одамни нега уйга бошлаб кирдинг?

Мавзунинг бу томон бурилишини кутгани учун Манзура довдирамади:

– Бир бечора хотин нажот истаб келибди.

– Сенга қолса, бу дунёдаги ҳамма хотинлар «бечора»! Менинг уйим бечоралар нажот қидириб келадиган жойга айланиб қолганми?

– Бечора якинда қамоқдан чикибди.

– Ҳа... айтмоқчи-я, менинг уйим қамоқдан чиққан «бечоралар»га карvonсарой бўлиб қолгани эсимда ҳам йўқ...

– Унака деманг, адаси, у бечоранинг эри қиморбоз бўлган экан...

Манзуранинг «эри қиморбоз бўлган экан», деган гапи Асадбекни кейинги пичинглардан қайтарди. Манзура «бечора хотин»нинг тарихини сўзлаб, тугатмагунча гапини бўлмай эшитди.

Манзура «бор гап шу» дегандай жимгина қараб қолгандан кейин ҳам ундан кўзини узмай тикилиб тураверди. Эрининг бундай караши яхшилик аломати эмаслигини билган Манзура аёлнинг ғоят бечора эканини таъкидлаш учун яна нимадир дегиси келди-ю, лекин гап тополмай, мўлтиллаб тураверди.

– Хўп, энди мен нима қилишим керак? – деди Асадбек. – Эрини тирилтириб берайми? Ё бошқа эр топиб берайми?

Манзура «Эрини атай ўлдирмаган, тасодифан бўлган...» – деб Фазлияни окламокчи бўлди.

– Атайми ё тасодифанми, энди буни аниклашнинг фойдаси йўқ, сен гапни бурма, даллолликни бошлидингми, охиригача кил.

– Бечора болаларини қидиряпти...

– Ақли жойида бўлса, қидириши керак.

– Болаларини киморбозлар олиб кетишган экан.

Каёқдалиги номаълум эмиш.

– Уша ваҳший қиморбоз мендирман балки? – Асадбек пичингни бас қилиб, энди зардали оҳангда гапирди. – У ёк-бу ёқни караб чик-чи, болаларини ертўлага олиб тушиб оёғидан осиб қўйган бўлсам, то-пиб бера қол.

– Вой... унақа деманг, адаси... Сизнинг яхшиликларингизни кўп эшиштан экан...

– Бўлди, бу ёғига ўзинг тўкима. Булар менинг кайси яхшилигимни эшитишибди? Гапни олиб қочмагин-да, дангалига ўт: «дунёдаги ҳамма қиморбозлар сизнинг оғайнингиз, шу хотиннинг болаларини ўғирлаганларига айтинг», дегин, – Манзура эътирозга оғиз жуфтлаган эди, Асадбек гапиртирмади. – Тушундим, бўлди. Айтаман, суриштиришади, лекин катта вайда бериб юборма. Орадан анча вакт ўтибди, нима бўлган, Худо билади. Агар ўлдирворишмаган бўлишса, топилади.

– Худо асрасин, норасидаларни ҳам ўлдиришадими?

– Қиморда ютқизганни Худо ҳам асрай олмайди. Умри жойнамознинг устида ўтса ҳам асралмайди... Худонинг хўжайинчилиги қиморбозларга ўтмайди.

Манзура эрининг нимага шама қилаётганини англаб, келинлик даврида тунни жойнамоз устида ўтқизганини эслади-ю, юраги бир қалқиб:

– Худога шукур, сиз унақа эмассиз, – деди.

– Ҳа, унақа эмасман... – Асадбек шундай деб енгил хўрсинди. Кутимаганда устозини эслади:

«Устозим ўлар олдида менга «Хотининими ё синглисиними қиморга тикиш аҳмоклик, болаларини ти-

киш ҳайвонлик», деб васият килган эди. «Ҳайвонлик» деб адашганди, чунки ҳайвон ақллирок, боласини киморга тикмайди. Бироннинг боласини қиморда ютиб олган одамни нима дейиш керак унда? Болаларни ўлдиришмагандир. Бошқа бир ўйинда тикиб, бошқа ҳайвонларга ютқизишгандир. Болалар қўлмакўл бўлиб юришгандир...»

Асадбек бу гапларни хотинига айтгиси келмай, ҳазил оҳангига кўчди:

– Хотинини қиморга тикмаган битта аҳмок қиморбоз мен эдим...

– Унақа деманг, адаси, сиз аҳмоқмассиз...

– Шунча йил бирга яшаб, аҳмок эмаслигимни энди тан олдингми, а? Гапингни тугатдингми ё чаласи борми?

– Ўзингиз бир-икки айтувдингиз... «хизматчи олайлик», девдингиз... Шу хотинни олсак-чи?

Асадбек хотинининг жавдираган кўзларига тикилди: «Ачингани учун олиб қолмокчи. Нотаниш, синалмаган хотинни хизматга олмоқчи. Аслида хизматчига муҳтож эмас. Уй ишларини ўзи қилса кўпроқ овуди. Лекин... ёлғиз. Ўлғизлиги энди сезиляпти... Фам юрагини кемириб адо қилмасидан аввал унга дардкаш топиб беришим шарт эди. Бу хотин кўнглига ёқиб колган бўлса, мен нима дейин?»

– Кўнглингга ўтирган бўлса, ўзинг биласан. Факат... аввал синаб кўр.

Манзура эрига миннатдорлик билдириб, унинг ёнбошига ёстик кўйди-да, меҳмон ҳузурига қайтди.

Эртасига Жамшид келганда Асадбек уни савол билан кутиб олди:

– Ҳовли супуриб юрган хотинни кўрдингми?

– Кўрдим, – деди Жамшид саволдан мақсад нима эканини англамай.

– Қанақа экан?

Жамшид шунчаки бир қараб ўтган эди, хожасига

жавоб қайтаришга иккиланиб, «нима дердим, оддий бир хотин-да», дегандай елка кисди.

— Қанақа одамсан? Үйимда нотаниш одам пайдо бўлибди, «ким экан, нима киляпти?» деб ўйламайсанми? Кириб келишингга қараб ўтирувдим. Маҳмуд аканг бўлганида, тўхтаб, ўша хотин билан саломлашарди, бир нималар деб гаплашарди, кимлигини, қанақалигини билишга уринарди. Маҳмуд сени чала ўқитиб кетибди. Энди гап бундай: кеннайингнинг гапига қараганда, бу дунёдаги энг бечора хотин экан. Қанақа бечоралигини ипидан-игнасигача аниқла. Эри болаларини қиморда ютқизган экан. Сур билан Тарзанга тайинла, суриштиришсин, болаларни топишсин. Болалар тирик бўлишса, отаси ютқизган ҳакни берив, кейин олларинг, зўрлик қилмаларинг.

— Үлдирворган бўлишса-чи?

— Нима қиласанлар? Уларнинг ҳақи... индамай қўя коласанлар. Бу ишда биз кози эмасмиз... — Асадбек ниманидир эслагандай пешонасини силаб қўйди-да, афсусли оҳангда гапини давом этди: — Ҳайдар аканг Садир киморбозни бекорга жувонмарг қилиб юборувди. Мен «танобини тортиб қўй», дегандим, «ўлдир» демагандим. Бу кесак калла гапнинг фаркига бормасди. Сурга тайинлаб қўй: мен тирик эканман, ҳеч кайси киморбозни ўлдиришга ҳеч кимнинг ҳаққи йўқ.

Асадбек шошилмаётган эди, шу сабабли Жамшидга «ўтири», деб қаршисидаги жойни кўрсатди. Жамшид ўзига чой қўйди, хожасининг пиёласидаги совуб қолган чойни тўкиб юбориб, янгилади. Асадбек чойдан бир ҳўплаб, пиёлани дастурхон устига қўйди-да, Жамшидга тикилди:

— Хабаринг бўлмадими, йўқолган отарчи болани топишибдими?

— Қидиришяпти, изи чиқмаётган эмиш.

— Демак, қотилни ҳам топишмаган. Ҳар ҳолда, йўқолган боладан гумонсираётган бўлишса керак?

— Шунақа экан...

– Бу ерда бошқа гап борга ўхшайди. Отарчи болани ким ўлдирган бўлса ҳам, усталик қилган, гувалабошлар буни ўйлашмайди. Йўқолгани тирик бўлса, қотилликни бўйнига қўйишади-ю, юмалок-ёстик қилиб қамоқقا тиқвoriшади. Ҳархолда у бола тирикмасдир, қайси бир ўрада куртларга ем бўлиб ётгандир... Элчинни ҳам сўрок қилишибди... Мени нима учун ўшанда прокуратурага чақиришди, кейин ҳеч ўйлаб кўрдингми?

– Терговчи бола ёшлиқ қилиб, адашган...

– Сен прокурор ёрдамчисининг гапини гапиряпсан. У каззоб сени ишонтирибди-да? Атрофингга қараб қўй: ҳамма нарса ўзгаряпти. «Сизнинг керилиб юрган давру давронингиз ўтди, хоҳласак, шу ерга олиб кириб, гарданингизни синдириб қўйишимиз мумкин», демоқчи бўлишган. Шундай қила олишадими?

Савол қатъий, жавобталаб эди. Жамшид ишончсиз тарзда:

– Кўлларидан келмаса керак, – деб қўйди.

– Калта ўйлама, атрофингни зийраклик билан кузатгин, дедим. Ҳар кадамда Ҳайдар акангнинг ўрни билиниб турганини сенга минг марталаб айтдим. Лекин кесакполвонларнинг даври ўтиб кетаётгани билан хисоблашмасам, нодоннинг ўлими билан ўлиб кетаман. Ўлимдан-ку қўркмайман, лекин лақма одамга ўхшаб жонни икки кўллаб топшириб кетиш алам қиласди. Сур янгича ишламоқчими, майли, ишласин, лекин милица билан прокуратурага бориб кадаладиган киликлардан ўзини тийсин, шунга кўз-кулок бўлиб тур. Анави сўтакни астойдил жазоламоқчи, ўлдириб мурдасини милицахона остонасига ташлаб кетишдан ҳам қайтмайди, у тентак. Нимага шунақа қиласди, биласанми?

– «Мен ҳеч нарсадан қўркмайман, қўлингдан келса, мени қидириб топ», деганими бу?

– Ҳа, шунақа. У ўзича омону фалакда. Лекин милица аҳмоқ эмас, буни тушунади, арқонни узун ташлай-

ди. Милиса билан мушук-сичқон ўйнашнинг оқибати копқон бўлади. Осмондаги қушни ерда туриб овлашади, тўғрими?

Жамшид хожасининг мақсадини англаб, «тўғри гапиряпсиз», дегандай бош иргаб қўйди.

Асадбек прокуратурадаги ўша нохуш воқеадан сўнг бу чакиравнинг тагига етиш мақсадида кўп фикр юритди. Маҳмуд тирик бўлганида ўша ёрдамчи ни бир сикувга олиб ёки чўнтагини тўлдириб қўйиб, ҳамма сирни билиб берарди. Жамшид бундай қила олмайди. Ҳар ҳолда чакиравнинг салкам ҳибсга олув кўринишида бўлиши бежиз эмаслигига Асадбекнинг ишончи бор.

Суликонинг бобоси «Қароргоҳларинг чўқажагини билмайсанларми?» деган эди-я... Ҳа, набиралари чатоқ бўлгани билан ўзи доно эди. Ўшанда айтган ҳикмати Асадбекнинг хотирасига ўрнашиб қолган: «Ҳазрат Ийсо дейдики: «Денгиз тўлқини устига ким уй қура олади? Бу дунё ҳаёти шунинг ўзидир. Уни абадий қароргоҳ қиласман, деб ўйламанг». Асадбек ҳозир шу ҳикматни эслаб Жамшидга айтгиси, «қароргоҳимизни чўқтиришга уринишлар бўлаётганини билмай ғафлатда ётиш бизга ярашмайди. Чўқтирмоқчи бўлганларнинг ўзларини чўқтиришимиз керак», демоқчи бўлди-ю, «бунақа гапларга тушунармикин?» деган мулоҳазага бориб, индамай қўя қолди.

Қадимги эртакларда ҳақиқат излаган Кенжаботир рўпарасидан уч йўл чиқарди: бири – «борса келмас», иккинчиси – «борса ё келар ё келмас», учинчиси – «борса келар». Шайтанат оламига мухабbat кўйган Асадбекнинг рўпарасида факт биттагина – «борса келмас» йўли бор эди. У буни биларди. Москвадаги сўнгги учрашувда Илико «Оркада факт ўлим бор», деганида у ўйчан тарзда: «Олдинда ҳам ўлим бор», деб бежиз таъкидламаган эди. Буни тан олиш қанчалик нохуш ва оғир бўлмасин, ҳақиқатдан кўз юмишнинг фойдаси йўқ эди. Илико ҳам тан олган эди: «Истай-

мизми, истамаймизми, энди икки ўлим оралиғида «лезгинка»га ўйнайверамиз...»

2

Асадбекнинг таънали гапларидан кейин Манзура эртасига ёқ қизиникига йўл олди. Гап фақат қизининг ўжарлигига бўлса, бунчалик шошилмас эди. Унинг тинчини олган нарса: ҳамонки, Асадбекда хавотир уйғонибдими, бу бежиз эмас! Худонинг ўзи асрасин-у, аммо қандайдир фалокатнинг шарпаси сезилганга ўхшайди.

Элчиннинг уйига яқинлашганда дарахт соясида турган машинага, унда ўтирган икки таниш йигитга кўзи тушиб, хавотири сал нари бўлди. Дарвоза эшиги одатдагидай очик эди.

Манзура қизи билан кўришаётib айвонда бўш турган аравачага эътибор килди:

– Қанилар? Ёлғиз ўтирибсанми? – деб сўради ажабланиб.

– Куёвингизни ўртоқлари дўхтирга олиб кетишли. Яна бир даволансалар, дард кўрмагандай бўлиб кетарканлар. Олдинига дўхтирлар роса ваҳима килишган эди-я, каранг, Худо хоҳласа, ҳар қанака касал ҳам тузалиб кетаркан-ку?

– Илоҳим шифосини берсин, – Манзура шундай деб қизининг пешонаси билан икки кўзини меҳр билан ўпди-да, умидли оҳангда қўшиб кўйди: – Худо сизларга фарзанд берсин, боласини ўзи эркалаб кўтариб юрадиган бўлсин. Ўзинг қанақасан?

– Яхшиман, ойижон.

Айвондаги думалоқ стол атрофидан жой олгач, Манзура муддаога ўта қолди:

– Аданг яна гапиряптилар, ўжарлик қилмай бизни-кига кўчиб борсанглар яхши бўларди.

– Вой, ойижон, ўжарлик қилиш менга зарурми? Бу киши... ичкуёвлиқдан иснод қилаётганга ўхшайдилар.

— Агар иккала аканг билан кеннаиларинг бағримизда яшашганида, уялса арзирди. Энди сизлардан бошқа кимимиз бор? Ўзинг секин тушунтирсанг бўларди. Аданг гапирсалар малол олиши мумкин.

Зайнаб онасига ачиниш кўзи билан қаради. Ёлғизлик отасига нисбатан шу муштипар онасини кўпроқ забтига олишини у билмайдими? Билади! Аммо икки ўт орасида изтироб чекаётган бу қиз бечора нима қилсин? Онасининг дардини енгиллата олмаётган Зайнаб ҳозир Кесакполвон айтган «Асадбекнинг кизи» кўринишида эмас, ҳар қандай дардни сабр билан енга олувчи маъсума қиёфасида эди. У нигоҳини онасидан олиб қочиб синик овозда:

— Хўп, ҳали келганларида яна маслаҳат айтиб кўрарман, — деди.

— Ҳеч бўлмаса ўзинг бориб турсанг ҳам майли эди, — деди Манзура иложсиз одамнинг ялиниш овозида.

— Қизиксиз-а... — Зайнаб онасига ялт этиб қаради: — битта ўзларини бу аҳволда ташлаб кета оламанми?

— Билиб турибман. Бу ерда сенга қийин, у ёқда бизга оғир...

— Уйга бориб тураман, десам, куёвингиз йўқ демайдилар. «Яна касалхонага ётсам, сен уйингга бориб турасан», деяётувдилар. Бир-икки кун сабр килиб туринг.

Сабрдан ўзга яна чораси борми? Манзура қизини ғам кўлмагига ботириб кетмаслик учун дардини ичига ютиб, бу мавзуда бошқа гапирмади.

Икки дардли юрак бир-бирини авайлаган тақдирда ҳам, қайси бир сўз ўки барибир қалб ярасини тилиб ўтиши табиий. Шу сабабли Манзура узок гаплашиб ўтиришини истамади. Куёвингиз қайтишини кутмай, изига қайтди.

Элчинни шифокорга олиб кетган дўстлари яхши хабар билан қайтишди. Бундан кўнгли равшанлашган Зайнаб онасининг келганини айтиб, саломини эрига

етказиш билан чекланди. Кўчиш ҳакида эр хотин аввал узил-кесил гаплашиб олишгани учун Манзуранинг муддаосини билдирамай кўя қолди.

Элчин толиккан бўлса-да, ётишни истамади. Шифокор яқин орада ҳаракат ҳам, овоз ҳам тўла қайтишига ишонтириб, уни рухлантирган, ҳозирнинг ўзида тўлиб-тўлиб қўшик айтгиси келаётган эди. У торни стол устига олиб қўйишни хотинидан илтимос қилиб, аравачаси билан сурилди. Зайнаб унинг илтимосини бажаргач, пешинга таом тайёрлаш максадида ошхона томон юрди. Пиёзларни арчиб, музлатгичдан гўштни олаётганида айвондан Элчиннинг овози эшигилди. Элчин Зайнабни ҳайратга солиб, қўшик хиргойи қила бошлаган эди:

Қайда у кунларим, қайда у висол?
Қайда қувончимга коришган жахон?
Сени мен йўқотдим йўловчи мисол,
Қолди кароқчига талангандарвон.

Эгасига бўйсунгиси келмаётган бармоклар торни заифгина чертади, жаранглаши лозим бўлган торожиз инграйди. Жаранглаши зарур бўлган овоз эгасининг амрини бажармайди, хасталик чегарасини босиб ўтолмайди. Хаста юракда туғилган қўшиқ аслида жаранглаши шарт ҳам эмасди. Қўшиқ Элчиннинг ўзига эриш туюлгани билан ошхонада дикқат билан тинглаётган Зайнабга ёкаётган, эрининг дардли қўшиғи уни ўз чодирига буркай бошлаган эди.

Сенсиз умр ярим ва дунё бир кам,
Нетай, ўқтин-ўқтин зиркирап қалбим.
Ўчоғи бор-ку ярқ этган чўғнинг ҳам,
Қолдим уйи куйган мусулмон каби.

Зайнаб қўшик сўзларига дикқат қилди: кимга аталган бу қўшик?

«Сени мен йўқотдим йўловчи мисол...»

«Сенсиз умр ярим ва дунё бир кам...»

«Ҳарҳолда биринчи хотинига аталган, – деб ўйлади Зайнаб. – Уни унупотмайди... Мен бу кишини кечирдим, лекин у ўзини кечира олмай, юрак яраси билан яшаяпти. Ҳатто менинг меҳрим ҳам бу ярага малҳам бўла олмаяпти. Бу яра... умуман тузалмаса керак... Одам ўзини ўзи кечира олмаса, қийин, жуда кийин... Ёш ўлиб кетган бўлса ҳам, ўша хотин мендан баҳтлироқ экан. Чинакамига севадигани бор экан. Үлимидан куйиб-куйиб инграйдигани бор экан. Менинг кимим бор? Мени ким севади? Ўлсам, ким ингрраб тўлғонади? Ҳеч ким...»

Дўл урган даладек паришон бу дил,
Афсус-надоматлар ёндирап бўғзим.
Менга лаънатлар айт, қарға муттасил,
Берсин жазоимни Худойим ўзи.

«Ким қарғаши керак? Гўрда ётган хотиними?! –
Хаёлига келган бу фикрдан ўзи чўчиб тушди. – Тавба, тавба!! Худойим ўзинг кечир! Тирик одам қарғаса, қарғишини қайтиб олиши мумкин. Ўликларнинг қарғиши нима бўлади? Балки бошига тушаётган кўргиликлар шунака қарғишлиарнинг оқибатидир?
Қачонгача қарғайди? Қачонгача азоб чекади бу киши?
Худойим, меҳрибонсан-ку, Ўзинг кечира қолгин...»

Ёнган уй тикланар, бутланар карвон,
Дўл урган дала ҳам яшнайди қайтиб.
Бирок, йўқолмайди кўксимда армон,
Бирок, сен йиғлайсан, лаънатлар айтиб...

«Сен йиғлайсан, лаънатлар айтиб?»

«Буни менга айтмаяптими? Ҳа, мен йиғлайман, лекин лаънат айтмай қўйганман. Лаънатдан энди Худойим асрасин. Нима бўлганда ҳам эрим... Мен орзу

қилган отабеклар йўк... Кумушни ўзим ўлдирдим...
Ўлдиришим керак ҳам эди...»

Зайнаб кўзларини намлаган ёшни артиб, эшик томон қадам босди-да, эри ўтирган хона томон қаради. Торни худди чақалоқ сингари қучоқлаб олган Элчин бошини қуи эгиб, ҳаракатсиз ўтиради. Баданида енгил титрок туриб, торни тушириб юборди. Зайнаб кўлидаги пичоқни стол устига отди-ю, эри томон шошилди.

Элчин ҳушидан кетмаган, қўлида титрок тургани учун торни тушириб юборган эди. Зайнаб югуриб келиб елкасидан кучгач, унинг қўлларини силаб:

– Кўрқитиб юбордимми? – деди айбдор одамнинг овози билан. – Тор сал оғирлик қилди. Бармоқларим ўргана олмаяпти.

– Албатта оғирлик қиласи-да, – деди Зайнаб. – Соғ одам кўтара олмайди-ку... Яна озгина чиданг, шошилманг.

– Анварнинг акаси ташлаб кетган шеърларни қуига солувдим... Ичимга сиғмади...

– Эшитдим, зўр чикибди.

– Илёсбекнинг айтишига мўлжалловдим, насиб қилмабди. Қизиғ-а, Зайнаб, эшитганмисан, дунёнинг тузилиши спирал шаклда экан. Шунинг учун айрим тақдирлар маълум нуқталарда туташар экан. Шу шеърни карагин, ёзган одам ўзини ўлдирди, ашула ни айтиши керак бўлган йигитни ўлдириб кетишиди... Куйга солган одамнинг аҳволи бу...

– Дунёнинг спирал шакли – олимларнинг тахмини. Сиз айтган тақдирлар туташуви тасодиф...

Зайнаб шундай деб эрининг елкасини силаган бўлди. Кейин гилам устида юзтубан ётган торни олиб, стол устига авайлаб қўйди.

– Илёсбек билан Козимбекдан умидим зўр эди. Иккови бир оламга татийдиган бўлиб камолга етиш ятувди. Охирги келганлари эсингдами? «Дўсти, дўсти, нараха»ни жўровозда айтиб беришганда, хин-

дийчани тушунмасам ҳам, йиғлаб юборай дегандим. Ҳиндларнинг ўзи ҳам бунақа таъсирили айтишолмаган, тўғрими? Тузалсам, иккови билан бирга саҳнага чиксам, деб орзу қилувдим. Бизда жўровозда айтувчи-лар деярли йўқ...

– Худо хоҳласа тузаласиз, саҳнага ҳам чиқасиз.

– Гапларимдан кулма. Санъаткор ҳалки шунака шухратпаст бўлади. Даври даврони ўтганини билиб турса ҳам, саҳнага чиксам, одамлар қарсаклар чалиб олкишлашса, деб орзу қилаверади.

– Давру давронингиз ўтгани йўқ. Одамлар ашула-ларингиз ёзилган кассеталарни пулга сотиб олишяпти-ку, саҳнада ўрнингиз борлигини шунинг ўзи исбот эт-маяптими?

– Ёзувни эшитиш бошқа, саҳна бошқа. Саҳнада узок туриш қийин, ёшларнинг оқими сел каби ёпи-рилиб, хар қандай машҳур санъаткорни суриб таш-лайди. Мен ўла-ўлгунимча ашула айтиб юраверишим мумкин, эски муҳлисларим мазза қилиб эшитишлари ҳам мумкин, лекин илгариги Элчиннинг аллақачон ўлиб кетганини тан олмасам, куним шармандаликка колади.

– Қўйинг, совук нафас қилманг. Ана, французлар-нинг Шарл Азнаури шу ёшидаям дунёни лол колдириб юрибди-ку?

– Сен иродали аёлсан, шу иродангнинг ярми менда бўлганидами? – Элчин шундай деб маъюсгина жил-майди. – Илёсбекнинг «иш»и нима бўлдийкин? Тер-говчи яна келмоқчийди, жимиб кетди. Қотилни топ-ганмикин?

– Топиш осон эканми? Келувди ўша терговчингиз, уйга киритмадим.

– Нега? Баҳонада у-бу янгиликни билиб олардик.

– Терговчи сизга янгилик айтарканми? Бошингизни айлантиришдан бошқа нияти йўқ унинг. Аслида, биринчи келганида киритмаслигим керак эди. Битта-си ўлдирилган бўлса, яна биттаси йўқолса, сизнинг

нима дахлингиз бор? Адамният олиб бориб сўрок килишибди.

Бу янгилик Элчинни чинакамига таажжубга солди:
— Ие, нега?

— Негалигини ўзлари билишади. Қанақа қилиб бўлсаям адамдан кир топишлари керак-ку?

— Лекин... аданг уларни ҳатто билмасдилар. Янги чикаётган ашулачиларни ёқтирасдилар.

— Буни ўша терговчиларга тушунтириш керак. Эрталаб карасам, сизни сўроқ қилган одам тўппа-тўғри кириб келяпти, «тўхтанг, отангизнинг уйими бу, индамай кириб келадиган», десам, «мен томошаталаб одаммасман, хизмат юзасидан келдим», деб олифтагарчилик қилувди, «Хизмат юзасидан бўлса, прокурорнинг рухсатини кўрсатинг», дедим. Бизнинг одамлар милисани кўрдими, тамом, айби бўлса-бўлмаса, тиззаси қалтирайди. Рухсатнома сўрамайди. Булар шунга ўрганиб, «нима қилсан ўзимнинг ишим», деб керилиб юраверишади. Хоҳлаган уйга бостириб кираверади, истаган одамини турмасига тиқиб кўяверади.

— Ўзбекчилик-да, — деди Элчин кулимсираб, — буларни ҳам меҳмондай кутиб олаверамиз. Мехмоннинг кўкрагидан итариш одати бизда йўқ. Ҳар ҳолда киритаверганинг маъқул эди.

— Фашимга тегмай одамга ўхшаб гапирса, киритардим...

— Нима деди?

— Кўяверинг, ўзи нима-ю, гапи нима бўларди...

Зайнаб шундай деб, ошхонага қайтди. Рухсатнома талаб қилганида терговчи осмондан келиб: «Биз билан ўйнашманг, Асадбекнинг кизи бўлсангиз ўзингизга, катта кетманг», деди. Отасининг номи ўринисиз ҳолатда тилга олиниши Зайнабнинг жаҳлини қўзгади. Кесакполвон «Сен Асадбекнинг қизисан!» деганда ҳакли эди. Зайнаб ғазабланганида кўзлари катта-катта очилиб, гўё ёна бошлагандай қизариб кетарди. Бундай ҳолатда нафрат учқунларини факат Асадбекнинг

кўзларида кўриш мумкин эди. Терговчи томонидан нодонлик билан айтилган гапдан кейин Зайнабнинг кўзларидан ана шундай учқунлар сачради. «Мен бу ерда Асадбекнинг қизи эмасман, Элчинбекнинг хотиниман. Мен билан ҳам ўйнашманг», деб кўкрагидан итаргудай бўлиб остонаяча кузатиб қўйди. Ҳозир Зайнаб гап бошлади-ю, лекин эрига бу машмаша тафсилотини айтгиси келмади.

Элчин яраланиб, неча бор хушидан кетиб, ўзига келган онларида ҳаммадан кўпроқ Анварни эслади. Нима учун шундай бўлаётганини ўзи ҳам билмади. «Агар ўлмай, тузалиб чиксан, Анварнинг хотирасига туркум қўшиқлар атайман. У ўзини шоир деб ҳисобламасди. Лекин унча-бунча шоир зотини оркада қолдириб кетадиган шеърлари бор эди. Ҳалк уни тириклигига танимади. Ўлимидан кейин номини эъзозласин. Шеърлари газетада чиқсан билан бирор ўқийди, бошқаси бехабар қолади. Шоирни ашула машҳур қиласди», деган аҳдни қалби тўрида асрени. Анварнинг ўлмас шеърлари билан Илёсбекни янада баландроқ мартабага кўтармоқчи эди...

Илёсбек... кимнинг қасди бор экан бу йигитда...

Козимбек... Наҳот у?

Йўқ... Улар чинакамига дўст эди. Ҳасадсиз санъаткор бўлмайди. Улар орасида ҳам ҳасад бўлган, лекин ғаразга айланмаган, ҳар ҳолда шундай эканига Элчиннинг ишончи бор эди. Дўстини ўлдириб ёки ўлдиритириб, қочиб юриш Козимбекка хос эмаслигига эса имони комил.

Ошхонага қайтган Зайнабнинг хаёли ҳам икки ёш қўшиқчининг аянчли тақдери билан банд эди. Эрини йўклаб турувчилар орасида бу иккиси чинданам бошқача эди. Қошлари қалин, кўзлари кулиб турувчи бу йигитларнинг овози, гапириш оҳангига ҳам ширали эди. «Шаҳарнинг энг гўзаллари талаш қилиб юборса керак бу хушрўй йигитларни», деб ўйлаган эди Зайнаб. Охирги келишларида ҳиндча кинодаги ашулани

хиргойи қилиб беришувди. Кейин ғалати гап айтишган эди...

Ўша гапни эслаган Зайнабнинг юраги ғалати бўлиб кетди. Пичок ушлаган қўли котди.

«Кинода икки дўст бир гўзални севиб колади, бизнинг ҳаётимизда бир гўзалга уч ошиқ... Гўзал эса худди эртаклардаги маликага ўхшаб шарт қўйган: кўрик-танловда ким биринчи бўлса, ўшанга тегармиш. Шахсан мен бунақасига рози эмасман. Бунақа савдо билан ҳаёт чиройли бўлмайди. Шунинг учун четга чикажакман... Гўзалдан юз ўгириб, халқимга, ижодимга қайтажакман!»

Бу гапларни Козимбек айтган эди. Жиддий эмас, ҳазил оҳангиди айтганди. Лекин бир гўзал уч йигит орасида талаш бўлса... ҳамма нарсани кутиш мумкин. Демак... котил учинчи дўстми?

Зайнабга бу фикр ҳакикат бўлиб туюлиб, эти бир жимирилашди. Яна бир оз ўйланиб тургач, эрининг ёнига қайтди. Элчин чолғуга қўлини чўзиб, кўрсаткич бармоғи билан торни заифгина чертиб ўтиради. Зайнабнинг паришон ҳолда кириб келишидан ажабланди. Зайнаб унинг рўпарасига ўтиреди, хаёлига келган фикрни айтишга иккиланди. Элчин «Тинчликми, Зайнаб?» дегач, тилга кирди:

– Калаванинг учини топганга ўхшайман... Сиз ҳақсиз, Козимбекдан шубҳа килиш керакмас. Охирги келишларини эсланг, ашулани айтиб бўлишгандан кейин Козимбек «бир гўзалга уч ошиқ» деган эди. Гўзалнинг шартини айтиб, четга чиққанини билдирганди. Қанака кўрик-танлов эди, сиз биларсиз?

– Битта мен эмас, ҳамма билади. Бокуда ёш хонандаларнинг халқаро кўрик-танлови бўлади... «Бўлади», эмас, назаримда ўтиб бўлди. Даъвогарлар орасида Илёсбек, Козимбек ҳам бор эди.

– Яна биттаси бўлиши керак эмасми?

– Битта эмас, бир нечта эди даъвогар. Лекин арзидигани шу иккаласи эди. Ҳа, Толиб ҳам бор эди.

- Уччаласи дўст эдими?
- Билмадим... Лекин учовиям бир жойда ўқиган.
- Гўзал ҳақида ҳам гапиравди, танийсизми ўша кизни?

– Йўқ, тўғриси... ўша кунги гапни мен ҳазил деб тушунувдим. Булар киз талашадиган йигитлар эмас, буларни қизлар талашишса керак?

– Қиздан ташқари халкаро кўрик-тандлов ҳам бор. Козимбек ҳазиллашмаган бўлса, у даъвогарликдан воз кечган. Демак, икки киши қолган. Илёсбек ўлдирилгач, Толиб бордими?

– Ҳа, шунака бўлибди.

– Ютибдими?

– Йўқ, рағбатлантирувчи мукофот олибди. Бунақа мукофотни борганларнинг ҳаммасига беришади.

– Унда гўзал қизнинг шарти бажарилмабди-да? Илёсбек ўлдирилди, Козимбек изсиз йўқолган, Толиб Бокудан куруқ қайтган... Гўзалнинг тақдиринима бўлади энди? Толибга тегишдан бошқа чораси колмаганми? Толиб эришадиган асосий мукофот ўша гўзалми? Шу мукофотни деб икки йигит жувонмарг бўлиб кетаверадими?

Элчин куйиниб гапираётган хотинига қараб кулимсиради.

– Куладиган жиннича гап гапирдимми? – деди Зайнаб зардали оҳангда. У воқеани таҳлил қилиб, худди отаси каби мантиқий хulosалар чиқара бошлаган эди. Эрининг кулимсираши масхара бўлиб туюлиб, отаси каби бирданига ёнди.

– Кулганим йўқ, Зайнаб, – деди Элчин узр оҳангда. – Фақат... терговчига ўхшаб мени саволга кўмиб ташладинг. Ўйлаб жавоб беришга улгурмай қолдим. Гапларингда жон бор... Лекин... терговчилар эшитишмагани маъқул. Толибни яхши билмайман. Эҳтимол, юрагида ёвузлиги бордир. Лекин санъаткорнинг қалбидаги нафосат билан ёвузликнинг бирга яшashi мумкинлигига ишонгим келмайди.

– Нега ишонмайсиз? Моцарт фожиасидан кейин Сольерига ўшаганлар бутунлай кирилиб кетишганми? Ўзингизнинг ашулангизда бор эди: «Дўстга зор бўлган куним дўст мени хор айлади...» Шогирдларингизни бегона одам ўлдирмаган.

– Козимбекни ҳам ўлдига чиқаряпсанми?

– Агар мантиқка суюниса, бошқача хулоса бўлиши мумкинмас.

– Агар терговчи бўлганингда...

– Ҳеч қачон терговчи бўлолмайман.

– Нега энди?

– Мен ҳар воқеадан мантиқ излайман, терговчининг мантиқ хақида ўйлашга вакти йўқ. У хужжатларни тезгина юмалоқ-ёстиқ қилиб, ишни судга ошириши керак. Ундан ҳеч ким мантиқ талаб этмайди.

– Гапинг тўғри, лекин ҳар қалай...

Зайнаб ўрнидан туриб, зрига норози киёфада бокди:

– Гапингиз ичингизда қолмасин, айтаверинг.

– Ранжимагин-у, анча шафқатсиз терговчи бўларкансан.

– «Шафқатсиз» дейсизми? Йўқ, мен эмас, ҳаёт шафқатсиз...

Ҳаётнинг ҳар турли шафқатсиз дўллари остида қолиб, ҳаётдан тўйган Элчин хотинига зътиroz билдира олмас эди. Эр-хотин ҳаётнинг шафқатсиз эканини зътироф этишса-да, шафқатсизлик хусусидаги қарашлари бир хил эмасди. Улар гўё «ҳаёт шафқатсизлиги» деб аталмиш азм дарёning икки қирғоғида кезаётган икки дарбадар каби эдилар. «Ҳа, ҳаёт бениҳоя шафқатсизdir!» деган ҳақиқатда бирлашган эр-хотин «Ҳаётнинг нимаси шафқатсиз?» деган савол ўртага қўйилса, бир-бирларидан узоклаша бошлаган бўлардилар. Ҳозир ҳаётнинг қанақасига шафқатсиз экани исбот талаб этилмади, Зайнабнинг дардли қалдан сизиб чиққан сўzlари кифоя қилди.

Эрини касалхонадан олиб чиқиб, акасининг тўйига бормаганилиги Асадбекка аввалига нодонлик бўлиб туюлган эди. Кейинрок ўжарликка йўйди. Сўнгрок эса қизининг феълига умуман тушунмай колди. Абдуҳамиднинг ўлимидан кейин, айниқса, Абдусамад ўкишга қайтганидан сўнг ёнида қизи бўлишини жуда-жуда истаган эди. Ота истагига кўра қизнинг қайсарлиги устун бўлса, нима қилсин у бечора!

Асадбек «қизинг эрининг раъийга қарайди», деган гапни Манзурага қатъий ишонч билан айтмаган эди. Элчиннинг бу хонадонга кўчиб келишга кўнмаслигини билар ва унинг бу ҳолатига тушунгани учун зўрлашдан ўзини тиярди, Зайнабнинг ўжарликларига ҳам чидаб келаётганди.

Лекин...

Зайнабнинг ота уйига кўчиб келмаслигига жиддийрок сабаб ҳам бор эдики, буни Асадбек ҳам, Манзура ҳам билишса-да, сиртга чиқаришмасди.

Зайнаб бу уйга кўчиб келгач, Жамшид билан ҳар куни, турли ҳолатда кўришиб туришдан чўчиётган эди. Гарчи Жамшид уни «синглим» деб атаса-да, дардни умид билан енгишга уринган Зайнаб руҳидаги Кумушбибини бераҳмларча ўлдирган бўлса-да, орадаги шайтон ҳали тирик ва ҳатто сергак эди!

Зайнаб келин аяси Муштарийнинг бир гапини кўп эслайди: «Румонни мутолаа этувим жараёнинда Кумуш кандай киз экан, деб чўх ўйга толурдим. Сизни кўрдим ва дедимки: ана, Кумуш!»

Кизлик сурури билан яшаётган кунларида бу таъриф берилса, унга ғоят хуш ёккан бўларди. Балки бу мақтов қанотида муҳаббат осмонида парвозлар қиласмиди... Энди у осмон йўқ, парвоз қилувчи қанотлар киркилган... Шу боис келин аясининг пок кўнгил или билдирган лутфини қабул қила олмай, синик овозда: «Кумуш ўлган...» деб кўйган эди. Яхшики, Муштарий кайнисинглисининг бошига ёғилган мусибат дўлидан бехабар. Зайнабнинг гапини китобдаги

Кумушнинг заҳарланиб ўлиши, деб тушуниб, эътиroz билдириб эди: «Кумушбиби жисман ўлмишлар. Бибийимиз муҳаббатлари тирикдир, ўлмасдир. Унинг туйғулари сиз ила бизда яшар...»

...унинг туйғулари сиз ила бизда яшар...

Зайнаб шу гапни кўп ўйлайди. У қалбидаги туйгуни ўлдирганига ишонарди. Айниқса, Ҳайдар амакисига қўшилиб Мардонани ўлдиргани борганида бунга амин эди. Кейинчалик, келин аялари билан сұхбатларда муҳаббат туйғусини ўлдириш мүмкінмаслигига ишона бошлади.

Отаси уйга кўчиб ўтиш ҳакида сўз очганида у ўша туйғунинг тирилиб қолишидан қўркарди.

Жуда-жуда қўркарди...

3

«Кар эшитганини, қўр ушлаганини қўймас», деганларидек, Фазлияни санчки ушлаган ҳолда кўрганларнинг гувоҳлиги асос бўлиб, аёл зрининг қотили сифатида қамалган эди. Адвокат «юқори маҳкамага шикоят қилиб, бу суднинг хукмини бузамиз», деганда ҳам унамаган, бирорвга ҳасрат дафтарини очмаган Фазлия дардларини бу бегона аёлга қандай айтишни билмай, кийналди.

Фазлия йиллар бўйи банди бўлган кулфат гардларидан кутулиш, юрагини темир тирноклар исканжасида тутиб турган аламлардан ҳоли бўлиш учун ўзига дардкаш изларди. Лекин фаровонлик тахтида ўтирган Манзура унга дардкаш бўла олармикин? Бу хонадонга нажот олиҳасини излаб келгани билан, Манзурани фаровонлик тахтида ўтирган дардсиз хотин деб ўйларди. Манзуранинг ичи дардлардан дўл ғалвир килиб юборган чорасиз барг сингари илма-тешик бўлиб кетганини қайдан ҳам билсин?

Манзура бу маъсуманинг синик овоз билан баён этган арзи ҳолини эшитиб, титраб кетди. «Муштипар-

нинг юраги шунча ғам-аламга кандай чидади экан?» – деб ўйлаб, унинг қалб ярасига малҳам бўла оловчи сўз излади. «Адамизга айтаман, болаларингизни топишга ёрдам берадилар» деб овутмоқчи бўлди. Манзуранинг бу гапларидан кейин аёлнинг мунгли кўзларида умид учқунлари кўринди. Аммо кейинги таклифини эшитиб, бошини эгди. Бу ерга келишдан максади болаларини топишга ёрдам сўраш эди. Тўғри, кишлоқдаги уйида яшашга юраги бетламай қолганди. Қамоқдан чикиб борди. Кўни-кўшнилар йўқлашди, ош-овқатдан ками йўқ эди. Бир ойми ё ундан кўпми, окибатли кўшнилар паноҳида мухтожлик нималигини билмай яшаши мумкин эди.

Энди бу бегона хонадонда яшаш?

Манзура «хизматкорлик қиласиз», деб очик айтмади. «Шу ерда яшаб туринг, у-бу ишларимга қарашиб турарсиз», деди. Фазлия бошини эгиб жимиб қолга, «ҳеч бўлмаса, болаларингиз топилгунича яшаб туринг», деб кўшиб кўйди.

Фазлия бир хонадонга хизматкор бўлишни тасаввур қила олмасди. Гап ишдан қочишда эмас, қишлоқда ўсиб, эрлар билан теппа-тeng ишлаган аёл меҳнатдан кўрқармиди? Қишлоқда тонг отгач, куёш аста бош кўтариб қарайди-ю, ўзидан аввал уйғониб, аллақанча ишларни килиб ташлаган аёллардан уялганиданми, баъзан қизариб кетади. Куёшда ор бор, аммо яrim кечага қадар қайси бир тўйда ёки гап-гаштакда бўкиб ичиб, кун ёйилгунча уйкуни урадиган эрларда виждон йўқ. Субҳдан илгари туриб, сигир соғиб, ховли супуриб, кир ювиб, яна томорқадаги сабзини ўток қилиб кўйишга улгурган хотинига қараб: «ҳалиям чойинг қайнамадими?» деб бўкиришга овоз бор. Аммо шу овозга монанд ғайрат, мардлик йўқ.

Барча афсус шунда.

Аммо... Аёллар афсусланишмайди, виждонсиз, ғайратсиз, такасалтанг бўлса ҳам майли, эрнинг борига шукр қилишади.

Фазлия ҳам шуларнинг бири.

Хизматкорликни таклиф қилаётган аёл эса ундей эмас, у бошқа олам. Фазлия унинг тирноклари бўялмаган бармоқларига караб, нозанин, эгилмас, сатанг бойвуччалардан эмаслигини сезди. Асадбек хотинининг истагини эшитиб, «синалмаган хотин»ни олиб қолмоқчи бўлаётганидан ғашланганди. Фазлия эса сигналмаган уй бекасининг қандай хизматларини бажаришини тасаввур эта олмай ғашланди. Қишлоқда иш оғир, иш ҳаки эса оз бўлгани билан эркин юра олади. Бу ерда қишлоқдагичалик иш бўлмайди, берадиганлари ҳам кўпдир. Лекин... бирорларнинг қош-қовоғига караб, мутелик билан кун кўриш... Фазлия шундан қисилиб, жавобга қийналаётган эди. «Ҳеч бўлмаса, болаларингиз топилгунича яшаб туринг», дейилиши мушкулини осон этди. Чехраси ёришиб, Манзурага миннатдор кўзлари билан каради:

– Майли, опажон, – деди енгил хўрсиниб, – факт... уйга бориб келай, бу бозорда сотадиган нарсаларим бор.

– Нималарни сотмоқчисиз? – деди Манзура ажабланиб, кейин саволига аниқлик киритди: – Нега сотмоқчисиз?

– Мен у ёқдалигимда... барака топгур кўшниларим мол-холга караб, анча кўпайтириб қўйишибди. Одамлардан қарзларимиз бор... ўлган одамнинг қарзи тўланмаса, гўрда қийналиб ётаркан. Молни сотиб, дадамизни гўр азобидан кутқаришим керак.

Бу гапни эшитиб Манзура бир сесканди. Тирик болаларининг ғамида юрган муштипарнинг кабр азобидаги эрини ўйлаши уни ларзага солди. Қарғишларга лойик эрнинг нариги дунёдаги ахволига ачиниш унга ғалати туюлиб, айтишга гап тополмай қолди. Сўнг... унга яна бир яхшилик қилгиси келди.

– Молларингизни сотманг, болаларингизнинг тўйларига атаб қўйинг. Қарзларингизни тўлашга ета-

диган пулни мен берайин. Молларни бокиб туришгани учун қўшниларингизга ҳам ҳақларини берайлик...

– Нима деяпсиз? – деди Фазлия унга ҳайрат билан қараб: – Кўни-қўшничиликда бунақаси йўқ. Нима қилинса, холисаниллоҳ бўлади. Агар «ҳақ олинглар», десам, кейин бетимга қарамай қўйишади. Қарзларни ҳам баъзи бирорлар кечиб юборишибди. Биттала-ри: «Эринг қиморвоз, арокхўр бўлгани билан яхши одам эди. Жанозасида тобутининг тепасида туриб қарзлардан воз кечганман. Яна бир-икки киши кечди, эринг у дунёга бўйнидаги қарздан кутулиб кетди, сен хотиржам бўлавер», дедилар. Раҳмат айтдим-у, лекин кўнглимдаги хиалик кетмади. «Тўлаб қўй», деб вавият қилган эдилар, кечишган бўлишса ҳам тўлашим керак... Опажон, ранжимант, қарзларни ўз молимдан тўлашим шарт. Йўқ бўлганда, ўзим сўрадим...

– Молларни болаларнинг тўйларига атаб қўйинг, деяпман.

– Худойим болаларимга яна ризқ берар...

Подшоҳ саройидаги мажлис ахлидан: «Ҳамма нарсадан оғирроқ, каттиқроқ нарса нима?» деб сўраганида, донишмандларидан бири: «Қарилик, танглиқ, йўқчилик», – деди. Иккинчиси: «Касаллик ва ғам-андух», – деди. Учинчиси подшоҳга маъқул гапни айтди:

– Ҳамма нарсадан оғирроқ ва қаттиқроқ нарса – ажалнинг яқинлашиб қолиши ва ҳаётда яхшилик қилмай, ёмон номга эга бўлиб вафот килиш...

Манзура қайсиdir издиҳомда отин ойидан эшитган бу ҳикматни эслаб қолған эди. Ўғлининг ўлимидан кейин бу ҳикматнинг ўзгача кудратини ҳис этди. У яхшилик қилишдан ҳеч качон бўйин товламаган. Ёмонликдан ҳазар килган. Ҳозир ҳам бу муштипарга яхшилик қилмоқчи, лекин бечора бўлишига қарамай у қўлини қайтаряпти. Кўп одамлар муҳтоҷ бўлишмасада, бу хонадондан бир нималар кутишади, арзимаган

нарса учун пой-патак бўлишдан ҳам қайтишмайди. Бу бечора эса...

Пул бойлиги бўлмаган аёлнинг ғурур бойлиги қандай бўлишини Манзура энди кўрди. Кўрди-ю, барча бойлигини ҳадя этган тақдирда ҳам бу бечора даражасида бой бўла олмаслигига ақли етиб, руҳи эзилди. Фазлия уйига кетганидан кейин ҳам Манзуранинг хаёли унинг гаплари билан банд бўлди. Манзура шоҳона хонадонда туғилмаган, болалигига тўкинлик лаззатини кўпам тотмаган эди. Аксинча, мухтожлик қанака бўлишини билиб улғайганди. Асадбекка текканидан кейин ҳам дарров бойлик шоҳсупасига кўтарилмаганди.

Уша онларда унда Фазлияники каби ғурур бойлиги бормиди?

Бор бўлса, уни қачон йўқотди?

Йўқотганини қайта топа оладими?

Бу каби саволлар қайнаб чикаверди, жавобга эса ожизлик қилди. Ўзгача бўлиши ҳам мумкин эмас. Бу каби саволларга иймон билан кувватланган ақлгина тўғри жавоб бера олади.

Бозор куни ҳам ўтди, Фазлиядан дарак бўлмади. «Келмайди, чўриликни ор деб билди...» деган хаёлда Манзура ундан умидини уза бошлади. Жамшид келиб, хожасини олиб кетгач, уйга сиғмай қолди. Ошхонада ғимирлаб, ўзини чалғитмоқчи бўлди. Юраги барибир сиқилавергач, отин ойи ҳузурига бориб, кўнглига таскин топин учун йўлга ҳозирланди.

Манзура очик эшикни аста тақиллатиб, ичкарига қараганда Афруза дераза ойнакларини юваётган эди. Мехмонни кўриб, тезгина пастга тушди-да, кўлларини сочикка артди. Манзура бемаврид келганидан хижолат бўлиб, айвонга чиккиси келмади. Унинг хижолатини сезган Афруза дарахт соясидаги думалок стол томон бошлади. Ўтириб, дуо қилингач, мезбон кулимсираганича:

— «Ишингга солиб «акримиз-зайфа» нур, ту-

туб маръи ойини «хайрул-умур», деганлар Навоий ҳазратлари. Шу тарзда шоир бобомиз бизга «акримиз зайфа» – «Меҳмонни хурмат қил!» деб амр этилганини эслатяптилар. Чунки бу амрга итоат этишимиз «хайрул-умур», яъни ишларнинг яхшиси экан, – деб таомилга кўра, дастурхон ёзмок мақсадида ўрнидан турмоқчи эди, Манзура унамади:

– Бир масалани ечолмай, бошим қотиб келдим.
Икки оғиз гапингизни эшитаман-у, қайтаман, – деди.

– Икки оғиз гап бир пиёла чой устида айтилса, яна ҳам чиройли бўлади, – деди Афруза жилмайиб, – Аллоҳ таоло «үйингизга меҳмон келмай қолса, «аузу биллаҳи минаш-шайтонир рожийм», денглар», деб ўргатган. Шайтон ин қўйган уйга меҳмон яқинлашмайди. Уйимга меҳмон юборган Аллоҳимга шукур, меҳмон остона ҳатлаганидан кейин изни қисман мезбон ихтиёрига ўтади.

Гарчи «бир пиёла чой» дейилган бўлса-да, дастурхон ёзилди, Аллоҳнинг неъматларидан насиба қўйилди. Бу жараёнда меҳмоннинг хижолати ошаверди. Айниқса, Афрузанинг «шайтон ин қўйган уйга меҳмон яқинлашмайди», дейиши вужудини жимирлаштириб юборди. Меҳмон келмай қўйгани учун шайтоннинг ёмонлигидан Аллоҳдан паноҳ сўралса, у канчалар илтижо этмоғи зарур экан? Эшиги олдида коровул, яқинлашишга бегона одамнинг юраги бетламайди. Фазлияга ўхшаш ҳожатталаблар соатлаб, балки кунлар йўл пойлашса... Ҳовлига қўйиладиганлар ҳам самимий, холис меҳмонлар эмас, қайси бир ишни битириш учун келганлар... Меҳмон кириб келганда кувониб кетиш, хайрлашиш чоғида дийдорига тўймаганидан афсусланиш... Бундай туйғулар камдан кам ҳолларда уйғонади. Манзура меҳмон кутишни яхши кўради, меҳмонни соғинади. Аммо... меҳмондан безувчининг раъйига қараб яшашга мажбур.

Ваъда қилинган бир пиёла чой ичилгач, Манзура ечолмаётган масаласини баён қилишга ўтди:

— Одамларга яхшилик қилиш шартлигини биламиз, саховатли бўлиш ҳакида ҳам кўп эшитамиз. Лекин бир одам мухтожроқ одамга яхшилик қилгиси келса-ю, у мухтож одам олмаса-чи?

Манзура мақсадини охиригача очик баён этишдан тортинди. Афруза буни сезди, яна гапирав, деган ўйда бир оз кутди. Кейин шогирдига масаланинг ечимини тушунтираётган устоз оҳангидагап бошлади:

— «Яхшиликни раҳмдил, меҳрибон умматларимдан кутинглар», — деганлар пайғамбаримиз алайхиссалом. — «Шунда сизлар улардан умид қилган марҳаматларга эришасизлар. Тошбағир, қаттиккўл, беражум умматларимдан зинҳор яхшилик кутманглар, зеро, уларга Аллоҳ таолонинг лаънати ёғилиб туради. Эй Али!» — деб хитоб қилганлар. — «Аллоҳ таоло яхшиликни яратганда унинг ўз аҳлини ҳам алоҳида яратган ва уларга яхшилик ва хайрли ишларни яхши кўрсатиб қўйган. Шунинг учун улардан ким яхшилик кутса, албатта мақсадга эришаверади. Бунинг мисоли чанқоқ бўз ерга сув кўйиб юборилса, у ер канчалик яшнаб эгаларини сероб қилгани каби яхшилик ахли ҳам одамларга шунчалик манфаат ва баҳра етказур. Бу дунёдаги энг яхши кишилар охиратда ҳам яхшилар каторида тургайлар». Ўнлаб шарафли ҳадисларда, Куръони Карим оятларида одам зоти фақат яхшилик қилишга буюрилган. Мен сизга фақат биттасини айтдим. Куръонда бу оят ҳам бор: «Улар енгиллиқда ҳам, оғирликда ҳам нафака қиласиганлар, газабини ютадиганлар ва одамларни афв қиласиганлар. Аллоҳ яхшилик қиласиганларни ёқтиради». У одамлар яхшилик қилишда сабитқадамдирлар. Ҳаётлари енгиллашиб, ҳамма нарсалари сероб бўлиб кетса ҳам, ҳовлиқиб, ҳаддиларидан ошиб, фиску фасодга берилиб кетмайдилар. Балки ўзларини босиб, хайр-эҳсон, нафака қилишда бардавом бўладилар. Шунингдек, бошларига оғирлик кунлари тушса ҳам, сиқилиб, ўзларини

нокулай сезиб, баҳиллик йўлига ўтиб олмайдилар. Балки нафака қилишда бардавом бўлаверадилар.

– Ҳар бир одам ўз яхшиликларидан ўзи сарой куриши керак, буни «охират саройи» деб атасак ҳам бўлади. Бу борада отаси қуриб қўйган саройда яшай олмайди. Ундаги қулайликлар ва имтиёзлардан фойдалана олмайди. Қиёматда кимсанинг «Отам намозхон эди, ҳимматли эди», деган даъвосига қулок солинмайди. «Узинг қандай яхшиликлар қилгансан?» деб сўралади. Бу дунёда кўркам яхшилик саройи бунёд этган бўлса, фоний дунёда ҳам жаннат саройларида яшар инша Аллоҳ! Агар қилган яхшиликлари гаригина кулба каби бўлса... Шунисидан Аллоҳ асрасин!

– «Аҳсин камо аҳсаналлоҳу илайка», дейилганинг маъноси – «Аллоҳ сенга яхшилик қилгандек, сен бошқаларга яхшилик қил». Бу фикрни сал соддароқ тушунтиурсам: бу дунёда ҳам, у дунёда ҳам Одам болаларининг бошларига саодат соябони бўлувчи фазилат – яхшилиkdir. Бу соябонни сотиб олиш мумкин эмас. Бошқа одам ҳам ясад бера олмайди. Ҳар бир киши уни ўз амаллари билан ўзи ясайди. Саодат соябонининг ҳажми ва гўзаллиги қилинган яхши амалларнинг даражасига боғлиқ. Одам кишиларга қилган яхшилиги қадар яхши одамдир. Саодат ва фароғатга ёмонлик аталмиш ботқоклик орқали етаман, деган инсон нодондир, бадбахтдир.

Афруза ўзи билмаган ҳолда ҳақиқат сўзларининг ўқларини Манзура калбига қадаётган эди. Бу ҳақиқатни Манзуранинг ўзи ҳам билади. Лекин ўзгалар тилидан эшлишиш оғир ботаркан. У маломат тошини кўтара олмай, бошини эгди. Афруза гаплари таъсир этаётганини сезиб, давом этаверди:

– Тўғри, яхшилик туфайли бунёд бўлувчи бу соябонни ясашни кимсага ўзгалар ўргатиши мумкин. Демак, яхшиликнинг микдори ва миқёси, холислиги устознинг таълимига ҳам боғлиқ экан. Риё ва миннат

кўлмагидан сув ичувчи яхшилик яхши соябон бўла олмайди. Бирорга қилинган яхшилик учун сира надомат чекмаслик керак. Аллоҳ таоло ризолиги учун яхшилик қилиб кўйиб, сал фурсат ўтмай надоматга берилса, бу иллати кишини ёмонликка элтиб, яхшиликдаги савобнинг йўколишига сабаб бўлади. Кимгадир хизмат қилиш лозим бўлиб қолган бир пайдада нафл, яъни қўшимча ихтиёрий ибодатлари, яъни: нафл намози, нафл рўзаси, нафл зикри... тарқ этилиши мумкин. Чунки нафл ибодати инсоннинг ўзигагина фойда етказади. Бироқ, бошқа бир кишига хизмат қилиш – жамиятга хизмат қилишdir. Бунинг савоби кўпроқdir. Иброҳим алайҳиссалом Каъбани қайта бунёд килганларида тўрт бурчагининг хар бир бурчагида минг ракаатдан намоз ўқиб: «Раббим, шундай ибодат қилдим, сенга маъқулми, мақбулми? Сенга янада яхшироқ, мақбулроқ ибодат борми?» деб сўрадилар. Ваҳий келдики: «Ҳа, ё Иброҳим, бир факир камбағалга бир луқма нон бериш...»

Кўряпсизми, опажон, бирон бир кимсага яхшилик қилинса, сизнинг саховатингиздан у одам беҳад шод бўлиши баробаринда ўзингиз ҳам бу химматингиздан шунчалик завқ ола билишингиз керак. Бундай завқ фақат беминнат ва холислик ила яхшилик килувчиларга насиб этади. «Яхшилик кил – дарёга сол, балиқ билур. Балиқ билмаса – Холиқ билур», деб бежиз айтилмаган. Ҳазрати шайх Суфёни Саврий дедилар: «Кимки ихлос билан бир амални қилса-ю, кейин ўша амалга мактаниб, «мен фалон ишни қилдим», деса, қабул бўлган ўша амали яхшилик рўйхатидан ўчирилиб, риё рўйхатига ёзилур».

Бир ривоят бор: Бағдод шаҳрига ёнгин тушибди. Бир хожанинг икки ўғли олов ичида қолди. Ота-онаси фарёд уриб, чора топа олмабдилар. Ҳазрати Абул Ҳусайн Нурий деган шайх у ердан ўтаётган эканлар. Дарҳол ўт ичига қирибдилар-да, болакайларни олиб чикибдилар. Олов у кишини куйдирмабди, балки ул

муборак зот учун гулистон бўлибди. Болаларнинг отаси ҳазратга миннатдорлик билдириб, бир коса тўла тилла тутибди. Шунда шайх ҳазратлари:

– Нурий тилла олса, оловдан болаларни чикара олмас! – деб жавоб берган эканлар.

Бу гапларни айтишимдан мурод шулки, холис яхшиликка Аллоҳ таоло ажр беради. «Лан танолул-бирра ҳатто тунфиқу миммо тухиббу» – яхши кўрган нарсаларингиздан сарфламас экансиз, яхшиликка эриша олмайсизлар, дейилиши бежиз эмас...

Афруза «бирон нимага тушундингизми, энди сўзлаш навбати сизга», дегандай Манзурага қараб қолди. Бир неча нафаслик сукутдан сўнг Манзура бошини кўтарди:

– Эшитмаган гапларимни эшитдим, яхшиям келибман, – деди у паст овозда. Гарчи гўзал ҳикматлар баён этилган бўлса-да, саволига жавоб олмаган эди, шу боис яна мавзуга қайтди: – Лекин ҳали айтганим... қилинмоқчи бўлган яхшилик холис эди, дилдан чиқарилган эди...

– Опажон, сезиб турибман, дардингизни очиқ айта олмаяпсиз. Учинчи шахс тилидан гапирмай, воқеани тўлиқ баён қилиб бераверинг, икковимиз ақллашиб бир хulosага келармиз.

Манзура бир оз иккилангач, Фазлия билан бўлган сухбатларини айтиб берди. Афруза жимгина тинглади, сўзни бўлмади, орада савол ҳам бермади. Унинг учун ҳаммаси тушунарли эди.

Манзура сўздан тўхтагач, «у синглимиз нотўғри иш қилибдилар», деган ҳукмни кутди. Лекин унинг кўнглидаги жавоб бўлмади:

– Сизни қийнаган масаланинг ечими унчалик кийин эмас. Пайғамбаримиз алайҳиссалом «бир-бirlарингизга ҳадя қилинглар», деб ўргатганлар. Ҳадяни олмай, кўлни қайтариш одобдан эмас. Ҳатто камбағал одам кўнглидан чиқариб битта майизни ҳадя қилса ҳам, бой одам олиб, дуо қилиши керак. Олмаса такаб-

бурлик бўлади. Фазлияхоннинг ҳаракатида сиз шунаقا ғурур кўрибсиз. Лекин, аклим адаштирмаётган бўлса, ундан эмас. Фазлияхон қарзларни тўламоқчилар. Қарзларни тўлаш учун моллари етарли. Ҳалол молдан тўламоқчи бўлгандари яхши фазилат. Агар уйларида ҳеч нималари бўлмай туриб, сизнинг яхшилигинизни инкор этганларида таассуфли иш қилган бўлардилар.

— Мен ўша молларини болаларининг тўйига атаб қўйишларини хоҳлаган эдим, — деди Манзура афсус билан.

— Аллоҳ фарзандни ризки билан қўшиб беради. Тўйларига аталгани ҳам бордир. Лекин... сиз кўпам куйинманг, яхшиликнинг дарвозалари кўп. Агар бир неча йил у ёқда ўтирган бўлсалар, уйлари тўкилиб қолгандир. Кўшнилари молларига карашган, уйда одам яшамаса, тез нурайди. Болалар топилгунига қадар сиз уйларини чиройли қилиб беринг. Оғилхоналарини ҳам янгилаб, иккита букача боқтириб қўйсангиз, олам – гулистон-да!

Афруза шундай деб жилмайди. Худди уйлар таъмирланиб, оғилхоналар янгиланиб, букачалар боқилаётганидан кувонгандай жилмайди. Бу жилмайиш Манзурунинг кўнглини илиқ нур билан ёритди. Хайрлашиш учун ўрнидан қўзғалди-ю, дилини хира қилиб турган яна бир саволга ойдинлик киритишни истади:

— У синглилизни қамашған, бу дунёдаги жазони олганларини тушундим. У дунёда нима бўлади?

Зоҳиран енгил туюлган саволнинг жавоби Афрузани бир оз қийнади. «Буни Аллоҳнинг Ўзи билади», деб осон кутулишни истамади. Кафтларини очиб, юқори кўтарди-да:

— «Байзаллоҳу таоло авроқа жаройимиҳо» — Аллоҳ таоло унинг гуноҳлари ёзилган варақаларни ок қилсин, кечирсин, — деган дуо билан сұхбатларига яқун ясади.

Кечки пайт эри келганида Афрузадан эшитганларини ўзининг шахсий таклифи сифатида баён қилди. Асадбек толикқан эди, хотинининг ҳаяжон билан айтган гапларини эътиборсиз тинглади. Битта уй билан оғилхонани янгилаш, икки эмас, йигирмата буқачани боктириб қўйиш унинг учун арзимаган иш эди. Жамшидга ёки бошқа бир аъёнига имо қилиб қўйса бас, бир ҳафтага етмай ишлар қойилмақом қилиб қўйиларди. Лекин Асадбек, хотинидан фарқли ўларок, кимга яхшилик қилаётганини олдиндан билиши керак эди. Кеча кўз ёши тўкиб келган хотин бунчалик яхшиликларга арзийдими ё йўқми? Асадбек аввал шу саволга жавоб олиши лозим эди. Жамшидга «кеннайингнинг гапига қараганда, бу дунёдаги энг бечора хотин экан, қанақа бечоралигини ипидан-игнасиғача аниқла», деб топширган эди, топшириқ натижасини билмагунича Манзуранинг ҳозирги таклифларига тайинли жавоб беришни истамади. Шунинг учун гапни қисқа қилиб:

- Аввал болалари топилсин-чи... – деб қўйди.
- Сиз ёрдам беряпсиз, Худо хоҳласа албатта топилади, – деди Манзура ишонч билан. – Бу ёғини ҳам бошлаб турсак савоб кўпаяркан. Яхшилик қилишга шошилиш керак экан...

«Ажал етиб келгунича кўпроқ яхшилик қилишга шошилиш керак», деб тўлиқ айтмоқликка Манзуранинг тили бормади. Ажалнинг тилга олиниши зрига ёмон таъсир қилишини билгани учун ҳикматни яримлатиб айта қолди. Шунга қарамасдан, умид билан айтилган бу гап Асадбекнинг ғашини келтириб, қошларини чимирди.

– Шунақами? Яхшилик қилишга шошилиш керак эканми? Шошилмаса нима бўларкан? Ажалидан беш кун аввал ўлиб коларканми?

- Вой, адаси, унақа деманг...
- Сен гапни айлантирма. Мен яхшилик қилишдан қочмайман. Лекин худойинг ваъдасини бажаряпти-

ми? Яхшиликларимга яраша мукофотини беряптими? Қани ўша мукофотлари?! Гуноҳларимни кўриб, жазосини нақд қилиб қўйди. Агар «ҳисобли дунё» дейдиган бўлсанг, худойинг билан ҳисоб-китобни қилиб олишим керак.

Бу гапларни эшитган Манзуранинг вужудини титроқ босди. Кўзларини катта-катта очганича тили гапга айланмай қолди.

Манзура ўғлининг жанозасидан кейин эри айтган шайтоний гапларни эшитмаган, эшитгандами эди...

Ўшанда Муҳиддин ота «Аллоҳга таваккул қилинг, Аллоҳдан нажот сўранг», деб далда бермокчи бўлганида иситма оташидаги Асадбек «Ҳадеб Аллоҳ, Аллоҳ дейсиз... Аллоҳга сўзингиз ўтса, айтинг, ўғлимни қайтарсин!» деган эди. Бу гапдан ларзага тушган Муҳиддин ота ҳам, Жалил ҳам «астағ-фируллоҳ!» деб, уни тавбага ундашганда у ўжарлик билан: «Ота, менинг Худо билан шартномам бор: энди мен унинг уйига қадам босмайман, у меникига кирмайди», деб дилларни вайрон қилганди. Гарчи иситмаси тушиб, Муҳиддин ота билан Жалилнинг гапларидан кейин тилида тавба қилгани бўлса-да, иймон дарвозасидан узоқда қолаверган эди.

Иймон дарвозасидан узоқ шу одамнинг ҳозирги гапи аввалгидай муртадона даражада бўлмаса ҳам, куфрнинг айни ўзи эди. Аввалгисида Жалил шапалоқ тортиб юборган, елкасидан силкиб: «Тавба қил, аҳмоқ! Дарров тавба қил!» деб ҳайқирган эди. Манзуранинг бундай қилишга ҳоли ҳам колмади, журъати ҳам йўқ эди. «Тавба! Тавба!..» деб пичирлаганича тураверди. Кўзларидан ёғилган ёш киприкларига илиниб парда ҳосил қилди, эри кўринмай қолди...

Кўзи илингандагу қулоғи остида майин, ширали овоз тиловат қила бошлади. Овоз эгасини таниди – Афруза! Куръон тиловати тугагач, маънодор оҳангда сўз бошлади:

– Опажон, қуръон ўқилганда шунчаки роҳатланиш

билан кифояланмаслик керак. Оятларнинг маъносини тушуниш ва унга амал қилиш муҳимрок. Ҳеч нарсага тушунмаган одам нимага амал қиласди? Мана ҳозир сел бўлиб эшитдингиз, маъносини эса билмайсиз. Қаранг, Аллоҳ таборак ва таоло «Шу оятларни кўргандан кейин ҳам дилларингизга таъсир қилмади», деяпти. Яна деяптики: «Дилларингиз мисли тошдек қаттиқ, балки ундан ҳам қаттикроқдир. Чунки баъзи тошлар орасидан чашмалар чиқиб, анҳорлар жорий бўлади. Тошлардан баъзилари ёрилиб, орасидан сувлар чиқади ва баъзи тошлар Парвардигоридан қўрқанидан пораланиб, майда-майда бўлиб кетади. Аммо сизларнинг дилларингиз ҳаргиз таъсирланмайди. Шуни билингларки, Аллоҳ таоло сизларнинг амалларингиздан ғофил эмасдир...»

Манзура кўзларини очди. Уйғонганидан кейин ҳам Афрузанинг сўzlари қулоғи остида акс садо берив турди:

...дилларингиз мисли тошдек қаттиқ, балки ундан ҳам қаттикроқдир...

...баъзи тошлар Парвардигоридан қўрқанидан пораланиб, майда-майда бўлиб кетади. Аммо сизларнинг дилларингиз ҳаргиз таъсирланмайди...

Манзура «тош қалбларга назар солинмайди», деган ҳакиқатни эшитган эди. «Эримнинг қалби тоши ми?» деган фикрнинг ўзиёқ уни гўё ўтмас пичоқда қийма-қийма килиб юборарди.

...дилларингиз мисли тошдек қаттиқ, балки ундан ҳам қаттикроқдир...

Агар бу эрига ҳам тааллукли бўлса, оқибатда уларни яна нималар кутади?

Манзура тунни шундай талваса билан ўтказди. Эрининг дилини юмшатиш чораларини излади. Асадбек Абдураҳмон табибдан жисмидаги дардга шифо топиб келганида руҳида ҳам ўзгариш сезилганди. Лекин ўғлининг вафотидан кейин яна аслига қайтди. «Балки руҳ шифосини ҳам Абдураҳмон табибдан топиш мум-

кинди? Жалил ака ҳам күп нарсаларни биладиларку, лекин адамизга сўзлари ўтмайди. Табибга яна бир олиб боришлари керак...»

Манзура нажот йўлини топгандай суюниб, кўнгли бир оз хотиржам бўлди.

IX б о б

1

Тиниқиб ухлаш нималигини унугтан Асадбек учун бу тун ҳам азобли бўлди.

Назарида ухламаган эди. Ташқаридаги тиқ этган товушни ҳам эшиштётган эди. Бу овоз эса унинг хонадони сукунатини бузиб, титратиб юборди. Овоз эгасини таниди – узоқ йиллар муқаддам, Кесакполвон билан кирган эдилар унинг хонадонига. Қиласар ишларини қилиб, кейин унугтан эдилар. Йиллар ўтиб, Асадбек икки ўғлини Москвадаги ҳибсхонадан чиқариш учун кетаётганида ўша воқеани бирдан эслаган, бу овоз Москвадаги меҳмонхонада ётганида яна бир таъкиб этганича кейин холи кўйган эди. Қора кечада бағрини ёриб, ўша овоз энди ҳовлисига кириб келди:

– Сизлар номардлик килдинглар, мен сўраган пулларингни бериб келаётган эдим, – деди аламли овоз. – Мени ҳимоялаш ўрнига тириклиайн гўрга тикдиларинг!

Асадбек «сен Шониёз шолча билан тил бириктириб, тиллаларингни биздан яширган эдинг», деб эътиroz билдирумокчи эди, овози чиқмади. Бу онда аёлнинг фарёди ҳаммаёқни ларзага солди:

– Кизимга тегманглар! Кизимга тегманглар!!

Ҳа, Кесакполвон «буқачаларни қўйиб юбораман», дегач, қўшни хонадан чиққан эди бу чорасиз ҳайқириқ. Энди эса Асадбекнинг қулоқлари остида жаранглади:

– Худодан қайтсин, илойим! Ҳали Худодан қайтади!!!

Асадбек нолани эшитмаслик учун қулоқларини беркитмокчи эди, күллари ўзига бўйсунмади. Алами овоз эгаларини кўра олганида эди, бир амаллаб хайдашга уринарди. Улар ўрнига тепасида Собитхон кўринди.

– Ҳа, Бек ака, қарғишдан кўрқяпсизми? – деди у чўғдай порлаётган кўзларини Асадбекка қадаб.

– Қарғишдан ким кўрқмайди? Бу хотин қарғаганида қизим ҳали туғилмаган ҳам эди.

– Қарғишининг қачон ва қайси пайтда ушлашини Худонинг ўзи билади.

– У қизга мен тегмаган эдим.

– Лекин уйга биргаликда бостириб кирган эдингиз? Зулмкорларга қаршилик ҳам қилмадингиз. Агар ризолигингиз бўлмаганида улар зулмга журъат эта олишмас эди.

– Буни қаердан биласиз?

– Менга аён...

– Энди нима бўлади?

– Билмайман. Бек ака... яхшилаб ўйлаб қаралса, бу дунё ҳаётидан тубанроқ нарса йўқ. Сизнинг дунёйингиз йиқилишта юз тутган деворга ўхшайди.

– Яна шу гапингизни айтдингиз-а...

– Ҳа. Гапим эсингизда экан-у, лекин мағзини шу пайтгача чакмабсиз.

– Мен шу деворга суюньяпманми?

– Ҳа... Йўлингиз ҳам сирпанчик. Бу сирпанчида ҳеч кимнинг оёғи собит турмайди. Сирпана-сирпана сўнгги зиёратгоҳига қараб бораверади. Сўнгги зиёратгоҳ эса қабр. Ажални унутишда одамлар бир-бирларини ортда колдириб кетадилар.

– Айтмасангиз ҳам биламан: мени ўлим кутяпти... касаллик ололмаган эди. Энди кимнинг тиғидан ё ўқидан кетаман?

Собитхон унинг бу гапини эшитиб, «баттар бўл!»

дегандай кулимсираб қўйди-ю, саволига жавоб бермади.

– Сизга кўп нарса аён бўлар экан. Айтинг, айтинг! Мен билиб қўяй. Шармандали ўлим билан кетмай бу дунёдан. Орқамдагилар масхаралаб қолишмасин...

Собитхон энди қах-қах отиб кулганича чекина бошлади. Асадбек кўлларидан ушлаб колмоқлик мақсадида кувди, кува-кува етолмагач, ҳайкирди:

– Тўхтанг! Тўхтанг!..

– Адаси! Адаси...

Манзура тер босган эрини уйғотди:

– Вой, яна босинкираяпсиз-а, бир ўқитиб юборсак яхши бўларди.

Асадбек қаддини кўтариб ўтириб-да, кимнидир излагандай атрофига аланглади. Кейин кафти билан пешонасидаги терни артиб, беихтиёр уф тортди. Манзура унинг елкасини силай бошлади. Бу Асадбекка ёқмай, хотинининг қўлини олди:

– Ўқитамиз, тўғри айтдинг... ўқитамиз. Сен... ёта-вер...

Шундай деганича ўрнидан туриб, ташқарига чиқди. Очик кўкрагига урилган енгил шабада хуш ёқиб, чукур нафас олди. У авваллари ҳам туш таъбирига ишонмасди. Кейинги пайтда бунданда баттар тушлар кўравергани учун «Бу нимани англатади, энди нима бўларкин?» деган саволлар билан ўзини кийнамай қўйган эди. Туш таъсирида хира тортган кўнгли бир оздан кейин ўз-ўзидан равшанлашарди. Бу сафар ғашлик тез тарқамади. Хотиннинг фарёди кулоғи остида акс-садо бериб тураверди. Шу онда телефон жиринглаб, Асадбекни бу нохушликдан кутқарди. Гўшакни кўтармай, болохона томон қаради. Бир неча нафасдан кейин болохонадаги йигит тушиб, Томскдан сўрашаётганини айтгач, гўшакни хавотир билан кўтариб, «Ҳа, эшитяпман», деди. Овозининг хириллаши ғашини келтириб, енгил йўталди.

– Салом, Бек, тундаги оромингни буздим, ранжи-майсан...

Балабуханинг овозини таниб, хавотири яна ошди. «Нима қилиб серрайиб турибсан!» дегандай йигит-га норози киёфада боқди. Йигит бу қарашнинг маъ-носини тушуниб, тезгина изига қайтди. Шошилинч топширик бўлиб қолиши эҳтимоли борлигини билга-ни сабабли, болохонага чиқмай, зина ёнида тўхтади.

– Салом, тинчликми? Нима бўлди? – деди Асадбек бу сафар дадилроқ овозда.

– Козловни ўлдириб кетишибди. Йигитларининг ҳам анчаси қирилган. Кимлигини тахмин қилаёт-гандирсан?

Асадбек бир оз ўйланди.

– Ўликларнинг киролими? – деди ўз тахминига ишонқирамай.

– Моргашни яхши билармидинг?

– Унчалик эмас. Нега ғафлатда қолдиларинг?

– Мен Хонгирейнинг ўрнини Маматбей эгаллаши-ни кутувдим. Ҳамма режаларим шунга мосланган эди. Ахир бу ҳайвонга нисбатан Хонгирейга Маматбей яқинроқ эди-ку? Ўғрилар оламида ҳам обрўйи бор эди. Кавказликлар нега бу ўлимтикка йўл бериб кўйиши, тушунолмадим. Сен унинг тахтга ўтирганини эшит-ганмидинг?

– Ҳа. Менга қўнғироқ қилувди.

– Осмондан келдими? Қўрқитдими?

– Йўқ... Довдир-совдир гапларни айтди.

– Бу ёмон... жуда ёмон бўлибди. Сергакрок бўлиб юр.

– Ҳаммамизга уруш очганими бу?

– Йўқ... Мен билан тинч-тотув яшамоқчи. Сулҳ таклиф қилди. Лекин бу таклифи ўлим хабари билан тенг. Бек, Илико билан тез боғлан, сени химоя килсин.

– Маслаҳатинг учун раҳмат. Иликонинг ўзига яра-ша ташвишлари бор. Мен ўзимни ўзим химоя кила

оламан. Сен унга ортиқча баҳо бериб юборяпсан. Ўликхонадан чиққан одам охири ўликхонада ириб-чирийди.

— Яхши гап айтдинг. Лекин бу ҳозирча сенинг орзунинг, халос. Хонгирей аblaҳ бўлгани билан ақдли эди. Бу маҳлукда зифирча ҳам ақл йўқ. Ақлли душманни енгиш осон, буни ўзинг биласан, Бек.

Шундай деб, Балабуха хайрлашди. Асадбек гўшакни жойига қўйиб ўйга толди. Кейин бир қарорга келиб, болохона томон юрди. Зина ёнида турган йигит хожасига пешвоз чиқиб, икки-уч қадам ташлади. Асадбек машинага яқинлашганида «үй кийимида бир ёқка бормоқчимилар?» деб ажабланиб қараб қолди. Асадбек эшикни ўзи очиб унга: «Ўтирмайсанми?! Нимага лалляясан?!» деб тўнғиллади. Йигит шошилганича ҳайдовчи ўрнига ўтирди. Бу орада болохонадаги иккинчи йигит чаккон тушиб, дарвозани очди.

— Қизимникига ҳайда, — деди Асадбек катта кўчага чиқишигач.

Зайнабнинг кўчасига бурилгач, дарвоза яқинидаги таниш машинани кўриб, кўнгли сал тинчиди. Шундай бўлса ҳам, «Чироқни ўчир, ўша машинага овоз чиқармай тақаб бор», деб буюрди. Машина тўхтагач, йигитга «сен ўтиравер», деган ишорани қилиб, аста тушди. Пойлоқчи йигитларнинг иккови ҳам ухлаб ўтирган эди. Асадбек ҳайдовчи томондаги эшикни шашт билан очди. Эшикка суяниб ухлаётган йигит ўзини тута олмай оға бошлади. Кўзларини очишга ҳам улгурмай, зарб билан ёпилаётган эшик бошига урилиб ҳушини йўқотди. Ўн томондаги йигит уйғониб, қарши хужумга шайланди-ю, уй кийимидағи хожасини кўриб, кўзларини катта-катта очганича тўхтаб қолди. Асадбек эса унга яқинласиб, қорнига тепди. Кейин Элчиннинг дарвозаси томон юрди. Тутқични ушлаб тортди, берклигига ишонч ҳосил қилгач, изига кайтди.

– Бу ёкка туш, Жамшид аканг келгунича қимирламай турасан.

Йигит тушгач, ўзи ҳайдовчи ўрнига ўтирди.

Дарвозани очиб, Асадбекни кузатиб қолган йигит ўша захоти қўнғироқ қилиб, хожасининг бирданига нимадандир ташвишланиб, сирли равишда шошиб қолганини Жамшидга етказиб улгурган эди.

Эрининг шошилиб чиқиб кетганидан ташвишга тушган Манзура айвонда унинг қайтишига кўз тикиб турган эди. Асадбекнинг машина хайдаб кирганини кўргач, хавотири баттар ошиб унга пешваз чиқди:

– Тинчликми, адаси?

– Тинчлик... кечқурунги шаҳарнинг чиройини кўргим келиб қолди. Сени овлолсам бўлар экан... Кўчада биронта ҳам одамбашара хотин кўринмади...

Асадбек хотинини ташвишдан кутқариш учун пи-чинг аралаш ҳазил қилган эди. Бирок, ўзининг хавотирини овози ошкор килиб қўйди. Манзура буни сезса ҳам, дардини ичига ютиб, эрининг ҳазилига ишонгандай бўлди.

– Илоҳим тинчлик бўлсин, бизга қасд қилганлар паст бўлсин, – деб пичирлаганича, уйга кирди.

Дам ўтмай Жамшид етиб келди. «Тинчликми, Бек ака?» дейишга ҳам улгурмай, хожасининг ғазаб ўқларига дуч бўлди:

– Зайнабнинг кўчасига қанака хунасаларни қўйгансан?!

Хожасидан «нима бўлди?» деб сўраш ортиқчалигини билган Жамшид бош эгганича жим тураверди. Асадбек сўка-сўка хуморидан чиқиб, ғазаби бир оз бо-силгач, амр оҳангига ўтди:

– Йўқот, икковиниям! Думларини тугиб юбор! Тузукроқ йигитларинг борми, ё ҳаммаси шунақа мөровми?!

Асадбек гапни кўпайтирмай, бурилди-да, уй томон юрди. Ҳеч нарсага тушунмаган Жамшид Зайнабнинг кўчасига боргач, воқеадан огоҳ бўлди-да, хожасидан

эшитган сўкишлари ҳакига пойлокчи йигитларни бир-икки тепиб, «думларини тугиб» юбора колди.

Жамшиднинг ҳовлида эканини билса ҳам, Асадбек уни нонуштага таклиф қилмади. Нонуштадан кейин кийиниб, ҳовлига чикқанида «Буйруғимни ба-жардингми?» деб ҳам сўрамади. Хожасининг уюлган қовоқларига қараб олган Жамшид мутелик билан:

– Ҳаммаси жойида, Элчин акамдан хабар олдим, яхшилар, – деди.

Зайнабнинг номини тилга олишдан чўчиди. Айтмаса ҳам Асадбек тушунди. Аммо аъёнининг хизматига баҳо бермади, индамай юриб бориб, машинага ўтирди. Шаҳар марказига боргунларига қадар ҳам гапирмади. Балабуханинг кўнғироқ қилганини, хавотири сабабини айтиб ўтирмади. Факат манзилга етиб боргандарида:

– Ҳозир лаллайиб, ғафлатда яшайдиган замон эмас. Лаллайган одамни ажалнинг ўқи кутиб турибди, шунга қараб фикр қил, – деб кўйди.

Кароргоҳи жойлашган уч қаватли бино яқинида турган Ҳалимжонга кўзи тушиб, «сен чақиртирдингми?» деган маънода Жамшидга қаради. Жамшид «хабарим йўқ», деган маънода елка қисди. Ҳалимжон улар томон икки қадам ташлади-ю, Асадбекнинг зинага қараб бурилганини кўриб, тўхтади.

Ичкари кирган Асадбек пешвоз чиқиб кутиб олишга кечиккани учун довдираб қолган Қорақошнинг саломига алик олмай, сўради:

- Ташқарида турган одамни танийсанми?
- Сал-пал...
- Қанчадан бери кутяпти?
- Анчадан бери?
- «Анча» деганинг қанча? Ун йилми ё юз йилдан берими?
- Бек ака... соат саккизда қараганимда турувди, демак... олдинроқ келган.
- Шунақами? Ақлингга қойилман! – Асадбек шун-

дай дегач, ўгирилиб, пичинг ўқини энди Жамшид-га қаратди: – Эла-эла қилиб роса ақлиларни түп-лагансан-а? Чақир уни.

Жамшид норози қиёфада имлаши билан Қорақош тезгина чиқиб, Ҳалимжонни бошлаб кирди.

Асадбек Ҳалимжоннинг саломига ҳам алик олмади.

- Нега турувдинг, менда гапинг борми?
- «Дам олгин», девдингиз, дам олиб бўлдим. Хизматга келувдим.

– Хизматгами? – Асадбек унга ўткир нигоҳини қадади. Бундай қарашга кўпчилик чидай олмас эди. Ҳатто айбсиз одам ҳам кўзларини олиб қочарди. Ҳалимжон эса «тўйиб-тўйиб тикилиб олинг», дегандай парвосиз тураверди.

«Бу безбет ким ўзи? – деб ўйлади Асадбек. – Милисанинг одами эканига далилим оз, менга содиклигига эса шубҳам кўпроқ. Фош бўлганини ўзи сезмайдими? Шунчалар бефаҳмми?»

Асадбек стол тортмасини очиб, кўлига карта олди. Ҳалимжонга тикилганича, киприк коқмаган ҳолда чийлади. Ўтиришга таклиф этмай, «берирок кел», деб чақирди. Ҳалимжон столга яқинлашгач:

- Сенам эркаксан, ҳеч бўлмаса «йигирма бир»ни биларсан? – деб сўради.
- Биламан, – деди Ҳалимжон, ишонч билан.
- Билсанг яхши... уч қўл мен ўйнайман, уч қўл сен ташлайсан.

Асадбек шундай деб у томон битта картани очиб ташлади. Кейин ўзиникини ҳам очди. Сўнг Ҳалимжонга яна бир картани очди. Ўйин шу тарзда очик бўлди. Ҳалимжонга икки ўнлик, Асадбекка эса уч еттилик чиқди.

– Буни қиморбозлар «очко» дейишади, Худодан ҳамиша шу «очко»ни тилашади, – Асадбек шундай деб картани қайта чийлаб, яна очиқласига ташлади. Бу сафар ҳам Ҳалимжонга икки ўнлик чиқди. Асадбекка

эса икки олти-ю бир тўққиз чиқди. Ҳалимжон индамай кузатиб тураверди. Асадбек картага қарамас, кўзлари йигитда, бармоқлари эса ўзи билган ҳаракатлар билан банд эди. Эндинида Ҳалимжонга яна икки ўнлик, Асадбекка эса икки еттилик билан бир олтилик чиқди.

– Бунисини «банкирнинг очкоси» дейишади. Кўрдингми, укахон, мен «туз»сиз ўйнадим. Майда карталар билан ютдим. Энг муҳими – очикчасига ўйнадим. Энди сен тарқат. Беркитиб ўйнайвер.

Ҳалимжон картани олиб, ишончсизлик билан чийлаб тарқатди. У Асадбекнинг мақсадини билолмай гаранг эди. Уч марта тарқатиб, уччаласида ҳам ютқизди. Асадбек картани олиб, хона бурчагидаги елим тўрчелакка ташлади.

– Унақасига ҳам, бунақасига ҳам ютқиздинг. Кўнга нима тикилган эди, билармидинг? Жонинг тикилган эди. Мен сенга «жонингни тик», демаганман. Маҳмуд аканг биринчи марта шу хонага бошлаб кирганида ўзинг тиккан эдинг, эсингдами? Энди нима бўлади?

– Нима бўларди? Жоним сизнинг қўлингизда, – деди Ҳалимжон хотиржам равища.

– Жонинг менинг қўлимда эмас... Бу бармоқлар карта чийлашга уста эди... кекирдакни узиб оладиган бармоқлар бошқа. Ҳайдар аканг сени аллақачонок фош қилиб, жонингни бу акахонингга топшириб қўйган. Мен милиса билан нари-бери бўлишни истамайман, шунинг учун «дамингни олавер», деган эдим, яна нега оёғим остида ўралашиб колдинг?

– Ҳайдар акам адашганлар, хоин эмасман.

– Хоинмисан ё йўқми, билмайман-у, лекин жуда безбет экансан. Мен ҳакимда хўжайинларингга етарли маълумот бермаганинг учун яна келдингми? Олдин нима топдинг-у, энди кайси тирнокнинг ичидан яна қанақа кир изламоқчисан? Кўй, ука, жонингни ўзингга совға қилганимга «раҳмат» демасанг ҳам, яшаб юравер. Фош бўлганинг учун хўжайинларинг бошингни силашмайди, биламан, сенга ҳам қийин. Орден олол-

майсан, погонингдаги юлдузлар ҳам кўпаймайди, лекин бу фожиа эмас, буларсиз ҳам яшаш мумкин. Қани, яшаб кўр-чи, бу ёғи бир гап бўлар...

«Изо заҳара ал-ҳаққу лам ябқа мааҳу ғайруху» – ҳакиқат равшан бўлган вактда бошқа нарсаларга ўрин колмайди, дейилганидек, энди ортиқча гапга ҳожат йўқ эди. Асадбек шундай деб «чиқариб ташла бу ахлатни», дегандай Жамшидга имлади. Ҳалимжон эътироз билдиримоқчи эди, Жамшид уни елкасидан ушлаб, ташқарига бошлади.

Жамшид «сургун»дан қайтгач, Асадбекнинг амири билан улардан «нарироқ юрган» кезлари Кесакполвон уйига келган, «сени ўлимдан мен асраб қолдим» деган маънода бир-икки гап қилиб, Ҳалимжонни кузатиб юришни топширган эди. Ҳалимжонни кузатиб чиқаётган Жамшид кичик хожасининг «Илон бўлиб кўйнига кириб ол, «чақ!» дейишим билан чақиб ўлдирасан», деган буйруғини эслади. Ўшанда Кесакполвон бир ўқ билан икки қуённи уришни мўлжаллаган эди. Бири шуки, Жамшид топшириқни бажаргудай бўлса, Ҳалимжон йўкотилади. Лалайса, эплай олмаса, ўзи гумдон бўлади. Ҳар икки ҳолатда ҳам ютуқ Кесакполвонда кетиши керак эди. Бироқ, нияти амалга ошмай, ютуқ бу икки йигитда қолди: Жамшидга «чак» дейишга улгурмай кетди. Жамшид бу одамнинг кўйнига илон бўлиб киришга астойдил уринмади, унинг ўзи ўзини фош қилиб қўйди. Хоиннинг жазоси аниқ бўлгани ҳолда унга марҳамат эшиклиарининг очилиши Жамшид учун сир эди. Хожасининг нима сабабдан арқонни узун ташлаганига ақли етмагани учун ҳам Ҳалимжонга қўполлик қилмай, яхшилик билан кузатиб қўйди.

бой бермади. «Болаларни топларинг-у, қиморбозларга тегмаларинг», дейилиши унга ёқмади. Гуноҳкорларни жазолашни хуш кўрадиган йигит вазифанинг бу тарзда қўйилишини нотўғри деб билди. Қиморга уй, машина, хотин ёки сингилнинг тикилиши унга янгилик эмас. Болаларнинг тикилишини ҳам эшитган, лекин бунаقا ҳодисага юзма-юз дуч келмаган эди. «Фалончи пистончини бола-чақаси билан ютиб олибди» деган гапни эшитганда ғазабдан бир ютиниб олган. Болаларини тиккан одамни ҳам, ютганни ҳам аёвсиз калтаклаги-си келган. Лекин қачондир шундайларни жазолаши мумкин ҳолатида ҳатто черта олмаслиги хаёлига ҳам келмаган эди. Жазолашдан лаззат олувчи одамнинг барча имкониятлари бўла туриб, тийилишга мажбури-лиги ўзини ўзи оғир жазога мубтало қилмокликдир. Жамшиднинг қатъий топшириғидан сўнг Ахтам ўзини шу жазога учраганини ҳис қилди. Лекин ҳукм ҳамиша ижро этилавермагани каби, топширикни ба-жармаслиги мумкинлигини ҳам биларди. Бек акаси, таги қиморбоз бўлгани учун, қиморбозларни аяган. Лекин болалик баҳтидан бебаҳра улғайган йигит бо-лалик баҳтини топтаганларни аяши мумкин эмас эди. Жамшид буни сездими, барча харакатларга Тарзан-нинг бош эканини таъкидлади. Бу таъкид ҳам Ахтамга ёқмади, қошларини чимириб:

— Хотиржам бўлинг, акахон, мен Тарзанга кул бўлиб яшаш учун дунёга келганман. Унинг чизган чизиғидан чиқкан куним — ўлган куним, — деди пи-чинг билан.

Жамшид унинг пичингини тушунса-да, жиддийлик билан танбеҳ берди:

— Озгина адашдинг. Чизиқни Тарзан эмас, Бек акам чизадилар. Бек акамнинг чизиғидан ким чикса, асфа-ласофилинга жўнайверади.

— Буни биламиз, — деди Ахтам. — Шахсан мен «асфаласофилин» деган курортга яқин орада жўна-майман.

Жамшид кеттгач, йўл ҳозирлигини кўраётганларида
Ахтам Тарзанни огоҳлантириди:

— Марик, сен мендан ақллироқсан, лекин қимор-
бозларни топганимизда, менга кўпам ақл ўргатма.
Бир ҳайвонсифат одам тошга қоқилиб ўлиб қолса, айб
биздамас-ку, тўғрими?

Ахтам Марленга «Тарзан» деб лақаб қўйган бўлса
ҳам, баъзи-баъзида ўзининг ундан устунроқ экани-
ни таъкидлаш учун ўсмирлик кезлари гаровга олин-
ган кунни эслатиш мақсадида «Марик» деб мурожа-
ат киларди. Тарзан бунга кўнишиб колган эди. Ҳозир
ҳам Жамшиднинг «Тарзан бу ишда бошлиқ» деган
топшириғи Ахтам томонидан бекор қилинганини анг-
лади. «Бек акамнинг топшириғи билан ҳазиллашма»,
демокчи бўлди-ю, «аввал уларни топайлик-чи, вазият-
га қараб иш тутарман», деган фикрда, «маъқул» ишпо-
расини қилиб, шеригини тинчлантириди.

Улар қишлоққа етиб боришганда Фазлия кечаги
бозорда сотган молларнинг пулини тарқата бошлаган
эди. «Жаноза куни қарздан воз кечганмиз», деганларга
ҳам пулни қайтариб, кўнгли анча равшанлашди.

Эри ўлимидан олдин «Шункорбойваччадан йигир-
ма беш сўм олдим, тўлаб қўй», деган эди. Фазлия би-
ринчи бўлиб шу одамга учраб, пулни узатди. Орадан
йиллар ўтган бўлса-да, Шунқорбойвачча қарзни унут-
маган экан. «Аслида шу йигирма беш сўмга муҳтоҷ
эмасман-у, лекин Қиёматгача қарздан қийналиб,
гўрида азобланмаслиги учун оляпман», деди. «Охират
учун шу қарздан кечдим», демади.

Фазлия қайноғасидан қарз олинганини биларди,
лекин эрининг «қарздан кутулганман», дегани ҳам
ёдида эди. Орада қарз борми ё йўқми, бор бўлса, жано-
зада қайноғаси кечганми ё йўқми – буни аниқ билмас-
ди. Шунга қарамай, пулни олиб қайноғасиникига бор-
ди. Қайноғаси кеча бозордан қайтган буқасини ҳовли
ўртасидаги ўрик дараҳтига боғлаб қўйиб қассобга
мақтаётган экан. Уни кўриб, саломига бош ирғаб алик

олган бўлди-ю, савдосини давом эттирди. Фазлия «бирор кимса кутиб олармикин» деган умидда атрофга бокди, кейин «овсиним уйда йўқ шекилли», деб ўйлаб, айвон зинасига бориб ўтириб, қайноғасининг бўшашини кутди. Бири молни мақтаб, иккинчиси ерга уравериб, охири савдо жанжалга айланди. Бир қишлоқда туғилиб, бирга яшовчи икки одам озгина фойда илинжида бир-бирини ҳақоратлашдан қайтмади. Бир-бирларини ҳақоратлаш билан тийила қолишиша кошки эди, ўлиб кетган оналари-ю, катта зналари ҳам тилга олингач, мушт ишга тушай деганда, Фазлия ўрнидан туриб, уларни ажратди.

Қассоб чиқиб кеттанидан кейин ҳам қайноғаси сўкишдан тўхтамади. Ўзининг адолатли, яхши инсон эканини шу сўкишлар оркали исбот этгандай бўлиб тинчида-да, чукур хўрсишиб:

– Бола-чақа бокиш шунака қийин бўлиб қолган, – деди. – Талашсам, болаларимнинг ризки учун талашман, бу текинтомок мендан юлиб олмоқчи бўлади.

«Бола-чақа бокиш шунака қийин»...

Қайноғаси бу гапи билан «қарзларингни қачон тўлайсанлар?» демокчи бўлдими ё қариндошлар етимларни олиб кетишаётганида ўзини четга тортганини шу қийинчилик билан окламоқчи эдими, Фазлия англамади. Бу гапни мулоҳаза қилишни ҳам истамай, муддаога кўчди:

– Дадамиз сиздан қарз олганмидилар?
– Минг марта олган, нима билмасмидингиз?
– Мингтасидан хабарим йўқ, биттасини билардим, олиб келдим.

Қайноғаси «Қаердан олдингиз? Қамокда пул берарканми?» дегандай ажабланиб қараб қолди.

«Шунча фожиадан кейин ҳам қарзни эсладингизми, келин? У қарзлар унутилиб кетган, энди болаларингизни, ўзингизни йўланг!»

Фазлия қайноғасидан бундай олижаноблик кутмаган эди, бундай ҳиммат юз очмагани учун ажаблан-

мади ҳам. Молини сотолмагани учун аламдан титраб турган қайноға күзлари энди шодликдан чақнади:

– Ҳа, Худога шукур, пулдан қийналиб турувдик, ўзи етказди, – деб қўл чўзди.

Фазлия пул ўрамини берди:

– Санаб кўринг, тўғримикин?

Қайноғаси бармоғини тез-тез лабига теккизиб, хўллаб, пулларни эринмай санади.

– Охиргиси шунча эди, олдингилари эсимда йўқ, – деди, кўнгилхушлик билан.

– Эсингизга тушса, айтарсиз, кочиб кетганим йўқ...

Фазлия шундай деб изига қайтди. Уйига яқинлашганда омонат эшик олдида нотаниш икки йигит турганини кўриб, юрагига хавотир оралади. Қадамини секинлатди.

«Болаларимни ўғирлаганлар шулар!»

Хаёлига урилган дастлабки фикр шу бўлди.

«Одамларни ёрдамга чакираими ё тўппа-тўғри бориб башарасини юлайми?»

Бир қарорга келолмай атрофга нажот излаб бокди. Нажот кўринмади. Йигитлардан бирининг у томон жилмайиб қараб турганини кўриб «улар эмасдир», деб ўйлади. Шунга карамай, ҳам кўркув, ҳам нафрат исканжасида битта-битта қадам босиб уларга яқинлашди. Жилмайиб турган йигит – Тарзан унинг холатини сезди:

– Кўрқмай келаверинг опажон, сизни кутиб турибмиз, – деди мулойимлик билан.

– Кимсиз, нега мени кутасиз? – деди Фазлия. Унинг сал титраган овози хавотирини ошкор қилди.

– «Қутулганлар жамияти»данмиз, – деди иккинчи йигит – Ахтам, унга тикилиб.

Жамиятнинг номи Фазлияни ажаблантириди:

– Қанақа жамият? Нимадан кутулади?

– Нимадан кутуларди, камоқдан кутулади-да! Эшитмаганмисиз?

Фазлия жавоб қайтаришга улгурмай, жилмайиб турган йигит мулойимлик билан тушунтириди:

– Яқинда шунақа жамият тузилган. Баъзилар камоқдан чикиб, кўчада сарсон-саргардон бўлиб юради, баъзилар тирикчиликка қийналади. Бу жамият шунакаларга ёрдам беради.

Фазлия бу гапга бир ишониб, бир ишонмай, йигитларга қараб олиб:

– Менга ёрдам керакмас, – деди.

– Эшийтдик, ҳатто эрингизнинг қарзларини тўлаётган эмишсиз, – деди Ахтам киноя оҳангидা.

– Кимдан эшийтдингиз?

– Қишлоқда девор йўқ-ку, кичкина янгилик ҳам у тешик қулоқдан бу тешик қулоқка бир зумда етиб боради. Узоқдан келганмиз, бир пиёладан совук чой берсангиз, савобга колардингиз, – деди Тарзан.

Фазлияниң хаёлига «эркаги йўқ уйга сизларни таклиф қила олмайман», деган гап келмади. Чунки қишлоқда бунақа одат йўқ, уйда эр борми ё йўқми, бошка одам кириб келаверарди. Шу боис Фазлия чақирилмаган меҳмонларни итоат билан ичкарига бошлади. Мулойим йигитдан ҳадиксирамади-ю, аммо кўзларини чақчайтирганидан сал қўрқди. Меҳмонлар айвонда қолишмай, ичкари уйга кириб келаверишди. Кўзи чақчайгани қўлларини белига кўйганича уйга разм солиб олгач, кутилмагандан:

– Эрингизни ўлдириб тўғри қилган экансиз, – деди.

Фазлияниң кўнглини кўтаришни истаганларнинг кўпи шундай дерди. Бирок, бегона йигитнинг тўсатдан бундай хукм чиқариши уни довдиратиб кўйди.

– Унака деманг... Бунақа дейишга ҳаққингиз йўқ! Нима тўғрилигини Худонинг ўзи билади! – деди титрок овозда.

– Худодан хабарим йўқ, лекин мен аниқ биламан: эрингиз майда, ҳатто пачоқ қиморбоз бўлган

экан. Унинг майдалигини уйингиз айтиб турибди. Зўр қиморбозлардан бўлиб, боласини тикса кечириш мумкин эди. Сариқ чакани деб боласини тикадиганларни шартта ўлдирвориш керак.

Бу гапдан титроққа тушиб, ҳатто муштини туккан Фазлия мулойим йигитга қараб, баланд овозда:

– Ким бу?! Нега бунақа безбетлик қилади? – деди.

– Бу оғайнимиз сал бефаросатроқ, опажон, парво қилманг.

– Тўхта, Марик, сен гапни айлантираверма. Опажонинг билан мен гаплашиб олай: «Кутулганлар жамияти»га ишондингиизми? Аҳмоқ экансиз! Ким тузади бунақа жамиятни! Қамоқдан чиқсан одам ўладими ё қоладими, кимнинг иши бор? Мана, сиз олижаноблик қилиб эрингизнинг карзларини тўлаб юрган экансиз. Эрингиз биздан ҳам қарздор эди. Бизникини ҳам тўлаб кўйинг. Аввал сизни тиккан эди. Марик, эсингдами? «Бу ландавурнинг хотинини бошимга ураманми, хотини ҳам ўзига ўхшаган қуртлаган туршакдир», дегандим. Янглишмаган эканманми?

Ҳар кандай аёл, шодлик чоғидами ё дунё кўзига коронғу кўринадиган қайғули дақиқаларидами, чиройи ва шаънига доғ туширувчи сўзни эшитса, ҳамма нарсани унутади. Фазлия алҳол «ириган қоки»га ўхшатилгач, аввалги ғазабини унуди:

– Турқинг курсин сенинг, ўзинг қанақа туршаксан?!

– Мен ўтган замондаги гапни эсладим. Сизни ютиб олганимда бошимга урармидим, мана вақти келди, пулни оламан.

– Балони оласан! Танимайман сени!

– «Эримнинг қарзларини тўлайман», деган хотин охиригача мард бўлиши керак.

Фазлия хонтахта устида турган чойнакни олиб отмоқчи эди, мулойим йигит чаққонлик қилиб, кўлини ушлаб қолди-да, кейин шеригига «чиқиб тур», деган ишора қилди.

Фазлия дарров ўзига кела олмади. Мулойим йигит чойнакдан чой қуйиб, узатди. Фазлия титроқ қули билан пиёлани ушлаганича жим тураверди.

— Оғайним, сал оширворди, сизни синамоқчи бўлди. Аслида эрингизнинг қарзи йўқ. Уни кўрмаганмиз. Болаларингизни қидиришини сўраган экансиз, шунга келдик.

Бу гапни эшитиб, Фазлия қувониш ўрнига негадир чўчили, кўлидаги пиёлани тушириб юборди.

— Олдинги гапларимизда ёлғон бор эди, хозиргиси рост. Саволларимни эшитиб, шошилмай жавоб беринг, баъзи нарсаларни аниқ эслашга ҳаракат қилинг. Эрингиз кимор ўйнагани кетганда узоғи билан неча кунга кетарди? Қайси жойларга борганини айтармиди? Биронта қиморбознинг номини тилга олармиди? Айниқса, охирги ўйиндан кейин бирорни тилга олганимиди?

Расмий тергов тарзида бошланган савол-жавоб узоқ давом этмади. Аввалига ишонкирамай жавоб бера бошлаган Фазлияди, шу киска муддат давомида болаларининг топилишига умид уйғонди.

Умиднинг уйғониши кийин эмас, унинг хайрли оқибатига етмоқ мушкул. Фазлия буни билади. Умиди куладиган кунга қадар сабр қилиши зарурлигини ҳам англайди. Ўша фожия кунидан бери сабр ўтида куйяпти. Фарзандларининг дийдорига тўйиш учун, уларнинг кулгиларини эшитиш учун яна шунча, эҳтимол унданда кўпроқ куйишга тайёр. Аммо кўп катори у бир ҳикматдан бехабар: «Ал-иймону нисфони-нисфуху сабрун ва нисфуху шукрун» – «иймон икки бўлимдан иборат: ярми сабрdir, ярми шукр» шарафли ҳадиси унинг кулоғига етмаган. Алҳол бирон илм згаси келиб айтган тақдирда ҳам англаши кийин бўларди. Сабр лозимлигидан хабари бор, бунга амал қиласи, чунки бундан ўзга чораси йўқ. Лекин нима учун шукр қилиши керак? Иймони заифларга бу муаммони англатиш осон эмас.

Остонада колган Фазлия, уйдан узоклашаётган икки йигит зоҳирان икки олам бўлиб кўрингани билан иймон заифлиги томонидан уларда яқинлик мавжуд эди. Фақат бу аёл сабрни бўйнига олган, икки йигит, айникса Ахтам эса бундан бебахра. Шукр бўйича эса хар иккала томон бир йўлда эди. Тарзанга, айникса Ахтамга бирор «шукур қил» демаган, дегандами... бу дунёнинг имтиҳон дунёси эканидан бехабар йигитлардан қандай жавоб эшитиши маълум...

Тарзан Жамшиддан вазифани олган пайтдаёқ, Ахтамнинг таъбири билан айтганда, «бош оғриқ» ишга рўпара қилинганини фаҳмлаган эди. Фазлиянинг мавхум жавобларидан кейин топшириқнинг накадар мушкуллигини тўларок англади. Жамшид дастлабки учрашувда хожасининг улар билан қизиқаётганини билдира туриб, «Бек акам «нимага?» деган саволни ёқтирмайдилар, «хўп бўлади»ни яхши кўрадилар», деб огоҳлантирмаганида «бу болаларни топиш нима учун шарт экан?» деб сўраган бўларди. Сабаб айтилмадими, демак, сўрашнинг ҳам ҳожати йўқ.

Сабабни аниқ билишининг Ахтам учун ҳам ҳожати йўқ. Унга гуноҳкорни, балки гуноҳкорларни топиб боплаб жазосини бериш мухимрок. У шундан лаззат олар экан, Жамшидинг тақиқи ҳам мухим эмас. Эгасиз ҳовлининг аянчли аҳволини кузатиб, ғаши келаётган Ахтам гуноҳкор топилгач, шу ерга олиб келиб жазолашни кўнглига тугиб қўйди.

«Шу айвоннинг остонасига кўмиб қўяман, – деб ўйлади у. – Бу хотин ҳам, болалари ҳам унинг ўлиги устидан неча минг марта ўтади. Бир кунмас бир кун келиб, «сенларни балогардон қилган аглаҳ оёкларинг остида ётибди», десам канака аҳволга тушишаркин?»

Бу фикр оз фурсатда умрини яшаб тутатди: «Йўқ, – деб ўзини ўзи инкор этди, – яширин ўлдириб, билдиримай кўмиб қўйишнинг нима фойдаси бор? Бунака аглаҳлик жазосиз қолмаслигини ҳамма билиб қўйиши

шарт! Милиса оғайниларимиз ҳам идораларида пашша қўриб ўтиrmай, бир ахлат титкилашсин...»

Аллоҳ таоло Ўзининг элчисига «Ё Довуду, инно жаъалнока халифатан фил-арзи, фахкум байнан-носи бил-ҳакки», – «Эй Довуд, Биз сени Ер юзига халифа килдик, энди сен одамлар орасида ҳақ билан ҳукм юрит», деб марҳамат қилган, аммо Ахтамга ҳеч ким бирор устидан ҳукм юритиш ҳуқуқини бермаганди. Худди Асадбек каби Ахтам ҳам бу ҳуқукни ўзига ўзи берган ва буни дунёдаги энг адолатли ҳолат деб ҳисоблар эди. Ҳақ билан ҳукм юритишни билмайдиган, ҳатто тасаввур қилолмайдиган одамдан нималарни кутиш мумкин?

Тарзан ҳовлига чиқиб, кўча томон юрди. Ахтам уй остонасида тўхтаган Фазлияга қараб олиб, шеригига сўзсиз эргашди. Машинани бир кўча наридаги қайраоч соясига қўйган эдилар. Фазлияни кутиб, суҳбатлашиб қайтгунларича куёш тик келиб, офтобда колган машина қизиб кетган эди.

– Бу хотин билан гаплашишнинг фойдаси йўқ, демаганмидим? – деди Тарзан эшик ойнагини тушираётib. – Куруқ кириб, куруқ чиқдингми?

– Унчалик эмас, – деди Ахтам.

– Нималарни билдинг?

– Сенинг гапинг тўғрилигини тушундим: бу хотиннинг эри ростданам пачок қиморбоз бўлган. Бу атрофда тикилган болаларни ютиб оладиган тузукрок қиморбоз бўлмаса керак. Бунақа қилиқ, катта шаҳарларда, катта ўйинларда бўлади. У «пачоқ» қайси шаҳарга борган бўлиши мумкин?

– Бунақалар шаҳарга боришни орзу қилиши мумкин-у... йўқ, юраги дов бермайди. Балки... шаҳарда тепки еганлардан биронтаси бу томонларга келиб, лақмаларни шилиб кетган бўлса-чи?

– «Балки» билан ош пишириб бўлмайди. Биз тезроқ топиб, ишни тезроқ юмалоқ-ёстиқ килишимиз керак.

— Ана, энди ўзингга келдинг, эркак! — Ахтам шундай деб Тарзани туртиб кўйди. — Бек акамизнинг топширикларини коқ иккига бўламиш: сен топасан, мен юмалоқ-ёстиқ қиласан!

Узининг гапи ўзига хуш ёқиб, Ахтам роҳатланиб кулди. Тарзан эса ўзини масхараланган ҳис этиб, пешонасини тириштириди-ю, лекин қарши гап айтмади.

— Сариқум деган шаҳарчани эшитганмисан? — деди йўлдан кўз узмай.

— Эрталаб ўтиб келдик шекилли?

— Ҳа. Охирги ўйин ўша жойда бўлган экан. Шоди шилта деганини топсак, болаларнинг изига тушармиз.

Шаҳарчага кираверишдаги биринчи самоворхонадаёқ Шоди шилтанинг уйи қаерда эканини айтиб беришди. Самоворчи «Шоди аканинг уйи қаерда?» деган саволни эшлитиб, йигитларга бошдан-оёқ синовчан назар солди-да:

— Бу атрофда Шодивойлардан учтаси бор, қай бири керак? — деб сўради.

— «Шоди шилта»си, — деди Ахтам қўпол оҳангда.

Самоворчи «ўзинг ҳам шилталарданмисан?» дегандай унга қайта разм солди-да:

— У сизга нима учун керак бўлиб қолди? — деб сўради.

— Биз хукумат идорасиданмиз. Шоди ака тўрт йил олдин уч етимни боқиб олган эканлар. Шу болаларнинг аҳволидан хабар олгани келдик, — деди Ахтам.

— Шилта етим боқиб олган эканми?

Самоворчи шундай деб «кимни лақиллатяпсан?» дегандай бош чайқади. «Агар хукумат одами бўлсаларинг ижроқўмга бормай, самоворхонадан суриштирасанларми?» деб маломат қилиб ўтирмай, учинчи кўчадан чапга бурилиш кераклигини айтиш билан чекланди.

Пастки қисми чириб, қийшайиб колган дарвозага караб Ахтам:

— Бунинг ҳам пачоклардан экан-ку? — деб түн-ғиллаб қўйди-да дарвозани тақиллатди.

Йигирма ёшлардаги нимжон йигит чиқиб, нотаниш одамларга қараганича жим қолди. Бу хонадонга нотаниш кишилар кўп келиб, айримлари зулм ўтказиб, кўркитиб қўйганлигини Тарзан йигитнинг жавдираган кўзларига қараб сезди.

— Соқовмисан? — деди Ахтам унга яқинлашиб.

— Йў-ўқ, — деди йигит довдираб.

— Аданг саломлашишини ўргатмаганми? — деди тик қараб.

Йигит бундан саросимага тушиб, тисарилди:

— Сизга ким керак?

— Шоди ака уйдамилар? — деди Тарзан. У муло-йимлиги билан йигитни саросимадан куткармоқчи эди, Ахтам бунга йўл қўймади:

— Оғайнилари «Шоди шилта», дейишади, тўғрими?

Йигит Ахтамга кўркув билан қараб олиб, кейин Тарзандан нажот кутгандай унга тикилди. Жавобга тили айланмади.

— Шоди акадан сўрайдиган гапимиз бор, уйда бўлсалар чакириб чик.

— Йўқлар, — деди йигит титроқ овозда.

— Қаердалар? — деб сўради Тарзан.

— Ўйинга кетганми? Қачон келади? — деб қўшимча килди Ахтам.

— Йўқлар... — деди йигит яна.

— Буни тушундик, сен бизга қаердаликларини айт, — деди Тарзан.

— Адам... ўлганлар...

Ахтам билан Тарзан бир-бирига қараб олишиди. Бирининг қарашида «Бунисига нима дейсан?» деган пичингли савол, иккинчисиникида «Сен энди бир пас жим тур», деган маъно бор эди.

— Адангни Худо раҳмат қилсин, биз эшитмаган эканмиз, қачон ўтдилар? — деб сўради Тарзан.

— Икки йил бўлиб қолди.

– Аданг ўзи ўлдими ё ўлдириб кетишдими? – деди Ахтам.

Йигит бу саволдан кейин ўзини ичкари олди. Қийшиқ дарвозани ёпиб, ўзини ҳимоя қила олмади, Ахтам унинг изидан ҳовлига қадам қўйиб, билагидан тутди:

– Сен бола, биздан кўркма, жонингни сугуриб олмаймиз. Аданг каттага тушган, бу харобангни сотиб ҳам кутула олмайсан. Агар саволимизга жавоб берсанг, қарздан кечишимиз мумкин.

Тарзан уй томон қараб, дераза ортида бир аёлга кўзи тушди. Ахтамни четга суреб, йигитнинг билагини бўшатди.

– Кўркма, аканг шунаقا тўмтоқ ҳазил қиласди. Тўрт йил олдин аданг учта етим болани боқиб олган экан, улар ҳозир каерда?

– Билмайман...

– Сен эслаб кўр.

– Эсимда йўқ.

– Ҳозир эсингга тушириб қўяман! – Ахтам Тарзани нари суреб, йигитни бўғиб олди. Шу онда дераза томондан «Боламга тегманглар!» деган фарёд эшитилди. Дам ўтмай аёл югуриб келиб, Ахтамнинг билагига ёпишди.

– Боламга тегманглар! Мана, мени олиб кетинглар!

Бу ноладан кейин кутилмаган меҳмонлар бир-бирларига савол назари билан қараб колишли. Ахтам йигитни қўйиб юбориб, «энди ўзинг гаплашавер», дегандай тисарилди. Шоди шилтанинг ўз ажали билан ўлмагани, вафотидан кейин ҳам бу уйга чақирилмаган меҳмонлар келиб тургани аён бўлган эди. Ахтам тисарилгач, аёл ўғлини қалқон каби тўсиб олди.

– Кўркманг, опа, – деди Тарзан. – Сизларга тегмаймиз. Агар саволимга тўғри жавоб берсангиз, бундан кейин уйингизга бирор бостириб келмайди. Эрингиз тўрт йил аввал қиморда учта болани ютиб олганмиди?

— Йўқ, — деди аёл ютиниб. — Дадаси пул ютиб келардилар... бола ютмаганлар.

— Сиз шошилмай, ўйлаб жавоб беринг. Бир ўғил, икки қиз. Уйнгизга бошлаб келганини одамлар кўришган. Самоворхонадагилар ҳам айтишди.

Тарзан таваккал қилиб ёлғон ишлатган эди, керакли самара берди:

— Самоворхонадаги ғийбатчи ўлгурларга шундан бошқа гап қолмабдими?! Дадасидан бир танишлари илтимос қилган экан, икки ҳафта уйимизда қараб ўтиридик. Бояқишлиарни кўзлари гўрда чиригур ўша киморбоз ютган. Дадаси ўша ўйинда озгина ютқизган эканлар, «болаларга қараб турсанг, қарздан кечаман», дебди.

— Ким эди ўша танишлари?

— Шаҳарлик экан...

— Отини айтинг.

— Эсимда йўқ...

— Агар айтмасанг, ўша болаларнинг ўрнига ўғлингни олиб кетамиз!

Четроқда турган Ахтам шундай деб улар томон бир қадам босди. Бундан даҳшатга тушган аёл ўғлини кучоқлаб олди. Тарзан «бир пас жим турсанг-чи!» дегандай шеригига қовоқ уйиб қараб қўйди.

— Эсингизда бор, бизни алдаманг. Болаларнинг икки ҳафта тургани ҳам ёлғон. Болаларни олиб кетишмагунча эрингиз билан минг марта уришгансиз, ўша одамни ҳам яхши танийсиз. Эрингиз билан ичib ўтирганида захарламоқчи ҳам бўлгансиз...

Аёл эътироз билдиromoқчи бўлди-ю, гап тополмай, «буларни қаердан биласиз?» дегандай оғзини очганича қараб тураверди. Тарзан бу сафар ҳам тахминини айтган эди. Эри уйга уч нотаниш болани бошлаб келса, қайси аёл бефарқ қараб туради-ки, бу индамаса? Болаларнинг каттасини гапга солиб, фожиадан хабар топгач, эри билан талашиб-тортишгани-чи? Бу фожиага сабабчи одам уйига келганда қалбида уни

захарлаш истаги туғилгани-чи? Тұғри, арокқа ёки таомга захар солмагандир, ҳатто захар топишга уриниб ҳам күрмагандир, бирок, истаги бўлгани аниқ. Тарзан шу мантикий хулосалар асосидаги гапи билан аёлни гангитиб қўйган эди.

– «Жамолбек» дегандай бўлувдилар... – деди аёл титроқ овозда.

– Энди каерда туришини ҳам айтинг.

Аёл айтди.

– Энди сизларга ким дўк-пўписа қилаётганини ҳам айтинг, биз ваъдамизда турамиз. Бунақаларнинг танобини тортиб қўямиз.

Аёл буни ҳам айтди. Тарзан «Эрингизни ўшалар ўлдиришганми?» деб сўрамоқчи эди, кўркувдан титраётган аёл барибир тұғри жавоб бермаслигини фаҳмлаб, бошқачароқ тарзда сўради:

– Кўп ютқизган эканми?

Аёл Тарзанга жавдирағанича қараб турди-да, мужмал жавоб берди:

– Энди... қарзни секин-секин тўлаяпмиз, озгинаси қолди.

Бегоналарга яна нима деб жавоб қайтарсин у бечора! Кечаси келиб, эрини арконда бўғиб ўлдириганларини қандай айтсин?! «Ўғлингнинг жони гаровда, гинг деб оғиз очсанг – ўлади!» деганларга бу иккаласининг кучи етармикин? Танобини тортиб кўйиш ҳақидаги гапи чин эканига ишониш мумкинми? Иўқ... «Эрим қиморда кўп ютқизиб кўйган экан, иснодга чидолмай ўзини осди», деган гапида туравериши керак. Бу гапга милиса ишониб, ҳақикатни титкиламадими, демак, жим юравергани дуруст. Ўлган ўлиб кетди, тўғри гапни айтгани билан тирилиб, қайтиб келмайди...

Кўркув исканжасида титраётган аёлга иккови ҳам ачинмади.

– Кириб, ширин чой ичворинглар, титроқни босади.

Тарзан шундай деб бурилди. Ахтам «бизларни унутманглар» дегандай уларга ўқрайиб тикилди-ю, сўнг шеригига эргашиди.

– Бек акамиз қаторларига олганларида зўр-зўр ишларни қотириб ташлаймиз, деб ўйлабман мен ахмок. Майдо-чуйда шилталарни изидан юришга менинг тоқатим йўқ, – деди у машинага ўтиргач. – Жамолбек акахонингникига караб сурамизми ё шилтанинг оиласини балолардан асроймизми? Жуда катта ваъда бериб юбординг-ку?

– Ваъда бердим, демак, бажаришим шарт.

– Аҳмоқсан, бир-бирларини гўштларини еб юравермайдими? Норбой деган хунасани шилта хунаса шўрини куритибди, шилтани бошқаси, бошқасини яна бошқаси... Сен бу занжирни узиб, тинчитмоқчимисан?

– Мен ваъда бердим. Иш учун керак, – деб Тарзан гапни қиска қилди. Аёл айтган манзилни топиб боришгач, Ахтамга юзланди: – Тушиб, чақириб чик, ўша хунасани.

Бу буйрук Ахтамга малол келди:

– Чакириб чиқмайман, уйида тинчита қоламан, – деди машина эшигини очиб.

– Чакириб чиқ. «Садир киморбознинг жияни сўраяпти», десанг етарли. Ўзинг дарвоза ёнида тур, – деди Тарзан катъий оҳангда.

– Сен катта кетаверма, бола! – Ахтам жаҳл билан эшикни ёпди. Фазабланса-да, шеригининг буйруғига итоат этди. Уй эгасини илтифот билан таклиф этмай, сўкиб, туртиб олиб чиқди. Кирк ёшлардаги калиши машина томон юра туриб, икки марта орқасига ўтирилиб каради. Исми Ҳожимурод бўлган бу одамнинг сочи йигитлик давридаёк тўкилиб кетгани учун барча «Калҳожи» дейишга ўрганиб қолганини Шоди шилтанинг хотини айтган эди. Тарзан ўрнидан кимирламай, уни ғазабли нигоҳи билан қаршилади.

– Садир киморбоз деганни эшигтганмисан?

Калҳожи ўзидан анча ёш йигитнинг саломлашиш

ўрнига сенсираб гапиришидан ғаши келса-да, бир нима деб эътиroz билдиришга журъат этмади. Ичкарида Садир қиморбознинг номи тилга олинганидаёк унинг ичидан киринди ўтган эди. Гарчи фожиадан сўнг кўп йиллар ўтган, айрим тафсилотлар унутилган бўлса-да, бу атрофдагилар бечора қиморбознинг такдирини эслаб туришарди. Ахир унча-бунчага бўйин эгмайдиган қиморбознинг ким томонидан жазоланганини унутиш мумкин эканми? Ҳамонки, бу йигит хе йўқ-бе йўқ гапни Садир қиморбоздан бошлидими, демак, бу томонларга бекорга келмаган.

– Гарантисан, гапимни эшитмадингми? – деди Тарзан овозини баландлатиб.

– Эшитганман...

– Шоди шилтани ҳам эшитгансан-а?

– Ҳа.

– Сендаи қарзмиди?

– Ҳа.

– Қарзини жони билан тўлабди-ку, яна нима дейсан?

Калҳожи нажот излагандай атрофга жавдираб караб олди.

– Уни... ўлдириш ниятимиз йўқ эди. Бўйнига аркон солиб қўрқитмоқчи эдик... бўғмасимиздан олдин ўлиб қолди. Юраги чатоқ экан...

Чиндан ҳам Шоди шилтани қўрқитмоқчи эди... Бир пайтлар лақма қиморбозларнинг чўнтақларини куритишда яқин шериги бўлган одамни ўлдиришга қўли борармиди? Шерикчилик қилиб юрган йиллари икковининг ҳам ошиғи олчи эди. Пулни тақсимлашда икковининг нафси шаталоқ отди-ю, дўстлик ипла-ри шарт узила қолди. Қиморбозлар оламининг зўрларидан бўлишмаса ҳам, ризқларини териб юришиб эди. Уша охирги ўйинда Шоди шилта катта кетиб, унга рўпара келди. Иккови туни билан ташлашиб. Пул уюми дам у томон, дам бу томон суриласевиб, чўталчининг ҳамёни тўлгандан тўлди. Тонг-

отарга бориб Шоди шилта томондаги пулларнинг баракаси учиб кетди. Қарзга ботди. Калҳожи «қарзга ўйнамайман», дегач, мапинани тикиб, уни ҳам юткизди. Гал уйга келганда Шоди шилта рақибининг ғирром ҳаракатини пайқаб колди. Пайқади-ю, исбот қилиб бера олмади. Шундай бўлса-да, қарзини тўлашдан воз кечди. Ўйиннинг эртасига қарзни ундириш мақсадида кўрқитиш учун келишганди... Шоди шилтанинг ўлимидан кейин Калҳожи уч ойгача кўчага чиқмай, уйда ўтирди. У милициянинг қотилликда айблашидан эмас, ўзи мансуб бўлган оламнинг хукмидан кўркарди. Милиция нари борса, қамайди. Қиморбозлар Шоди шилта ноҳақ ўлдирилган, деган хulosага келишса, уни аяб ўтиришмайди. Орадан вақт ўтиб, тинчлана бошлагач, шилтанинг хонадонига яна борган эди. Ҳозир нотаниш йигит ҳовлисига бостириб кириб, Садир киморбознинг номини тилга олгач, шу ишидан пушаймон қилди. Машинада ўтириб сўроққа тутаётган йигит рўпарасида саросимага тушиб, ўзини окламокчи эди, «Нега талвасага тушасан? Садир киморбозни гум килишга Ҳайдар aka келгандилар, булар ким ўзи? Мишики болалар-ку?!» деган фикр уйғониб, гапни чўзмади.

Калҳожининг қисқа тушунтириши Тарзанинни кизиктирмади. У томон тупуриб, гапни қисқа қилди:

– Унинг қарзи йўқ сендан. Хотинидан олганларингни икки кун ичидагайтариб бер. Уша томонларга қадам боссанг, Садир аканг билан ачомлашиб ётасан, тушундингми?

Калҳожи «тушундим», дегандай бош иргади.

– Жўна энди, Мурдани айтиб юбор, келаверсин.

– Кимни? – деб ажабланди Калҳожи.

– Дарвозангнинг ёнида турган одамнинг оти Мурда. Сен уни яхшилаб таниб ол, балки яна учрашарсан.

Калҳожи буйруқни бажаргач, улар узоклашгунларига қадар дарвозаси ёнидан жилмади.

– Хунасанг иштонини хўл қилиб кўйди, – деб кулди Тарзан ўз ишидан мамнун бўлиб. Шеригининг бу гапи тагида «Қойил қилдимми! Мендан ўрган!» деган маъно яширганини Ахтам англаб, пешонасини тириштириди.

– У сенданам, менданам қўрқмади. Қўрккан одами бошқа, – деди беписандлик билан.

– Бек акамдан қўрқди, демоқчимисан, акахоннинг номларини тилга ҳам олмадим-ку?

– Бу ерларнинг додахўжаси аҳмок эмас. Садир қиморбозни сен гум қилганингда сендан қўрккан бўларди. Орқангда ким турганини битта гапингдан билган. Менга алам қиласидигани ҳам шу.

– Тушунмадим? Нега алам қиласиди?

– Шер ўлжа тутиб, бўғзини чайнаётганда атрофига қашкирларми, ўлаксахўрларми изғиб пайт пойлашади. Сен билан мен ҳозир ўшаларга ўхшаймиз.

– Шошилма, биз шундай шер бўлайлик-ки...

– Бир ўқирсак, дунё титраб кетадими? – деди Ахтам пичинг қилиб. Кейин ҳорғин овозда қўшиб кўйди: – Шер бўламан, десанг, аввал шерни йўкотишинг керак.

– Бунинг ҳам вакти келади. Фақат... унгача бизни «қашқир» дема, «шербачча» деганинг яхши.

– Отангга қарасам, сени «шербачча» дейишга тилим бормайди.

– Адамга осилма. Адамнинг аблажликлари бор, лекин у менинг адам!

– Дунёнинг нотўғрилиги ҳам шунда. Ўғилга отани танлаш имконияти берилганида адангта ит ҳам қарамаган бўларди.

– Яна илтимос қиласман: адамга осилаверма!

Тарзан «илтимос қиласман», дегани билан овозида қаҳрли амр оҳангি зоҳир эди. Ахтамнинг бундай китмирилиги янгилик эмас. Лекин Тарзан «илтимос қиласверади», у эса сурбетлигини кўймайди. Шеригининг ишларидан кўнгли тўлмай ғашланадиган Ахтам

шу гаплари билан хумордан чиқмок максадида фикри ни давом эттиреди:

— Менга мазза: отам йўқ. Бирор «падарингга лаънат!» деб сўкса, жаҳлим чикмайди, аксинча, кувониб, «рахмат!» дейман. Қидираётган учта итваччани топиб, «отангнинг хайвондан фарқи йўқ эди», десанг, қилган хизматингнинг мукофотига башарангга тупуришади. Шилтанинг ўғли ҳам ўлса ўлиб кетади-ки, лекин отасининг шаънига доғ туширтирмайди. Бу калнинг болалари эҳтимол, сени бўғиб ўлдиришлари мумкин. Бу масалада ўғиллар бир-бирига ўхшайди. Оталаринг-чи? Сенинг отанг ўша шилтадан яхшироқми? «Киморбознинг омади келиб, роса пул ютди» дейишади, нотўғри гап бу. Киморбоз ютмайди, пулни ҳалол меҳнати билан ишлаб топади. Адангга ўхшаганлар-чи?

— Агар бўлди қилмасанг...

— Нима, Бек акангга чақиб берасанми?

Ахтам шундай деб ҳахолаб кулди.

— Сени нега яхши кўраман, биласанми? – деди кулгидан тўхтамай. – Юз марта гап талашсак, тўқсон саккизтасида фикрларимиз бошқа-бошқа бўлиб чиқади. Агар бир одамнинг атрофига тўпланганлар унинг ҳамма гапини маъқуллайверишиша, уларни нима деб аташ керак, биласанми? Ахмоклар! Ҳа, ахмоклар! Чунки уларнинг ўз фикрлари йўқ. Мана, Бек аканг аввал сени чакирди, сени ақлли деб ўйлаган бўлса керак. Бек акангнинг бағрига киргунингча ақлли эдинг. Энди сен ҳам бошқаларга ўхшаб ахмокликни бўйнингга олдинг. Жамшид аканг нима деб ўқитди? Бек акамиз «нимага?»ни ёмон кўрадилар, «хўп бўлади»ни яхши кўрадилар. Сен бу қоидани гарданингга олганинг учун шу томонларда юрибсан. Мен ҳам ахмоқман, лекин «хўп бўлади», дейдиган ахмоклардан эмасман. Менинг ахмоклигим – «хўп бўлади»га тоқатим йўқлигига. Бек аканг бора-бора сени яхши кўриб қолади, менинг эса шўримни қуритишга уринади.

– Ўлдирворишидан кўркяпсанми?

– Менми? Сенга минг марта айтганман: ўлишдан кўркмайман. Аслида мен тирик одам эмасман, кайси бир зўрнинг арвоҳиман. Арвоҳни ким ўлдира олади? Бек акангми ё сенми? Менга ўлим хақида гапирма. Менга ўлдириш хақида гапир.

Тарзанга бу гаплар ёқмаса ҳам, ҳазилга буриш учун кулимсираб қаради:

– Ҳар куни жон оладиган одамхўрга ўхшаб гапирасан-а? Шуларни бояги калнинг олдида айтганингда бечоранинг юраги ёрилиб кетарди.

– Ақлинг кўп-у, лекин одамнинг ичини билмайсан. Уйин пайтида жонини ҳам тикворадиган одамнинг юраги унча-бунчага ёрилмайди. Айникса, сендақа мишикининг битта гапига иштонини ҳўл қилмайди.

Ахтам шундай пичинг қилиб, унинг гарданига уриб қўйди. Бундан Тарзан бир силкиниб, шеригига ғазаб билан ўқрайди:

– Гарданимга кўл теккизма, демаганмидим?!

Ахтам «кимга бакираётганингни биляпсанми, еган калтакларинг эсингдан чиқдими? Кўл теккизиш мумкин бўлмаган ипак йигитчамасмисан?» дейишга тилини қайради-ю, лекин «шунча жиғига текканим етар», деган карорда унга киприк кокмай тикилди-ю, жавоб кайтармади.

«Шамол эккан – бўронни йигишириб олади», деганларидек, Тарзанинг эккани шу ёвуз нигоҳли Сур эди. Энди оҳини кимга айтсин, додини ким эшигади-ю, ким ярасига малҳам кўяди...

Зоҳид шифохонадан кайтган Саид Қодировни йўқлайман, деб турганида унинг ўзи бир кўлида қаҳва тўла финжонни кўтарганича кириб келди. Салом-алик, хол сўрашдан сўнг Саид Қодиров финжонни Зоҳидга узатди:

– Бу сизга, азизим, ховурининг чиройлиигини қаранг, чойдан бунака ҳовур кўтарилемайди. Ҳиди-чи! Бир самовор чой дамласангиз ҳам бунака ҳузурбахш хид таралмайди.

– Ўзингиз-чи? – деди Зоҳид унинг дабдабали мактовларидан қулиб.

– Ох, ўзимми? Ярамга туз сепдингиз-а? Икки ҳафта давомида дўхтирлар менга нимани кашф қилиб беришди, айтами? Қаҳва юрагимга зарар экан, босимни оширас экан. Қаҳва ичиб ўтирган эдим, дўхтири кириб қолди. «Нима қиляпсиз?» – деди. Ранги-рўйини кўрсангиз эди: қошлар чимирилган, гўё у талабчан муаллим-у, мен қулоқсиз шумтака ўкувчиман. Мениям шумлигим тутиб, «қаҳва ичяпман», дедим. «Нега ичяпсиз, мумкинмас-ку, унутдингизми?» деди. «Гапингиз эсимда. «Заарали» девдингиз, нимаси зарарли эканини синаб кўраётган эдим», дедим. «Синашингиз шарт эмас, олимлар исбот қилиб беришган, қаҳвани тўкиб юборинг, бўлмаса босимингиз яна ошади», деди. «Қаҳва ичмасам ҳам ошяпти-ку, ундан кўра ичиб ҳузурланганимда ошгани яхшимасми?» дедим. Хуллас, дўхтири жаноблари тиббий маърифат дарсини ўтиб айтдиларки, Худо яратган неъматларини турли жойларга сочиб юборган, кайси неъмат каерда етиширилса, ўша ерда истеъмол килинса фойдали экан. Тушуняпсизми, қаҳвани Бразилияга ё Мексикага бориб ичсак, зарари йўқ экан. Мен «хўп, унда помидор билан картопкани нима киламиз?» дедим.

– Жавоб топдими саволингизга? – деди Зоҳид кулимсираганича қаҳвадан ҳўплаб.

– Жавоб эмас, ҳукм топди: «Прокурорларга гап тушунтириб бўлмайди!» деди. Кеча қайтар маҳалим уларга эсларидан чиқмайдиган зўр совға бердим. Битта қаҳва, олтита финжон, битта қаҳва дамлайдиган чойнак, бир кути шоколад олиб дўхтирларнинг хонасига кирдим. Совғадан кувонишганда, «ана, энди ўзинглар ҳам қаҳвага ўрганиб, мендай бечораларни сиқувга олмайсизлар», дедим. Сиз совутмасдан ичинг. Мен эрталабки насибамни ичволдим. Кўнглимга яқин одамга қаҳва дамлаб бериб, мақтov эшитсан, баҳридилим яйраб кетади. Қаҳвани ёқтирумасангиз ҳам мақтаб қўяверинг.

– Ақлни пешлайдиган даражада зўр бўлиби, Бразилия маликаси ҳам бундай тотли қилиб дамлай олмаса керак.

– «Дамлай олмаса керак», деганингиз нимаси! Бу аниқ ҳақиқат. Малика хоним олиялари қаҳва дамламайдилар, кун ёйилиб, ноз уйкудан уйғонганларида канизак тайёрини тутади, момик тўшакларидан ноzik қадларини кўтартмай туриб, гунча лабларини чўлпиллатиб, ҳўплаб-ҳўплаб ичадилар.

Сайд Қодиров худди гўзал маликанинг сарвқоматини кўриб маст бўлгандек, кўзларини хиёл юмганича хузурланиб гапирди. Кейин чўчиб уйғонган одам сингари хаёл дунёсидан аччик ҳаёт оламига кайтди:

– Жиноятчиларимизнинг ахволлари нечук?

– Афсуски, ҳаммалари соғ-саломатлар, – ҳазил оқангидаги саволга Зоҳид айни шу охангда жавоб қайтарди.

– Ўзингизнинг кайфиятингиз қандай?

– Ёмон эмас, чидаса бўладиган.

– Демак, сизда ўсиш бор. Денгизчидан «хаҳвол қанақа?» деб сўрашганда: «Кайфиятлар аъло, чўкяпмиз!» деганими? Ҳамонки, чўкмаётган эканмиз, ҳамонки, қаҳвани ичиб аклимизни пешлаб олган экан-

миз, энди ишдан гаплапсак ҳам бўлади. Ашулачи йигитни отиб кетишганини эшитгандирсиз?

– Эшитдим... – Зоҳид «бу хақда бекорга гап очмаётгандирсиз?» деган маънода унга савол назари билан каради.

– Тахминан... нималарни эшитдингиз?

– Тахминан эмас, бу иш билан шаҳардагилар шугулланишаётганини аниқ эшитдим.

– Шунинг ўзими? Асадбегингизни сўроқка чақиришганини эшитмадингизми?

– Менинг Асадбегимнimi? – Зоҳид истеҳзо билан жилмайди. – Ашулачига нима алоқаси бор экан?

– Марҳум ҳам, қочиб юрган гумондаги йигит ҳам куёванинг шогирдлари эмиш. Калаванинг бир учи Бегингизга бориб тақалмасмикин?

– Сўроқка чақиришибди-ку, бир нима дегандир?

– Нима дейиши маълум-ку?

– Чакирмаслик керак эди.

– Ҳа, нодонлик қилишибди. Ўғлининг ўлимидан сўнг Асадбекни тушуниш қийин. Ё ҳаддан ташқари эҳтиёткор, ё нима қилаётганини ўзи ҳам билмайдиган бўлиб қолган.

– Эси оғибди, демокчимисиз? – Зоҳид бош чайқади. – Бунақа одамлар дард олдида тиз чўкмайди.

– Одамлик туйғуси йўқ, демокчимисиз?

– Ачиниш туйғуси бўлса, виждон қйналарди. Ачиниш туйғуси йўқ вужудда виждон нима қилсин? Виждон бераҳм калбга яқинлаша олмайди. Демак, бундай калб эгасининг руҳий касалликка чалиниши эҳтимолдан узок.

– Ўх-хў! Ҳукмингиз бераҳмларча бўлди-ку, азизим!

– Бу менинг ҳукмим эмас, «ҳақиқат» деган одил ҳакам бор.

– Хўп, фалсафа бобида тортишувларимизнинг чеки йўқ. Ҳозир мени икки нарса ўйлантиряпти: би-

ринчиси – Асадбек одамимизни ўзидан четлатди, сирдан огоҳ бўла туриб нега жазоламади?

– Ўзингиз айтдингиз: эхтиёткор бўлиб қолган. Асадбек хоинни кечирмайди, лекин жазони ҳам тезлаштирмайди. Агар ўзининг одами бўлганида аллақачон куритворарди. Одамимизни жазоласа, бизга қарши уруш очган ҳисобланади. Ҳозир ҳам, кейин ҳам биз билан ўчакишиш қандай ачинарли оқибатга олиб келишини у яхши англайди.

– Мени ишонтира олдингиз, деб ҳисоблаймиз. Одамимизнинг хабарига кўра, Асадбекнинг энг яқин шериги изсиз кетган. «Чувринди» сирли фожиа натижасида ўлди, «Кесакполвон» дегани эса ғойиб бўлган... Фалати ҳолат эмасми?

– Олдинги маълумотда Асадбекнинг барча ишларни шу шеригига оширгани айтилган эди. Ўзи тинчитган, деб ўйлайсизми?

– Менинг аниқ хulosам йўқ. Гумонлар бир коп бўлиб, тўлиб-тошиб кетди. Кесакполвоннинг ғойиб бўлиши сабабини мен ўрганаман. Сиз шаҳардаги дўстларга ёрдам беришингиз керак.

– Ашулачи масаласидами?

– Ҳа.

– Калаванинг учини Асадбек томондан қидиришда маъно йўқ бўлса керак.

– Сиз кармоқни куёвига ташланг. Элчин жабрланивчини ҳам, котилни ҳам яхши билган, лекин терговчи билан гаплашишни истамабди.

– Мен билан гаплашар эканми?

– Сиз Элчиннинг мархум дўстини билгансиз, демак, танишлигингиз бор.

– Ҳа, танишмиз, афсуски, дўст эмасмиз. Бундай ҳолатда дўстгина ёрдам бериши мумкин.

– Илтимос, дўстлашишга ҳаракат қилиб кўринг.

Сайд Қодировнинг буйруқ тарзида эмас, ялиниш оҳангига гапириши Зоҳидга малол келди. Истеҳзо би-

лан жилмайиб, финжонни унга узатиб миннатдорчилик билдириди-да, қўшиб қўйди:

— Ажойиб қаҳванинг ҳақи-хурмати учун илтимо-сингизни бажаришга уриниб кўраман. Шу баҳонада балки яна бир дўст ортиарман.

Сайд Қодировга Зоҳиднинг пичингли ҳазили хуш ёкиб, кулиб юборди:

— Ана кўрдингизми! Одамлар қаҳвани менсишмайди, ахир унинг кучи билан дунёни ўзgartириб юбориши мумкин-а! Ажойиб қаҳванинг кучи кирқилмасдан бурун ашулачи билан учрашувга шошила колинг. Биламан, раҳбариятнинг бошқа топшириғи бор. Буни ўйламанг, зиммангиздан сокит килинган, деб хисоблайверинг. Бунака майда ишларни бажарадиган майда одамларимиз етарли, — Сайд Қодиров шундай деб, айёrona кўз қисиб қўйди. Хонасига қайтмоқ ниятида эшикни очди-ю, остоnага оёқ босиб тўхтади. Айтилмай қолган зарур гапини эслагандай Зоҳидга ўтирилди.

— «Виждон бераҳм қалбга якинлаша олмайди», деб чиройли гапирдингиз. Мен эсам сизни бераҳмликда айбладим. Биламан, жиноятчиларни ёқтирамайсиз. Уларни ҳамма ёмон кўрганда бизнинг раҳмдил бўлишимиз кулгили ҳол, албатта. Бу ёғини суриштирсангиз... бу тоифани кўрарга кўзим йўқ. Лекин на илож, улар билан юзма-юз бўлишга мажбурмиз. Ҳакикатни юзага чиқариш учун баъзан муроса килармиз, баъзан кўнглини овлаш учун мактартмиз ҳам... Афсуски, уларни ҳамма одам қиёфасида кўради. Менга улар бошқача кўринишда кўринадилар. Улар серкатнов йўл бўйида яккам-дуккам ўсиб ётган тиканакларга ўхшайди. Улар хеч қачон далани ёппасига эгаллай олмайди. Факат акл кўзи юмуқ биринки одамга зиён етказадилар. Сўнг сувсизликдан қовжирайдилар. Улар ёкиб юборилади, аммо алангалири фойда бермайди, аксинча, салгина алангалири фойда бермайди.

га олади-ю, нафсиз ўчади. Кулини шамол учиради. Тамом-вассалом!

Сайд Қодиров «ҳикматга мойил гапим маъқулми?» дегандай маънодор қаради. Зоҳид эса ундан нигоҳини узуб, дераза оша ташқарига қаради. Худди ўзига ўзи гапираётгандай деди:

— Осонгина «тамом-вассалом» бўлганида кошкни эди. Бу «тамом-вассалом»га қадар қанча қонлар тўкилади, қанча диллар вайрон бўлади. «Тамом-вассалом»ни тезлатиш, жонларни саклаб қолиш, афсуски, кўлимиздан келмайди. Фалсафандизни инкор этмайман, озгина қўшимча қиласман: бирорлар хаёт гулшанидан умри давомида гул тўплайди. Бирорлар эса чирик хазонларни тўплай-тўплай ўзидан ўзи ажабланади: «Мен нима учун яшадим-у, нима мақсадда бу чиркин баргларни тўпладим?»

— Яхши фалсафа, лекин сиз айтиётган хазонфурушларнинг хаммаси ҳам бундай инсофга келавермайди. Хазон тўплаганидан фахрланиб ўлиб кетадиганлари ҳам бор. Бу фикрни мен сизга текинга сотдим, фалсафа дафтарингизнинг бир чекасига кистириб қўйинг.

Сайд Қодиров шундай деб жилмайди.

Зоҳид бу фикрни инкор этолмаслигини билдириб, «енгилдим» дегандай кўлларини кўтарди. Бошлиғи чиқиб кетгач, жойига ўтириб, жиноят тафсилотлари битилган қоғозларни қўлига олди. Бир-икки сатр ўқигач, хаёлга берилиб, қоғозларни жойига қўйди.

«Жиноят оламидаги таҳтлар ҳеч қачон бўш колмайди, – деб ўйлади у. – Таҳт учун олишув ҳеч қачон тўхтамайди. Даъвогарларнинг бири кетади, иккинчиси келади. Ёқаси кирланган қўйлакни алмаштирган каби... Котил топилиб қамалгани билан нима ўзгаради? Бу жазо марҳум ўрнини тўлдирмайди-ку? Ҳа, ҳеч нарса ўзгармайди. Бирок, одамлар адолатга бўлган ишончларини ўлдирмасликлари учун ҳам жиноятчини топиб, албатта жазолаш керак...»

Кун оқшомга оғди. Зоҳид бошлигининг топшириғини бажаришга отланиб, оғринибгина ўрнидан турди. Бу ишга аралашувидан наф йўклигини билгани учун Элчин билан кўришишни истамаётган эди. Элчиннинг кўчасига бурилиши билан дарвоза якинида турган оқ «Жигули» дикқатини тортиб, Асадбекнинг эҳтиёткор бўлиб қолганлиги ҳақидаги гапни эслади. Дарвоза олдида тўхтаганида машинадан бир йигит чаққонлик билан тушиб, унга яқинлашди.

– Акахон, сизга ким керак? – деб сўради у, Зоҳидга бошдан-оёқ разм солиб.

– Элчин аканг керак, – деди Зоҳид, унга тик қараб.

– Ишингиз борми?

– Ҳа, бор.

– Қанақа иш? Менга айтаверинг.

– Ўзига айтадиган иш. Агар сенда ишим бўлганида сенга айтардим.

– Менга айтаверинг, биз бу ерда пашша қўриб ўтирганимиз йўқ.

– Шунаками? Ҳофиз акангни тўйга айтгани келдим.

– Ҳофиз акам тўйга боролмайдилар.

– Нега?

– Негалигини билишингиз шарт эмас. Акахон, яхши гапга кўнинг-у, изингизга қайтаверинг. Ҳаво исиб кетяпти, яна у ер-бу ерингизга чанг тегмасин.

Зоҳид «у ер-бу еримни чангта булайдиган азamat сенмисан?» дегандай унга бошдан оёқ разм солди-да, гувоҳномасини чиқариб, ўзини танитди.

– Шуни бошида айтавермайсизми? – деди йигит норози оҳангда тўнғиллаб. Кейин «Бирпас кутинг», деб, ичкари кираётанида Зоҳид: «Анвар акамнинг танишлари келибди», десанг мени танийди», деб қолди. Уч-тўрт дақиқадан сўнг йигит чиқиб, Зоҳидга инда-

май ўтди-да, машинасига бориб ўтирди. Дарвозахонада Зайнаб кўриниб, саломлашди.

– Сал мазалари йўкрок, ишингиз зарурмиди? – деб сўради у синик овозда.

– Касалликларини биламан, маслаҳатлашадиган гапим унча безовта килмаса керак.

Зоҳид шундай деб кулупнай ва нон солинган коғоз халтани унга узатди. Зайнаб «Овора бўлиб нима килардингиз», деган манзират билан тортиқни ийманнибгина олди-да, ичкарига таклиф қилди:

– Кира қолинг, фақат кўп гаплашманг, айниқса... асабни бузадиган гапларни айтманг. Анвар ўртокларини эслатмасангиз ҳам майли...

Зайнаб шундай деб, ичкарига йўл бошлади. Кимсан, Асадбекнинг қизини маҳзун холда кўриш Зоҳидга ғалати туюлди. Кибр йўқ, ғазаб йўқ, кўзларидан зулм учқунлари чақнамайди... Зоҳиднинг назаридаги аксинча бўлиши керак эди. Чунки у Зайнабнинг отасидан кўра онасига кўпроқ ўхшашини билмас эди.

Элчин аравачасини ғилдиратиб келиб, Зоҳидни айвон остонасида кутиб олди. Салом-алиқдан сўнг уни айвон ўртасидаги стол томон бошлади. Зоҳид меҳмон келганда аёлларнинг шошилиб колишларига, уйни тез-тез йиғиширишларига, кўрпача тўшаб, дастурхон тузаб, қанд-курс, мева-чеваларни бир-бир олиб чикиб тузашларига ўрганиб қолган. Бу ерда бесаранжомлик бўлмади. Зайнаб ота уйидаги ўргангани учун дастурхонни меҳмон кутишга ҳамиша шай тутарди. Эрининг меҳмонларини яхши танимаса, салом бериб, чой дамлаб келгач, уларни холи колдиради. Бу сафар ҳам шундай бўлди.

– Қайси шамол учирди, кўришмаганимизга ҳам кўп бўлди, а? – деди Элчин, меҳмоннинг ташрифидан мамнунлигини билдириб.

– Ҳа... Анвар вафот этган куннинг эртасига учрашган эдик, шекилли? Уйингизга отланганимда оқибатсизлигимдан хижолат бўлдим. Йўқлайман, деб

неча бор ният килдим-у, лекин ҳар турли баҳоналар билан «эртага, эртага» деб орқага суравердим. Охири «ҳам зиёрат, ҳам тижорат» деганлари дай... – Зоҳид шундай деб, айбдор одам сингари узрли кўринишда жилмайди. – Очигини айтсам... шогирдларингизнинг ташвишли шамоли учирив келди мени.

– Навбатдаги очилмайдиган ишга киришаяпсизми? – деди Элчин киноя либосида кулимсираб.

Зоҳид «иншлар очилмаётган бўлса, жиноятчилар камоққа ўз хошишларича кириб ўтиряптиларми?» деб кинояга истехзо билан жавоб қайтармоқчи бўлди-ю, «бу ўзи ким-у, мен нега унга ҳисоб берайин, нега ўзимни оқлайн», деган фикрга келиб индамай кўя қолди. Элчин буни «сукут – ризолик аломати» ўрнида кабул килиб, давом этди:

– Анварнинг ўлими билан ҳатто кизикиб ҳам кўрмадинглар. «Ўз жонига сункасад» – чиройли хуласа! «Ёш олим йигит нега ўзини осди, балки у бўйнига арқон солаётганида исён қилмоқчи бўлгандир», деб сиз ҳам ўйламагандирсиз.

– Тушунмадим, қанака исён? Жанозадан кейин учрашганимизда «бандалик эмас, ахмоқлик» деган эдингиз. Энди «исён» дәяпсиз?

– Фикрим ўзгармади. Факат аниклик киритдим. Исёнининг сабабини аникладим. Ўшандаги гапларим эсингиздадир? Саволни яна такрорлайман: хаёт ўрнига ўлимни афзал билишига уни кимлар мажбур килди? Сиз у лаънатиларни қамай олмайсиз, чунки сиртмоқда уларнинг бармок излари йўқ. Сизга факат экспертиза хуносаси керак. «Рухий сиқув» деган нарсани экспертиза аниклаб беролмайди. Тўғри, кодексингизда «ўлимга мажбур қилиш» деган банд бор. Лекин, бу банднинг пачагини чиқариб юборадиган ёлғончи гувоҳлар атрофда тиқилиб ётибди, – Элчин шундай деб хўрсинди, нигоҳини Зоҳиддан олиб, худди ўзига ўзи гапираётгандай овозини пасайтириб, дардли оҳангда давом этди: – Виждон – дунёнинг энг

олий маҳкамаси экан. Тергаш жараёни бошланганида ёлғончи гувоҳлар, мунофиқларга бу маҳкамада ўрин бўлмайди. Энг асосийси – виждан маҳкамасининг ҳаками порахўр бўлмайди. Юқори идоралардан бўладиган қўнғироклар олдида бўйин эгмайди. Ҳукм эса одилона бўлади. Афсуски, вижданни мавҳум тушунча деб, бу хақиқатни англамайдиганлар дўл каби бошимиз устига тўхтовсиз ёғилиб турибдилар. Бу адолатсизлик дўли мен айтган одил ҳакам – вижданни омон колдирганмикин? Масала шунда!

Элчин «сиз шу масалани ечиб бера оласизми?» дегандай Зоҳидга караб, жавоб кутди. Зоҳид бу фалсафий мушоҳадалар орасига сиқилиб киришни хоҳламай, сукут саклади. Алхол, Элчиннинг кўнгил оғриғи қўзғаб, кўз олдига умидсизлик пардасини тортиб, дунёни кўзига тор ва қоронги қилиб кўрсатаётган эди. Дараҳтларни яшнатиб турган баҳор гулларининг жонини аямажуз суғуриб олса, унга кайта жон атаб бўлмайди. Кора совуқ ўтиб кетади, қуриган боғлар эса мунғайиб қолаверади. Уни қайта тиклашга ким хафсала килади? Тиклашга уринувчилардан кўра бепарволар кўп экан, боғнинг ахволи нима бўлади? Ҳаёт экинзорига локайдлик, бераҳмлик уруғи кадалиб, масъулиятсизлик суви билан суғорилса, канака ҳосил олинади? Умидсизлик денгизида кўпдан бери сарсон сузиб, муддао соҳилига етолмай қийналаётган одам бу саволларга кандай жавоб топиши мумкин?

– Худо Ер юзини яхшилик учун яратган экан, лекин нодонлар уни омонсиз олишув майдонига айлантириб олдилар. Ер триллион-триллионлаб жасадларни бағрига сиғдирди. Ҳозир яшаётган тўрт ярим миллиард одам ҳам бирин-сирин уларнинг сафига ўтади. Улганларнинг ўрнини туғилганлар эгаллайдилар, кейин олиша-олиша гўрларни тўлдираверадилар. Бир-бирини севмаган иккита одам Ер юзига сиғмаса, айб кимда?

Элчин енгил хўрсинди. Иложсиз одамнинг ҳасрати билан бошини эгди. Ўзининг саволларига ўзида жавоб бўлмаса, ўзга кимсадан нимани кутсин?

Ўша фожиали куни жанозадан қайтгач, «бир-икки кун ойингга карашгин», деб Зайнабни уйига юборди. Назарида ёлғизлик кўнглига таскин берадигандай эди. Бундай бўлмади – кўнгилга ёлғизлик овунчок бўла олмади, айрилиқ исканжаси қалбини баттар эзди. Таскин топмоқ максадида конъякни қўлига олди. Қопкоғини очди, лекин қадаҳга куймади, ичгиси келмади. Эси оғиб қолган телба одам сингари ярим тунга қадар у хонадан бу хонага максадсиз кириб-чикаверди. Тун оққанда ҳолсизланиб, оромкурсига чўкди. Оёғини баралла узатиб ўтирди. Кўзига уйку илинди. Қалб оғригини муолажа қилиши лозим бўлган қуш уйкуси вазифасини уdda қилолмади – уйку ташвишлари юзига парда торта олмади. У қиска фурсат орасида туш кўрдими ё дўстининг рухи уйига кириб келдими, билолмади. Лекин аниқ кўрди: Анвар оппоқ либосда кириб келди. Кейин маймунбашара бир одам кўринди. Анвар у томонга кўлини бигиз қилди: «Менинг қотилим шу, устознинг қотили ҳам шу... Қасос олмайсанми? Ноила учун қасос олмокчи эдинг. Менчи? Арзимайманми?..» Анвар бундан кейин ҳам бир неча марта кўринди. Ҳатто касалхонада хушсиз ётганида ҳам кўриниб, қасосга даъват этди. Ҳозир бу прокурорга шуларни айтиши керакми? Бирорнинг аччик тақдиридан куймайдиган бу одам унинг дардига тушинармикин?

Шуларни хаёлидан ўтказган Элчин ҳазин оҳангни тарк этиб, энди қатъийрок тарзда давом этди:

– Холидий деган одамсифат маҳлук яна қанча одамни куриптганини сиз билмайсиз. Даъво ҳам қилолмайсиз. Мен у бадбахтни бугун ўлдирсам, ўйлаб ҳам ўтирмай, эртагаёқ мени отасиз. Мантиқан қаралганда, уни ўлдирганим учун мени мукофотлашингиз керак. Чунки уни ўлдирсам, қанча одамлар-

нинг ҳаётини саклаб қолган бўламан. Яширмайман, у махлуқни ўша жиннихонанинг ўша ҳожатхонасига осмокчи ҳам эдим. Бунака бўлиб қолиш бошимга тушмаганида килардим шу ишни! Тузалишдан умидим бор... Ўзимнинг кучим етмаса, бирорни ёллайман. Ҳозир Россиядаги киллерлар иш қидириб юришганмиш. Битта қўнғирок килсан, бас... бугун бўлмаса, эртага Холидийнинг ўлигини ҳожатхонадан топиб, янги «Иш» очасиз. Сизга яна бир бошоғрик ортирганим учун ҳозирдан узр сўраб қўяйми?

– Шу одамни оссангиз дунё чиройлироқ бўлиб қоладими? Анварнинг исёндан мақсади шу эдими?

– Анвар аҳмоклик килди. Исён киладиган одам ҳеч бўлмаса битта махлукнинг тухумини қуритиб кетиши керак.

– Шу гапларни сиз гапиряпсизми?

– Менга нима қилибди?

– Ишонмайман...

– Нимага?

– Холидийни осишингизга ишонмайман. Юрагида муҳаббат бор одам бундай қила олмайди. Тўғри, қасос олишни жуда-жуда хоҳлайди. Фикру ўйи шу одамни ўлдиришда бўлади, лекин қўли бормайди.

– Менинг муҳаббатим камоқхоналарнинг сассик баракларида бўғилиб ўлган. Осишинга ишонаверинг. Осишдан олдин тилини сұгуриб, кўзларини ўйиб олишимни ҳали айтмадим...

– Сиз ўзингизни ўзингиз алдаяпсиз.

– Балки шунақадир... – деди Элчин, аввалги шаштидан сал пастроқ тушиб. – Эшитгандирсиз, кадимги Хитойда ҳақоратланган ёки зулм кўрган одам қасос олишни истаса, ўша зулмкорнинг остонасига келиб, ўзини ўзи осаркан ё сўйиб, ичак-чавогини ағдариб ташларкан. Шундан сўнг зулмкорга нисбатан атрофдагиларнинг нафрати ошар экан-у, у бадбаҳт бегона юртларга кўчиб кетаркан. Сизга балки жазонинг шу тури маъқулдир?

- Виждан ҳамма нарсадан устун кўйиладиган жамиятда бу жазонинг таъсири бўлар. Лекин...
- Ҳа, ана энди ўзингизга келдингиз. Ҳамма гап ўша «лекин...»да! Қамоқдан қайтсан, Анвар жиннихонада ётган экан. Борсам, «дунё формуласини топдим», дейди. Сиз аввал илмга берилган экансиз. Пифагору Эйнштейн назарияларини сув килиб ичиб юборгансиз. Катет, гипотенузаларингизни четга қўйиб, айтинг-чи, дунё формуласида ҳақиқат нимага баробар?
- Мен математикага қизикардим, ҳозирги саволингизга файласуф жавоб бериши керак.
- Ҳар бир одам ўзича файласуф эмасми? Наҳотки, дунё зиддиятлари билан қизиқмагансиз? Саволимга жавоб берманг, майли, чунки факат сиз эмас, ҳаммамиз дунёда ҳақиқат деган тушунча борлигини унутиб яшаймиз. Анвар эса унутмаган. У кашф килган ўша формулани: «ҳақиқат»нинг нимага баробар эканини топиш учун «хиёнат»ни «риё»га қўшамиз, «ҳасад» билан «очкўзлик» қавс ичидаги қўшилади. «Адоват», «ғийбат», «нифок», «шухратпарастлик», «манрабарастлик» эса илдиз остида қўшилади. Буларнинг ҳосиласидан «виждон», «иймон», «ҳаё»нинг қўшилмасини айирсак – баробар нол! Анвар дунё формуласидаги «ҳақиқат – нол!» деган хотимага қарши исён килган эди. Дунё формуласини ким, тўғрироғи, кимлар бунака хато ечимга олиб келади? Сизлар буларни ўйламайсизлар. Ҳолбуки, бошингизни қотираётган барча жиноятлар шу хато ечимдан туғилган. Ёш ҳофизнинг ўлими сабабини кидириб, жавобни кайнотамдан олмокчи бўлибсизлар. Кулгили эмасми?
- Кулгили эмас... ачинарли... Бундай килмасликлари керак эди, – деди Зоҳид, баҳсда енгилган одамнинг афсусли оҳанги билан. Сўнг максадини тушуниришга ўтди: – Сиздан ҳам, қайнотангиздан ҳам гумонимиз йўқ. Жаҳлингиз чиқмасин. Ўша икки санъаткор қандай йигитлар эди, сиздан шуни

билимокчимиз. Буни бизнинг тилимизда «шахсини аниқлаш» дейилади. Қотил топилганда кўнглингиз оз бўлса-да, тинчимайдими?

– Тинчимайди! Қотилни беш-олти йилга қамаб, уч йилдан кейин амнистия билан чиқариб юборганингиз учун сизларга олам-олам раҳматлар айтишим керакми?

– Мархум яхши санъаткор эдими? Мен унинг ашуласини эшитмаган эканман.

– «Яхши» дедингизми? Тенгсиз эди! Унинг авжи хозир қўзикориндай чиқаётганларнинг ҳеч бирида йўқ эди. Ҳозиргилар туғилиши билан киндигини ўзи кесиб, микрофонга улашяпти-ю, пилдираганича катта саҳнага чикиб, ўзини «юлдуз» деб эълон қиляпти. Тасқараларнинг биронтасида авж йўқ. Авжини ололмаган ашулачининг қадри сарик чақа!

– Демак, мархумнинг келажаги порлок бўлган. Истеъдод бобида тенгсиз ёшларнинг ўзига яраша ҳасадчилари бўлади. Атрофида дўстга ўхшаб юришади-ю, лекин пайт пойлаб туриб, чалиб юоришади. Шунчаки чалишса майли, бунақа ҳолат...

– Қотилни энди дўстлари орасидан қидирмоқчимисиз? Биринчи гумонингиз Козимбекда, шундайми?

– Ҳа.

– Бу сизларнинг ўзгармас услубингиз. Жиноятчини биринчи галда жабрланувчининг якинлари орасидан қидирасиз. Козимбекни котил сифатида эмас, жабрланувчи сифатида қидирганингиз маъқул.

– Охирги учрашганимизда «Жамшид ўлдирилганини аниқ биласизми, ўзи?» деб тагли гап айтган эдингиз. Чиндан ҳам ўлдирилмаган экан, ўшанда кўнглингиз сезганмиди?

– Тилдан учган шунчаки бир гап эди. Мен фолбин эмасман. У гапни бекорга эсламагандирсиз, а? «Шоғирдларингизнинг тақдири тўғрисида кўнглингизга келган гапларни айтинг», демокчига ўхшайсиз? Шоғирдимнинг бири ўлган, гумонга ўрин йўқ.

– Икинчиси эса тирик... ёки... тирикмикин?

– Билмайман... ярамга туз сепманг...

Зоҳид Элчиннинг илтимосига парво қилмай гапини давом эттирди:

– Ҳархолда, жуда қизик: ўқ бор, кичик калибрли милтиқдан отилган, гилза эса йўқ. Ўқ пешонага теккан, мурданинг ёнида тишланган олма... Олмани марҳум тишлаган, чайнаб ютишга улгурмаган. Олма ейишига қараганда, у ҳеч нимадан хавотирланмаган. Қочишига ёки ўзини ҳимоя килишга уринмаган. Яна ҳам қизифи: баллистик экспертиза хulosасига қараганда, у тўхтаб, деворга суюниб турган.

Элчин Зоҳиднинг бу хulosасини маъкулламади ҳам, инкор ҳам этмади. Зайнабнинг гумонларини айтипига чоғланди-ю, лекин тилини тийди. У гарчи ўғрилар оламига тобе бўлмаса-да, милиция ёки прокуратура билан ҳамкорлик қилишни ўзи учун ор деб биларди. Қамоқда орттирган бу одатига хилоф ишқилгиси келмади.

Алҳол, қўшни хонада Зайнаб уларнинг гаплари-га қулок солиб ўтиради. Мехмон оддий терговчи бўлганида, уни уйга қўймаслиги аниқ эди. Анварнинг номини тилга олиб келган бу одамга эшикни очганидан энди афсусланди. Чунки дастлаб келган терговчининг ҳам, бунисининг ҳам мақсади бир, худди Элчин шогирдини уйига яширгандай атрофга олазарак карашади. Элчин икки қўлинин кўтарса-ю, «хид олишингизга қойилман, дўстини отиб ўлдирган Коғимбекни мен яшириб қўйган эдим», деб қотилнинг қўлларига кишан солиб берса! Уларга шу керак! «Элчин акамда гумони бўлмаса, нимага ҳадеб келаверади?!» Зайнабни шу савол темир тирноқлари билан исканжага олиб, ғазабини оширди. Худди отаси каби у ҳам Кесакполвонни ёдга олди. «Сафарлари бунча чўзилиб кетди? Агар шу ерда бўлганларида булар оstonамизга ўйлаб якинлашишарди. Ҳайдар амаким

сафарда бўлсалар, адам шу ердалар-ку? Адамни мен-симиай кўйишганми? Нега ҳадларидан ошишяпти?»

Зайнабни «Асадбекнинг асл қизи» деб эркалаган Кесакполвоннинг қадри ўтаётган эди. «Асадбекнинг қизи йиғламаслиги керак!» Акасининг ўлимидан кейин йиғламай қўйган. Кўз ёшлари тугаб, ўрнини қасос чўғлари эгаллаган. Бир ғалтак ип қандай ўралган бўлса, кейинги йиллар мобайнида ёғилган дарду аламлар гўё ип бўлиб, унинг юрагини чирмаб ташлаган эди.

Абдусамад хорижга кетар олдида уни овутмоқчи, Жамшид эса: «Бу эркакларнинг иши, мен ўлсан, менинг ўрнимга сен келасан!» деб ишонтирмоқчи бўлди. Қасос оладиган эркаклар кани? Нега индамай юришибди? Нимани кутишяпти? «Акамнинг хунини олиш хукуқини Худо менга берган, эркакларнинг бошқа ишлари бор. Уларга ишонсан, қасос ололмай ўлиб кетаман...» Қасос олишга аҳди қатъий эди, бироқ, ишни нимадан бошлаб, нима билан тугатишни билмасди. Бунинг учун унга бир маслаҳатгўй, суюнадиган бир коя керак эди. Ўша маслаҳатгўйни, ўша кояни ҳар куни кутади. Худди баҳтини кутаётган баҳтсиз одам каби кутади. Кутаётган одамининг тақдиридан бехабар. Орзу қилгани – қасос Қиёматга қолганини ҳам билмайди.

Қасос шарбатидан ичиб хузурланиш ҳатто отасига насиб этмагани ҳам унга номаълум. Ҳонгирейнинг ўлимидан кейин ўч шамширини кимга санчишини билмай рух азобида тўлғанаётган ота қизига дардини айтармиди?..

Орзу-умид икки тоифа бўлади. Хайрли орзу-умид сабр ва ишонч булоғининг мусаффо сувидан ичиб, хаёлдан ҳақиқатлар оламига кўчгач, саодат охиратини беради. Разиллик балчиғидан қувват оловчи орзу-умид ҳам бор, афсусларким, бу ҳам ҳақиқатлар дунёсига кўчиб, бандани самум меваси билан тақдирлайди. Кайси орзу-умидни танлаш кишининг онгига

ва бу онгни тўғриликка йўллаб турувчи иймон нурига боғлиқ. Зайнаб бир вактлар пок орзулари офтобида ҳузурланиб яшарди. Буни саодат офтоби деб билиб, осмондаги күёш янглиғ абадий нур сочишига ишонарди. Ҳаётнинг хунук кора булутлари борлигини ўйлаб ҳам кўрмаган эди. Энди саодат охиратидан умид йўқми? Рухини эзиб турган оғир дард ўзининг залвори билан умид ва сабр чиннисини мажақлаб ташла-масмикин?

Нажот йўлига умид билан қараш икки хил бўлади. Шайтон кўзи билан қарашнинг охиривой! Иймон кўзи билан қараш Аллоҳнинг ажри билан тақдирланади. Не афсуски, емок-ичмоқ, киймоқ ва яшамоқнинг барча зийнатларидан баҳраманд бўлган Зайнаб бу тушунча бобида ғоят ғариф эди.

Айвонда ўтирганлардан бири жиноят тугунларини ечмоқ мақсадида бош қотиради.

Уйдаги Зайнаб эса қасос қонини ичмоқ истайди...

Зоҳид гапни чўзишдан фойда йўклигини билиб, мезбонга раҳмат айтди-да ўрнидан қўзғалди. Зайнаб шошилиб чиқиб, уни кузатди. Хайрлашар ҷоғида кўз-кўзга тушиб, Зоҳид ҳайратланди: Зайнаб энди у тасаввур килган аёлга, Асадбекнинг кизига айланган эди.

Зоҳид бу хонадонга умидсиз келган эди, курук қайтди.

XI б о б

1

Абдусамад Чўлпонойни маҳзун ҳолатда кўриб, ҳам ажабланди, ҳам хавотирланди.

Бахтиёрлик қаноти билан ота юртга учеб бориб, Абдулхамидинг ўлими туфайли бу қанотлари кирқилган ҳолда айрилик чашмасига қайтган ёшларнинг кўзларига дард булути тез-тез соя ташлайдиган

бўлиб қолган эди. Муштарийнинг кўзларида кувонч чўғлари бутунлай сўнганига, Гулузор бегимнинг эса кизи хасратида куйишига улар бефак караб туришолмас эди. Муштарий билан Гулузор бегим даврасида ўтиришгандан ҳузурланиб кулиш ёки кишига кувонч берувчи гапларни гапиришдан тийилишга мажбур эдилар. Бундай мотамсаролик барчанинг руҳини эзib турарди. Бугун Чўлпоной онаси билан ёлғиз қолганида «ҳаётни мотам тиконзорига айлантирмоклик дуруст эмаслигини» айтиб, танбех эшилди. Табиатан меҳрибон бўлган Гулузорбегимга бу ҳақиқат аён эди, бироқ, беваликнинг заҳарли шарбатидан азоб чекаётган қизини мотам сахросидан ҳаётнинг нурли боғига қандай қилиб тортиб олишни билолмай қийнаётган эди. Чўлпонойнинг гапини инкор килолмагани баробаринда фикрининг тўғри эканини тан олиши шу боис ҳам мушкул эди. У қизини кийнаётган айрилик дардининг ҳомиласига таъсир этишидан ҳам кўркарди. Чўлпоной синглисига ҳамдард бўла олмаётгандай туюлиб, ғазаб оташида унга бир-икки аччик гап айтишдан ўзини тута олмади, ҳатто «бирга яшамоқлик ҳасрати дилингни эзаётган ўлса, ҳасрат дўлидан қутулмок учун айри уйда яшамоқлик истагинг ўлса, ихтиёрингдир», деб юборишдан тилини тия олмади.

Ҳеч бир она ҳеч қачон фарзандига ёмонликнираво кўрмайди. Ҳатто, онанинг беихтиёр айтиб юборган қаргиши ҳам ўтмайди, дейдилар. Қайси она суюклисини бағридан чиқариб юборгиси келади. Жонини боғлаб турган икки қаноти ота юртга учганда Гулузор бегимнинг юраги ҳувиллаб қолмаганими эди?! Бу ҳувиллаган юрак соғинчнинг аччик суви билан тўлмаганмиди? Фарзандлари кемтик баҳт билан кайтдилар. Соғинч тарқ этди-ю, аммо қизининг мунгли кўзлари ҳаловатини олди. Чўлпоной буни ҳис этмайдими? Онаси билан синглисининг дардлари унга бегонами?

«Ҳажр аро бу давр нетай мен жонни, жон нетсун мени, Ким эзур ҳар лаҳза мендин жон, мен жондин малул», дейилганидек, мотам кунлари сонсиз ҳасрат чодирига беркинган синглисини овутиш мақсадида қайсиdir китобда ўқигани: «Бугун катта бир дардинг бўлса, Раббингга юзланиб: «Эй Раббим, менинг оғир бир дардим бор», демагил, балки, дардингга юзланиб: «Эй дард, менинг Буюк Раббим бор!» дегил», – насиҳатини айтиб, бу дард абадий эмас, ўткинчилигини, ўрнини кувончга бўшатиб беришини таъкидлаган эди. Синглисига айтди, бирок, «Тангри ҳалқ этмиш мани гўё маломат чеккали», деб юрган онасига ақл ўргатишдан истихола қилди.

Онасининг бу гапи...

Дардкаш бўлиш ўрнига дарддан кочувчи шафкатсизми у? Бошка уйга кўчиб ўтишдан осони йўқ. Лекин бераҳмлик тамғаси билан яшаш осонми? Бу юрт туб аҳолисининг одатига кўра, ота-онадан айри яшаш маъкул кўрилса-да, Чўлпоной бу урфни хеч маъкулламаган, бошка уйга чикиб кетиш хаёлига ҳам келмаган эди. Айниқса, синглисини ҳасрат денгизи пўртанасига ташлаб кетиш... «Бир кориндан туғилмок бор-у, бирга яшамок йўқ», деган гапнинг ҳаётга кўчишини хеч қачон истамаган.

Онаси...

...захарли ўқка айланган бу сўзлар унинг лабларидан беихтиёр учдими?..

Аллоҳ! Аллоҳ! Она қалбини бу телба ҳақиқатдан Ўзинг асрар!

«Шафқатсиз опа» деган шарманда рўмолини елкасига ташлаб чикиб кетиш...

Чўлпонойни онасининг гапи маҳзун этмади, балки ҳаёлинини тўзитиб юборган шу гапларнинг ҳаётга кўчиши мумкинлиги ҳақидаги нохуш ҳақиқат даҳшатга солган эди.

Абдусамаднинг «сизга нима бўлди, хоним?» деган ширин саволига аччиқ жавобни энди қандай айт-

син? Эри бу саволни яна бир тақрорлаганида йиглаб юбормоғи аник эди. Бахтига эшик очилиб, онаси күринди. Гулузор бегим күёвини кўриб, бевакт кираётганидан хижолат бўлди. Унга бир кулимсираб, ортига қайтмоқни ихтиёр килди-ю, бу иши янада нокулай бўлишини англаб, ичкарига қадам босди.

– Оқшомингиз хайрли бўлсин, – деди Абдусамад енгил таъзим килиб.

– Хайрли акшамлар, – Гулузор бегим шундай деб күёвига кўл узатди.

Тошкентдан қайтишганда Чўлпоной онасига: «ул юрт урфида куёв ўғилга кўл узатиб кўришмак уят саналмиш экан», деб танбех берган эди. Бу танбехни унугтан кезлари ўз одатига хилоф қилмай, кўришмок учун кўл узатарди. Ҳозир ҳам шундай бўлди. Қайнонаси билан кўл учиди сўрашгач, Абдусамад кўлидаги китоб-коғозларини кўйиб чиқиш баҳонасида хонасига йўл олди. Гулузор бегим ҳеч бир сўз айтмай, кизига яқинлашиб, уни кучоклади. Сўз айтмаса ҳам, Чўлпоной онасининг узр сўрамоқчи эканини англади.

– Бийр данагинем! – деб пичирлади ҳасрат инган титрок лаблар.

– Биз иккимиз... – деб пичирлади маъсума.

Муштарий туғилмасидан аввал Гулузор бегим тўнғичини турк оналарига хос бўлган меҳр билан «бир донагинам» деб эркаларди. Бу одатни иккинчи кизи туғилганидан кейин ҳам давом эттирди. Унисини ҳам, бунисини ҳам шундай деб суярди. Чўлпоной улғайганида онасига «Мен бир доне эмас, биз икидурмиз, анне», деб танбех берганди. Тўйдан кейин, келинлик либосидаги қизларининг пешонасидан ўпиб, «бийр данагинем», деганида Чўлпоной: «Энди биз дўрт ўлдук, анне, қалбинийз дўрт парчаси», деб кулган эди.

Гулузор бегим қизини бағрига маҳкам босганича жим эди.

«Бир киши ўлгани билан ҳаёт тўхтамаслигини мен билмайманми? Аммо қайғу пўртанасидаги қизимни тортиб олишдан ожизман», – дейди меҳрталаб юрак.

«Буюк Аллоҳ иймон келтирганлар ва сабрлилар билан биргадир. Бизга бир шарафли ҳадисни ўқиб бериб эдингиз: «Пайғамбаримиз алайҳиссалом ўғиллари Иброҳимнинг ўлими арафасида муборак кўзларидан бир неча томчи ёш тўкилди. У зот шундай марҳамат қилдилар: «Кўз йиглар, калб маҳзун бўлар, яъни бу табиий, башарий бир нарсадир. Иброҳимдан айрилганимиз учун биз чиндан ҳам қайғудамиз. Аммо Раббинизнинг розилигига тескари бир оғиз сўз айтмаймиз». Бу шарафли ҳадисни ардоқли синглимга ўзингиз яна бир эслатинг... Ҳасрат пўртанасидан уни биз тортиб ололмасмиз, сабр ва шукрдан кувват олган иймон кучи билан ўзи қутулиб чиқажак, инша Аллоҳ!» – дейди дардкаш юрак.

Узроҳлик унсиз тарзда якунига етгач, Гулузор бегим қизининг пешонасидан бир ўпиб, бағридан бўшатди. Шундан сўнг онани ҳам, қизни ҳам нокулай ахволга соловчи ғалати сукут уйғонди. Ҳудди айтиладиган сўз йўқдек, бир-бирларига жимгина тикилиб қолдилар. Сўз бор эди, бироқ, Гулузор бегим гапира бошласа, титроқ лаблари йигини тўсишдан ожиз қолуви мумкин эди. Чўлпоной буни англаб, ўзи сўз бошлади:

– Ойижон, бу тонг сабаҳ намозин ўқигач, мутолаага эҳтиёж сездим. – Чўлпоной эрининг уйига борганда қайнонасини «ойижон» деб ўрганган эди. Бу ёкка қайтгач, онасини дам тошкентчасига «ойижон», дам туркчасига «канне» дейдиган бўлди. Бунга айтарли аҳамият бермаган Гулузор бегим ҳозир ҳам эътибор қилмади. – Танламоқ ихтиёридан воз кечиб, қўлима илинмиш китобни олиб, варакладим. Не ажабки, сиз биза ўкуб берган Румайса ибратига кўзум тушти.

– Хаёлим паришон, бийр данагинем, қай бир ибратни айтурсан?

— Сахобия Румайсанинг ҳикояси-да, эслиюрсиз, дедиларки: «Болам оғир бемор эрди. Бабаси сўкокда эркан чоги, бола жон верди. Уни уй тўрия ётқуздум. Акшам намазидин сўнгра қўжам келгач, «ўғлимнинг аҳволи нечук», дея сўради. «Аллоҳа шукурлар», дедим-у, хушнут қўринмак чорасин килдим. Суҳбатлашиб ўлтурас эканмиз, «Кўшнимиз хўп ажабда», дедим. «Нечук?» дедилар. «Мендин бир омонат олиб эрди, бу окшом қайтаришни сўраб эрдим, нушикурлик ила йиғламокқа тушти», дедим. Эш: «Бу иши ножоиздур», дедилар. Шунда дедимки: «Бабаси, Аллоҳ биза чўх гўзал бир неъматин омонат бериб эрди, бу акшам қайтариб олмишdir», дедим. «Инна лиллаҳи ва инна илайҳи рожиуън», дедилар кўжам». Анне, пайғамбаримиз алайҳиссалом буюк сабр ва шукур соҳибаси ўлмиш Румайсани жаннатда кўрганларини марҳамат килганлар-а?

— Оре, рост, — деди Гулузор бегим бошини эгиб. — Сабр ниҳоясиз бир неъмат ўлур... Мен бийр режани ихтиёр эттим: бабанг Париж сафарини якунлаб, бағримиза қайтганлариндин сўнгра Тошкандаги аннанг ила бабангга даъват таклифи юборурмиз, иншааллоҳ, лутфлари ила бизни сарфароз этажақлар. Уларнинг ташрифи Муштарийни ҳасрат пўртанасидин халос этгусидир. Ойижонинг, — Гулузор бегим бу лутфга урғу берив, кулимсиради, — бунда эканлар, Аллоҳ беражак набира неъматидан биргаликда кувонажакмиз. Манзура бегим жўжуқни йўргаклаб, адажонинг, — Гулузор бегим кулимсираганича Тошкент шевасидаги бу сўзга ҳам алоҳида урғу берди: — кулогига аzon айтурини Аллоҳдан сўрайпман.

Бу янгилик Чўлпонойни эзаётган маҳзунликни хайдаб, кўзларида кувонч чироқларини ёқди:

— Инша Аллоҳ! Инша Аллоҳ! — деди у онасини кучоқлаб. — Чўх гўзал ўлур, чўх гўзал!

Кувониш баробаринда қайнотасининг набира кулогига аzon айтиб қўйиши пуч умид экани уни афсус-

лантирди. Афсуси қайнотасининг бенамоз эканидаги-на эмас, балки бу хақиқатни онасига айта олмаслигига ҳам эди. Гулузор бегим набираси кулоғига қудасининг аzon айтмоғини ният қилган экан, Аллоҳ бу ниятни қутлуғ ва муборак этиб, ўзи берган набира неъмати шарофатидан унинг бобосига ҳам хидоят берса не ажаб?

Бу он Чўлпонойнинг қалбида шу умид туғилди.

2

Қайнонасидан изн теккач, хонасига кирган Абду-самад қўлидагиларни стол устига ташлаб, ўзи ором-курсига чўкди. Ҳозир уни она-боланинг сұхбати кизиктирмас, балки ўзини «Валерий» деб танитган малла йигитнинг гаплари хаёlinи банд этган эди. Кутубхонадаги биринчи учрашувни тасодиф деб ўйлаган эди. Кейингилари... тасодиф эмас. Айниқса, бугунги-си... «Шу ердан ўтаётib сизни кўрдим-у, тўхтатдим», дейиши ёлғон. Қарашида макр зоҳир бўлган бу йигитнинг мақсадига Абдусамад кейинрок тушунди.

Тўй ва Тошкент сафари сабабли билим олишда доктор Худоёрнинг танбеҳига лойик даражада оқсаётган Абдусамад дарсдан кейин яна кутубхонага бормокликни ихтиёр этган эди. Йўлда Валерийга дуч келиши режасини бузди.

– Ҳамшахар, ўзимизнинг тошканчасига бир чойхўрлик килиб отамлашмаймизми? – деди Валерий.

Абдусамад учрашувдан хурсанд эмаслигини яширмай, қошлирини чимирди. Ундан тезроқ кутулиш мақсадида: «Тошканча чойхўрлик Тошкентда бўлади, бу ерда Бавария пивосини ичиб отамлашадилар», – деб йўлида давом этди. Валерий гўё унинг истагини англамагандай эргашди:

– Бу ҳам яхши таклиф, – деди қувлик билан, – Бавария пивоси ҳаммага ҳам насиб этавермайди.

– Мен таклиф этмадим. Пиво ҳам ичмайман.

– Биламан, сизларнинг «танимаганин сийламас», деган гапларинг бор. Лекин нотаниш одамга нисбатан уйғонган дастлабки нохушлик алдамчи бўлиши ҳам мумкин.

– Мен кутубхонага шошяпман, дарсларим кўп, – деди Абдусамад, энди узр оҳангидা.

– Менинг дарсларим сизнидан ҳам кўп. Лекин кутубхонага бораверишдаги турк қаҳвахонасиға кириб чиқсак, икковимизга ҳам фойдали бўлади, ишонинг.

– Фойда? – деб ажабланди Абдусамад.

– Ҳа, моддий эмас, икки илм одамининг сұхбатидан хосил бўладиган маърифий фойдани назарда тутяпман.

Бу гапдан кейин Абдусамад унинг таклифини қабул қилишга мажбур бўлди. Немислар одатига хос равишда соатига караб олди-да, «майли, аммо ўттиз дақика вакт ажратаман», деб унга эргашди.

Ойнаванд қаҳвахонада одам сийрак эди. Валерийнинг таклифи билан улар дераза томондан эмас, йўғонлиги бир кулоч келадиган думалок устуннинг панасидаги столдан жой олишди. Хизматчи яқинлашиб, «хуш келдингиз, муҳтарам афандим», деб лутф қилгач, Валерий мезбон мартабасини эгаллаб:

– Битта пиво ва битта қаҳва, – деб буюрди.

– Бизда пиво бўлмайди, афандим, – деди хизматчи узрли оҳангда.

– Қизик... қизик... бренди ҳам йўқдир?

– Афандим, бизда маст қипувчи ичимликларнинг ҳеч бири йўқ.

Абдусамад турк қаҳвахонаси йўл устида бўлгани учун шу ерга таклиф қилди, деб йўлаган эди. Валерийнинг ичкарига кириб, бир назар ташлашдаёқ пана жойни танлаганидан бу ер унга яхши танишлигини сезди. Қаҳвахонада ичкилик ичилмаслигини билгани холда буюртма бериши уни янада сергаклантирди.

– Мен нима дейишни билмай қолдим, сиз буюра қолинг, – деди Валерий.

- Пўртахўл шарбатидан иккимизга биттадан, — деди Абдусамад гапни киска қилиб.
- Пўртахўл... пўртахўл... — деди Валерий ниманидир эслашга ҳаракат қилгандай, — Ҳа, демак, апельсин. Гўё апельсин шарбатини ичгандай бўламиз. Ажабланяпсизми? Шарбат пўртахўлники эканига ишонасизми? Дунёда неча юз минг қаҳвахона бор? Уларда неча миллиард одам пўртахўл шарбатини ичиб ўтирибди? Миллион-миллион литр шарбат чиқариш учун неча миллиард тонна апельсин керак бўлади, хисоблаб кўрганмисиз?
- Бу мени қизиқтирмайди.
- Нега? Ошқозонингизни аямайсизми? Ахир бу «шарбат» деганингиз кимёвий моддалардан иборат эканини биласиз-ку?
- Мен шарбатхўр эмасман. Бўкиб ичганимда ошқозонимга жабр бўларди.
- Шарбатхўр эмассиз, пивохўр ҳам эмассиз, — деб кулди Валерий, — демак, фариштасиз!
- Илмий сухбатингиз шуми? — деди Абдусамад энсаси қотганини яширмай.
- Одамларни алдаб, конини кимёвий моддаларга тўйдиришнинг илмга даҳли йўқ, деб хисоблайсизми? Ҳа, майли, унда буни сухбатимизнинг кириш кисми, деб кўя қоламиз. Сизни сухбатга чорлашимнинг сабаби — бу ерда юрагим тарс ёриладиган даражада сикилиб кетди. Аслида илмий ишимни ўзимизда килаверсам ҳам бўларди. Оғир ионлар физикасини биз немислардан эмас, немислар биздан ўрганса,adolatlirok iш килинган бўларди. Мен Кембридж университетига боришни истаган эдим. У ердаги электронларни тезлаштириш лабораторияси бизнидан яхширок, ниманидир ўрганиш мумкин. Лекин Москвадаги амалпарастларнинг ҳисоботида «ёш физик олимлар малака ошириш учун Германияга юборилди», деган катакча бор. Биз ўша катакчаларни тўлдирувчи жонсиз тошчалармиз. Бир нарса билан сира-сира му-

роса қила олмайман: биз буларни урушда енгтан эдик. Ер юзидан суриб ташлашимизга оз колувди. Кирк беш йил тарих учун бир зарра. Шу зарра оралиғида биз паст кетиб, улардан ўрганишимиз керакми?

Савол Абдусамадга берилган бұлса-да, Валерий шарбат келтириб қўйган хизматчига қаради. Абдусамаднинг шарбат ичгиси йўқ эди, шу сабабли ёқимсиз ҳамсұхбатининг кўнгли учун бир ҳўплаб қўйди-да:

– Бу сизнинг дунёкарашингиз, мен бошқача фикрдаман, – деди. У гарчи кутилмаган сұхбат учун ярим соат вакт ажратган бўлса-да, Валерийнинг гапларидан безиб, тезрок туриб кетишни истаётган эди.

– Тўғри, улар урушдан олдин биздан салгина олдинда эди. Масалан, аэродинамикада. Тарелка кўринишидаги учувчи жисмни бошқариш қийинлигини биздаги баъзи довдирлар халигача тан олишни исташмаяпти. Гравитация нималигини билмайдиган олимлар кайси осмондан ёғилган, билмайман. Ҳа, айтмоқчи, урушдан олдин Германияда аэродинамика бўйича яширин ишлар олиб борилган, уруш пайтида ҳам тўхтамаган. Тадқиқотлар олиб борилган жойга «янги Берлин» деган ном берилгани маълум, Гитлернинг аҳволи танглашганда минглаб асиirlар, олимлар қаергадир кўчирилган. Аникроғи, улар изсиз йўқолган. Одамлар ҳам йўқ, тадқиқот натижалари ҳам йўқ. Нега шундай?

– Буни тарихчилардан сўранг.

– Улардан сўрашнинг фойдаси йўқ. Чунки тарих ўзгаради, тарихчиларнинг фикри ҳам ўзгаради. Лекин биз ўзгармаймиз...

Бу гапни эшлитиб енгил сесканди. Бир неча ҳафта илгари Москвада профессор Зиновьев унга айнан шундай деган эди:

«Тарих ўзгаради, тарихчиларнинг фикри ҳам ўзгаради. Лекин улар ўзгаришмайди. Сен мен билан баҳслашмагин-у, агар чинакам олим бўламан десанг, сиёсатдан узокрок юр. Юртдошларингнинг давраси-

дан коч. Ўкишни бил, бошқа ҳеч нарса билан ишинг бўлмасин...»

«Сиёсатдан узок юр, юртдошларинг даврасидан коч», деб масалаҳат бериш осон. Сиёсатга ўзининг ҳам токати йўқ, қанча узоклашса, ўзи шунча роҳатланади. Юртдошлар даврасидан узоқлашишга харакат қилиши ҳам мумкин, лекин мана бу одамнинг шилқимлик билан ёпишиб олишидан қандай кутулсан? Абдусамад шарт ўрнидан туриб кета олмади, бундан фойдаланган Валерий гапини давом эттирди:

– Сиз бу ерга анча ўрганиб қолдингиз. Ҳатто иккинчи ватанингизга айланиб ҳам қолгандир?

– Ватан иккита бўлмайди.

– Олқишлийман, сизни, фақат олқишлийман. Лекин кишининг атрофида ватандошларининг кўплиги ҳам аҳамиятли. Германияда тўрт миллионнинг нариберисида турклар яшайди, биларсиз?

– Мен турк эмасман. Германияда руслар, украинлар, белоруслар ҳам кўп.

– Ҳа кўп, лекин улар бизни одам ўрнида кўрмайдилар. Масалан, уларнинг ҳеч бири мени куёв қилмади, – Валерий шундай деб муғомбirona кулади. – Доктор Худоёрдай устозим ҳам йўқ. Профессор Строгановни эшитгандирсиз? Бултур физика соҳасида Нобель мукофотига кўйилган эди. Шу одам урушда онасига қўшиб бу мамлакатга ҳайдаб олиб келинган. Онаси немисларга чўрилик қилди. Ўзи бу мартабага эришди. Мен кўришмоқчи эдим, қабул қилмади. Менинг нима айбим бор? Урушни мен бошладимми? Отасини жангда мен ўлдирдимми? Онасини қулликка мен ҳайдадимми?

Абдусамад унга тикилиб, «нега норозиликларини менга дастурхон қилиб ёйяпти?» деган саволга жавоб излади. Кейин «мақсадсиз гаплар», деган тўхтамга келиб, туришга чоғлангандай қимирлаб кўйди:

– Сұхбатимизни якунласак ҳам бўлар, мен шошяпман, – деди соатига қараб олиб.

Валерий ҳам соатига қаради:

– Ярим соатга ваъдалашганмиз, – деди айёrona кўз қисиб. – Мен доктор Худоёрнинг ишлари билан танишиб чиқдим, устоз масаласида Худо омадингизни берибди.

– Доктор Худоёр – биофизик, англашимча, сиз ядро физикасига яқинсиз, устознинг ишлари нимага керак бўлиб қолди? – деб сўради Абдусамад сергакланниб.

– Тўғрисини айтами? – Валерийнинг қарashi кескин ўзгарди, кўзларидаги кувлик ўрнини зулм учқунлари эгаллади, энди у ўзининг асл қиёфасига кирган эди. – Доктор Худоёрнинг ишлари нейтрон бомбага алоқадор, деб ўйлабман.

– Хўш, аниқладингизми, алоқадор эканми?

– Буни кутубхонада ўтириб аниқлаб бўлар эканми?

– Унда нима учун китоб титдингиз?

– Менга қизиқувчанлик касали ёпишиб колган, шундан ҳеч кутула олмаяпман. Яқинда сиз Штатдан келган профессор Яквалхўжа билан учрашибсиз, жуда омадли одамсиз-да!

– Омадим нимадан иборат экан? – деди Абдусамад, асабийлаша бошлаганининг ишораси сифатида қошларини чимириб.

Ҳамсухбатида асабийлик аломатининг пайдо бўлиши Валерийни кувонтирди.

– Худди билмагандай гапирасиз: агар Штатда ўнта улуғ физик бўлса, биттаси ватандошингиз доктор Яквалхўжа, иккита бўлса, биттаси шу одам. У билан якин танишлигингизнинг ўзи бир баҳт.

– Мен у одам билан таниш эмасман.

– Камтарлик килманг... Бундай одамлар билан танишиш менинг орзум. Орзуимни амалга оширишга ёрдам бера олмайсизми? Ўзбек бўлмасам ҳам, ҳамشاҳарлик хурматим бордир? Мен у зотнинг бошини кўп котирмайман. Оғир ионларни тезлаштиришга доир бир-икки масалани сўрайман халос. Агар саво-

лим ҳарбий ёки давлат сирига алоқадор бўлса, жавоб бермасалар ҳам майли...

Абдусамадга энди унинг мақсади очикроқ аён бўлган эди. Бу ердан тезроқ кетишни истаб, ўрнидан турди:

– Мен у одамни бир марта кўрганман, саломалигим йўк.

– Лекин кайнотангиз билан алоқаси яхши. Кайнотангиз Париждан қайтганларидан кейин уларни бир финжон қаҳвага таклиф этмокчиман, – деди Валерий унга эргашиб.

– Қахва ичгани Америкадан келиб-кетадими? – деди Абдусамад қўпол оҳангда.

– Бу муҳтарам зот ҳозир шу ерда. Мюнхендан юз чақиримча нарида сиз билан мен яқинлаша олмайдиган бир илмий даргоҳ бор. Кайнотангизнинг биргина қўнғироқлари кифоя...

– Хайр, илмий сухбатимиз унча ковушмади.

Абдусамад шундай деб кўча томон шошилди.

– Ўйлаб кўринг, менинг илтимосимни ерда қолдирганлар кейин афсусланиб юришган.

Абдусамад профессор Зиновьевнинг бекорга огохлантирганини энди англади. Валерийнинг кейинги гапи таҳдид оҳангига эди. Ҳамонки, таҳдид килишдан қайтмадими, энди ундан кутулишнинг иложи йўқ...

Ўйга кайтиб, ёлғиз ўтирган Абдусамад малла йигитнинг ҳар бир гапини қайта-қайта эслаб, таҳлил қилиб, хulosча чиқара бошлади. Унинг кимлиги маълум, мақсади ҳам аниқ...

«Гарбий Германия Совет учун душман эди, эшиклар тақа-так берк эди. Муносабатларни юмшатишдан сабаб ўз одамларини кўпроқ ишга солиши миди? Бизнинг бу ёққа келишимизга ҳам жиддий тўсик бўлмовди. Шу мақсад билан йўлимизни очишганмиди? Энди жосуслик қилишим керакми?»

Абдусамад боши узра янги бало булутлари тўп-

ланайтганини сезиб, нима қиласини билмай, гангиб колди. Москвадаги устози: «Энди бир нарсани миянгга куйиб ол: биология билан физика бир нуктада бирлашиши мумкин, аммо илм билан сиёсат бир қозонда кайнай олмайди, тушундингми?» – деб таъкидланган эди. Тушунишга-ку, тушунади. Сиёсат қозонида қайнатиб, куйдиришни истайдиган кучлар бор бўлса, у нима килсин? Куйиб, ўлишдан бошка чорани кўрмаяпти-ку?..

Эртасига кутубхонага боргиси келмади, малла йигитга дуч келишдан чўчиdi. Индинига ҳам бормади. Кейинги куни уни доктор Худоёр йўклади. Кайфияти яхши бўлса, доктор Худоёр кулимсираб: «кани, биофизика гулшанинда кандай чечакни кашф этдинг?» деб кутиб оларди. Бу сафар кўнгли ғаш бўлгани учун шогирдини ўйчан қиёфада қарши олди. Рўпарасига ўтирган йигитга савол назари билан тикилди-да:

– Кимлар ила шарбатхўрлик килиб юурсан, билюрмисан? – деб сўради. Бу саволни эшлитиб гангигиб колган Абдусамад жавоб беришга улгурмай, яна сўради:

– «Аифклерунгс» деган идорани билурмисан?

Абдусамад ўзини нотаниш копқонга тушиб қолгандай ҳис этиб, жавоб бериш ўрнига устозига «мени кутқаринг», дегандай нажот назари билан каради.

XII б о б

1

Асадбек янги канотларининг дастлабки парвози ҳакидаги кисқа баённи Жамшииддан эшлитиб, ўйланиб колди. Бир вақтлар жавлон урган оламидан у анча узоқлашган, баъзи-баъзида қозиликка доир муаммо туғилса, Ҳайдарнинг зиммасига юклаб қўярди. Ҳозир

Жамшиддан эшитганлари энсасини котириб, пешонасины тириштириди.

– Жуда-а майдалашиб кетишибди-ку, – деди у афсусли оҳангда.

Жамшид буни йигитларига берилган баҳо деб ўйлаб, ёнларини олмокчи бўлди:

– Менам шунаقا дедим. Тарзанни анча уришдим...

– Думбулвойларингни айтмаяпман. Йигитларинг фўрликка фўр. Уларинг одам бўлгунича анча қовун пишиғи бор. Ҳозирги киморбозлар майдалашиб кетишибди, шунга ғашим келди. Тикадигани беш-үн сўм пул-у дабдабаси оламни бузади. Керилишидан ит хуркади-ю, лекин зўрлиги кўринмайди. Калҳожининг килиғини Ҳайдар аканг билмаган эканми?

– Эшитмагандирлар?

– Бу тахмининг тўғри, Ҳайдар эшитиб қолганида буларинг оналарини кўтарди. Эҳтимол Махмуд аканг билгандир, нима дейсан?

– Балки...

– «Балки» эмас, аник! Эшитган-у, «битта ўлик етарли», деб босди-босди килган, тўғрими? Яна нима демоқчисан?

– Калҳожи келибди, сизга арзи бор шекилли?

– Шунаقا дегин... – Асадбек Жамшидга синовчан тикилди: – Арзини эшитайми?

– Эшитсангиз, талтайиб, эртага чориги билан тўрга чикиб ўтирадиган бўлиб қолади.

– Шунақамикин? – хожасининг овозидаги киноя оҳанги Жамшиднинг бошини эгди. – Балки Тарзан ошириб юборгандир, узр сўрашим керакдир? – Жамшид бошини хам қилганича тек тураверди. Мутела-рининг айбдор ҳолатини хуш кўрувчи хожа эса энди ғазабли оҳангга кўчди: – Ўзинг хам фўрлик қиласан, бола! Ҳайдар аканг бунақалар шаҳарда кўриниши билан келган жойига кирғизворарди, менинг бошимни котирмасди.

– Сурга айтаман...

— Сен бундай кил: умид билан келибдими, Ҳайдар акангнинг қозихонасига борсин. Қозихонада... майли, Сур билан отамлашсин. Сурга тайнла, ўлдирмасин. Лекин шундай килсинки, менинг одамларимдан шикоят қилиш бошқа бирон бир калланинг тушига ҳам кирмасин.

Жамшид «вазифани англашим», деган маънода қўлини қўксига қўйди, аммо жойидан жилмади. Асадбек унинг яна гапи борлигини фаҳмлаб, «Яна дардинг борми?» деб сўради.

— Жамолбек акани шу ерга олиб келайми, ўзингиз гаплашасизми?

Асадбек аъёнига савол назари билан тикилди. Жамшид «яна қовун туширдим шекилли», деган ҳадикда нигоҳини олиб кочди. Тарзан киморда ютқизилган болаларнинг изи топилганини айтиб, Жамолбекнинг номини тилга олганда «Ҳозирча унга яқинлашмай турларинг, Бек акамнинг олдиларидан ўтайлик», деган эди. Жамолбек етти иқлимга машхур киморбоз бўлмасада, катта-кичик давраларда эсланиб туриларди. Жамшид уни кўрмаган, лекин Ҳайдар акаси билан Маҳмуд акасининг сухбатларида бир неча марта унинг номини зшифтанди. Айниқса, Садир киморбоз изсиз йўколган кезлари Ҳайдар акасининг «Жамол сичконнинг инини ижарага олиб, тухум босиб ётибди», дегани ёдида. Акалари яхши билган киморбозга хожасининг муносабати қандай экан, буниси Жамшидга коронги эди. Шу боис, йигитларни тўхтатиб, саволни ҳам эҳтиётлик билан берганди.

— «Жамолбек» дегин? У тўққиз қайтган энди «бек» бўлиб колибдими? Ваъдасида турмайдиган тутуруксиз бўлгани учун ҳамма уни «тўққиз қайтган», деб, одам ўрнида кўрмасди. Бир ошнам пайтавасини унинг бошига дурра қилиб ўраб, «Тановор»га ўйнатган эди. Шу хотинчалишни сен «бек ака» дединг-а?

Бу воқеалардан бехабар Жамшид энди нима де-

син? Боини эгиб тураверди. Ҳамонки, эгилган бошни қилич кесмас экан, Асадбек ҳам унга раҳм килди:

— Ҳайдар акангнинг ўрни билингти, — деб сукут килди. Жамшид бу гап шунчаки тасодиф билан такрорландими ё унинг замирида армон бормиди, англай олмади. Асадбек эса давом этди: — Беклик қанақа бўлишини кўрсатиб қўйиш керак. Ўлдиришмасин-у, тавбасига таянтиришсин.

Бу гапдан кейин Жамшид хожасига савол назари билан қаради.

— Гапимга тушунмадингми? — деди Асадбек бу карашнинг маъносини англауб.

— Тушундим-у... факат...

— Ланжлик қилма, хотинчалишлик сенга ярашмайди.

— «Ўлдиримасин», дедингиз... Улар шу пайтгача та-лашган, алдашган, уриб-тепишган-у, ўлдиришмаган. Бу томондан кўнглингиз тўқ бўлсин.

— Ўзингнинг кўнглинг тўқми?

— Ҳар ҳолда... шунаقا гап очганимда Тарзан «одамнинг конидан ҳазар қиласан», деганди. Мен унга ишонаман.

— Одамнинг конидан ҳамма ҳазар қиласи, — деди Асадбек ўйчан. — Ҳайдар аканг ҳам ҳазар қиласарди. Ўз қўли билан бирорни ўлдиришмаган... Лекин баъзи бирорлар Азоилни кўрса кўрқмасди-ю, Ҳайдар акантга рўпара келса, жони чиқиб кета қоларди. Шу пайтгача бу думбулвойларинг кондан ҳазар қиласан бўлса, энди ўзини кўрсатиш учун бир-икки каллани узиб ташлашдан тоймайди. Агар шуни хисобга олмасак, иккаламиз ҳам камоқда чириб кетамиз. Сен бундай қиласан: Сурқиморга уста, деганимидинг?

— Ҳа... бозорда бир машина картошканинг пулини яrim соатда шилиб олганини кўрувдим.

— Тўққиз қайтганнинг даъвоси осмонда бўлгани билан уста қиморбознинг тупугини ялашдан бошқага ярамайди. Лекин шу туринида ҳам бозордаги лакма-

лардан дурустрок эканини ҳисобдан чиқарма. Болалар масаласида сикувга олишдан аввал, кўлидан келса, Сур уни қиморда бир эзиб кўйсин. Чоғи келмаса, ўйинни чўзмасин. Сен менга Жамолни эслатмадинг, мен уни танимайман, тушундингми?

Жамшид бу амри Тарзанга етказганида Ахтам зиммасига ёқимли вазифа юкланганини билиб, мамнунлик билан тиржайди. Айниқса, Жамолбекнинг бошига бир пайлар пайтава ўралганини эшитганида роҳатланиб кулди.

Ўша куни сўраб-сурештириб, Сайрамда катта ўйинга тадорик борлигини аниклашди.

– Радиони эшитиб туриңг: «Сайрамга чориғини судраб борган Ахтам уйига «Ахтам бой» бўлиб кайтди», деган хабарни эшитсангиз, юрагингиз ёрилиб кетмасин, – деди у.

– Катта кетма. Жамолбек аканг картошка бозорида сенга лақка тушадиган овсарлардан эмас, бунақа ишларнинг пири бўлиб кетган, ўрисча қилиб айтганда, «қиморбозликда кўп итларнинг гўштини еб юборган».

– Бунақа гапни эшитганман, «кўп итларнинг гўштини еб», керилган қиморбоз охирида итдай хор бўлишини билмайсизми?

– Ёнларингга яна уч-тўрт одам олларинг. Ўйин катта бўлса, кўнга кўп жонлар ҳам тикилиши мумкин.

– Керак эмас...

– Керак! – Жамшид худди хожаси каби қатъий тарзда унинг гапини узди. – Маҳмаданалик қилма! Ўйин пайтида ҳам, кейин ҳам гапничувалаштирма. Бек акамнинг номларини тилга ҳам олма, яқинлигингни бирор била кўрмасин.

Бўлажак ишнинг хатарини Тарзан англаб, «чизган чизигингиздан чиқмаймиз», дегандек қўлини кўксига кўйди. «Бу дунёда бехатар иш йўқ», деб ҳисобловчи Сур эса, шеригининг хавотирини «нозик-ниҳол ипак йигитнинг навбатдаги кўркоклиги», сифатида баҳолади.

Сайрамда катта ўйин бўлишидан милиция хабар топгани учун қиморхонани Ўтрор томонга кўчиришга тўғри келди. Чала курилиб ташлаб қўйилган беш қаватли иморатнинг ертўласи шоҳона безатилмаса-да, қиморга мослаб жиҳозланди. Катта шаҳарлардан кутилаётган қиморбозлардан дарак бўлавермагач, ўйинни кичикрок даврада бошлайверишига қарор қилиниши Тарзан билан Ахтамнинг даврага қўшилишларини осонлаштириди. Аввалига бу икки нотаниш келгиндини яқинлаштиришни исташмади. «Жамолбек акамизга қуюқ саломимиз бор», дейишгач, ичкарига хабар килишиб, ижозат текканидан сўнг омонат курилган эшикдан кўйишиди. Даврада ҳал қилувчи сўзни айта олиш хуқукига эга Жамолбек бу овлоқни излаб топиб келган икки йигитга шубҳа билан қаради.

— «Садирнинг жиянимиз», дебсанларми? — деб сўради у.

— Ҳам жияни, ҳам шогирдимиз, — деб аниқлик киритди Тарзан.

— Қизик... бунақа кетворган жиянлари борлигини билмаган эканман? — деди Жамолбек улардан кўз узмай. Бу қарашдаги «мени лақиллатмоқчимисанлар?» деган маънони уққан Тарзан пинагини бузмай, ҳазил оҳангига жавоб берди:

— Катта бувамизнинг ўн тўртта хотинлари бўлган экан. Садир тоғамизнинг адалари еттинчи хотиндан, бизнинг адаларимиз ўн тўртинчисидан туғилган экан. Биз супракоқдимиз. Садир тоғамизга жиянлигимизни кўчалари аспал бўлганидан кейин билиб қолдик.

Садир коморбоз кўчасига кўмилиб, усти асфальтланиб ташлаганини даврадагиларнинг кўпи билмагани сабабли бу гапга эътибор беришмади. Жамолбекнинг эса эти бир жимиirlаса-да, сир бой бермай, оҳангини ўзгартирмади:

– Садир хотин зотига ўч эди, бобосининг қонидан ўтган экан-да?

– Қиморбозлик ҳам ўтган. Катта бувамиз Тошканда ошиқ тепсалар, Бухоронинг миноралари зириллаб турар экан.

– Қара-я!.. Сенлар ҳам ошиқ тепасанларми? Агар шунака бўлса, бу ерга келиб, адашибсанлар, ошиқ тепадиган жой бошқа.

– Адашмадик. Биз картада ташлашамиз. Хохласангиз проферанс, истасангиз покер ҳам ўйнайвемиз.

– «Покер», дегин? Садир покер-мокерингни билмасди.

– Тўғри, билмасдилар. Акам, – Тарзан шундай деб Ахтам томонга қараб қўйди, – Магадандаги курортга борганида америкалик билан бирга бўлиб қолибди. Америкаликка ошиқ тепишни кўрсатган экан, у акамга покерни ўргатибди. Халқаро тажриба алмашинув шунака бўлади-да. Ҳозир Лос-Анжелесдаги казиноларда максус ошиқтепар бўлимлар очилибди. Уч хафтадан кейин ўша ерда байналхалқ ўйин бўлади. Борай десак, йўлкира чакяпти. Бугун йўлкирани шу ерда ишлаб топмоқчимиз.

Бу даъвони эшитган қиморбозлар бир-бирларига маънодор қараб олишди.

– Биз билан ташлашиб, йўлкира топмоқчими-санлар? – деди улардан бири ўрнидан туриб. – Белларинг чидайдими, ҷоғларинг келадими?

– Кучаниб, чатаноқларинг йирилиб кетмайдими? – деди иккинчиси заҳархандалик билан.

– Қани, чўнтакларингни кавлаб кўрларинг-чи? – деди Жамолбек, уларни қувватлаб.

– Чатаноқларимиз бакувват, хотиржам бўлинглар, – Тарзан шундай деб, Ахтамга қаради. У эса хотиржам равишда чўнтагидан битта ўн сўмлик чиқарив, стол устига қўйди.

– Шунинг ўзими? – деди Жамолбек, кейин пичинг килди: – Икки кишига кўплик қилмайдими?

– Бошлаб олишга кўплик қилади, – деди Ахтам унга ўткир нигоҳини қадаб. – Бу иккиват пул, ўйин бошланиши билан туғишини бошлайди. Итдан ҳам кўп болалайди. Кейин... мен ўйнайман, укахоним, пул тахлаб ўтиради. Унинг бармокчалари пул санашга мосланган.

Чакирилмаган йигитларнинг сурбетликлари ўтирганларнинг ғазабини қўзғатиб, уларни тепа-тепа кўчага суриб чиқаргилари келди. Лекин Жамолбекнинг хотиржамлиги уларни бу ҳаракатдан тўхтатиб турди. Жамолбек бармокларини қисирлатиб, бир оз ўйланди. Бурама гапларга ўралган маъноларни тушунишга уринди. Йигитларнинг аник максадларини англай олмаса ҳам, уларни тепиб чиқаришга шошилмади. Ўйинга кўйишга карор қилди:

– Ўтири, – деди Ахтамга рўпарасидаги бўш жойни кўрсатиб. – Пулнинг иккиқатлигини энди эшишим. Агар шу рост бўлса, туғиши пайтида ўлиб қоладиганлари ҳам бор. Демак, шу иккиват ўн сўмингга ишониб, биз билан покер ўйнамоқчимисан?

Ахтам жавоб беришга улгурмай, Жамолбекнинг ёнида ўтирган одам тўнғиллаб, гапга аралашибди:

– Покер-мокерларингни йўқот. Ўзимизнинг билганимиздан қолмайлик. Покер ўйнагиси келаётган бўлса, Америкасига борадими ё ундан наригами, бора-версин.

– Узоқка бориб нима қилади? – деди яна бири. – Ана, Сариоғочда казино очишибди, беш-олтита думи кесилганлар покер суроётганмиш.

– Халқ кўнмаётиби-ку, нима қиламиз? – деди Жамолбек яна пичинг билан.

– Халқ нима деса шу-да! – деди Ахтам ҳам шундай оҳангда. – Устасига фарки йўқ, қўлимга карта тушса бўлди, суравераман.

– Бунака мард киморбозни анчадан бери кўрмаган

здим, – деди Жамолбек. – Мардлик қилиб келибди, биз ҳам тантилик қилайлик. Иккиқат пулини бир қўлда ютқизиб, шумшайиб кетмасин, кўнни катта қilmаймиз, эллик тийиндан тикамиз.

– Чақани қаердан оламиз, бир сўмдан булаверсин, – деди Ахтамнинг ёнида ўтирган киморбоз. – Укахон, бир сўм оғирлик қилмайдими?

Киморбозлар бир-бирларига маънодор караб, жилмайгандарича ўртага бир сўмдан ташладилар. Ахтам нодон, анқовлардан эмас, уларнинг масхара қилмокчи бўлганларини англаб, мийиғида кулиб кўйди. Тарзан даврадан чекиниб, деворга суяниб турди.

– Нега четлашдинг? – деди Жамолбек. – Иккиқат пулларинг туккан болаларини санаб олмайсанми?

Бу гапдан кулган киморбозлардан бири пичингни давом эттириди:

– «Туғолмай ўлган иккиқат пулга жаноза ўқимайсанми?» денг...

Захарли бу ҳазиллардан ғашлари келса-да, икковлари ҳам жилмайиб кўйиш билан тийилдилар. Ахтам уч гал кетма-кет ютқизди. Киморбозлар уни очиқласига калака қилаверишгач, у хунарини ишга солди. Оқибатда, ўз таъбири билан айтганда, «иккиқат пули туға бошлади». Даврадагиларнинг чехралари жиддийлашиб, масхарани бас қилдилар. Кўп ўтмай, очиқласига ғазаблана бошладилар. Борини ютқизган одам Ахтамни ғирромда айблаганда Жамолбек ўртага тушиб, «исботинг бўлмаса, гапирма», деб уни қайириб ташлади. Шундай айблов бўлишини сезгани учун Ахтам енгларини шимариб ўйнарди. Енгига карта яширмаса, ўзи билан карта олиб келмаган бўлса, бегона жойда шунака кўп ютиш мумкин эканми – ўтирганлар шунга ҳайрон эдилар. Жамолбек унинг ҳаракатларини синчиклаб кузатиб, гайри оддий бирон нарсани сезмагач, маҳоратига тан берди-ю, бу йигитнинг шунчаки пул ютиш максадида келмаганини фаҳмлаб, эҳтиётлик билан ўйинни давом эттириди. Пулларини ютқизганлар

бир-бир ўйиндан чиқавердилар. Шунда Жамолбек йигитнинг битта мақсадини сезди: «Охирида мен билан бирга-бир ташлашмоқчи, бор-йўғимни шилиб олмоқчи, демак, мени атай кидириб келган... Нега?»

Ана шу «нега?»га жавоб тополмай ичи куйди. Даврада уч киши қолишганда Ахтам ҳаддидан ошди: бўлар-бўлмас гаплари билан Жамолбекнинг жигига тегаверди. Айниқса, ютилган пулларни ўзи томон сураётганда «Афандининг гапи тўғри, бу дунёда хамма ўғри», деб хиргойи қиласавериши тоқат жомини тўлдириб, тошириб юборди. Ёнидаги пулнинг ярмидан кўпини ютқизган Жамолбекни ғазаб ўти ўз бағрига олди. Бутун жону жаҳонини тикиб бўлса ҳам бу сурбет боланинг абжағини чиқариб ташлашдан ўзга нарсани ўйламади. Махоратда оқсаса-да, тажрибаси кўп бўлган бу қиморбоз керакли чегарарада ўзини тўхтатиб колиши лозимлигини унутди. Учинчи қиморбоз «йўлкирага етарли пулим қолди», деб ўйиндан чикканда Тарзаннинг бирдан ғойиб бўлиб қолганини Жамолбек сезмади. Ташқарига чиқкан Тарзан хаялламади. Унинг изидан хонага кўзлари чақчайган икки бақувват йигит кириб келгач, ютқизик аламини тотиб ўтирганлар қиморхона устида зулм булути тўпланаётганини англаб, секин-секин чиқиб кетдилар. Охирги пулини ўртага ташлагандан кейингина Жамолбек атрофга каради: қиморбозлар йўқ, ўзи билан келган ҳимоячи йигитлари ҳам кўринмади. Хонада Тарзан билан икки нотаниш йигит кўзарини чақчайтириб унга тикилиб туришибди. «Йигитларим қани?» деб сўрамади, «буларнинг шум нияти борлигини сезган эдим, нега арқонни узун ташладим?» деб ўзини лаънатлади. Бўлар иш бўлган, энди Худога нола килишининг фойдаси йўқлигини билиб, «шартингни айт», деб Ахтамга каради. Ахтам «пачағингни чиқариб ташладим-ку!» дегандек тиржайди.

— Уч қўл ташлаймиз, шу пулларингга уйимни тикаман, — деди Жамолбек алам билан.

– Тўғри киласиз, уй топилади, обрў топилмайди. «Бир Мурда келиб, Бекнинг иштонигача ютиб олибди», деган иснод ёмон.

– «Мурда» дедингми?

– Ҳа, Магаданда менга шунақа от беришган. Сал хунукрог-у, аммо ўзимга мойдек ёқади.

«Сени шу ерда тобутга тикиб, исмингни жисмингга мос қилиб қўйишим керак», деган ният хаёlinи ёритди-ю, аммо тилига чиқармади. Ҳимоячи йигитлари шу хонада шай турганида ҳам, дилидагини айтишга журъат этарди. Ҳозир эса... орзу бор, унинг амалга ошуви эса мубҳам.

Ахтам тантилик қилиб, уч мартасида ҳам карта сузиб, таркатиш ҳукукини Жамолбекка инъом этди. Йиллар давомида кад ростлаган дангиллама уй олти даққада Ахтам ихтиёрига ўтди. Жамолбек бошини згди-ю жим қолди. Ғазабдан бағри ёнаётганини тез-тез нафас олиши ошкор этди. У уятдан эгмади бошини, нафрат ва алам юкини кўтара олмади.

– Дастурхонни йиғаверамизми, яна кўз ёшидан ивib кетмасин, – деди Ахтам заҳархандалик билан.

Кейинги гап Жамолбекнинг танасига қиличдек урилиб, қоқ иккига ажратиб ташлагандай бўлди.

– Ўзингдан кетма, бола, ўйин ҳали тугагани йўқ... – деди Жамолбек ҳансирааб.

– Ким ўйин тугади, деяпти? Энди қизияти-ку? Нимани тикасиз, акахон? Фақат... илтимос, хотинингизни тикманг, «Мурда бир туршак кампирни ютиб олибди», деган гапдан ор киламан. Майли, ўйлаб олинг. Қарзга ўйнамайман. Балки... невараларингизни тикарсиз, ёмон таклиф эмас, а?

Қилич заҳмидан азоб чекаётган вужуд энди қиймаланди, бу ҳам етмагандай ўтга ташланди...

Жамолбекнинг кўз олди қоронғилашди. Хира парда ортида фақат стол устидаги қизил гулли чойнак кўринди. Уни отиб сурбет йигитнинг бошини ёрмокчи бўлди. Аламзада қиморбознинг бу харакатини ол-

диндан билгандай, йигитлардан бири сапчиб, унинг қўлларини кайирди.

– Ҳа, нима бўлди, акахон? Тумруғингни чаён чақдими? Невараларингни тиксанг ўйнайман, бошқасига кўнмайман. Тикасанми?

Қўлларини бураётган бақувват йигитнинг чангалидан чикиш умидини узган Жамолбек гап оҳанги ўзгариб, сенсирашга ўтилгач, типирчилашни бас қилиб, ҳансираганича «Йўқ», деди. Кейин жон бераётган одамнинг тушкун овозида қўшиб кўйди: «Бўлди, ўйин тамом...»

– Ўйиннинг қачон тамом бўлишини мен айтаман. Сен шу туришингда невараларингни кўнга тикдинг. Иккитамиди неваранг? Аслида менга учтаси керак. Майли, укангнинг битта неварасини ҳам кўшамиз. Ўйин кетди!

– Бўлди қил! Сен мени билмайдиганга ўхшайсан. Сен ўзингга ўзинг гўр қазияпсан!

– Адашдинг, сен галварс! Шу келишимда сенга гўр қаздириб қўйганман. Невараларингни ютиб олганимдан кейин олиб бораман, охирги масканингга. Садир тоғам «ошнамни юборларинг, аспалнинг тагида ётавериб зерикиб кетдим», деганиди. Ўйин кетди, учта одам гувоҳ. Кўзингни катта очиб, караб тур, уч қўл ташлайман.

Набираларни ютиб олиш икки дақиқага бормади.

– Ҳайвон экансан, сен бола! – деди Жамолбек тишларини ғижирлатиб.

– Ҳайвонликни сендан ўрганган бўлсам-чи? Сен учта етимни чириллатиб олиб кетаётганингда одаммидинг?

Жамолбек бошини кўтариб аввал Ахтамга, сўнг Тарзанга каради, бу йигитларнинг асл максадлари энди унга аён бўлган эди.

– Икки йиллик гапни кавлаштириб келдиларингми?

– Икки йилда эсдан чикиб кетади, деб ўйловдингми? Бунака ҳайвонлик икки юз йилда ҳам унудилмайди.

– Мен ҳаппа-ю ҳалол ютиб олганман, сенларни ким юборди?

– Қанақасига ютиб олганингни билмайман, лекин отаси ўлиб, онаси қамалган болларни олиб кетишга ҳаққинг йўқ эди.

– Ўзинг кимсан-ки, бунакасига ажрим қиласан?

– Кимлигимни айтдим-ку? Мен – мурдаман, укахонимнинг оти – Азроил. Шунақасини эшигтганмисан?

– Ким юборди, сенларни?

– Меровмисан? Садир тогам юборди, дедим-ку? Ёнларига бугун борасанми ё уч-тўрт кун кутайми? Сен менга бунақа олайиб қарама. Мен инсофли мурдаман. Ўликлар орасида мендақаси йўқ. Агар хоҳласанг, келишамиз: невараларингнинг ўрнига ўша болаларни бера кол.

– Қаердан оламан уларни?

– Бу нима деганинг? Қани улар? Ўлдириб юбордингми? Гўштларидан мастава қайнатиб ичдингми?

– Тилингни тий! Оркангда ким турганини билиб турибман. Сен унга ишониб, катта кетаверма. Сен якинда пайдо бўлган боласан. Мен вактида акахонимнинг хизматларини қилганман. Агар қилиқларингни эшитиб қолса, терингни шилиб олади.

– Ким экан у, айт-чи?

– Ўзинг биласан.

– Билмайман, билишни истамайман. Мен ўзимга хон, ўзимга бекман. Хўш, болларни неча кунда топиб берасан?

– Билмайман, уларни кўрмаганимга бир яrim йилдан ошди.

– Қачон кўрганинг билан ишим йўқ, улар қаерда?

– Билмайман... мен уларни ютқизиб қўйганман.

– Кимга?

– Билмайман... узокдан келган экан.

– Сен бўласан-у, ким билан ўйнаганингни билмайсанми?

– Ҳа, билмайман...

– Ёшлигингда бир одам бошингта пайтавасини ўраб, ўйнатган экан, эсингдами?

Нега эсламасин? Ютқизиклар, хорликлар, хўрликлар унutilмайди. Кишини гўрга қадар кузатиб боради. Лекин...

«Бу сурбет ўша хорликни нега эслатяпти? Буни кам одам биларди. Билганларнинг кўпи ўлиб ҳам кетди. Тириклардан бири Асадбек ака, иккинчиси Ҳайдар ака эди... Наҳотки, улар шу мишиқига гапириб беришган? Агар гуноҳим жиддий бўлса, Ҳайдар ака козихонага чақириб танобимни тортиб қўярди. Буларни нега юборди?»

Мушоҳада қилиб, саволларга бамаъни жавоб тошишга Жамолбекнинг фурсати йўқ эди. Пайтава воқеасини эслаб олиши учун Ахтам унга бир неча нафас фурсатни инъом қилиб, гапини давом эттирди:

– Мен бошингга пайтава ўраб ўтирумайман. Кафанга тикиб қўя қоламан. Йўқ... сенга бу ҳам ҳайф, – шундай деб Тарзанга каради: – Азроил, нима дединг, кафанга ўрашга арзийдими бу хунаса? – Тарзанга шеригининг қиликлари маъқул келиб, жилмайиб қўйди. – Ана, Азроил куляпти, демак, Садир тоғамнинг олдига шипшийдам бўлиб бораркансан. Қани, тур!

Кимирлашга Жамолбекнинг ҳоли колмаган эди. Кўлинини бураб турган йигит туртиб турғизди-да, эшик сари судради. Унга иккинчи йигит ёрдам берди. Ташқарига чиқишгач, Жамолбек бошини кўтариб, атрофга нажот билан олазарак каради. Тонг коронғулигига зоғ кўринмади. Уни туртиб, анча ергача қарийб судраб бордилар. Бу томонга келишаётгандага чўмичи синган экскаватор пойидаги чукур ўрани кўриб, Ахтам ниятини шу ерда амалга оширишни мўлжаллаб қўйган эди. Жамолбекни шу ўра лабига олиб келдилар.

— Қара, думларинг шу ерда, — деди Ахтам.

Жамолбек ботаётган ой ёруғида икки одам корасини күрди.

— Болаларни сендан ютиб кетган шоввоз ким эди, айт!

Ахтам шундай деб ўдағайлаб, уни қаттиқ туртди. Агар күлини қайириб турған йигит бўлмаганида у пастга учиб тушарди. Бу туртки кафансиз кетишига яқин қолганидан хабар бергандай туюлиб, нафаси қайтди. Иккинчи турткида шошиб-шошиб тилга кирди. Керакли маълумотларни билиб олгач, Ахтам йигитга «қўйиб юборавер», деган маънода имлади. Кўли бўшаб, «кутулдим», деб қаддини ростлаши билан Жамолбек оркасидан тепки еб, ўрага учиб тушди.

— Тракторчига айт, тупрокни сураверсин, дунёда учта хунаса камайди, — деди Ахтам овозини баландлатиб.

Атрофда трактор ҳам, тракторчи ҳам йўқ эди. Бундан бехабар чорасизлар талвасага тушиб, Ахтам билан Тарзанга кўнгилро хашни бахш этишди.

3

Янги қўшқанотларининг қилиқларини Жамшиддан эшигтан Асадбек мийигида кулиб қўйди.

— Агар Ҳайдар аканг тирилиб келса, Сурга шогирд тушса бўларкан. Ўйинини жуда-а мактаб юбординг, агар қиморни ташламаганимда бурнини ерга ишқаб, адабини бериб қўйган бўлардим-а! Тўккиз қайтганини ютиш иш эканми? Агар тўққиз қайтган ўша давранинг зўри бўлса, қолганларининг аҳволи маълум.

Асадбек шундай дея туриб Жамшид узатган коғозга кўз югуртирди-да «Томскка боғлан, Балабухани топ», деб буюрди. Икки соатдан сўнг Балабуха ўз уйида телефон гўшагини кўтарди. Асадбекнинг илтимосини эшитиб, ўйланди:

— Арсен, лақаби «учувчи», Воронежда яшашы аниқми? — деб қайта сұради.

— Аник бұлса керак? — Асадбек шундай деб савол назары билан Жамшидға қаради.

— Бунақасини эшитмаган эканман, — деди Балабуха мужмал оханды.

— Балки янги олифтадандир?

— Янги олифтадар бола еталаң юришмайды. Ұша ернинг үзіда пулға алмаштиришади. Майли, мен суриштириб күрай-чи...

Мужмал ваъда берган Балабуха ярим тунда күнғирок қилиб, Воронежда ҳам, унинг атрофияда ҳам Арсен деган киморбоз йўқлигини билдириди. Бундан ғазабланган Асадбек сўкиниб қўйди-да, ташқарига чиқиб болохонадаги йигитни чақириди:

— Жамшидни топ, тўққиз қайтганинг ё тиригини, ё ўлигини топиб, эрталаб Ҳайдар акангнинг қозихонасига олиб келсин! Сур билан Тарзан ҳам үша ерда бўлсин!

Жамшид Бек акасининг бу топшириғини вактида бажара олмади. Жамолбекни эрталаб змас, пешинга яқин топиб келди. Шошқич чорланганларининг сабабини билолмай хуноблари ошган Тарзан билан Сур бу вакт мобайнида қозихонада ипсиз боғлангандай бўлиб ўтиришди. Жамолбекнинг нима учун чақирилганини ўз тахминича билган Жамшид уни йигитларга рўпара килмай, самоварчининг хонасига киритиб, «жон керак бўлса, қимирламай ўтиринг», деб тайнлагач, хожаси-никига караб кетди.

Асадбек уни нороzi нигоҳи билан қаршилади.

— Бек ака, топиб келдим, — деди Жамшид айбородада синик овози билан.

— Ўзинг туғиб, бира тўла катта қилиб олиб келдингми? — деди Асадбек заҳарли оханды. — Қачон топиб келишинг керак эди?

— Беркиниб ётган экан...

Жамшид үзини оқлаш учун бошқа гап топа олмай,

бошини эгди. Асадбек буйруғининг вактида бажарилмаганидан ғазабда эмас эди. Қиморбознинг беркиниб ётганини фаҳмлаган, тахмини бўйича, Жамшид уни эртага топиб, рўпара килиши керак эди. Вазифа мўлжалидан олдин бажарилганидан кувониш ўрнига норози қиёфада туришидан мақсад – тобеларини қаттиккўллик билан ушлаб туриш эди. Жамшиднинг синик ҳолда туриши унга маъқул келиб, ортиқча танбеҳ бериб ўтирмай, машина томон юрди. Ҳожасининг ғазабидан осон қутулганидан мамнун бўлган Жамшид эса чакконлик билан олдинга ўтиб, машина эшигини очди.

Асадбекнинг қозихонага кириб келишини кутмаган Тарзан билан Сур шошиб қолишиди. Саломларига алиқ олинмагач, довдираганларича Жамшидга ҳам савол, ҳам нажот назари билан қарашган эди, у «мен ҳеч нарса билмайман», дегандай нигоҳини олиб қочди.

Бургут полопонини учишта ўргатиш максадида баланд қоядан пастга ташлар экан. Асадбек бу икки қанотига унча мураккаб бўлмаган вазифани топширган эди. Ҳомлик қилган йигитларни энди қоядан ташлаб, иложи бўлса, тошлигарга бошларини уриб, кўзларини очиши керак эди. Бир неча дақиқа мобайнида дам унисига, дам бунисига каттиқ тикилиб турди. Жамшид қозихонада бундай сукунатли дақиқаларга сира гувоҳ бўлмаган эди. Бу ер сирли қарашлар макони эмас, балки киска фурсатли дўқ-пўписа изидан келувчи калтаг-у оху фарёдлар маскани эди.

– Қойилман, йигитнинг гули, – деди Асадбек Ахтамга тикилиб. – Боплабсан. Ўғил бола иш шунақа бўлиши керак. Энди болаларни олиб келиш керак. Воронежга ўзинг борасанми?

– Бир оғиз гапингиз... – деди Ахтам гап оҳангидаги пичингни сезмай.

– Сенга бир оғиз гап кифоя килса яхши... – шундай деб Тарзанга қаради: – Сенга ҳам кифоями?

Тарзан бу саволдан хожасининг мақсади не экан

нини англамай, мутелик ифодаси сифатида күлини кўксига кўйиш билан чекланди. «Бу айёр... жуда айёр, ичиди нима борлигини билиш кийин», деб ўйлади Асадбек, кейин Жамшидга қараб имлаб кўйди. Икки-уч дакиқа ўтмай Жамшид Жамолбекни бошлаб кирди. Кўркувдан ранглари окариб, лаблари титраётган Жамолбек эшик рўпарасида турган таниш йигитларни кўрди-ю, жони чикиб кетаёзди. У нима учун чақирилганини биларди, тўғрироғи, чорланишини кутаётганди. Ўрага йиқилганида тирналган, шилинг ан жойлари битмаган, кўркуви эса баттар ошган эди. Беркиниб ётган еридан чиқиб, Жамшидни кўрганида «ё Ҳайдар акам ё Асадбек акам чақиртирганлар», деб ўйлаган, Кесакполвоннинг ғазабига учрашишнинг оқибати хайрли эмаслигини билгани учун Бек акасига рўпара бўлишини Худодан сўраган эди. Қозихона остонасидан ҳатлаётиб, аввал Ахтами кўрди-ю, унинг қаҳрли нигоҳи билан кўзлари тўқнашгач, «энди бу ўлдиради», деган ўйда оёкларидан жон кочгандай туюлди. Жамолбекнинг кириб келишини кутмаган Тарзан эса ажабланиб, хожасига қаради. Жамолбек ҳам беихтиёр у караган томонга ўгирилди-ю, најжот фариштасини кўргандай кўзлари чакнаб кетди. Ҳаяжон ва умид билан «Бек ака!» деганича кучоқ очиб юрмокчи эди, Жамшид елкасидан ушлаб тўхтатди.

— Ассалому алайкум, Бек ака! — деди кўзларини пирпиратганича.

Асадбек саломга алик олмади. «Сенам одамми-сан?» дегандай унга бир оз тикилди-да, сўнг назарини Жамшидга каратди:

— Янги пайдо бўлган «бек» шуми? Довруғи эсимни тескари қилиб юборди-я! — деди истехзо билан. — Нима бўлди, башарасини ит таталаганми?

Саволга жавоб қайтариши лозим эмаслигини фаҳмлагани учун Жамшид Жамолбекнинг елкасини ушлаганича жим тураверди.

– Кучайибсан, Жамолбек! – Асадбек «Жамолбек»ка кинояли ургу бериб, калбида нажотга умид уйгонган киморбознинг жонини суғуриб олгандай бўлди. – Бoshингга пайтава ўралгандан кейин майдакамдам бўлиб кетганингни эшитган эдим, қачондан бери «бек»сан?

– Унақамас, Бек ака... – деди Жамолбек титрок овозда. – Беклик факат сизга ярашади. Одамлар ўзича айтиб юришибди, мен орзу ҳам қилмаганман, Худо урсин!

– «Худо урсин»ми? Худонинг сендан бошка ташвиши йўкми? Анави Мурданинг ургани камлик килдими?

Жамолбек бошини эгди-ю, жавоб бермади.

– Сур, «Жамол Бек» акангни кўряпсанми? – Асадбек «Жамолбек»ни заҳарли киноя оҳангига айтди. – Бир томонда сен, бир томонда у, яна бир томонда мен турибман. Жамшид ўйинда йўқ. Қани, каллангни ишлат-чи, уччаламиздан қайси биримиз лақмарокмиз? Жавоб бера оласанми?

Ахтамнинг бош эгиш, ерга қараб айбига икрор бўлиш одати йўқ эди. Ҳожасига «гапингизга тушунмаяпман», дегандай безрайганича қараб тураверди.

– Маҳмаданалик қилишга тилингнинг суюги йўқ-ку? – деди Асадбек қаҳрли овозини кўтариб. – Бу аканг сени лақиллатибди, сен эса мени овсар деб ўйлабсан. Шунақами?

– Мен буйруғингизни бажардим, – деди Ахтам ўжарлик билан.

– Буйрук бунақасига бажарилмайди. Мен «биров лақиллатса лаққа тушиб қайтиб келавер», деб буюрмаган эдим. Бугун акангни олиб, Воронежга жўнайсан. Арсен деган киморбозни топиб, оёғига йиқиласан.

Бу гапдан кейин Ахтам чорловдан мақсад не эканини англаб етиб, лаби гезарди. Қиморбоз томон сапчиб, уни ерга булғалаб ташлагиси келди. Тириклайн кўмиб юбормаганидан афсусланди.

– Алдабдими? – деди Ахтам, муштумини туғиб.

— Алдаганми ё йўқми, ўзидан сўра, — деди Асадбек.

Иш кутилганидан нисбатан осонрок битганидан қувониб қайтишаётганида Тарзан шеригига «дунёда шунаقا довдирлар борлиги ҳам яхшида, а!» деб қўйган эди. Ҳозир ўша довдир томонидан лақиллатилганини билиб, шу лакмалиги туфайли хожаси хузурида иснодга қолгани учун ўзини ўзи лаънатлади. Ахтам қиморбозни ўлдириб юбормаганидан афсусланган бўлса, у «тирик колдирганимиз яхши бўлган экан, бу хунаса сирни ўзи билан олиб кетганида бошимиз маломатдан чиқмас эди», деб, хожаси олдида ўзини оқлашга имкон сақланиб қолгани учун ўзига таскин берди.

Жамолбек кутилмагандан тиз чўқди, Жамшид уни ушлаб қолишга улгурмади. Ахтамнинг сапчиб, ташланаб қолишидан кўрқсан Жамолбек жонҳолатда тез-тез гапира кетди:

— Бек ака, айбимга икрорман, лекин шундай килишга мажбур эдим, мен буларни танимай туриб, қанақасига тўғрисини айтаман? Башарамдаги ярачақалар тузалгандан кейин ўзим келиб, сизга айтмоқчи эдим.

— Бу болларнинг кимлигини билмадингми? Пайтавани эсингга солишибди-ку, шунда ҳам фаросатингни ишлатмадингми? Бахтинг бор экан, боллар хомлик килишибди, Садир ошнангга ачомлатиб қўйишлари керак эди.

— Унақа деманг, Бек ака, мен сизни акам деганман, ҳар куни намозларимда дуойи жонингизни қиласман.

— Нима дединг? Ҳали сен намоз ўқийсанми?

— Ўқийман, Бек ака...

— Кундузи намоз ўқиб, кечаси кимор ўйнайсанми? Ҳажга ҳам боргандирсан?

— Борганим йўқ-ку, умид билан юрибман, сизни «борарканлар» деб эшитувдим, биллалашиб боришни Худодан сўраяпман.

Бу гапни эшитиб, Асадбек стол устидаги пиёлани олиб унга карата отди-да, «хе, сендака хожини...», деб сұкина кетди. Пиёла елкасига тегиб, суюгини зириллатиб юборган бұлса-да, Жамолбек чўқкалаганича тек тураверди. Асадбек сұкина туриб, ўзидан ўзи норози бўлди. Бир пачок қиморбоз олдида паст кетгани учун ғашланди. Вужуди кирланиб кетгандай туюлиб, афтини буриштириди. Бунақа килиқ Кесакполвонга хос эди. Ўзини Кесакполвон ўрнида кўриш дилини тилиб ташлади. Ахтамни биринчи марта кўрганида Кесакполвонни кўмсаган эди. Тўғри, ошнасининг айрим хурмача киликлари ёқмасди. Лекин унинг ўлишини, айниқса, хорланиб ўлдирилишини истамаган эди. Ахтам бетгачопарлиги билан ғашини келтиранида «Ҳайдар ўзи паст кетса ҳам, бунақаларнинг олдида пастлашишдан мени ҳимоя қиласди», деб амрон килганди. Ҳозир бу хакиқатга яна бир карра амин бўлди. Сукут саклаш ўзига нисбатан бўлган нафратини ошкор килиб кўйиши мумкин эди. Шу боис:

– Невараларингни ютқизибсан-а? – деди қаҳр билан.

«Саводул-важҳ фид-дорайн» дейилганидек, икки дунёда юзи коралик нима эканини фаҳм этмайдиган Жамолбек бу саволни эшитиб, Асадбекка яқинлашиб, оёғига бош урмок мақсадида ўрнидан турмокчи бўлган эди, Жамшид елкасидан босиб, кимирлатмади.

– Невараларимни мен тикканим йўқ, ўйин ғирром бўлди, Бек ака, – деди нажотдан умид узмай. Унинг бу холати оч бўрига рўпара келса-да, тирик қолишдан умидвор бўлаётган нодон кўзига ўхшарди. Нодон умидворларни кўп кўравергани учун Асадбек бунақаларнинг аҳволларига ачинмасди, майдалашиб ўтирамай, Кесакполвон ихтиёрига топшириб юбораверарди. Ҳозир бир ишора қылса ёки юз ўгириб чикиб кетса, тиш қайраб турган бу икки йигит уни ур калтак-сур калтак килиб ташлаши аниқ эди. Арконни узун таш-

лаб, бу пачоқ қиморбозни рухан бурдалаб ташлаш мақсадида Ахтамга қаради:

- Сур, ғирром ўйнадингми?
- Ҳаммаси ҳаппаи ҳалол бўлди, Бек ака, – деди Тарзан.
- Сендан сўрамадим, – деб, Асадбек Ахтамдан жавоб кутди.
- Мен ғирромдан ҳазар қиласман. Ишонмасангиз, кўзингизнинг олдида бошқатдан ўйнайман.
- Эшиятсанми? Ўйнайсанми, «бек»?

Жамолбек «ўйнайман» дейишининг оқибати нима бўлишини англаб, «йўқ» деган маънода бош чайқади.

– «Фирром» деб даъво килганингдан кейин гапингда тур. Ҳажиқизлик қиласверма. Сур, ўйна. Ютқизсанг, ўзингни тикасан, бунинг пайтавасини ўзинг ўрайсан.

Сур бу буйруқдан мамнун бўлиб, Жамолбекка қараб ишшайди-да, чўнтағидан карта чиқариб, стол устига ташлади:

- Ўзи чийлаб, ўзи тарқатсин! Уч кўл ташлаймиз, ўйин шунақа бўлган...

Жамолбек «керақмас» дегандай умидвор кўзлари билан Асадбекка термилди-ю, қаҳрли овозда «тур ўрнингдан!» – деган буйруқ янграгач, амри бажарди. Титрок кўллари ўзига бўйсунмаса ҳам, картани чийлади. Уч кўлда ҳам ўйинни бой бериб, ўлимига рози бўлган ҳолда шалвираб қолди.

Асадбек ўйинни эътиборсиз кузатгандай бўлса ҳам, Ахтамнинг ҳар бир ҳаракатига диккат қилиб «Бало бу бола, қамоқхонанинг мактаби сезилиб турибди», деб қўйди. Кеча Жамшидга «бурнини ерга ишқаб қўйган бўлардим», деганини эслаб, бу болага адаб бериш осон кечмаслигини англади.

- Ўйинг кетибди, невараларинг кетди... бу кунингдан ўлганинг яхшимасми?
- Ўлганим яхши, Бек ака...
- Сенинг ўлигинг кимга керак? Ўйинг шу бола-

ники. Невараплингни алмаштиришни айтган экан, маъқул таклиф. Етим боллар каерда?

– Барнаулда. Фима деган ютиб кетган.

– Фима? Рабиновичларданми?

– Билмадим... Олдин «Ефим» деди, кейин «Фима»...

– Иккаласи бир... – Асадбек шундай деб бир оз уйланди-да, Ахтамга каради: – Иш энди пишадиганга ўхшаб қолди Нима килмоқчисан?

– Ўзим бориб келаман. Факат... битта шартим бор.

– Сен менга шарт қўйма, бола!

– Шарт бўлмаса... илтимос... У ёққа боришдан олдин бунинг терисини шилиб олишим керак.

– Ўлдирмокчимисан?.. Йў-ўқ, дунёни осонгина ташлаб кетмасин, бу тўққиз қайтган. Узок яшасин, туғилганига пушаймон бўлиб яшасин, тирик юриш жонига тегиб кетсин, етимларни бир келгиндига ютқизгани учун ҳар куни ит азобида ўтсин. Қара, ҳозир ўлимдан кўркиб питирляяпти. Ҳар нафасида Худодан ўзига ўлим тилаганида ҳам ўлимга етишолмай титраб-қакшаб яшасин. Ичинг ёниб кетаётган бўлса, майли, аламингни ол. Тарзан, сен нима дейсан?

– Бир ажойиб ертўла бор, киндигигача сувда бўлади. Кўлидан осиб, тўртта оч каламупни қўйварамиз.

Тарзан бу гапни чиндан айтдими ё Жамолбекни даҳшатга солиш мақсадида бўрттирдими, Асадбек тушунмади. Шундай бўлса-да, «маъқул» ишорасини килиб, чиқиб кетди. Саҳрода қараб қолган кудукдан ташналигини қондиришни умид килган нодон каби Жамолбек марҳамат илинжида дод деб ялинганича колаверди. Ахтам хожасининг «майли, аламингни ол» деган лутфу марҳаматидан фойдаланишни галга солгиси келмади. Кучли мушт зарбидан Жамолбекнинг икки тиши синди, бикинидан тепки еб, хушидан кетди. Тарзан ўртага тушмаганида тепкилар зар-

би унинг тақдирини ҳал килиб қўя коларди. Жамолбек ютқизик пулини вақтида тўламаганларни жазога ҳукм қилганида ўз бошига ҳам қачондир зулм дўли ёғилажагини ўйлаганмиди? Бечоралар тепкилардан, тирноклари орасига санчилган иғналар заҳмидан фарёд уришганда роҳатланмаганмиди? Ошиқ ҳамиша олчи туравермаслигини биларди-ку? Эндиgi кўргулигини не учун адолатсизлик ҳисоблаб, Худодан норози бўлиб инграяпти?!

Жон ширин...

Боши узра ажал булути тўпланаётганидан талвасага тушди...

Кўзига уйи кўринди, ертўлага кўмиб қўйган бойлиги кўринди...

«Ўзимни ўлдирсангиз ўлдиринг, аммо набиралимга тегманг», деб илтижо килмади-я...

«Ёмонликларимнинг мукофотига етишдим», деб тавба қилмади-я...

«Худойим, раҳминг келсин, менга!» – демади. «Нега мени бу бадбахтларнинг кўлига топширдинг, ҳар йили қўй сўйиб, худойи қилардим-ку, ҳисобга олмаган эдингми?» – деб даъво қилди.

Тарзан ҳукм турини айтганида бир оз бўрттирган эди. Жамолбекни ташландик иморатнинг зах ва коронғи ертўласига ташладилар. Ҳукмда айтилганидай киндигига чикадиган сув ҳам, каламуш ҳам йўқ эди. Ёлғончи қиморбознинг қўлларини чириган кувурга чандиб боғлаган Ахтам «каламушларинг қани?» – деди заҳарли оҳангда. Норози шеригининг жиғига тегмаслик учун Тарзан гапни ҳазилга буриб: «Каламушларга раҳмим келди. Буни тишласа, заҳарланиб, ажалидан беш кун олдин ўлиб кетади», – деди.

– Дунё бир айланиб, бунинг кўлига тушиб қолсанг, сени аяб ўтирумайди. Бирорга раҳмдиллик қилсанг қиласвергин-у, бозор қайтишини ҳам ҳисобга олиб қўй, – деди Ахтам минғирлаб.

Асадбек ўша куниёк яна Балабуха билан боғланди. Балабуха унинг гапини эшитиб, «аниклаб қўяман», деб галга солмади.

— Фимани танийман. Ўйинда зўрмас-ку, лекин жуда айёр. Курумсоқликда бутун дунёга дарс беради. Болалар ўзида бўлса, осонлик билан топширмайди. Неча йил, ой, кун боккан бўлса, овқат пулигача тўлашингга тўғри келар, шуни хисобини олгин-у йигитларингни юборавер, менам уч-тўрт йигитимни Барнаулга жўнатаман, кутиб олишади. Эҳтиёт – шарт, «Балабуха аксирмай қўйди», деган одамга, менга ишонишгандай ишонаверишсин.

— Меникилар етиб боришгунича ўзи билан гаплашиб қўймайсанми?

— Тўсатдан бостириб боравериш керак. Олдиндан гаплашилса, у туллак думини тутқизмайди, нархини ошираверади.

Манзура «етимларни топишга ёрдам беринг», деб ялинганида Асадбек «топилса – топилар, топилмаса – Худодан», деган ўйда бу вазифани ғўр йигитларга юклаган эди. Калаванинг ғоят чигаллашиб кетгани, бир учи узоқ шаҳарга бориб тақалгани уни сергаклантирди. Йигитларга бош қилиб Жамшидни юбормокчи ҳам бўлди. Кейин фикрини ўзгартириб, «савоб ишлар килишимизни ҳукumat ҳам билиб қўйгани яхши», деган ўйда уларга Ҳалимжонни қўшди.

Учовлонни кузатгани Жамшиднинг ўзи чиқди. Ҳалимжон сув ичиш учун четлаганида «бунинг олдида ҳар нарсани валдирайвермаларинг», деб шипшитиб қўйди. Ахтам «бу одам ишончсиз бўлса, нега бизга бош оғрик қилиб қўшиб қўйяпсиз?» демокка оғиз жуфтлади-ю, Тарзаннинг карашидан «гапни чўзма», деган маънони укиб, индамади.

Барнаул уларни киши рухини эзувчи ёмғири, изғиринли шамоли билан каршилади. Уларнинг юртими аллақачон тарк этган тўрт фаслнинг султони баҳор бу ўлкага кўчиб келиб, астойдил жойлашиб олгандай эди. Аэропортдан чиқаверишда «Тарзан» деб ёзилган бир парча қоғозни кўтариб турган болакай уччининг дикқатини тортди. Жамшид «бир одам кутиб олиб, «Балабуха аксирмай қўйди», дейиши мумкин. Зарурат туғилса, ёрдам берар, лекин кўлам ишониб юборマルинг», деб огоҳлантирган эди. «Бизни ким каршилар экан, кутиб оловчини қандай таниб оламиз» деган саволлари бир парча қоғоздаги «Тарзан» деган ёзув билан осонгина ҳал бўлишини кутишмаган эди.

— Кара, сени бу ерда ҳам танишаркан, машҳури олам экансан-ку! — Ахтам шундай пичинг билан шеригининг биқинига аста туртди-да ундан жавоб кутмай, болага яқинлашиб сўради: — Тарзани сен кутяпсанми? Ҳалиям аксиряпсанми ё аксирмай қўйдингми?

Бола унга ишонкирамай караб олгач, қўлидаги қоғозни тўрт буклаб, кўча томон юрди. Ахтам унга эргашди. Тарзан сергакланиб, сал орқада борди. Бунақа эҳтиёт чораларидан хабардор бўлган Ҳалимжон паст овозда: «Бек акамнинг танишлари четроқда кутишаётгандир», деб қўйди. Бундан энсаси қотган Тарзан «акл ўргатма, ўзим ҳам билиб турибман», дегандай қошларини чимириб, унга қараб қўйди.

Аэропортдан анча узоклашсалар-да, бола ёмғирга парво ҳам қилмасдан индамай кетаверди.

— Ҳой думбулча, чарчамадингми, опичиб олайми? — деди Ахтам уни гапга солиш максадида.

Бола унга караб ҳам қўймади. Яна бир оз юришгач, уларни икки қора «Тойота» кувиб ўтиб, тўхтади. Орқадагисидан бўйдор, малла йигит тушиб, болага яқин турган Ахтамга яқинлашди:

– Тарзан сенмисан? – деди сўрашиш учун кўл узатиб. – Балабуха аксирмай кўйди.

– Тарзанинг эгасиман, – деди Ахтам унинг кўлини маҳкам қисиб. Тарзан билан Ҳалимжон яқинлашиб сўрашишгач, йигит мақсадини айтди:

– Сиз кидириб келган одам хозир Барнаулда эмас. Бир юз тўксонинчи километрдаги Комариха деган шаҳарчага борамиз.

Йигит кимлигини, ким томонидан юборилганини айтмади. Улар ҳам сўрашмади. Учовлари ҳайдовчининг ўриндиғи ўнг томонда бўлган «Тойота»-нинг орқа ўриндиғидан жой олишди.

– Шу машина яхши-ю, рулнинг ўнг томондаги ёмон, бир ой ҳайдасам ҳам ўргана олмадим, – деди Ахтам суюнчиккә ястаниб. Ҳалимжон «биз томонларда бунақа машинанинг уруғи ҳам йўқ-ку, қачон ҳайдадинг?» деган маънода унга қаради. Тарзан эса шеригининг мақсадини англаш, кулимсиради. Соддарок одам бўлганида «бунақа машинага энди ўтиришим, роса юмшоқ экан, рулни чап томонга олса ҳам бўлади шекилли?» каби саволлар билан мезбоннинг бошини котириши баробарида ўзини пастга урганини сезмас эди. Ахтам эса бир гапи билан «сенлар керилавермаларинг, бунақаси бизда ҳам бор», деган маънони англашиб кўйди.

Йигитнинг вазифаси меҳмонларни кутиб олиш-у хавфсизликларини таъминлаш эди. Уларни гапга солиш, зериктирмаслик хизмати зиммасига юкланмагани учун йўлдан кўз узматанича жим кетаверди.

Барнаулдан узоқлашиб, ўрмон йўлига чиқишганда ёмғир тинди. Чарчаган булутларни шамол булути қийма-қийма қилиб ташлади-ю, қуёш кўринди. Офтоб нурлари гердайган дарахтлар баргларига, кейин эса тупроққа ёғилиб, намлик билан қовушди-да, паға-паға бўлиб яна кўкка кўтарила бошлади. Ахтам машина эшиги ойнагини туширди. Нам тупрок ҳидига тўйган ҳаво барчаларига хуш ёқди. Аллоҳнинг мўъжизалари

бехад, бекиёс. Шундай ажойиб гўзалликни яратиб, унинг қайси бир кавагига зулмни яшириб кўяди. Фима яширинган зулм кавагини бошқа бир зулм косови оловли учи билан кавлаб, титгани кетяпти. Косов ўзи аланга олдирган оловда куйиб адо бўладими ё кавакдаги чўғни тита-тита ўчирадими – Худо билади. Аслида униси ҳам, буниси ҳам кулга айланиб, совурилса, одам ахлига фойдали эди. Наиложки, бундай бўлмайди, шуниси одамзодни паришон киладиган афсусли ҳол...

Аллоҳ ҳар ерга ўзича гўзаллик, ҳар бир инсонга ўзича рух берган. Чиройли рух эгасигина табиат чиройини ҳис кила олади. Бу чиройга банди бўлгач, ўзини унутади. Атрофида разолат борлигини ҳам унутади. Бир неча дақиқа шундай бўлади, кейин яна разил дунё бағрига қайтади...

Тўғри яшашни билганлар учун хаёт ғоят гўзал кўринади. Табиат чиройига мафтун бўлган Ҳалимжон беихтиёр: «Ажойиб экан!» деб кўйди. Ахтам унинг кайфиятини англамай, ажабланиб караб кўйди-да, совук оҳангда изоҳ берди:

– Бу ажойиб жойда уч-тўрт кундан кейин кун исиса, шунақсанги додахўжа чивинлар талашни бошлайди-ки, чиккан жойингга кириб кетишга ҳам таптайёр бўлиб қоласан.

Ҳалимжонни гўзаллик бағридан юлиб олиш учун шу таърифнинг ўзи кифоя қилди.

Шаҳарчага якинлашишганда йигит ўгирилиб:

– Фиманинг қўрикчиси кўп эмас, икки одами бор. Атрофини қўргон билан ўраб олмаган. Кириб-чиқиш bemalol. Бирга кирамизми ё четрокда пойлайликми? – деб сўради.

Тарзан шериги билан кўз уриштириб олгач:

– Ўзимиз кирамиз. Ёмон ниятда келмадик, ишни яхшилик билан битиришимиз керак, – деди.

Йигит «иш яхшилик билан битиши учун ҳам эҳтиёткорлик керак», деб кўйиб, ҳайдовчига имла-

ди. Ҳайдовчи бу ишорани англаб, йўл ўнгга бурилган жойда машинани тўхтатди. Йигит Фиманинг уйига қандай боришни тушунтиргач, «ичкари кирганларингдан кейин биз муюлишга бориб турамиз», деб огоҳлантириди.

Фима яшайдиган уй бошқаларни кидан фарқ килмасди. Бир томони товуқхона, молхонадан иборат ҳовли тошевор билан эмас, ёғоч панжара билан ўралганди. Товуқлар кўплигидан кўнгилни айнитадиган хид анқиб турарди. Бу жой қиморбозлар оламида дурустгина мавкега эга одамнинг қароргоҳига эмас, ўртаҳол дехқоннинг томоркасига ўхшаб кетарди. Йигит айтган икки қўрикчи ҳовлида кўринмади. Панжара эшикни очиб, ичкарига кирмоқчи бўлишганда молхонадан бир бўйдор йигит чиқди-да кўлидаги хаскашни деворга суяб қўйиб, чакирилмаган меҳмонларга яқинлашди.

– Ким керак? – деди совук оҳангда.

– Саломатмисан оғайнин? – деди Ахтам унга кўл узатиб.

– Ҳар ҳолда касал эмасман, – йигит унинг саломини жавобсиз қолдириб яна «ким керак?» деб сўради.

– Фима керак, – деди Тарзан унга ўткир нигоҳини қадаб. Йигит бу совук жавобдан қоникмай, «Нима ишларинг бор?» – деб сўради.

– Фимага қуёшли Ўзбекистондан қайнок саломлар олиб келганимиз. Бизнинг Ўзбекистонимизда меҳмон бунака кутиб олинмайди, – деди Ахтам у томон бир қадам қўйиб. – Хўжайнингга дарров кириб айт, қайнок саломимизни тез қабул қиласа совуб колади.

Йигит «тўхта, жойингдан жилма», дегандай кулини кўтарди:

– Бу ер Олтой, Ўзбекистонингмас.

Шу пайт уй эшиги очилиб, паст бўйли, елкасига кулранг камзул ташлаган, ҳаво совук бўлмаса-да кўлига ок қўлқоп кийган одам чиқиб келиб, панжарали эшиги олдида турганларга қашаши билан

каради. Устидаги умрини яшаб бўлган кийимларига кўлидаги оқ кўлқоп ғоят номутаносиб эди.

— Алёшка, меҳмонлар билан танишиб олдингми? — деди мулоим овозда.

— Ўзбекистондан келишибди, — деди йигит хўжайини томон ўгирилиб.

— Хаҳ, нодон! Ўзбекистонликларни чиройли та-
каллуф билан кутиб олиш кераклигини билмайсан-
ми?! Мен уларнинг юртига борганимда бошлари-
га кўтаришган. Безрайиб туришингни қара, тентак,
йўлни бўшат!

Йигит четланди, Тарзан билан Ахтам уй томон
юришди, Ҳалимжон панжара ёнида колди. Фима улар-
га пешвоз чиқмай, турган жойида кутди. Тарзаннинг
кўришмок учун узатган кўли ҳавода муаллак қолди.
Фима унинг саломига жавобан худди ҳарбийлар каби
кафтини чеккасига олиб бориб лутф қилди. «Нега кел-
диларинг?» деб сўрамаса ҳам уларнинг мақсадларини
билиш мақсадида савол назари билан бир-бир қаради.

— Яхши ният билан келдик, — деди Тарзан бу
қарашга жавобан. — Ўзбекистонликлар сизни яхши-
лик билан эслашади.

— Яхшилик билан эслашади, дегин... — Фиманинг
юзида айёrona жилмайиш зохир бўлди. — Яхшилик
билан эсланадиган одамникига дабдаба билан келина-
дими? Кора «Тойота»ларни пистирмага кўйиб келди-
ларингми?

Фиманинг уйи баландликка жойлашган, шаҳар-
чага олиб келадиган йўл кафтдек кўриниб турарди.
Овлоқдаги шаҳарчада хориж машинаси ҳар куни
кўринавермайди, бунака «Тойота» кимларда бўли-
шини фаҳмлаш учун эса ақлли бўлиш шарт ҳам эмас.
Бегона машиналарга кўзи тушиши билан эҳтиёт чо-
расини кўриб қўйганига бир одамининг молхонадан
чиқиб келиши, иккинчисининг кўринмаётгани да-
лил эди. Тарзан панжара эшик яқинида турганидаёқ

буни фахмлаган эди. Шу сабабли Фиманинг айёrona бокишидан шошиб қолмади.

– Биз томонларда ота-боболаримиз ардокли одамникига меҳмонга боришганда дабдаба билан отда кириб келишмаган, мезбоннинг хурматини килиб, шаҳар остонасида отдан тушиб, бу ёғига пиёда келишган. Ҳар кадам босишганда меҳмонни шарафлашган. Ардокли мезбон эса меҳмонларни остонаяда тўхтатиб, сўрекка тутмаган, курумсоқларнинг курумсоғи булганда ҳам ичкарига таклиф килиб, ҳеч бўлмаса бир қултум сув тутган.

Нотаниш йигитнинг тилидан ўз лакабини эшитган Фиманинг авзойи ўзгариб, ўнг қоши учди. Ахтам буни сезди, «кўп маҳмаданалик қилма», деган маънода уни секин туртиб кўйди. Иккови ҳам Фиманинг лакабини билмас эди, мезбоннинг авзойини қайси гап ўзгартирганини билолмай гангиб, бир-бирларига караб олишди. Фима эса юзидаги айёrona жилмайшини қочирмасдан сал нарида турган йигитга юзланди:

– Ўзбекистонда хурматли меҳмонларга атаб кўй сўйишади. Алёшка, энг семиз хўрозни сўй, кўнглим зиёфатни қўмсаб турувди, Худо ёрлакади, – деб буюрди.

– Кечаги товукнинг ярми турувди, ўшани пишира қолсам-чи?

– Ҳе аҳмок! – деди Фима овозини кўтариб. – Сенга кўй сўйгин, демадим-ку? Бор, буюрганимни қил.

– Айтдим-кўйдим-да, ўзингиз исроф қилма, деб сўкасиз-ку? – деди йигит жойидан жилмай.

– Алёшка тўғри айтяпти, – деди Ахтам унинг мушкулини енгил қилиб. – Биз томонларда инсофли меҳмонлар яримта товукка ҳам қаноат қилишади. Битта хўrozга тўймаган қоринлар яримта товукка ҳам тўймас экан, тирик хўrozни сўйиш Худога ҳам ёкмайди.

– Алёшка, эшитдингми бу хикматни? Сен булар-

дан ақл ўрганишинг керак. Молниг тагини тозалай-вериб, молфаҳм бўлиб колибсан.

Фима шундай деб уларни ичкари бошлади. Остона ҳатлашлари билан димоғларига қиздирилмаган ёғнинг хиди урилиб, кўнгилни айнитди. Ваъда килинган яримта товуққа ҳам, ҳатто сўралган бир қултум сувга ҳам тоқатлари колмади.

Хона ўртасидаги оёклари йўғон думалок стол атрофига ўтиридалар. Даствурхон солиниши, чой келтирилишини кутиш аклдан эмасди, шу сабабли Тарзан мақсадга кўча қолди.

— Ўйинга хеч бир даъвоимиз йўқ. Жамолбекнинг аҳмоқлиги айтилмаса, ҳаммаси ҳалол бўлган. Биз болаларни талаб қилаётганимиз йўқ, илтимос билан келдик. Ютирилган пулни олиб келганмиз.

Чакирилмаган меҳмонларнинг мақсадини билса-да, бу гапни эшишган Фиманинг ўнг қоши яна учди. Тарзанга муғомбирлик билан тикилди:

— Ўзбекистондан олиб келган қайнок саломинг шуми? Саломингга тушунмай турибман?

— Болаларни бокишга сарфланган харажат ҳам хисобга олинган, — деди Тарзан унинг айёрлигини сезмагандай.

— Қарилик тузалмайдиган ёмон касал, бўларкан, йигитча. Ё мен ниманидир унуганман, ё сен ниманидир тушунтира олмаяпсан.

— Довдир ошнам тушунтира олмаяпти, — Ахтам асабийрок тарзда шундай деб сұхбатга аралашибди. — Бу нодон қарилик нималигини билармиди? Ҳалигача бир марта ҳам аксирмаган бу овсар йигитча одамни ўлдириб юборадиган бошқа касалликлар борлигини ҳам билмайди.

Гап замирига яширинган таҳдидни англаған Фиманинг юзидағи айёrona жилмайиш йўқолди. Буни сезган Ахтамнинг кўнгли шодланиб, донишмандларга хос хотиржамлик билан давом этди:

— Шунинг учун Худодан фақат саломатликни сўраш керак, колган ҳамма нарсани сотиб олиш мумкин. Фима амаки, сизни шундай деб атасам майлими? — Ахтам жилмайиб, сўраган саволига жавоб кутмади: — Фима амаки, эшигингиз остонасидан жануби ғарб сари роппа роса икки ярим миллион еттиз юз ўн бир минг уч юз ўн бир қадам юрилса, Новосибир деган шаҳарга етиш мумкин. Ўша шаҳардаги Ленком кўчасида яшовчи «Қонли «туз» деган одам менга «Барнаул атрофларида Фимадан аклирик одам йўқ», деган эди. У бунака масалада ҳечам адашмаган. Сизнинг олтин бошингизга олтиндан ҳайкал қўймоқчи эди. Ҳали қўйилмадими?

Асабийлаша бошлаган Фима бу саволдан кейин зийрак тортса-да, ажабланганини яшира олмади:

- «Қонли «туз»ни каердан танийсан?
- Анатолий Игнатьевич менинг устозим. «Валет» билан «туз»нинг фаркини Учкудуқда ўргатган.

Бу олам тобеси дўппи тор келиб қолганида ёки кимданdir устун келмоқчи бўлса, зўрлардан бирининг номини дастак қиласи. Бу усулдан кўп фойдаланган Фима Ахтамнинг гапига ишонкирамади. Кўзлари айёрлик билан қисилди. «Бу ўйинларинг менинг чўнтағимдан тушиб қолган, лақиллатишга бошка овсарни топ», дегандай тикилди.

Ахтам алдамаётган эди. «Қонли «туз»дан қиморга тегишли қўпчилик билмайдиган нозик услубларни ўргангани ҳам рост эди. У қамокда орттирган устозининг Фима билан алокаси бор-йўклигини билмасди. «Буларни ошначилик занжири боғлаб турмаса ҳам, бир-бирларини танишлари аник», деган фикрда гап бошлаган эди, тахмини тўғри чиқди. Шу боис Фиманинг тикилган кўзларига безрайганича караб тураверди. Фима ҳам «сен болани барибир синдираман», деган қасдда киприк қоқмай тикилди:

- Устозинг ҳали ҳам Ленком кўчасида яшайдими? — деб сўради муғамбирлик билан.

— Йўқ, ўтган йили ёғоч тахтта ўтқазиб, бошқа кўчадаги қасрга кўчириб қўйишган.

— Қаерга?

— Гўрга... Эшиитмаганмидингиз?

— Эшиитгандай бўлувдим... Ҳа, Ленкомдаги уйида болалари яшаяпти шекилли?

— «Қонли «туз» уйланмаган, киморбоз бўлса ҳам, ўғрилар қонунини ҳурмат киларди. «Владимир централи»да тож кийдирмокчи бўлишганда «ёшлигида бир қизни бузиб қўйган», деган гап чикиб қолди.

Фиманинг бу гаплардан хабари бор эди. Ахтамнинг ишонч билан гапириши ундаги гумонни тарқатиб юборди. «Қонли «туз» тождор ўғри бўлмаса ҳам, бармоғига қалин узукнинг суратини тушириб олган, кимор ўйнаганда кўпчиликнинг кўзи шу бармоқда бўларди.

Ахтамнинг тахмини тўғри эди: Новосибир, Томск, Краснояр, Ёқутистон-у Олтой томонларда ўзини кўрсатган қиморбозлар бир-бирларини билардилар. Фима ёқутлар ютидаги «Қонли «туз»га йигирма йил аввал биринчи марта рўпара келган. Ёқут йигитлар ўртага соф тилла тикишганда кўрқиб кетиб, этагини йиғишириб олган, «Қонли «туз» ёмбиларни осонлик билан ютиб олгач, кўркоқлиги учун ўзини ўзи лаънатлаганди. У ўшанда ютқизиб қўйишдан эмас, тилла билан қўлга тушиб, узок муддатга қамалиб кетишдан кўрккан эди. Ўша ўйинда ёқутларни ҳам, «Қонли «туз»ни ҳам доғда колдира олишига ишончи бор эди. Кейинчалик яна икки марта «Қонли «туз»га рўпара келиб, хонумонини ютқизишига бир баҳя қолди. Болалик кезлари отаси унга карта чийлашни ўргатаётгандеёқ «пулингнинг ярмини ютқиздингми, ўйинни йиғишитир. Охирги тангасини умид билан тикадиган қиморбоз энг аҳмоқ қиморбоз ҳисобланади», деб таъкидлаган эди. Бир куни отаси уни катта ўйинга олиб бориб, ўзи четдан кузатадиган бўлди. Унинг кўлига бир халта пул тутқазиб, «умрим бўйи

топган-тутганим шу. Ўлсам, мерос колдиарман, деб ўйлагандим, тириклигимда ола қол. Ақл билан ўйнасанг, бойиб кетасан, аҳмоқлик қилсанг – хонавайрон бўлиб, ўла-ўлгунингча хорликда яшайсан», деди. Фима пулнинг ярмини ютқизганда тўхташ кераклигини унумаган эди. Лекин қизиган қони тўхташига йўл қўймади. Шайтонга миниб олган қиморбоз йигит каергача борарди? Сўнгги чақасигача ютқизган Фима отасига қарашдан уялди. Отаси уни урмади, сўкмади, балки уч кундан сўнг қўлига яна бир халта пул тутқазиб, санаши буюрди. Санади. «Ўйинда ютқизган пулимни қайтариб беришдими?» деб ажабланди. «Ўйинда аҳмоқликдан ўзингни тия олмаслигингни билганим учун сенга аталган пулнинг қоқ ярмини олиб қолган эдим. Энди кўзинг очилгандир, бу ёғига пишик бўларсан?» Кўзи очилгани рост, пишик бўлгани ҳам рост. Шу боис ҳам «Қонли «туз» билан иккала ўйинда ўзини вақтида тўхтатди. У билан олишмади. Ўшанда «Қонли «туз»: «Энг ақлли одам Фима, дунёдаги барча қиморбозлар кирилиб кетса ҳам у тирик қолади. Ёмғирда қолган одам шалаббо бўлади, лекин Фима томчилар орасидан ўтиб, ўзига нам юктирумайди», деган эди.

Бу гапларни Фима «Қонли «туз»нинг ўз оғзидан эшитган. Кўзлари қаттиқ бу йигит ҳам шунга яқин гапни айтаяпти. «Қонли «туз»га наҳот шу даражада яқин бўлса? Барнаулдан кечаси чиқиб кетган эди. Орадан бир кун ҳам ўтмай, изидан топиб келди. Ўзбекистондан қўнғироқ қилиб огоҳлантирган одам «Асадбек» деганинг номини тилга олди. Фима Асадбекнинг ўзини кўрмаган, аммо номи қулоғига чалинган. Эҳтимол, у ўз юртида зўрдир. Лекин бу томонларга қўли етмаслиги аниқ. Йигитлари ўзларини жуда мағур тутишяпти. Бу томонлардаги суюнчиклари ким? Агар бу беззет йигит лақиллатмаётган бўлса, «Қонли «туз» ўлиб кетгани билан соялари қолган. Соя

эса ўз номи билан соя! Ҳеч қачон «Конли «туз» бўла олмайди...

Фима шуларни хаёлидан ўтказиб, бу икки келгин-дига қандай муомала қилишни ўйлади. Сўнг яна бир синаб кўриш мақсадида камзули чўнтағидан карта чиқариб, Ахтам томон ташлади.

– Товук пишгуンча эрмак қилайлик.

Ахтам унинг мақсадини фаҳмлаб, кулимсиради.

– Бу ишингиз яхши бўлди. Ашулачиникига келган меҳмон ашула айтади, киморбозникига келган одам бир қўл ташламаса ярашмайди, – деб карта чийлашни бошлади. Фима унинг харакатларини киприк қоқмай кузатиб, чаккон бармоқларда «Конли «туз»нинг услубини кўрди.

– Қанчадан тикамиз? – деди Фима унга синовчан тикилиб.

– Пулингизни ютишдан уяламан, – деди Ахтам муғомбирлик билан. – Сиз ҳали қозонга тушмаган яримта товуқни тика қолинг. Мен бус-бутун хўрозди тикаман.

– Қарашингдан безбетга ўхшайсан-у, лекин ҳазилни ўрнига қўяркансан, – деди Фима кулимсираб.

– Тикадиган хўрозингни Ўзбекистондан олиб келганмисан?

– Йўқ, Барнаулнинг эрталабки бозоридан сотиб олдим.

– Аттанг, бу ерларнинг хўролари офтоб кўрмагани учун тотли эмас. Ўзбекистонники бошқача эди.

– Тотли хўрол гўштига кўнглингиз сус кетган бўлса, меҳмон бўлиб боринг, яхши одамларнинг кадрига етамиз.

Ахтам шундай деб карта узатди. Фиманинг юзи ғолиб одамнинг севинчи нури билан ёришди. Узатилган картага кўл узатмай «очиб ташла», деб ишора килди. Ахтам биринчи кўлда ютқизди, иккинчи учинчисида ҳам ўйинни бой берса-да, жилмайганича тураверди.

– «Қонли «туз»га ўхшамадинг, у кетма-кет учта хўроз ютқизмаган бўларди, – деди Фима.

– Ташвишланманг, бизда хўроз сероб, энг муҳими – яримта товуғингиз қозонга тушмайдиган бўлди. – Ахтам шундай деб карталарни тахлаб қутисига жойлади-да, эгасига узатмай, стол устига беписандлик билан ташлади.

– Ҳа, дарвоке... бу шеригинг ниманидир сўраганмиди?

– Арзимаган нарсани сўради: Жамолбекдан ютиб олган болаларингизни олиб кетишимиш керак. Пулини берамиз. Хоҳласангиз, сиз болаларни тикинг, мен олиб келган пулни тикай, уч қўл ташлайлик – ора очик бўлади-қолади.

Фимадек одам бу йигитнинг хўроздарни атанин ютқизганини сезмас эканми? Болалар тикилган тақдирда ўйин бошқача бўлишини билмаса «қиморбоз» деган «шарафли» номни бекорга кўтариб юрган эканда, а?!

У Ахтамдан кўз узиб, Тарзанга «Сенам шу фикрдамисан?» дегандай каради.

– Ошнам ҳазиллашяпти. Сиз билан ташлашадиган сиёки йўқ унинг. Биз бир коп пул ютқизгани келмаганмиз.

– Эшитдингми? – деди Фима Ахтамга караб. – Ҳазилингни йигиштири! Лекин... сен айтиётган болалар бўлганида таклифингни жон деб қабул қиласадим. Мен катта оғиз меҳмонларимни қанақа сийлашни яхши биламан. Бор-будини кокиб олиб, иштончан холларида кузатиб қўйишни жуда-жуда яхши кўраман-да! Барнавулда шунақа байрамлар кўп бўлган.

– «Болалар бўлганида» дедингизми? Ҳали «болаларни ютиб олмаганман» ҳам дерсиз?

– Ундай демайман. Ютганда ҳам қиморбозларингнинг тушмуғларини обдон ерга ишқаб келганман. Кейин эса... афсус, омадим кетиб, бечорагиналарни ютқизиб қўйганман. Пулларимдан айрилгандан

кўра, бегона текинтомоклардан қутулганим дуруст-да, тўғрими?

— Кимга? — деб сўради Тарзан. Ахтам эса бу туллакнинг галига ишонмай, тикилган кўзларини ундан узмади.

— Кимгалиги эсимда йўк. Эсимда бўлганида ҳам сенларга айтмас эдим. Биздаги қиморнинг шарти шунака. Сенлардагига ўхшаб соткинлик қилинмайди.

— Сизга беш кетдим, Фима амаки! — деди Ахтам, кейин шеригига юзланди: — Тарзан, сен ҳадеб бемаъни саволларингни ёғдираверма. Ҳозир Фима амакимнинг хотиралари саёзлашиб турибди. Биз ҳам йўлда чарчадик. Олтойнинг самогонини ичмабсан — дунёга келмабсан! Бирон жойда чарчоқбосди қилайлик-да, кайтайлик. Бизга «болалар ўша ерда бўлса, ҳақини тўлаб олиб келларинг», дейишган. «Фима амакингнинг бошини оғритиб, қийналаринг», дейишмаган. Биз кичкина одамлармиз, Фима амаки, баҳонада сиздай улуғ қиморбоз билан танишиб олдик, бизга шунинг ўзи бир бахт. Ютуғингиз ҳалол бўлган, кимгадир ютқизган бўлсангиз, даъвоимиз йўк. Шу атрофда кимникида зўр кўлбola арок борлигини айтсангиз бас, соғлиғингиз учун юзта-юзта отамиз-у кетамиз. Ҳозир ютқизганим учта хўрозни меҳмонга борганингизда юз баравар қилиб қайтараман.

Ахтам шундай деб эшик томон юрди. Тарзан унинг пичинг гапларини тугатиб, сиқувга олишини кутган эди. Ҳозирги ниятини англамай, иложсиз ҳолда эргашди. Ҳовлига чиқишгач, оstonада тўхтаган Фима:

— Ўнг томонга юрсаларинг, йигирмата хонадондан кейин «Азка-самогон» деганинг қулбаси бор. ўша ерда ичарсанлар менинг соғлиғим учун, — деди.

Ахтам орқасига ўгирилиб унга қарамади, «илти-фотинг учун раҳмат», дегандай чап қўлини кўтариб кўя қолди. Панжара-эшикдан чиқиб, ўнгга бурилганда Ҳалимжон унга эргашди. Ичкаридаги савдодан беха-

бар бўлса-да, шерикларининг курук қайтишлари бе-
жизмаслигини фаҳмлади.

– Болалар шу ерда бўлиши керак, узокқа кетмай-
лик, – деди у.

– Тўхтамасдан тез-тез юрларинг, орқага ҳам
карамаларинг, – деди Ахтам йўлида давом этиб. – Бо-
лаларнинг шу ердалигини каердан билдинг?

– Молхона ёнидаги хашакнинг орасида копток
кўринди.

– Шунинг ўзими?

– Ҳар ҳолда Фима йигитлари билан копток
ўйнамаса керак?

– Ўйнайди, деган хулосага келамиз. Бекор турмай,
яхшилаб кузатганга ўхшайсан?

– Бек акам зийракликни ёқтирадилар.

– Шунақами, хўш, зийрак йигит, яна нималарни
аниқладинг?

– Уй бурчагидаги дараҳт шоҳида рўмолча кўрдим.
Улар ё кечкурун, ё эрталаб келишган. Машина изи
янги. Лекин машинанинг ўзи йўқ.

– Иккита одами бор дейишувди, демак, биттаси
машинада кетган.

– Молхонадан чиқсан йигит молларнинг тагини
тозалайдиган хизматкорга ўхшамайди. Ҳатто ҳаскаши
ни қандай ушлашни билмас экан, сезмадиларингми?

– Мен ҳам умримда ҳаскаш ушламаганман, –
Ахтам шундай деб асабий равишда қўл силтади-да,
орқага қарашни тақиқлагани ёдидан кўтарилиб, ўги-
рилди. Жамшид «бунинг олдида ҳар нарсани валди-
райвермаларинг» деганида «хитларнинг одамими?»
деб гумонсираганди. Ҳалимжоннинг бирор айтмаса
ҳам атрофни зийраклик билан кузатиши ўша гумо-
нини тасдиклади. Лекин унинг асабийлашишига са-
баб бу змасди. Балки ўзи фаҳмлаши зарур бўлган
нарсаларнинг ўзга одам тилидан эшитиши кўнглини
ғашлантирганди.

– Иккинчи йигит уйда эди. Күшни хона деразасида одам қораси күринди, – деди Ҳалимжон кузатуви хулосаларини давом эттириб.

– Буни мен ҳам сездим, – деди Тарзан уни кувватлаб. – Ҳар ҳолда, бу Фима амакинг анойи эмас, бурганинг оркасини кўрганлардан экан.

– Паст кетдинг, – деди Ахтам. – Амаким бургани тақалаб, миниб ҳам олган. Менам ахмоқ эмасман. «Иккаланг кўшилганингда ҳам битта ҳаром тукимга арзимайсанлар», демокчи бўлганини фаҳмламабманми?! «Конли «туз» вактида уни тузлаганми ё йўкми, буни билмайман-у, лекин чангалидан қуруқ чикканига ишончим бор. «Конли «туз» ўзини бургут фаҳмларди, чангали ҳам, кўзлари ҳам ўткирлигига гап йўк эди. Лекин тулкининг айёрлиги олдида бунака бургутнинг сарик чақалик қадри йўқ. Бургутга қуёнми ё қўзичоқми бўлгани дуруст. Амакимизнинг оқ кўлқоп кийиб олганини кўрдинг-а?

– Ўйинга тайёрланяптими? – деб сўради Тарзан.

– Ҳа, билибсан. Биз билан кўришгани ҳам йўқ. Бармокларининг сезгисини авайлаяпти. Катта йўйинга тайёрланаётган одам овлоқда нега ивирсиб юрибди, буни ўйлаб кўрмадингми?

– Ўйладим. У бизнинг келишимизни билган. Ким хабар берган, Жамолбек акангми?

– Ким бўларди! Сен латталик қилиб, ёнини олдинг. Даббани аямасдан, ўрага кўмиб кетишимиз керак эди.

– Ўрага кўмсанг, бу ернинг изини топа олмас эдинг. Фимага нега хабар берган, бу курумсоқдан карзи бормикин?

– Билмайман, Бек акамиз «тўккиз қайтган» дедилар-ку, хунасаларнинг шунака хурмача қилиғи бўлади. Қайтиб борганимизда тумруғини узид олишимдан олдин сенга бир пасга бериб турман, «нега? нега?» деган саволларингга жавоб олволасан. Унга-ча каллангни ишлат: Фиманинг ўрнида бўлганингда нима қиласдинг?

– Унинг ўрнида нега мен бўлишим керак? Ўзинг бўлавер.

– Айёрикда аданг Фиманинг олдига тушмаса ҳам, ёнида тура олади. Сен эса ота ўғилсан.

– Адамни тинч қўй.

– Мен адангни мақтаяпман. Айёр одам аклли бўлади. Сенам шахмат ўйнаганингда рақибингнинг камидা бешта йўлини олдиндан хисоблаб қўясан-ку? Фиманинг катта ўйини қаерда бўлиши мумкин?

– Қиморбозларнинг қилигини сен биласан.

– Биламан, шунинг учун менинг ишимга бурнингни тиқма, – Ахтам шундай деб орқасига яна бир қараб олди-да, йўлида давом этди.

Тарзанга бу кўпол танбех ёқмади, ғазабини чап томонига қараб «чирт» этиб тупуриш билан ифода этди. Гарчи, Жамшид Асадбекнинг: «Акаларингдан қайси бирига ўхшайди?» – деган саволига жавобан: «Маҳмуд акамга. Ўйламасдан бир иш қилмайди», деб таъриф берган бўлса-да, йигитнинг ўз оламлари учун бир оз хомлигини сезиб турарди. Тўғри, Тарзан фикрларди, лекин у зулм денгизининг сокин сатҳида охиста сузиб юрувчи кичик кемага ўхшарди. Қанчалик фикрламасин, бу денгизда «айсберг» аталмиш муз тоғлари борлигини, ҳар қандай катта кемани тоғнинг тепа қисми эмас, сув қаъридаги кўзга кўринмас баҳайбат муз коялари парчалаб ташлашини ҳали яхши тасаввур қила олмасди. Ахтам эса сув ости кемасига ўхшарди – шайтанат денгизининг тўфонлари-ю гирдобларини яхши биларди. Энг қалтис шароитда ҳам шўнғиб, хужум килишдан тап тортмасди. Тарзан буни биларди, билгани учун ҳам шеригининг хурмача қилиқларига чидарди. Мазкур топширикни бажариш жараёнида ўзининг бу соҳада ҳали ожиз эканини ҳам сезди. Сезди-ю ич-этини еди, аммо сир бой бермади. Ахтам эса ўзининг нимага қодир эканини, Тарзанинг эса заиф томонларини яхши биларди. Билгани учун ҳам уни бир-икки заҳарли гапи билан

тупрокқа қоришириб ташлашдан тилини тиймасди. Ҳозирги гап Ҳалимжон олдиди айтилгани учун, Тарзан карши жавоб бергиси келса-да, мавриди эмаслигини фаҳмлаб, индамади. Тарзан индамагани билан, вужудини ғазаб ўти ялаб ўтганини Ҳалимжон сезди.

— Ўйинга тайёрланаётган бўлса, кўзимизни шамғалат килиб кетиб колиши мумкин. Пойлашимиз керак, — деди Ҳалимжон, уларнинг айтишувини узиб. — Кутиб олган йигитлар ҳам менга шубҳали кўринишди. Балки улар шу Фиманинг одамларири? Бизни қопқонга туширишмоқчири? Бу ёкка бошлаши, овсарга ўхшаб индамай келавердик.

Ҳалимжон Балабуханинг «аксирмай қўйгани»дан бехабарлиги учун шундай деди. Асадбекнинг қанотига кирган икки йигитнинг нотаниш одамларга қўшилиб бу томон келавериши уни ажаблантирган, сирдан огоҳ бўлиш мақсадида бу шубҳасини баён қилган эди. Тарзан Асадбек яқинида юрган Ҳалимжонни бир-икки марта узоқдан кўрган эди. Ўзлари Асадбек қаноти остига киришгач, бу йигит анчагача кўринмовди. Сафарга ҳамроҳ бўлишидан ажабланганида Жамшид сергак бўлиш хусусида огоҳлантиргач, унинг вазифасини «керак пайтида ёрдами тегади, кўпни кўрган бу бола», деб мавҳум тарзда изоҳлаган эди. Ҳалимжоннинг хозирги асоссиз гапи Ахтамнинг ғашини келтирган бўлса-да, ичида «ўзинг овсарсан!» деб қўйди-ю, жавоб бермади. Тарзан эса эътиборсиз тарзда:

— Кочмайди, қочса, факат гўрга кириши мумкин, — деди.

— Амаким ҳали-бери гўрга кирмайди, — деди Ахтам.

— Бизни гўрга тикишга уриниб кўрармикин? — деди Тарзан.

— Йў-ўқ, бунака иш қўлидан келмайди. У нархини оширмокчи. Балки пулимизни ютиб, уйимизга иштончан юборар?

– Унда нега таклифингга кўнмади? Фирромга мосланган карталари тайёр эмасмикин?

– Бунақа туллакнинг карталари милисанинг тўппончасидай ҳамиша тайёр туради.

– Ўйнаса ютиши аниқми? Кўлини кўрдинг-ку?

– Агар бармокларимда «Қонли «туз»нинг ҳаракатларини сезган бўлса, ўйнашга юраги дов бермасов, бирон бошқа киликни ўйлаб топар. Икки-уч кун шу ернинг совуғини ейсан-у дод демайсан, чидайсан.

– Журъат қилса-чи? Ютишга чоғинг келадими? – Тарзан бояги қўполликнинг аламини олиш мавриди келди, деб ҳисоблаб, камситиш оҳангига ўтди: – Катта кетмаяпсанми, ўзингга ишонасанми?

Бу гапдан кейин Ахтам шарт тўхтаб, орқасига ўғирилди. Шеригининг мақсадини англаб, «Ҳозир тупроқка кориштириб ташловдим-ку, камлик қилдими, яна булғалайми?» дегандай, унга қошларини чимирганича тикилди. Кейин донишманд одамнинг салмокли оҳангига сўради:

– Қиморда ўзига ишонганлар албатта ютқизади, нимагалигини биласанми?

– Мен қиморбоз эмасман.

– Қиморбоз бўлмасанг ҳам билиб ол, бу шахматнингта ҳам тааллукли: қиморда ўзига ишонганнинг албатта ютқизишига биринчи сабаб – ўзига ишонганлиги. Ўзига ишонмаган ҳам албатта ютқизади, бу иккичи сабаб. Мен эсам ютқизмайман, чунки ўзимга ишонмаслигимга ишониб ўйнайман. Тушунмадингми?

Ахтам гапни қойил қилганидан мамнун бўлиб, айёrona жилмайди. Ҳалимжон «фалсафасига менам тушунмадим», дегандай Тарзанга қараб олди. Шеригининг феълини яхши билган Тарзан эса «қани, донолигингни охиригача етказавер-чи», деган каби унга қараб тураверди.

– Мен кучимга ишонмайман, ютишимга ишонаман. Иккаласининг фарқи бор. Куч – хоин, у албатта

алдайди. Ютишга ишонч эса алдамайди. Сен эса менинг ютишимга ҳеч қачон гумон килма.

Ахтам «истасам, кимор оламининг кироли бўлардим, лекин ҳаётдаги мақсадим бошқа, шу мақсадга етаман деб, сенга кўшилиб, пастлаб юрибман», демоқчи бўлди-ю, Ҳалимжоннинг олдида гапни кўпайтиргиси келмади. «Сен эса менинг ютишимга ҳеч қачон гумон килма», деган гапни зарда билан айтди. Унинг аччиқланганини сезган Ҳалимжон кескинликнинг олдини олиш учун гапини бўлди:

– Ўн тўккизинчига келдик.

– Қанака ўн тўккиз?

– «Азка-самогон»нинг уйи йигирмата хонадондан кейин эди, – деди Ҳалимжон сал нарида қорайиб турган ёғоч кулбага ишора қилиб.

– Шунаками? Сендака сезгир йигитни энди кўришим. Бек акам қарашимга қараб туриб, менга «Сур» деб лақаб кўйган эдилар. Сеники «сезгир йигитча» эмасми? – Ахтам шундай дегач, рўпарадаги панжара-эшикни очиб: «Бабка!» деб бақирди. Ичкаридан жавоб бўлмагач, яна такрорлади. Тўртинчи чақиришида уй эшиги очилиб, пешайвонга бир кампир чиқиб келди.

– Бунча бақирасан, темирчининг боласимисан, нима бало! – деди Ахтамга норози қиёфада тикилиб.

– «Азка-самогон» сизмисиз?

– Азкани нима қиласан? – деди кампир сергакланниб.

– Бу атрофда энг зўр самогонни Азка ҳайдаркан, деб эшилдим.

– Бунака аҳмоқона гапни кимдан эшилдинг?

– Фима айтди.

– Фима айтдими? – кампир шундай деб афтини буриштириди. – Самогоннинг фаркини у тулки қаердан биларкан? Азкага самогон ҳайдашни ким ўргатганини айтмадими?

– Шунисини айтмади у кари туллак, – деди Ахтам кампир томон юриб. – Лекин айтмаса ҳам биламан.

– Нимани биласан?

– Биринчиси – сиз «Азка-самогон» эмассиз. Иккинчиси, самогон ҳайдашни Азка сиздан ўрганган. Лекин шалток бўлгани учун сассиқ самогонини ичиб бўлмайди. Бу атрофда энг зўр самогон фақат сизникида бўлади. Шунинг учун ҳам Худо бизни сизникига бошлиб келди.

– Ҳа-а... кўп нарсани биларкансан, сен қоравой, – деди кампир мамнун ҳолда.

– Фақат исмингизни билмайман, бувижон, – деди Ахтам меҳрибон набира овози билан. Бу оҳанг кампирни эритиб юборди.

– Бабка Нюра дейишади, сен «бувижон» деявер, неварамга ўхшаб ширин гапирапкансан. Қанча қуйиб берай?

– Бувижон, биз кўпчиликмиз. Ўйингизда ётиб колишимиз ҳам мумкин. Ҳакини яхши тўлаймиз.

– Ётиб қолишларинг мумкинмас. Бегоналарни уйга кўймайман.

– Кўркманг, бизнинг ёмонлигимиз йўқ. Неварангиз уйдами?

– Неварамми? – кампир йигламсираб бурнини билагига артди. – Неварам уч ой олдин самогондан бўкиб ўлган. Шунга куйганимдан менам ичаман.

– Ичганингиз яхши, бувижон.

– Нимаси яхши?

– Худо уч тоифани яхши кўришини билмайсизми?

– Доно бўлсанг, ўзинг айтавер.

– Худо болаларни, аҳмокларни ва майпарастларни яхши кўради. Сиз бола эмассиз, аҳмок ҳам эмассиз, демак, сизни яхши кўради. Нима қилайлик, кираверайликми?

Ахтамнинг юмшоқ оҳангдаги бу аврашлари ҳам қайсар кампирни эрита олмади:

— Бегоналарни күймайман, — деди яна қатый тарзда.

— Бу ишиңгиз ҳам түғри, шалтоқ бўлса ҳам Азканникада ётаверамиз.

Ахтам шундай деб орқасига ўгирилган эди, кампир уни тўхтатди.

— Майли, кирларинг. Қанча иссаларинг – ичларинг, ётсаларинг – ётларинг, фақат қиз бошлаб келмайсанлар.

— Нима деяпсиз! – деди Ахтам кулиб. – Бу атрофда қиз зоти борми ўзи?

Тарзан билан Ҳалимжон ховлига киришганда кўчада уларни кузатиб келган «Тойота» кўринди. Ахтам изига қайтди. Машинадан тушган йигит «нима қиламиз?» деган маънода унга савол назари билан қаради.

— Иш пишмади, – деди Ахтам. – Бугунча шу ерда қоламиз.

— Биз четроқда пойлаймиз, – деди йигит.

— Беркинишнинг фойдаси йўқ. У тулки ҳаммасини билиб ётибди. Биз билан ўтираверинглар. Наригиларни ҳам чақир.

— Куённинг расмини чизиб, қочиб қолса-чи?

— Қочмайди. Бир халта пулни ташлаб қочадиган аҳмок рабиновичлар орасида ҳали туғилмаган.

— Иккитасини пойлоқчиликка колдираман.

— Хоҳишинг. Фақат иккала машина шу ерда турсин.

Кутиб олган йигитларнинг учтаси уйга кириб, ўтиргач, кампир Ахтамни имлаб чакириб, хисоб-китоб қилиб олиши лозимлигини айтди. Ахтам саккизта йигирма бешталикни санаб бергач, чехраси очилиб, оёқ-қўли ҳам чаққон бўлиб қолди. Биринчи галда беш литрли шиша идишда тўла самогонни олиб кириб, стол ўртасига қўйди. Кетидан чўчка ёғи, кейин нон билан пиёз кирди.

— Машинада конъяк, колбаса бор, олиб келсин-

ми? – мезбон йигит шундай деб лойка сувни эслатувчи самогонга афтини буриштириб караб кўйди.

– Кампир ранжийди, – деди Ахтам, унинг шаштини қайтариб. – Биз ичмаймиз. Ичгинг келса ич, бўлмаса, буни куритиш йўлини топ.

– Канақасига куритаман?

– Ана, дераза очик турибди. Даражтлар ҳам бир маза килсин. Беш литр самогонга дарахтнинг кайфи ошиб, қийшайиб қолмас-а? – Ахтам шундай деб кулди-да, кўзини қисиб кўйди. – Лекин худди ичиб маст бўлгандай бақириб, сўкишиб ўтиришимиз керак. Факат онадан сўкмаларинг, бунакаси бизга ёкмайди.

Эҳтиёт чорасини кўриш ўрнига ҳужум қилишни, ҳар қандай ғанимни янчидан ташлашни афзал билувчи бу йигит Ахтамнинг мақсадини англаш, кўнглида норозилик ҳисси уйғонса-да, гапни кўпайтирмади. Билағи кучга тўла, аммо қалби меҳр-шафқатдан, акли эса фикрлашдан холи йигит учун бу ерда қанақа ҳолатда ўтиришнинг мутлако фарқи йўқ. Унинг учун бир томон ғаним, душмани ким эканлигининг эса фарқи йўқ. Хўжайини «Ўзбекистондан келганларнинг хизматини киласан, ўлдир деганини ўлдирасан, кулдир, деганини кулдирасан», дедими, бас, бошқа нарсани ўйлашига ҳожат ҳам йўқ. Худо уни «Ўзбекистондан келаётганлар ким ўзи, мақсадлари нима, уларга ёкмаган одамни нега мен ўлдиришим керак?» деган ташвишли ўйлардан холи қилиб кўйган. Агар Балабуха «Ўзбекистондан келганларни аэропортда эҳтиром билан кутиб олгин-у, ўрмон йўлига чиққач терисини шилиб олиб, жасадини Олтойнинг боткоғига чўқтириб юбор», деганида «Бу бечораларнинг айби нима?» деб ўтирмай, вазифани бажаришга енг шимарган бўларди. Хўжайини унинг ихтиёрини меҳмонлар измига бердими, улар нима деса, бўйсунишга мажбур: «дарахтни самогон билан суғор», дедими, суғоради. «Одам қони билан суғор», деса – бу ҳам мураккаб вазифа эмас. Бунака топшириқни бажараётганида кўли

калтирамаслиги аник, «менинг коним ҳам эртами-кечми қайсиdir дараҳт ёки күкатни суғорар», деган фикрдан ғоят узок эканлиги ҳам аник. «Мен ҳам кимдандир зулм күрарман, мени ҳам кимдир азоблаб ўлдирап», деган ҳақиқатни англаса, бу йўлидан кайтармиди? Худо билади! Ҳозир бирор келиб «Искирт бир кулбада ўз кучингга маҳлиё бўлиб керилиб ўтирибсан, якин кунларда Моргаш худди ўзингга ўхшаган бераҳм одамларини Томскка юборади. Улар Балабухага қўшиб сенинг жонингни ҳам сугуриб олишади. Жасадинг ахлатхонада ириб-чириб кетади. Но-минг милиция ҳужжатларида «бедарак йўколган», деб кайд этилади, сен учун қайғурадиган тирик жон то-пилмайди», деса-чи? Ишонадими бу гапларга ёки ха-бар етказган одамни жиннига чиқариб, оркасига бир-икки тепадими?

Киши ҳар бир иши учун Қиёматда жавоб беражгини, шунинг баробаринда охиратда кутаётган азобларни ҳар нафасида ҳис килиб турсагина зулм йўлидан қайтиши мумкин. Дунё ҳаётини иймон эмас, шайтоний кувват бошқаришига ишониб яшаётган кишида бундай ҳис бўлмайди, демак, ҳисоб кўркуви ҳам унга бегона.

Синов дунёсидаги ягона суюнчиғи – набираси майхўрликдан бўкиб ўлган майхўр кампирнинг яrim ҳароб, шалтоқ қулбасидан вақтинча кўним топғанларнинг бошини ана шу бегоналик ковуштириб турарди. Бу иркит кулбага бузилган муҳитнинг заҳарли тухумлари айни мос эди. Буларнинг онгини зулм тузоклари ўраб олган бўлса, нажот бормикин?

Даврага ўзининг бегоналитини сездириб қўймаслик учун Ҳалимжон ҳеч бир гапга, ҳеч бир ҳаракатга муносабатини билдиримай, хожасининг амрига маҳтал ижрочи кўринишида ўтирди. Остонадан ичкари қадам босишидаёқ димоғига урилган қўланса ҳиддан кўнгли айниса ҳам, сир бой бермай, чидади. Бошқаларнинг димоғи беркмиди ё бунақа жойларда кўп бўлганлари

учун ўрганиб кетишганмиди, хар ҳолда биронтаси-нинг башарасида ирганиш аломати сезилмади. Фақат Тарзаннинг афти бир оз буришди-ю, кейин унинг ҳам бошқалардан фарки қолмади. Бир боғдан, бир тоғдан келиб тинмай гапираётган Ахтамнинг гапларини диккат билан эшиштаётгандай кўриниш бериб жимгина ўтирган Ҳалимжон ис босган уйни аста кузатди. Ўтирган жойидан икки қадам нарида, печ ёнида тепласига газета парчаси ташланган эски челакка кўзи тушганда сассик ҳид қаердан тараалаётганини фахмлаб, кўнгли баттар айниди. Фикрини чалғитиши учун бошини бурди. Югурик нигохи уй бурчагини эгаллаган ўргимчак уясида тўхтади. Бурчакдан кўпдан бери ис олинмагани учун ўргимчак тўрини bemalol ёйиб, баҳузур ўрнашиб олган эди. Тўрининг пастки қисмида кимир этмай турган ўргимчакнинг корни тўқмиди ё кўпроқ ўлжа тушишини пойлаётганди, хар ҳолда домига илиниб, жон талвасасида, типирчилаётган пашшага эътибор қилмаётганди. Ҳалимжон бу манзарани диккат билан кузата туриб, отасидан эшишган ҳикматни эслади:

Ўргимчак қулф тиркишига жойлашиб, темир саройга эга бўлдим, деб қувонибди. Тиркишдан мўралаб, режа туза бошлабди: «зинапоялар орасига тўр ташлаб, пашшаларнинг додини бераман. Анави бурчакка тўрларимни тортиб, семиз-семиз чивинларни тутаман, остонаяга тўр ташласам, майда қуртлар ҳам илинади...» ўргимчак ўз режасидан маст бўлиб турганида оёқ товушлари эшитилибди. Уй эгаси келиб, қулфга калит солибди-ю хаёлпарастни эзғилаб юборибди...

Асадбекнинг қаноти остида якинда пайдо бўлган бу икки йигитни Ҳалимжон ўша нодон ўргимчакка ўхшатди. У янги шерикларининг қандай тақдир сўқмоқларидан ўтиб келишганини билмас эди. Жамшид «булар ҳали ғўррок, кўз-кулок бўлиб тур», деб тайинлашдан нарига ўтмаганди. Йўлда келишаётганди қиска сухбатлардан фахмлагани – Ахтам дегани

дўстига нисбатан ҳам ақллирок, ҳам шафқатсизрок. Ахтамнинг кўпни кўрганлардан экани, ғоят сезгир, ғоят эҳтиёткорлигини сезгани учун ҳам «ақллирок» деган тўхтамга келган эди.

Ахтам туғилганида барча тубанликлар, ҳамма фитна-фасодлардан йироқда эдими? Фитрати соғва гўзал эдими? Разилликларнинг турфа иллатлари унга кейин ёпишдими? Онаси раҳмида эканида ташқаридаги шафқатсизликлар она ҳасратига қўшилиб, она қони билан унга ўтмадими, валлоҳи аълам?! Ҳалимжон буни билмайди, ҳеч қачон билолмайди. У янги шерикларининг ботинига қарашиб имконидан маҳрум, фақат зоҳирлари ва яқин орада қиласидан ишларига қарабгина бир хулоса чиқара олади.

Уларнинг зиёфати авжига чиққанда кампир Ахтами имлаб чақирди-да: «ўтиришларинг кизимаяпти, яхши қизлар бор», деди. Ахтам яна йигирма беш сўмликнинг баҳридан ўтиб: «чақиринг», деди. Кейин ўнталикни чиқариб, маънодор оҳангда:

– Ертўлангиздан каламушларнинг овози келяпти, кўпми? – деб сўради.

Кампир саволга тушунди-ю, бу сахий йигитнинг яна пул чиқаришдан мақсади нима эканлигини англамади.

– Ҳамма ёқни каламуш босиб кетган, нима эди? – деб сўради ажабланиб.

– Учта каламуш керак менга. Учта халтачага солиб беринг.

– Нима қиласан?

– Пулни олинг-у, суриштирманг. Икки соатдан кейин тайёр бўлсин.

– Учта каламушга ўн сўминг кам, – деди кампир пулдан кўз узмай. Аслида шу пулга ҳам рози эди. Ертўлага сиғмай, уйда ҳам изғийвериб, жонига теккан каламушларнинг учтасини ушлаб бериш унга қийин эканми? Тўтидан бўшаб қолган қафасга данакдек чўчқа ёғи ташлаб кўйса, кифоя. Бирок, боболари

«киштаха таомланиш пайтида очилади», деганларидек, пулни күрган сайин күзи очлик чүғидан ёнаверди. Бу чүр «хар бир каламушга ўн сүмдан бераман», деган ваъддан кейин ҳам сўнмади.

Кампир айтган «қиз»лар ҳаяллашмади. Ёшлиари киркни коралаган, Худо ҳусну комат улашганда лаллайиб қолган уч бақалок «қиз» кириб келиб, барчаларининг таъбларини тирриқ килди. Тарзан Ахтамга ғазаб билан тикилди. «Бу энг азиз меҳмонларга аталган Фима амакимизнинг совфаси, – деди Ахтам унга шивирлаб. – Иккитаси Ҳалимга, биттаси сенга, танлаб ол».

Мезбон йигит кўнгли айнигандай афтини буришириб, Ахтамга «Бу кари товукларни йўқотиш керак», деган эди, «асло! Энди дараҳтнинг ўрнига буларни суғорасан. Ярим соатда, кулатишинг керак», деган вазифани олиб, учта алюмин кружкани лиммо-лим килиб тўлдирди.

– Бизга етиб олларинг, кеч келганларинг учун бу сенларга жарима! – деб узатди.

«Қиз»лар ноз қилиб ўтиришмади, аксинча, хурсандлик билан олиб кўтаришди. Учинчи «жарима»дан кейин чайқалиб қолишиди. Ахтамнинг топшириғи шу зайлда тез бажарилиб, Тарзан билан Ҳалимжон ноҳуш майшатдан қутулиб қолдилар. Учта каламушни учта халтачага жойлаб, ўз ишидан ўзи мамнун бўлган кампир «майшат» бўлаётган хонага кирди-ю, саржин каби тахлаб қўйилган «қиз»ларини кўриб, чўчиб тушди. У «қиз»ларнинг ахволидан эмас, сахий йигитнинг «қизларинг вазифасини бажармади, пулни қайтар», деб қолишидан кўркди. Ахтамга яқинлашиб, «каламушлар тайёр», деб шивирлади.

– Буларингиз ҳам тайёр, – деди Ахтам «қиз»ларга ишора қилиб. Кейин кампирнинг хадигини сезиб: – Кўркманг, мен пулини қайтиб оладиган номард эмасман, яхши хизмат қиляпсиз, – деб тинчитди-да янги вазифа берди: – Энди Азка-самогонникига чиқиб,

«Фиманинг меҳмонлари очоғат экан, сувдай ичиб ташлашяпти, тўйдиролмаяпман», деб, бир бутил самогон олиб чикинг.

– Уникини нима қиласан, ўзимда бор-ку? – деди кампир норози бўлиб.

– Уникидан ҳам ичиб кўрмасак, Фима амаким ранжийдилар.

Кампир Ахтамнинг гапларини тушунмади. Гўё унинг максади юзига ёзиб қўйилган-у, ўқимокка қасд қилгандай, тикилди-да: «Сен болада бир шумлик бор», – деб минғирлади.

– Шумлик йўқ, мен шўх боламан, ошналаримга бир ҳазил килиб қўймокчиман, – деди Ахтам кулимсираб.

Кампир бу сахий йигитнинг шўхлиги ва ҳазилига ишонмаса ҳам, топшириғини бажарди. Ярим кечада Ахтам шерикларига бўлажак вазифаларни тушунтирғач, ўринларидан қўзғалишди.

Фиманинг икки сокчисини тинчтиш Балабуханинг йигитларига кийин бўлмади. Ахтам уйга кириб чирокни ёқди. Фима уйғоқ, ок кўлқопи ечилган, панжаларини стол устига ёйилган картага қўйганича харакатсиз ўтиради. Чирок ёқилгандан кейин ҳам қимирамади. Фақат «келишингни билар эдим», дегандай Ахтамга илкис караб қўйди.

– Зерикаётганингизни билиб, қайта колдим, – деди Ахтам унинг рўпарасига ўтириб. – Қимор ярим кечада қизиганда жоним роҳатланарди, шуни қўмсадим.

– Йигитларга тегмасаларинг ҳам бўларди, улар безарап, – деди Фима унга қовоқ уюб караб.

– Тўғри айтдингиз, буларингиз молнинг тагини то-залашдан бошқага ярамас экан. Сиз эътиборли, кўзга якин одамсиз, укувли болалардан топишингиз керак.

Фима Ахтамнинг гапига эътибор бермай, унга каттиқ тикилди:

– Бу уйни деярли хеч ким билмас эди, кандай ис олдиларинг?

Ахтам мезбоннинг тикилишига жавобан, унга сур нигоҳини қадади-да саволга савол билан жавоб берди:

– Келишимизни қаердан билдингиз, Жамол айтдими?

– Билиб туриб нега сўраяпсан? «Ўк илон»нинг бу атрофларда канака одамлари бор?

– Билмайман, билганда хам айтмас эдим. Ўйинни давом эттирамизми?

– Канака ўйин?

– Кундузи кўз-кўзга тушиши билан ўйинни бошлаган эдик, – Ахтам нигоҳини Фимадан узмаганича ёйилган карталарни бир-бир тахтай бошлади. – Сизга тушунмадим, ўйинингизни ғирром, демайман, лекин бунчалик кўркиш, бунчалик синаш сизга ярашмайди.

– Кўрккан ким, менми ё сенми? «Азка-самогон»га атай юборди, заҳарлаб ўлдиради», деб кўркиб, Нюрканикига кирмадингми?

– Заҳарлаб ўлдиришдан осони йўқ, қишлоқиларга беш сўм-беш сўмдан бериб, ҳаммасини кўтарасига сошиб олишингиз кийин эмас. Лекин сиз котил эмассиз, қиморбозсиз.

– Сенам қиморбозмисан? Унда бу килиғинг нимаси?

– Мен собиқ қиморбозман. Пул ютиб олиш кейинги пайтда менга хузур бермай қўйди. Бир қоп пул ютсам хам кўнглим равшанлашмади. Мен ёлғиз бўлсам, шунча пулни нима қиласман? Менга кўнгил кувончи керак.

– Топдингми ўша кувончни?

– Топдим! Бир одам титкилаб-тиришиб, пул топади, бойлик тўплайди. Қайсиdir кечаси мазза килиб ётганда мен кириб бораман. Титрайди-қакшайди, дод солади. Мен пулларини жонини суғуриб олгандай тортиб оламан. Менга унинг пули керакмас, пул учун ўлишини томоша қилиш роҳатли. Охирги пулини ютқизиб, титрокқа тушган одамни кўрганда ўзингиз хам роҳатланасиз, тўғрими?

Фима бу гапни эшитиб, чақирилмаган меҳмонига бойқуш қарashi билан қаради. Нопоклик, ғирром, беражмлик ортида фожиа ётганини кайси қиморбоз билмайди? Умри шоми қайғу ва алам булути остида ўтажагини-чи? Қайғу ва алам булутидан күйдирувчи ажал ёмғири ёғишини-чи? Фима ҳозир буларни ўйламади, унинг фикри безбетлардан осон қутулиш йўлини излаб топиш билан банд эди. Бир неча нафаслик сукутдан кейин у тилга кирди:

– Сен эса номардлик қилиб, қиморда ютганинг шўрини куритасан?

– Йўқ, қиморбозга тегмайман, менга ресторон ёки универмаг директори ҳам бўлаверади. Қиморбозлик тубан ишга айланиб қолди. Милисадан қўркиб, ҳали у овлоқда, ҳали бу овлоқда биқиниб карта суринг жонингизга тегмадими? Тўрт-беш сўм ютсангиз, ўғрилар кўлига тушмай, деб қақшаб юрасиз. Ҳали ҳам кеч эмас, мен танлаган йўлга ўта қолинг. Қиморбозлик гуноҳ деб эшитдим, ташланг шу хунарни.

– Отанг онангга кўшилаётган дамда тўшакнинг бир четини кўтариб, ўзинг ўргатиб турган бўлсанг керак-а? – деди Фима заҳарли жилмайиб. – Қиморбозлик гуноҳ бўлса, бироннинг молини тортиб олиш нима бўлади?

– Бироннинг молини тортиб олиш гуноҳ эмас, роҳат бўлади. Худо биз учун тўплатиб қўйган бу молни. Агар вақтида тортиб олмасак, Худо ранжийди.

– Китоб ўқиб турасанми?

Ахтам бундай саволни кутмаган эди. Дарҳақиқат, уларнинг олди-бердисига китобнинг нима алоқаси бор? Ахтам Фиманинг юзига тикилгани билан, ундан бир маъно ўқиб ололмай, жавобни қисқа қилди:

– Бекорчи вақтим йўқ.

– Ўрисларнинг «Ақллилик балоси» деган китоби бор. Ўшани ўки, ўз ақлинг эртами-индинми сени ба-лога учратиб, барибир гўрга тиқади. – Бу гап ҳукмга айланиб, рўпарасидаги сурбет йигит ҳозирнинг ўзидаёк ажал топгандек туюлди-ю, Фима мамнун ил-

жайганича кўшиб кўйди: – Ёшлигидага ўлиб кетганларга жуда-жуда раҳмим келади-да...

Бунака киноя Ҳалимжонга ёки Тарзанга салгина таъсир килиб, кўнглининг озгини ғашлантириши мумкин эди. Асадбек қанотига киргунича «мурда» бўлиб юриб, энди «сур»га айланган йигитга қилча таъсир этмади. «Аччикни аччик кесади», деганларидек, пи-чингни пичинг киличи билан урди:

– «Ақллилик балоси» дедингизми? Зўр-ку! – деб хитоб килди, кейин таъкид этди: – Ростданам зўр гап! Менинг аклим – бошқалар учун бало! Бунга ишон-масангиз, энди карталарни очамиз: биринчиси, Азканикига ё Нюрканикигами ё бошка шалтоқникигами киришимизнинг сиз учун фарки йўқ эди. Агар шуни тушунмасам, аҳмоклигим бошимга бало бўларди. Узингизнинг кўнглингизни овлаб юрувчи учта оғатижонни юборибсиз, «кўриб кўнгли айнир, Нюркадан пулини қайтиб олар», деб ўйлаган бўлсангиз, хато килибсиз. Биздай довдирларга номи хотин бўлса бас, бўлаверади. Сиз факат бир нарсани кутмаган эдингиз, шунга бошингиз гаранг, сўрамоқчисиз-у тилингиз бормаяпти.

– Очик ўйинни бошладингми, энди гапни чўзма.

– Хўп, гапни чўзмасам, чўзмадим. Мен ўқиган китобларда «пачакилашиш» деган сўз йўқ. Сиз боятдан бери учта каламушинга ҳайрон бўляпсиз.

– Хўш?

– Сизнинг каламушингиз ҳам табаррук, унинг ҳам ўз вазифаси бор. Хафа бўлманг-у бунчалик паст кетишингизни кутмаган эдим. Шахматдаги энг пачок юришни танлаб, болаларча мот бўлишимизни истадингизми? Шу йўл билан нархини оширмокчи бўлган одамни сизларнинг тилингизда «аҳмок» дейдими?

– Нима деб валдираяпсан?

– Уйинда ютқиздингиз, деб валдираяпман, – Ахтам ундан нигоҳини узиб, остоноада турган Тарзанга ўгирилди: – Алёшкани олиб кир, бир отамлашайлик.

Тарзан эшикни очиб имлаб кўйган эди, буйрукка маҳтал турган Ҳалимжон Алёшканинг гарданидан тутиб, ичкарига олиб кирди. Қўллари орқасига қайрилиб боғланган йигит остона ҳатлагач, заифлиги учун хўжайинидан уялгандай бошини эгиб олди.

– Алёшка, азизим! – деди Ахтам у томон юриб. – Кундузи бизни кутиб олганингда димоғингдан курт ёғилаётган эди-я! Бир тепкилик ҳолинг бор экан-ку, сўтак! Бизнинг тарбиямизни олувдинг, бип-бинойи одобли йигиттга айландинг. Хўжайининг кариб, склероз бўлиб қолибди, мияси айниб, ҳеч нарсани эслай олмаяпти. Бир оғиз гапинг билан унга ёрдам бериб юборсанг, биз безовта қилганимиз учун узр сўраймиз-у, корамизни ўчирамиз. Кеча эрталаб келганларингдан кейин учта болани каерга яширдиларинг?

Йигит хўжайинига қўркув билан бир қараб олди-ю яна бошини эгди. Ҳавотирини яширмокқа уринаётган Фима уларга кўз остидан каради.

– Алёшка, мен бир марта сўрашга ўрганганман. Ҳурматингни килиб, майли, яна сўрайман: болалар кани?

– Қанака бола? Ҳеч нарсани билмайман.

– Тарзан, сен ҳамиша ишни чала қиласан! Бу боланинг тарбияси ҳам чала бўлибди. Камчилигинингни тез тўғрила.

Тарзан шу буйрукни кутиб турган эди. Чўнтағидан чилвир чиқариб йигитнинг аввал чап, сўнг ўнг сонини шими устидан боғлади. «Тарбия»нинг қандай азобдан иборат эканини билолмаган йигит бир хўжайинига, бир Ахтамга жавдираб каради. Ахтам эса Ҳалимжон узатган халтачани олиб, йигитнинг тумшуғига тутди.

– Эшлишимча, сен машнатни яхши кўрар экансан. Хўжайининг учта парисини бизга тортиқ қилиб юборган эди, уларни сеҳр қилиб, каламушга айлантирдиг-у, биттасини сенга атадик. Ҳозир каламушни иштонинг ичига ташлайман. Олтой каламушлари сендака галварсларни ғажишни яхши кўрармиш. Нозик жойингга

каноат қилмаса, буйрагингга ўтар, жигарингга ўтар... Миянгга етиб боргунича, эслаб қоларсан болалар каердалигини.

Ахтам шундай деб халтача оғзини очди-да, типирчилаётган каламушни йигитнинг шими ичига ташлади. Кўркув исканжасидаги йигитнинг бакириб юбориши учун каламушнинг типирчилаши кифоя қилди. Каламушнинг тиши ишга тушиб, Алёшка талvasани бошлаганида Ахтам имлаган эди, иккинчи йигитни ҳам олиб кирдилар.

— Шеринг болаларни қаерга яширганини эслай олмаяпти. Иштонига каламуш қамалиб колганмиш, кизик, а? — Ахтам гапини тугатмай, бу йигитнинг ҳам икки сони чилвир билан боғланди. — Шундай қилмасак, каламуш иштонингдан пастга тушиб қочиб колиши мумкин, — деди Ахтам ишшайиб. — Айтасанми, ё каламуш билан майшат киласанми?

— Нимани айтаман? Ҳеч нарсани билмайман.

Ахтам гапни кўпайтирмай, узатилган иккинчи халта оғзини тезлик билан очиб, шими ичига ташлади-да, орқасига ўгирилди:

— Фима, учинчи каламуш сенга аталган. Нима килсин, олиб кирсинми?

Ахтам сенсирашга ўтмаса ҳам, пичок бориб, суюнка тақалган эди. Фима бармоқларини авайлаши шартлигини ҳам унутиб, столни кафти билан қарсиллатиб урди-да, ўрнидан шарт туриб:

— Тўхтат, томошангни! — деб бакирди.

— Фима, томошанинг тўхташи менга эмас, сенга боғлиқ, — деди Ахтам совукконлик билан. Кейин меҳрибонлик билан қўшиб кўйди: — Фимушка, биз бир дунёнинг одамларимиз, бир-биrimизни севишимиз керак.

— Сени ажал севсин...

Фима пастки лабини тишлади, кейин оғриқка чидолмай, тили билан ялади. Бу йигитларни олдинрок кўчада учратиб колса, аҳамият бермай, «ха, иккита

мишики сўтак-да», деб ўтиб кетаверган бўларди. Буларни панжарали эшиги ортида кўрганида «Жамолбек ваҳима қилган «жон олғувчилар» шуларми?» деб менсимаган эди. Ҳатто бу хабар учун ваъда қилгани мукофотдан воз ҳам кечганди. У «жон олғувчилар»нинг турли тоифасини кўрган. Бу майдонда от суриб юрганлар билан тил топишиш осонрок, лекин эшакнинг думига осилиб юрганларга гап тушунтириш қийин. Назар-писандга арзимайдиган бу сўтакларнинг кўзлари факат жон талаб қилгандай хунук бокади. Тилидан бол томади-ю, нигоҳи эса консираган. Сўтак кўринишидаги йигит энди йиртқич ҳайвон ваҳшатида намоён бўла бошлаган эди. Фима Азроилнинг бу жиянларига қарай туриб, «Эй Мусо! Ҳасссангни ташлаб денгизни иккига ажратганингда «Эй Худо, Фимага мана бунака газандаларни рўпара қилма», деб сўрасанг бўлмасмиди!» деб ўзининг пайғамбарига дилида даъво қилди.

Каламушнинг иштаҳаси очилиб кетдими, Алёшка оғриққа чидомлай йиқилиб, типирчилай бошлади.

– Тўхтат! Айтаман! – Фима йигитлари томон қадам ташламокчи эди, Ахтам «аввал айт» дегандай унинг йўлини тўсди.

– Нариги хонадаги гиламни кўтарсаларинг ертўлага йўл бор, – деди Фима ҳансираб. У қўркувдан ҳансирай бошладими ё ғазабданми, билиш қийин, зотан, меҳмонлар учун бу аҳамиятсиз эди.

– Шу оппа-осон ишни бунчалик мураккаблаштириб, бошоғрик килишинг шартмиди! Алёшкангнинг тухуми куришига бир баҳя қолди-я! Тарзан, тарбиявий соатингга танаффус бериб тур.

Ахтам шундай деб қўшни хонага чиқди. Ҳалимжон гиламни кўтариб, ертўла оғзини ёпиб турган қопқоқни очди. Тепадан тушган чирок нурида ертўла ғира-шира ёришса-да, бурчакда гужанак бўлиб ўтирган болалардан садо чиқмади. Оталари ўлиб, оналари қамоққа

тушганидан кейин сотилувчи матоҳга айлантирилган болалар яна қандай балоларга мубтало бўлишларини билмай, зах ертўланинг совуғидан эмас, кўркувдан титрашарди.

– Болажонлар, биздан қўркманглар, – деди Ҳалимжон пастга тушар экан. – Фуркат, Норхол, зишитяпсанларми, бизни ойижонинг юборди.

Ҳалимжон ҳеч нарсадан қўркмасди. Ҳатто Красноярда лўттибозлар қўлига тушиб, вактинчалик қамоқхонада ўтирганда ҳам, терговчининг тепкиларидан суюклари зиркираганда ҳам ўз тақдиридан қўркмаган эди. Нимқоронғи ертўла бурчагида кунишиб ўтирган болаларни қўриб, қўркиб кетди. Уларнинг қисматидан даҳшатга тушди...

Ўтган узок вакт ичида кенжা қизча ўзбекчани эсдан чиқарган, катталари унутишмаган бўлишса-да, меҳрибон оҳангда айтилган гап уларга ғалати туюлиб, қулокларига ишонишмай, жойларидан жилмай ўтираверишди.

Болалар шафқат тилаган кўзлари билан мўлтиллаб, Ҳалимжоннинг қалбини поралаб ташлашди. Болаларни ютиб олган Фимани, ҳатто куткариш учун келган шерикларини ҳам тепкилаб-тепкилаб ташлагиси келди. «Болаларнинг ҳар бир охи учун бу газандаларнинг кўзларини ўйиб олиш керак, гўдакларнинг кўзларидан томган ҳар томчи ёшни чўкка айлантириб, буларнинг яланғоч кўкракларига оловли дўл қилиб ёғдириш керак!» – бу Ҳалимжоннинг қалбида туғилиб, тилига чиколмаган нидоси эди.

– Фуркат, – деб каттасига мурожаат қилди, – Фазлия опанинг ўғлимисан? Ойинг юборганига ишонмаяпсанми? Фима амакинг «ёмон одамлар келишди», деб қўркитганга ўхшайди, а? Туринглар, уйингизга кетамиз.

Пастга эгилиб караган Ахтам болаларнинг аҳволини қўриб, ғазабдан титраб кетди. Фимани булғалаб, тепкилаб ташлагиси келди. Аммо «қонли из колдириш

мумкинмас», деган вазифаси борлигини зслаб, ўзини тутди.

— Фуркат, — деди у, — аканг алдаётгани йўқ, чиқа колинглар. Фима амакинг ҳам рухсат берди.

Ҳалимжоннинг меҳрибон оҳанги эмас, Ахтамнинг гувоҳлиги ҳам эмас, Фима амакисининг рухсат берганлиги хусусидаги хабар таъсир қилиб, аввал Фуркат, кейин Норхол ўрнидан қўзғалди. Қизчалар акаларининг икки қўлига ёпишганларича эргашдилар. Ҳалимжон уларни худди туғишган акасидай бир-бир кучоқлаб, пешоналаридан ўлиб қўйиб, нарывондан юкорига кўтарилишларига ёрдам берди. Ахтам болаларга ачинган эди, бироқ, меҳр-шафқатга бегона бўлгани учун уларни Ҳалимжон каби кучиб, ўпмади. Уларга бошдан-оёқ разм солди: қўркишлари ҳисобга олинмаганда болаларнинг ранг-рўйлари, кийим-бошлари ёмон эмасди. Нималар бўлаётганига тушунмаётган кизча қўғирчогини бағрига босганича Ахтамга жавдираб караб тураверди. Унинг бу жавдирашида ўзининг эмас, қўғирчогининг тақдиридан ҳавотирланиш зоҳир эди. Акаси билан опаси эса «бошимизга қандай бало ёғиларкин?» дегандай нажот кўзи билан мўлтиллаб карашди. Ахтамга бундай караш бегона эмас, болалар уйида ҳам, кейинчалик болалар камокхонасида ҳам бундай нигоҳларни қўравериб, дийдаси котиб кетган.

— Совқотдиларингми? Ҳозир кетамиз, ойинг соғинибди, — деди Ахтам Фуркатга, кейин Ҳалимжонга «шу ерда тура турларинг», деб катта хонага чиқди. Алёшка қаламушдан кутулган бўлса-да, ҳали ҳам ўрнидан турмай, инграб ётарди. Шерити эса дум тушиб ўтириб олганди. Ахтам остона ҳатлаб ичкари кириши билан Фима:

— Буларни тез дўхтирга олиб бориш керак, — деди ғазабли буйрук оҳангидা.

— Кетганимиздан кейин дўхтирга кўрсатасанми, гўрковгами, ўзинг биласан, — Ахтам совук овозда шун-

дай дегач, Балабуханинг йигитларига имлаб қўйган эди, икковини судраб олиб чикиб кетишиди.

— Кетишига шошилма, хисоб-китобимиз тугамади, — деди Фима жойига қайтиб.

— Қанака хисоб-китоб? Эсинг жойидами, Фима? Каламушга ем бўлмаганларингга қувонсанг-чи! Эртага милиса кок суякларингни қўриб ачинадими ё каламушларни тутиб, «Иш» очадими?

— Учта муттаҳам камайгани учун милиса каламушларга раҳматнома эълон қилади, — деди Тарзан, шеригини кувватлаб.

— Ана, эшитдингми! Тарзан билиб гапиради. Афуски, хўжайнинмнинг тантилиги бор, «курумсокнинг ҳакини берларинг», деб тайинлаган. Мен буйрукни буза олмайман. Пулни олгин-у, жим ўтиравер. Аслида болаларни шунча ушлаб турганинг учун онасига сен товон тўлашинг керак эди.

— Болаларни кўрдинг, ёмон қарабманми? Ўзимнинг боламдай парвариш қилдим. Сен Жамол ютқизган пул билан, овқат пули олиб келибсан. Тарбия қилганимчи?

— Қанака тарбия?

— Мен уларни ўйинга ўргатдим. Нега ҳеч кимга бе-риб юбормаганимни айтайми? Уларнинг томирларида зўр ўйинчининг қони оқяпти.

— Аравани курук олиб қочаверма! Отаси пачок ўйинчи бўлган.

— Отаси пачок бўлгандир, менга бунинг аҳамияти йўқ. Лекин учови эрта-индин кимор оламини остин-устун қилиб юборади. Менинг келажагимни шулар беришади. Ўзимнинг болаларим йўқ, бериб юборсам, келажагим нима бўлади?

— Нима бўларди, қариндошларингга ўхшаб тарихий юрtingга жўнаворасан, қайтага яхши-ку! Писиб юришдан бира тўла қутуласан — деди Ахтам беписандлик билан.

— У ерда менинг насибам йўқ, бунда сенга

ўхшаганларни чув тушираман, у ёқда-чи? – Фима ҳеч кимга айтмайдиган ҳакиқатини бехос айтиб юбориб, уф тортди. Отаси ўлар олдидан «ҳеч қачон ўзимизникиларга қарши ўйнама, бир тийинини ҳам ютиб олма», деб васият қилган эди. Бошқаларга кўшилиб, тарихий ватанига кетса, тирикчилиги нима бўлади? Тўғри, у ерда ҳам қимор бор, лакма қиморбозлар ҳам борлиги аниқ. Лекин уларни ютиб, васиятни бузса, нариги дунёда учрашганида отаси кўзига қандай қарайди? Рўпарасидаги сурбетга қандай тушунтиурсин буни? Тушунтириши шартми? Шуларни ўйлаб яна бир уф тортди-ю, бошини эгди. Ахтам эса меҳрибон отанинг овозида уни овутишга киришгандай бўлди:

– Фимушка, бу болалардан ажраб хорланаман, деб куйинаётган бўлсанг, биз билан кета қол. Менга ўгай ўғил бўласан. Еганингча ейсан, кийганингча киясан. Мен етимларни яхши кўраман. Хор қилиб кўймайман сени.

Бу масхарадан кўнгли оғриган Фима бошини кўтариб, дадилрок овозда деди:

– Олиб келган пулинг харажатларимни коплашга урвок ҳам бўлмайди. Ҳисоб-китобни бошқача қилишимиз керак.

– Ол-а! – деб юборди Тарзан. – «Рейтер» агентлиги қизик тадқиқот ўтказибди. «Иигирманчи асрдаги зинг буюк найрангбоз ким?» деган саволга бир миллиард одам «Михаил Горбач», деб жавоб берибди. Бу хато, тўғрими? У аҳмоклар Олтой деган овлоқда Фима деган найрангбоз борлигини билмаганлар. Мен уларни огохлантириб қўяман, Миша Горбач келиб, сенга шогирд тушсин.

Ахтам шеригига норози киёфада караб, «аралашмай тур», деган маънода ишора қилиб қўйди-да, Фиманинг рўпарасига ўтириб, кўлига карта тўпламини олди:

— Эртакдаги Иванушка ахмок эсингдадир, рўпарасидан уч йўл чикади, а? Биттаси — «борса-келмас», кейингиси — «борса-ё келар, ё келмас», учинчиши — «борса-келар»... Қайси бирини танлайсан?

— Үзинг-чи? Иккита каламуш билан кўркитиб, осмонга устун бўлдим, деб ўйлаяпсанми? Балки енгимга яширган карталарим бордир?

— Биринчидан, бу ўйинда карта яшириш кўлингдан келмайди. Агар ўгрилардан кўркмай, улардан ўзингни нари тутиб юрмаганингда эплардинг бунака найрангни. Этагинг очилиб колганда беркитадиганлар ҳам топиларди. Иккинчидан, каламуш иккита эмас, учта, биттаси сенинг ҳидингга маст бўлиб ётиди. Учинчидан, сен Иванушка ҳам, ахмок ҳам эмассан. Сенга «борса-келар»и дуруст. Тўртинчидан, менинг рўпарамда ҳеч қачон учта йўл бўлмайди. Худо пешонамга «борса-келар»ни ёзиб кўйган. Бу ўчмайдиган ёзув, билиб кўй. Фима, Фимушка, мени лакма, деб ўйласанг ўйлайвергин-у, лекин ахмок киласман, деб хомтама бўлма. Агар болаларни ўзингда олиб қолмокчи бўлганингда Барнаулдаги иккита бошибузук одамхўрни ёллардинг. Учта лакма ўзбекнинг судраб келган чоригини тобутга айлантириб бериш қийин иш эканми? Қийин эмас, фақат озгина чиқими бор. «Чиқим» дегани сени илондай чакади. Сенинг танглайингни «кирим» билан кўтаришган. Тағин ҳам сен инсофлисан, отангнинг ўлигини сотиб юбормагансан. Шунақами? Ҳа, шунақа! Нега сотмовдинг? Нимагалигини айтами? Отангнинг сассиқ ўлиги кимга керак? Харидор чиққанида сотишдан қайтмасдинг. Майли, мени ахмок қилишга уринавер. Лекин анави иккита шеригимнинг сабр косасини тўлдириб, тошириб юборма. Мен ахмок бўлсам, улар фирт ахмок! Бошлирида тарикча мия йўқ. Ўлаб ўтиришмайди. Мен бир хунасани ушлаб, кўл-оёғини боғлаб берсам, булар сўйишдан бошқасини билишмайди. Айниқса, анави шохи йўқ ҳўкизга ўхшаганидан кўрк. Жуда кўпол-да,

у ҳайвон! Одамнинг терисини шилаётганида ҳатто ўлик ҳам дод деб юборади.

Ахтам бу гапларни киприк қоқмай гапирди. Фиманинг юзида ўзгариш бўлишини кутди. Фима дарров титроққа тушадиганлардан эмасди. «Чўпчагингни айтавер», дегандай тикилиб тураверди. Ахтам руҳий зарбаси иш бермаганидан ғашланиб, давом этди:

– Хўш, ташлашамизми?

– Йўқ. Олиб келганингга яна шунча қўшасан.

– Фима, найрангларинг ўтмади, ўзингни тарозига солма. Хўжайним бу пулга бир тийин қўшмайди ҳам, олмайди ҳам. Қиморбозлик ҳурматингни қилиб, мен битта каламуш қўшиб қўйишим мумкин.

– Кўрқитма. Фимани қўрқитганларнинг бир саржини куйиб, кул бўлиб сочилиб кетган. Агар қўшмасанг, иккита кичигини олиб кетавер. Каттасининг нархи бошқача.

– Нимаси бошқача?

– У картани кўз юмиб ўйнайди, шахматни қотириб ташлайди. Икки йилда гроссмейстер бўлади. Ҳозирнинг ўзида Карпни эзиз ташлаши мумкин. Уч йилдан кейин Каспар унинг олдидаги эмаклаб юрадиган бўлади. Шундай вундеркиндни бекордан бекорга бериб юборсам, овсар, деб маломат қилишмайдими?

– Аввалги жаҳон чемпионини эзиз ташлай оладиган, ҳозиргисини букишга қодир шахмат устасининг нархини белгилаб ҳам қўйгандирсан? – деди Ахтам.

– Олиб келганингга яна шунча қўшасан.

Ахтам бир бечоранинг юзига ғам ёки қўркув соя ташлаганида ярасига туз сепиб завқ оладиган тоифадан эди. Айни дамда шу килиғига содик қолди:

– Фимушка, менинг битта каламушдан бошқа бойлигим йўқ.

Ботқоқликдан балчик хиди анқийди. Бир чеълак атир сепилса ҳам, хуш ёкувчи хид таралмайди. Ахтамнинг тилидан учайдиган ширин сўзлар зулм ҳукмидаги

қалдан куч олаётган эди. Буни англаган Фима ғазабини жиловлай олмади, овозини баландлатди:

– Ҳадеб каламушингни пеш килаверма, ўйнасанг, каллангни ишлатиб, ҳалол ўйна.

– «Каллани ишлатиб» дедингми? Қойил таклиф айтдинг, ўз тилингдан илиндинг, Фима, энди гапингдан қайтмайсан. Карта эмас, беш қўл шахмат сурэмиз.

– Гапни айлантирма, мен «шахмат сурэмиз», демадим. Бу ўйинга уқувим йўқ.

– Сен ўйнамайсан, Тарзан билан Фурқатбек суриншиди. Ютсак, болани олиб кетамиз.

– Яхши, мен болани тикаман, сен-чи? Факат каламуш, деб дийдиё қилма.

– Шундай болага қарши каламушни тикувчи инсоғиз эмасман. Мен Тарзани тикаман. Ютқизса, олиб қоласан, хизматингни қилиб юради.

– Сен ўзингни тикавер, – деди Тарзан унинг тақидан аччиқланиб. – Икковинг бир-бирингга мос экансанлар. Шу ерда ўлсаларинг кўшмозор бўла колсанлар.

Ахтам ўгирилиб, «шунга ҳам жириллайсанми, аралашмай турсанг ўлармидинг?» дегандай норози киёфада қараб, пичинг оҳангини ўзгартирмай деди:

– Жон оғайни, мени шу туллак билан битта гўрга тикмагин. Бу кўмилган жойдан ҳаром ўлган товукнинг сассиғи келиб туради. Майли, мен дўсти учун заҳар ютиб юрган одамман, сазанг ўлмасин – икковимизни тикамиз. Нима дейсан, Фима?

Фиманинг кўзларидан нафрат учқунлари сачраётгани билан вужудига иложисизлик пушаймони ҳукмрон, «Сенларни бошимга ураманми...» – деб тўнғиллашдан ўзга чораси йўқ эди.

– Бошқа иложинг йўқ, Тарзан, болани олиб кир.

Ахтам шундай деб ўрнидан турди-да, дераза токчасидаги шахмат қутисини олиб стол устига кўйди. Кейин уй бурчагида ётган халтачани кўтариб, Фима-

нинг кафти устига ташлади. Фима чўчиб, кўлларини тортиб олди. Халтачада типирчилайтган каламуш худди унинг ичини кемира бошлагандай туюлиб, сапчиб турди-да: «Ол, бунингни!» деб бакирди. Ахтам унга парво қилмай, эшикдан кириб келган Фурқатни очик чехра билан қаршилади:

— Фурқатбек, Фима амакинг «зўр шахматчи», деб сени роса мақтади. Катталар билан ўйнаганмисан? Шу аканг билан бир ташлашиб кўрмайсанми?

Фурқатбек довдираб, нима дейишини билмай, мунгли кўзларини Фимага каратди. Фима қўркувини ошкор қиласлик учун, халтадан кўзини узиб, дадил овозда:

— Фурзиқ, сен чўчима, ўғилгинам, чап томондаги тўрани олиб ташлаб ўйнайвер, — деб далда берди.

Фурқатга бу далда етарли бўлмади, титрок бармоқлари билан оқ доналарни териб, чап катакдаги тўрани четга олиб қўйди. Тарзан «ростданам шунака зўрмикин?» деган маънода шеригига қаради. Ахтамнинг нигоҳида ҳам шу савол бор эди. Ҳалимжон эса бир Фурқатга, бир унинг укаларига қараб, болаларнинг хурқак нигоҳларида кўркув кўрди. Эҳтимол, уларнинг қорни оч қолмагандир, лекин бу айёр чолдан ғоятда кўркишларини шу нигоҳлари аён этиб турарди. Фима билан овора бўлаётган Ахтам ҳам, Тарзан ҳам бунга аҳамият беришмади. Ҳалимжон эса бу қўркувнинг сабабини билишга ошиқмади. Унинг учун ҳозир энг муҳими бу бечораларни зулм чангалидан омон-эсон қутқариб, олиб кетиш эди.

Биринчи ўйинда Фурқат ютгач, Фиманинг кўзлари чўғдек ёнди, халтачадаги каламушга ҳам парво қилмай қўйди. Кандай килиб ютқизганини Тарзаннинг ўзи ҳам тушунмади. Ахтам бир илмоқли гап айтиб, асабига тегиб қўймаслик учун юзини тескари бурди. Тарзан доналарни тергач, фарзинни олиб, четга қўйди-да:

— Мен ёш болалар билан фарзинсиз ўйнашга одатланганман, — деб кулимсиради.

Фуркат буни кутмаган эди. Фимага яна жавдираб каради. Тарзанинг болага руҳий хужум қилганини англаган Фима, бу ҳакиқатни қандай етказишни билмай қошларини чимириди, кейин ўзини зўрлаб қулимсиради:

– Ўғилгинам, акангни молбоқар қилиб ишга оляпман, бугун хоҳлаганича ўйнайверсин.

Ракибининг фарзинсиз ўйнаши чиндан ҳам бола руҳига таъсир қилиб иккинчи ўйинни бой берди. Бу сафар оқ доналарни тикиб, унинг ўзи фарзинни олиб кўйди-да, «найрангингизни билиб олдим», дегандай Тарзанга каради. Тарзан бу карашнинг маъносини укиб жилмайди, кора доналарни битта-битта шошилмай терди. Фарзин ва ўнгдаги тўра ўрнини эса бўш колдирди. Тарзанинг бу кутилмаган руҳий зарбаси Фуркатни янада довдиратди. Фимага қаради. Болага-қандай далда беришни билолмай қолган Фима «қўркма» деган маънода жилмайиб қўйиш билан чекланди.

Фима Фуркатга ортиқча баҳо бермаганди. Бола чиндан ҳам кобилиятли эди. Лекин юзлаб шахмат усталарининг ўйинларини синчилаб ўрганган Тарзанин енгишга етарли тайёргарлиги йўқ эди. Тарзан учинчи, тўртинчи ўйинда ҳам енггач, бешинчи сини ўйнашга ҳожат бўлмади. Тўртинчи ўйин кутилмаган мот билан якунланиши билан Фиманинг кўзлари телбаларча катталашди. Унинг оч нигоҳида ваҳший ўт бор эди. Қани эди, Худо уни бир зумгина йўлбарсга айлантириб қўйса-ю, бу бадбахтларни тилкалаб-тилкалаб юборса! Бу ғаламис сурбетларни сичқонларга айлантириб берса ҳам майли эди, товони билан эзғилаб-эзғилаб ташласа, кўнгил оғриғи ўрнига кувонч ва хузур келарди...

Фима бошини чанглаб ўғириб олди. У бургут тоифасидан эмасди. Аммо ўзини шу топда тирноклари суғуриб, ўткир тумшуғи кесилган, канотлари кир-

қилган, кўзлари ўйиб ташланган бечора қуш аҳволида кўрди. Найранглардан зўравонлик устун келаётган онда у миясини кемираётган ғалвали саволларнинг биронтасига ҳам жўяли жавоб топа олмай қолган эди. Кошларининг тепасида турган оғриқдан халос бўлиш учун пешонасини силаётганида енгил титраётган бармоклари аҳволини ошкор қилиб қўйди. Бошини кўтариб, жон олғучига қаради – сал нарида турган Ҳалимжон унинг кўзларида аламли мунгни кўрди. Ахтам эса унинг карашига парво ҳам қилмай, мулойимлик пардасига ўралган масҳарали гаплари билан унга «далда бериб», хайрлашгач, болаларни ташқариға бошлади. Ана шунда Фима худди жонидан айрилаётгандай сапчиб ўрнидан турди-да:

– Тўхта, бўпти, сазанг ўлмасин, уч кўл ташлаймиз, – деб хитоб қилди.

Ахтам Ҳалимжонга «чикаверларинг», деб имлаб кўйиб, Фимага қараб жилмайди.

– Фима, ақлинг кеч кирадиган бўлиб қолибди. Биз кетганимиздан кейин энг қаттиқ тошни топиб, бошингни ур! Шундагина аламдан чиқасан. Бошка чоранг йўқ, сен бечоранинг. Ўйна, десам, ўзинг ўйнамадинг. Энди вактим зик, самолётга кечикаман.

– Кечикиб бўлгансан. Тошкентга учган самолёт манзилига етиб бўлган.

– Тошкентга учади, деб ким айтди? Мен Бокуга учаман. Болаларнинг онаси бир озарбайжонга эрга тегиб, Бокуга кўчиб кетган... – Ахтамнинг Фимани лақиллатиш учун атай ёлғон гапираётганини тушуммаган Фуркат бир сесканди. Ахтам ундаги ўзгаришни сезса ҳам, бамайлихотир давом этди: – Болаларни Бокуга етказиб, эгасига топшириб, хизмат ҳакимни олгунимча сен ертўлангда ўтира турасан.

– Бундай қилишга ҳаккинг йўқ!

– Мени лақиллатишга ҳақкинг бормиди? Яхшилик билан келувдим, яхши гапирдим, яхшилик билан кет-

япман, шунисига кувонавер. Устозим «Қонли «туз» үлар олдидан менга: «сени ким лақиллатмоқчи бұлса, аяб үтирма», деган эди. Мен васиятни буздим, зәнди нариги дунёда унинг кўзига қандай қарайман? Ҳар ҳолда уни мендан олдин сен учратарсан, узримни етказиб қўй.

— Агар ростаданам «Қонли «туз»нинг шогирди бўлганингда бунақа ғирромлик қилмасдинг!

— Фимушка, мучалинг нима? Ҳа-я, сенларда мучал йўқ-ку? Гороскопда нимасан? Қискичбақадирсан-а? Ҳар ҳолда, киликларинг ўхшайди. Лекин бугун туюннинг қилиғини қилдинг. Бошингни кумга тикиб олиб, кутулмоқчи бўлдинг-а, галварс! Оркангни очиб кўйганингни ўйламадинг-а?!

Кўзлари олайиб кетган Фима унинг бу гапига ғазабли нигоҳи билангина жавоб бермоқчи эди, аммо, ғазаб хоинлик қилди:

— Мен сени ернинг тагида ч бўлса хам топаман! — деди ўлик овоз билан.

— Фима, бир лўлига фол очирганимда «сени ўлдириб, ёкиб юборишади», деган. Шунақа! Мени ернинг тагидан қидириб, овора бўлиб юрма. Сен хотиржам гўрингга киравер. «Қонли «туз»га мендан салом айтсанг, тантана билан кутиб олади. Бемалол майшатингни килиб ётсанг, эллик йилдан кейин борарман олдингга. Ҳисоб-китобнинг қолғанини ўшанда қиласиз. Гўрда кўришгунча хайр!

Ахтам, Балабуханинг йигитига «бу ёғи ўзингга ҳавола», дегандай қараб қўйиб, ҳовлига чиқди. Ихраниб ўтирган Алешка билан шеригига кўзи тушиб, «буларни бабка Нюрканикига ташлаларинг, самогон билан эплаб ташлайди», деб машина сари юрди.

Тарзан пича ҳаяллади. Фимани ертўлага ташлашга киришмоқчи бўлган йигитга «шошмай тур», деган ишорани қилиб, графиндаги сувдан стаканга қуиди.

— Фима, сен ақлли одамсан, салдан кейин чан-

қайсан, тилинг танглайнингга ёпишиб ўлиб қолишинг ҳам мумкин. Мен сени яхши кўриб колдим, бунақа азобли ўлим топишингни истамайман. Ўладиган одамга шунча пулнинг нима кераги бор? Ҳозир чо-расизсан, бор хазинангни тортиб олсам ҳам ғинг дея олмайсан. Лекин зўравонлик қилмайман, мен мард одамман, марддан эса ҳеч қачон ёмонлик чиқмайди. Сенинг жонинг ҳозир бу халтадаги пулга эмас, манави истакондаги сувга боғлик бўлиб қолди. Мен сенинг жонингни сотиб олмоқчиман, эвазига бир истакон сув бериб рози қиласман.

Тарзан «Ма, ол!» дегандай стаканни узатди. Фима стаканга беихтиёр қўй чўзаётганида Тарзан сувни унинг юзига сочиб юборди-да, бошқа сўз айтмай, пул тўла жомадончани кўтариб, изига кайтди. Машинага ўтираётган Тарзани Ахтам норози киёфада қарши олди:

— Паст кетдинг, Тарзан, отангта ўхшаб паст кетдинг. Пулни олмаслик керак эди, — деди у зарда билан.

Гапга яна отасини аралаштиргани Тарзанинг ҳамиятига тесса-да, ўзини тушунмаганга олди-ю, қилган ишидан фахрланиб, жавоб кайтарди:

— Отам мени «исрофгарчиликдан қоч», деб тарбия қилган. Ўзинг охирида хол кўйдинг: мен олмасам, анави гўрсўхталар барибир шилиб кетишарди. Энди пул уччаламизнинг ўртамиизда. Бек акам билмай кўя колади. Нима дединг, Ҳалим? Ё сотиб қўясанми?

Ҳалимжон унга қараб, қошларини чимириди:

— Яхши болага ўхшайсан-у, лекин тилнинг суюги йўқ эканини унутиб қўяркансан. Агар Бек акамнинг сояларида кўпроқ яшагинг келса, тилингни тийиброк гапир.

Тарзан «биз сояда яшашга қизикмаймиз, бизнинг соямизда бошқалар яшай қолсин», деб гап кайтармокчи бўлди-ю, лекин «тилнинг суюги йўқ» эканини билгани учун, бу сафар индамай қўя колди.

– Тарзан, сен билан гаров ўйнайман, агар Фима ўлмай қолса, изимиздан бориб, Бек акамизга дод-вой қилади. Баҳонангни тайёр қилиб кўй.

– Баҳона тайёрлагандан кўра, Фимани ҳаёт азобла-ридан куткариб кета қолайлик?

Тарзан шундай деб, машина эшигини очганида Ахтам уни ёқасидан ушлади:

– Ликиллайверма! Фима ўладиган иш қилмади, ўлдиришга ҳаккимиз йўқ...

Машина қўзғалиб, қишлоғининг лой кўчалари ортда қолгач, Ахтам Ҳалимдан: «Болаларни ўз фарзандидай кўришига ишондингми?» – деб сўраб, «Балки шундайдир», – деган мужмал жавобни олди.

– Сен-чи, Тарзан?

– Болаларнинг уст-боши ёмон эмас, корни тўқ, ҳар холда яхши бокқан.

– Икковингнинг аклингни кўшса, битта эшакка юқ бўлмайди. Бола бокқиси келса, Олтойда етимнинг уруғи қуриб кетибдими? Сен устингга кўйлак сотиб олишга борсанг, матоси нимадан, деб қизиқсанми? Болалар бу туллак учун одам эмас, фойда келтирувчи бир матоҳ! Болаларнинг ота-онаси ким, деб қизиқмаганми? Аҳмоқ эрини чопиб ташлаган хотин камоқдан чиқиб, болаларини кидиришини билмаганми? Факат у томонда Бек акамнинг, бу томонда яна аллакимнинг зўравонлари келишини кутмаган. Ё хотиннинг ўзи, ё тоғасими, амакисими келса, савдолашиб, пуллашни ҳисоб қилган. Ана шунаقا! Бир иш қилишдан олдин каллани ишлатиш керак. «Хўп бўлади, Бек ака», деб юраверсаларинг, шўрларинг курийди.

Кор ёғмаган киши, дард келмаган бош бўлмайди. Асадбек қўшниси Қамариддиннинг ташвишли масаласини қозихонада ҳал қилиб берганига амин эди. Не афсуски, даъвогар қарздан воз кечгани, уй сотилмай қолгани билан бу хонадон осмонидаги абрибalo хали таркалмаган эди. Корадорига ўрганиб қолган йигитни офат ботқоғидан тортиб олиш учун қозихонада кўрилган чоранинг ўзи кифоя килмаслигини Асадбек ўйлаб кўрмаган эди. Тўғри, ўша кезлар фарзанди вафоти туфайли ўз ғами чодирига бурканиб колди. Лекин, бу бало дўли ёғимаганида ҳам қўшни йигит тақдирига бошқа қизиқмаган бўларди. Назарида, у қўшнисини дардан бутунлай ҳалос этиб, бошига баҳт тожини кийгизиб кўйган эди. Ҳолбуки, уйни сотиш, карзни тўлаш Қамариддин учун ҳаёт-мамот масаласи эмас эди. Уйи сотилган тақдирда ҳам кўчада колмасди, бир кулбага жойлашиб, бир тишлам қотган нонга каноат килиб яшайверарди. Ҳудо насиб килган бўлса, яна бир бошпана куриб оларди, корни ошга ҳам тўярди...

Унинг дардини бегоналар тушуниши қийин:

...гиёҳвандлик кафанида кўним топиб, тирик ўлика айланган кенжасини ҳаётга қайтариш мумкин бўлармикин?

Жувонмарг бўлганлар ҳакидаги гап-сўзлар унинг кулогига ҳам етиб келади. Ўз фарзандини ҳам шундай кисмат кутаётгани ҳаёлига келса, бадани ажал музлиги ҳукмида титрайдиган бўлиб қолган эди.

Гунохкор банда!

Уй ташвишида, қарздан кутулиш дардида қўшнисидан ёрдам сўради...

«Фарзандимнинг жонини омон сакла, бу балолардан куткар!» деб Яратганга сиғиниб, саждага

бош кўймади. Кўп қатори тили «Худо асрасин», дерди. Бироқ, Худони танимай туриб, унинг қудрати-ю, мўъжизаларига ишонмай туриб, сўраб яна нажот кутиши ғалати! Танимаган нотаниш одамдан бир сўм сўраса бермаслигини билгани учун ялинмайди. Худони танимай туриб, амрларини бажармай туриб, сўрайверади, талаб қилаверади... Мантиққа зид бўлган бу ҳолда нажот кутишни нима деб аташ мумкин?

Оқибат уни каерда кутялти? Айрилик саҳросидами?..

Гиёҳвандни зулмат салтанати бағридан юлиб олишнинг машакқат эканини ҳамма билади. Даволаш масканида ҳам қайдандир қорадори топиб, томирига юбораётган нодонларни зулмат қаъридан тортиб олувчи куч борми бу вафосиз дунёда? Асадбек истаган тақдирда ҳам бунга кодир бўла олмасди. Дори-дармон учун пул бериши, врачларнинг энг зўрини топиб бериши ҳам қўшнининг дардини пича енгиллатиши мумкин, лекин бу нажот эмас!

Манзура бомдод намозини ўқиб бўлиб, шийпондаги жойнамоз устида тасбех ўгириб ўтирган эди. Бармоклари тасбех доналарида, хаёли эса ўғли Абдуҳамидда эди. Тушида чиройли либослар кийиб олган хушҳол ўғли билан сухбатлашди... Ҳозир эса ўй-хаёlinи маҳшаргоҳ ва ундаги она-боланинг нурли юз билан кўришаётгани манзараси банд этган эди. Тушидаги бу гўзал манзара коронғи кўнглига чироқ ёқди.

Унинг руҳи бу он Холик сари интилган, ёнидаги жойнамозда ўтириб, пичирлаганича муножот килаётган Фазлияни ҳам унуган эди.

Субхи содик коронғуликини суриб ташлаган дамда қўшни томондан онанинг зорли ноласи эшитилиб, Манзура сесканиб тушди. Фазлия «нима бўлдийкин?» деган савол назари билан унгә қараб, фармойиш кутди. Манзура «чикиб билиб келинг», деб буюрмай, ўзи чаққон турди-да, «вой шўрим, вой шўрим» деб пи-

чирлаганича дарвоза томон йўналди. Фарзанд доғида ёниб кул бўлаётган она қалби қўшни она не сабабдан фарёд килаётганини гап-сўзсиз ҳам англаб етган эди. Фазлия дарвозага қадар изма-из борди-ю, кейин нима қиласини билолмай тўхтади.

Онанинг ноласини Асадбек ҳам зшиитди. Туни билан алак-чалак туш кўриб, куш уйкусиде ётгани учун бу овозни тушидаги фарёдлардан бири деб ўйлади. Нола тинавермагач, кўзларини очиб, қаддини кўтарди. Кўшни хотин «вой, болам!» деб яна бир нола қилгач, овози тинди. Асадбек юз-кўлини ювиб, сочикни кўтарганича ховлига чикди. Фазлия уни кўриб, салом берди-да, ошхона томон юрди. Болохонадаги йигитлардан бири хожасига кўзи тушиши билан шошилганича келиб, кўшнининг ўғли вафот этганини маълум қилди.

– Қайси ўғли экан? – деб сўради Асадбек.

Йигит «бilmасам», дегандай елка кисди.

– Шундай бурнингнинг тагида бирор ўлиб ётади-ю, кимлигини билмайсанми? – деди Асадбек.

– Кеннийим чиқиб кетдилар, – деди йигит айбдор одам каби бошини эгиб.

Асадбек индамай бурилиб, ичкарига қайтди-да, кийимини алмаштириб чикди. Дарвозаси рўпарасида турган милиция машинасига қараб олиб, кўшни осто-насини ҳатлади. Ҳолсизланган Қамариддин гилос дарахтига суюниб турар, катта ўғли унинг елкаларини силаб далда берган бўларди. Дараҳт шохларида қизара бошлаган гилос мевалари улар тепасидан конли ёшлар тўкаётгандай эди гўё... Сал нарида ерга ўтириб олган бошяланг онаизор ёнида тиззалаб ўтирган Манзура уни сабрга даъват қиласарди.

Катта ўғилни кўргач, Асадбек «демак, кичиги ўлибди-да», деган хулосага келиб, кўшнисига таъзия билдириди. «Нима бўлиб ўлди?» дейишга тили бормай, «Милисани нега чакирдинглар?» – деб сўради.

– Олиб кетиб, ёриб кўриши шартмиш. Экспертиза

килмаса, гүрковга қоғоз ёзиб бермас экан, – деб ота ўрнига ўғил жавоб берди.

– Экспертизаси нимага зарур экан?

– Доридан ўлди-ку, шуни исбот қилиб беради-да.

– Қанака дори?

– Қанака бўларди, корадори-да!

– Ташламаганмиди?

Қамариддин саволга жавобан пастки лабини тишлади-да, алам билан бош чайқаб, «йўқ» ишорасини қилди.

– Бу тузаладиган касалмас, Бек ака, ўзи ҳам қийналди, бизларни ҳам қийнаб юборди. Мана, ўзи ҳам кутулди... – «биз ҳам кутулдик», деб юбормаслик учун тилини тишлади.

Қамариддин ўғлининг тилидан учмаган, аммо меҳрсиз дилидан жой олган ҳақиқатни англаб, ингради. Додлаб юборишдан ўзини тийиб, унга «ойингга қара», деб йиғламсираб пичирлади.

– Кечаси ҳаммомга кириб, томиридан яна олибди. Юраги чидамаган... – деди ўғил Асадбекка қараб.

– Ойингга қара, – деди Қамариддин бу сафар баландроқ ва зардали овозда.

Ўғли нари кетгач, «аканинг меҳри-оқибатини кўрдингизми?» дегандай мўнг тўла ёшли кўзларини Асадбекка тикди.

Фоғил банда!

«Худодан қайтибди!» деган ҳикматни наҳот билмаса? Эшитган... факат ўзини билмаганга солади. Ўғиллар меҳр-оқибатни кимдан оладилар? Улғайланларида меҳр-оқибат фазилатидан бебахра бўлсалар ким айбдор?

Чорак аср муқаддам бу жойлар ўрни жаннатмисол боғ эди. Қамариддиннинг аждодлари неча йиллар давомида бир-бирлари билан аҳил-иноқ яшаб, бу боғларни парвариш этганлар, ўзлариниң меҳр-мурувватлари билан охиратларини ҳам обод қилганлар. Иймон ва хидоят занжири Қамариддинларнинг авлодига кел-

ганда узилди. Бөг иккига бўлинганда онаси ҳали ҳаёт эди. Ака-укалар муносабатидаги ғайирлик онани кўп маъюс этди. Охири: «Икки қўчқорнинг боши бир козонда қайнар-у, бироқ ака-ука бир боғда иттифок билан яшай олмас, силаи раҳм бутунлай барбод бўлмай туриб, козонларини бошқа-бошқа қилиб қўя колай», деган тўхтамга келди. Қамариддиннинг укаси топар-тутарда ғайратлирок эди. Шу боис боғнинг иморатсиз бўлаги унга берилди. Ука онанинг раъйини оёқости этмай, акага даъво ҳам қилмай, баҳорда иш бошлаб, қишига қадар икки уй, бир даҳлизни куриб олди. Онасига атаб алоҳида уй курди. Уйлар офтобга қаратиб курилгани учун, ака томонга орка қилиб қолган эди. Ҳали пойдеворга тош ташланмасдан аввал она иштирокида бу масалада узроҳлик бўлган, Қамариддин укасидан рози эканини билдирган эди. Уй деворлари бел баробар кўтарилиганда розилик берганидан ачина бошлади. Онанинг ўлимидан кейин бу ачиниш норозилик ҳиссига айланди. Ўз кезлари уйнинг соясида роҳатланиб ўтиради, қишида соя узайгач, шайтон васвасаси кучайб, иморатни буздириб ташлашга даъват қиласверарди. Ҳидоятсиз калбга кирган ғайирликнинг давоси – иймон! Аммо қани ўша иймон? Қамариддин норозилигини давомли равишда ошкор эта бошлагач, ака-ука орасидаги совуган салом-алик ҳам йиғиширилди. Ҳатто жиянларнинг амаки ва кеннойиларга салом бериши тақиқланди. У йилларда маҳалла ака-ука орасидаги бундай нохуш ҳолга бефарқ қараб турмасди. Ота қадрдонлар уларни муросага келтиришга уринганларида Қамариддин «укам менинг ҳовлимдан бир метр ўғирлаган, уйини бузиб, бир метр нарига курсин», деб, кайсаарлик килди. Оқсоқоллар «ҳовлини онанг бўлиб берган эдик», деб эслатишса ҳам кўнмади. Охири, орани очик қилиш мақсадида мутахассисларни чакиртириб, ерни ўлчатишиди. Ака даъво қилгандай бир метр змас, йигирма беш сантиметрга хато килингани аниқланди.

Қамариддин ана шу йигирма беш сантиметрга ҳам күнмади. Укаси «шу бир қырғыз ер эвазига кичик ўғлингизга атаб ҳовлингиз этілгіга бир иморат солиб берай», деса ҳам, бу марҳаматни садака, ўзини эса тиланчи ўрнида күриб, унамади. Ота-она арвохининг безовта бўлиши эслатилганда ҳам хайрли йўлга бурилмади.

Укаси уйни бузишга ҳам рози эди...

Бирок... охирги можаро бўлган кечаси уйқуга ётди-ю, эрталаб уйғонмади. Ўлим уйқуси уни бағрига олиб, аканинг даъво-ю ғалваларидан қуткарди. Уканинг оиласи ҳам, махалла ахли ҳам ўлим можароларга якун ясади, деб янглишишган эди. Орадан тўрт ой ўтмай, аканинг ғиshawаси яна давом этди. Қайноғасининг ғалvasи тинмаслигини англаған келин эрининг йилини ўтказгач, ҳовли-жойини сотажагини эълон килди. Оқибат шу бўлди-ки, жойни Асадбек сотиб олиб, эски уйни буздирди-да, ўрнита янада баландрок килиб иморат солдирди. Уканинг уйи ҳовлининг учдан бирини эгаллаганди. Асадбекники бошдан охиригача эгаллаган бўлса-да, Қамариддин чурқ этмади – дардини ичига ютишдан ўзга чораси йўқ бечора ахволида яшайверди. Тинмай акиллаётган лайча бўрибосарни кўрганида думини кисиб қолганидай, одамлар орасида ҳам бу каби манзара учраб туради.

Дардини ичига ютди, аммо «ёмонлигим учун Худомени баттарроқ ахволга солди», деган фикр коронги кўнглини ёритмади. Юзкўрмас бўлиб кетган келини, жиянлари ҳузурига бориб, узроҳлик килмади. Кўзларигина эмас, қалби ҳам йиғлаган ҳолда пешонани саждага кўйиб, Яратганга сиғиниб, «Гуноҳларимни кечир!» деб илтижо этмади. Ўғлининг гиёҳвандлиги, карзга ботганлиги билинганда ҳам, ўзининг гуноҳларини эсламади, тавбани ўйламади.

Бу кеч Қамариддинни субхи козибда хотини уйғотди:

– Чиқиб қаранг, ўғлингиз боя ҳаммом томон ўтган эди, дараги бўлмаяпти, – деди хавотирланиб.

— Ярим кечада оркасидан юришим қолувди, — деб пўнғиллади ота, уйкули кўзини очишга эриниб.

Она яна бир неча фурсат ҳаммом томонга хавотир билан тикилиб ётди. Кейин ўрнидан турди. Ҳовлига чиқиб бир оз турди, сўнг бултур кесиб ташланган ўрикнинг тўнкасига омонат ўтириди. Узок ўтиришга тоқати етмай, ўрнидан шарт туриб, ҳаммом томон юрди. Эшикни очди-ю, додлаб юборди. Чала уйкули кўзларини очганича хотинини кузатиб ётган Қамариддин тезгина туриб, ташқарига шошилди. Ҳаммом зшиги остонасига ўтириб, кесакига суяниб қолган хотини бехолмиди ё бехушмиди, фарқламади. Кўзи ҳожатхона тувагига бош қўйиб чўзилган ўғлига тушиб, эсини йўқотди.

Йўқ, сал бошқачарок эди...

Аввал укасини кўрди...

Чўккалаб ўтирган укасининг кўзларидан қон ёшлиари окарди...

«Акажон, жиянимни олиб кетгани келдим, рози бўлинг, бу ерда уй қуриб берай десам, кўнмаган эдингиз, у ёқда қуриб кўйдим, биллалашиб ётамиз...» деди...

Ўғли амакисининг тиззасига бош қўйганича гўё ширин уйкуда эди...

Манзара шундай эди...

Кўзлари алдаган экан, гўё чақмок нури бир чараклади-ю, ҳақиқат тасвири намоён бўлди: ўнг кафтида эм игнасини чангллаб олган кенжаси амакисининг тиззасига эмас, ҳожатхона тувагига бош қўйиб жон берган эди...

Хушидан кетгандир, деб ўйлаб, ўғлининг юзини сингилгина шапатилади, сув ҳам сепди. Кейин тўнғичини чакирди, хотинининг юзига сув сепиб, хушига келтирди. Тўнғичи дўхтири чакирди, улар эса милицияни... Мурдани ёриб қўриш шарт эканини эшитган она додлай бошлади...

Манзура, кейин Асадбек шу фарёдни эшишишган эди...

Түнгич ўғли узоклашгач, Камариддин Асадбекка қаради:

– Ўрни бўлмаса ҳам, илтимосим бор эди... – деди ялиниш оҳангода.

– Маросимга нима зарур бўлса, тортичмай айтаверинг, – деди Асадбек.

– Жанозани ўтказишга тегишли гапим йўқ, – деб Камариддин чайналди. – Илтимосим уйга тааллукли.

– Уйга? Уй масаласи ҳал бўлган эди, шекилли?

– Унчалик эмас... Сизнинг оркангида бир иш бўлувди... Ҳайдар акамиз «бидирмай тураверинг», деганларига индамай юрувдим.

– Чайналмай, дангалини айтинг, – деди Асадбек.

– Ҳовли-жойни сотганман...

– Кимга?

– Ҳайдар акамиз сизга атаб олувдилар, икки ой муҳлат берувдилар. Шартга кўра, тўрт кундан кейин кўчишим керак эди. Агар йўқ демасангиз... кирки ўтгунча кўчмай турсам...

Тахминининг тўғри чиққани Асадбекни ғазаблантириди, томогига бир нарса тикилиб, нафаси бўғилди. Агар ёнида Кесакполвон бўлганида бўралаб сўкиши, ҳатто тепиб юбориши мумкин эди. Бироқ, гап талашиш, воқеани ойдинлаштиришнинг фурсати ҳам, ўрни ҳам эмасди. Ғазаб оловини ўчиришдан ўзга чораси йўқ эди. Бир нима деб, қўшни бечоранинг тилинган ярасига туз сепиб кўймаслик учун Асадбек уйига чиқиб кетиш мақсадида бурилди. Унинг индамай бурилиши Камариддинни ташвишга солди:

– Нима қиласай, кўчайми? – деди йигламсираб.

Асадбек тўхтаб, унга ўгирилиб қаради:

– Нега кўчасиз? Ҳайдар... сизга айтмаганмиди?

– Нимани?

– Московга кетишдан олдин мен билан маслаҳат

килганди, уйингизда... яна уч-тўрт йил ўтира туриңг.
Кўчишни ўйламанг.

— Олди-сотди хат-хужжат бўлган...

— Кимнинг номига?

— Абдусамаджоннинг номларига хатланган...

Ҳайдар акамиз «жияннинг ўкишдан қайтишига совға бўлади», девдилар. «Айтмай тур», деганларига индамаганийдим...

Бу гапдан кейин ғазабни босиш кийин бўлди. Тишларини ғижирлатиб, «ҳайвон» деб пичирлади. Шарт ўгирилиб шошаётган одамдай қадамини тезлатди. Остонага етганда яна тўхтаб, изидан илинж билан тикилиб турган қўшнисига қаради:

— Гапимга тушундингизми? Кўчмайсиз. Жанозадан кейин одам келади, хат-хужжатни бошкacha қиласди.

Зардали овозда шундай деб чикиб кетди. Қўшнисининг нима сабабдан ғазабланганини тушунган Қамариддин бўйини қисганича жойида қотиб тураверди.

Асадбек ғазабини босиш мақсадида ҳовлисида бир пас айланди, кейин шийпонга чикиб, кўрпачага ёнбошлади. Фазлия шошилганича уйга кириб, кўрпача билан ёстиқ олиб чикди.

— Муллака, кўрпача юпқа эди, — деди хижолатли овозда.

Асадбек ўрнидан қўзғалишга эриниб, кўлинин силтаб «керак эмас», деган ишорани килди.

Жамшид келиб салом берганида алик ўрнига хожасидан топширик олди:

— Ҳали жанозадан кейин... йўк, эртами-индин анавинга учрашиб, — Асадбек «анави»нинг кимлигини билдириш учун қўшни томон имлаб кўйди, — хужжатларини ол. Уйини ўзининг номига қайтариб, хатлатиб бер.

— Барибир сотибдими?

Сўради-ю, Асадбекнинг норози нигоҳидан сачра-

ган қаҳр ўқларига нишон бўлди. «Хўп, Бек ака», дейиш ўрнига савол берганидан афсусланди.

Кўшнилик хақи-хурмати учун Асадбек жаноза ўтгунича ўша ерда бўлиши керак эди. Бироқ, уйнинг сотилиши ҳақидаги гапни эшитганидан кейин Қамариддинни кўргиси ҳам келмай қолди. Иштаҳаси бўғилиб, бир пиёла чой билан кифояланди. Нонушта тайёрлаб, эрини кузатиш учун чикқан Манзура дастурхонни йигиштираётib «бояқишиларга жабр бўлганини» қайта-қайта таъкидлаб, Асадбекнинг жигига тегди.

— Ёрадиган жойда ишни атай чўзишар экан. Куриб кетмагурлар ўликнинг устида ҳам пул ишлаб олишаркан. Бугун беришмаса, эртагача бояқишиларнинг жонида жон қолмайди. Мусулмончиликда ҳам бугун ўлса, бугун кўмиш керак.

Асадбек бу жонкуярликдан хотинининг мақсадини англаб, пешонасини тиришиди.

— Мусулмончиликни ўргатмаган битта сен колувдинг, — деди жаҳл билан.

Ичидан келган нозик титрашни кўзларидағи хуркак караш ошкор қилиб кўйди. Эрининг кайфиятига қарамай гапириб кўйганидан чўчиган Манзура энди ўзини окламокчи бўлди:

— Ўргатаётганим йўқ... одамларнинг гапини айтдим.

— Одамлар яна нима дейди? «Эрингга айт, уйда пашша қўриб ўтиrmай, боласини тирилтириб берсин», дейишмадими?

Гапиришдан олдин эрининг кўзларига қараб, кайфиятини билиб оладиган Манзура бугун шошилдими ё «кўшнининг фожиасидан эрим ҳам кайғуда», деб ўйладими, ҳар ҳолда яланг оёклар билан чўғни босиб олган ғафлатдаги нодон ҳолатига тушиб, индамади.

Абдуҳамидинг ўлимидан кейин хотинига меҳрибонрок бўлиб колган, унинг ранг-рўйига қараб, қаттиқ гапирмаслик чорасини кўраётган Асадбек бу сафар ўзини босолмай бир саҷради-ю, дарров совиди. Кўшни

үйдаги фожиа Манзура қалбидаги айрилик ярасини янгилаганини англаб, «бекор ўдағайладим, бу бечоранинг айби нима?!» – деб афсусланди. Жамшидга караб:

– Ўзинг бориб кел, жанозаси пешиндан қолмасин, – деб буюрди.

– Барака топинг, адаси, сиз кўп хайрли ишлар қиласиз, савоби боламизга етади, Худо хоҳласа, – Манзура йигламсираганича шундай деб, чиқиб кетди.

Жамшид хожасини шаҳар марказидаги уч қаватли уй ертўласига жойлашган идорага кузатиб, ўзи вазифани бажаришга йўл олди. Ичкарига кирган Асадбекнинг димогига сигарет ҳиди урилиб, Қорақошга норози киёфада бокди. Қорақош бу карашнинг маъносини англаб, «айб менда эмас, анави чақирилмаган меҳмонда», дегандай елка қисди-да, чап томондаги хонага имлаб қўйди. Асадбек диванда ялпайиб ўтирганча сигарет тутатаётган Орзубекни кўриб, энсаси котди. Телевизорга тикилиб ўтирган Орзубек унинг келганини кўрмади. Асадбек индамай ўтиб кетмоқчи бўлди-ю, «орқамдан эргашмасин», деган карорда чап томондаги хонага кирди. Орзубек уни кўриб, сигаретини шошилганича кулдонга ташлади-да, ўрнидан туриб, тавозелик билан кўл узатди. Асадбек кўл учида кўришиб, узок гаплашишга хуши ҳам, вакти ҳам йўклигини билдириш мақсадида диванга эмас, стулга омонат ўтирди-да, «гапинг бўлса, гапир», дегандай савол назари билан қаради.

– Шошилиб турувдим, шу томонга йўлим тушувди, индамай ўтиб кетишдан ор қилдим, – деди Орзубек.

– Йўл-йўлакай кўриб ўтиладиган одамлар қаторига қўшилиб қолибмиз, шунисига ҳам шукур, – деди Асадбек киноя билан. – Сиз йўкламасангиз, ўтган ҳам, кетган ҳам тепавериб, тупрокка кориб ташлади.

– Вактида зиёрат қилмасам ҳам, юрагимнинг

тўрида турасиз... Вакт зик, депутатлик дегани арининг уясиға бош суқишдан баттарроқ экан.

– Бугун вакт bemalolproksi, арилар дам олишяптими? Агар шошилиб турган бўлсангиз, сизни ушлаб турадиган ўғри йўқ.

– Майли, муддаога ўта қолай: телевизор кўраёт-гандирсиз?

– Телевизорда кўп нарсалар кўрсатади, қайси бирини сўрайapsиз? «Оталар сўзи»ни эмасми?

– Кўшниларни назарда тутяпман?

Асадбек «қаердан эшита колибди? Жаноза билан унинг нима иши бор?» деб ўйлаб, ажабланди-да:

– Қайси кўшниларни айтяпсиз? – деб сўради.

Орзубек: «Билмайдими ё мени лакиллатиб, кала-ка қилмокчими?» – деб ўйлаб бир зум жим қолди-да, кейин фикрини аникроқ баён этди:

– Кўшни республикани... Ваҳшийликларни кўриб, ҳатто Чингиз Айтматов ҳам даҳшатга тушди-ку? Ўшдаги воқеани эшитгандирсиз?

– Эшитдим.

– Роппа-роса бир йилдан кейин Фаргона фожиаси-нинг такрорлангани сизни ажаблантирмадими? Худди бир вактда кўйиладиган кинога ўхшамадими? Сце-нарий муаллифи бир – Москва, режиссёри бир – яна Москва... Бош ролларни ўйновчилар бир, факат эпизо-дик ролларни бултур бечора фарғоналиклар ўйнашган эди, бу йил ўшликларга насиб қилибди. Ҳамма бало-казо эпизодик ролларни ўйнаган ғариблар бошига ёғиляпти. Бунга нима дейсиз?

– Нима дейишим керак? Менам бориб, эпизодик рол ўйнаб берайми?

– Ўзингиз бормасангиз ҳам йигитларингизни юбо-ринг, биз катта халқмиз, ярмимиз кирилиб кетсак ҳам, хорлашларига йўл кўймаслигимиз керак!

Бу гапдан Асадбек ҳайратга тушди. Бу депутатдан жўяли гап чиқмаслигини аввалги учрашувларида би-либ олган эди. Бунақа бемаъни гапни ё ғирт аҳмоқ, ё

жинни, ё иғвогар айтиши мумкин. Бу одам аҳмокқа ҳам, жиннига ҳам ўхшамайди...

Иғвогарми? Иғводан максади нима?

Саволга жавоб олиш максадида унга тикилди...

У зулм учқунларини сачратиб шундай ғазаб билан тикилди-ки, агар бу он кўзлари тилга кирганида «мен бундай қараш учун яратилмаган эдим», деб фиғон чеккан бўларди.

Орзубекка бу қараш таъсир этмади, кўзларини олиб қочмади.

– «Ярмимиз кирилиб кетсан ҳам» дедингми? – Асадбек ғазабини яширмай, овозини баландлатди. – Сен ўзинг қайси томонда бўласан? Кирилиб кетадиган қисмидами ё панада тухум босиб, жон сақлайсанми? Кўлингта милтик беришса, «узр, бугун жуҳуд хотинимнинг кошига ўсма қўйишим керак эди», деб кочиб коларсан, а?

– Гапимни айнан тушунманг, мен образли қилиб айтдим...

– Ҳе, образингга урай сени! Йигитларимни юбо-ришим керакми? Нима деяётганингни биласанми? Мени бир босмачи деб ўйлајпсанми? «Борларинг, босларинг!» десам, «июв-илюв!» қилиб, килич яланғочлайдиган бир дивизия аскарим борми? Бор бўлганда ҳам сенинг гапингга лакқа тушадиган аҳмоқманми мен?

– Ватанпарварлик ғурури...

– Сен ватанпарварликдан гапириб оғзингни кўпиртирма! Битта амал столи-ю, тагингдаги «Волга» билан ўладиган ғуруингни пеш қилма менга!

Орзубек зътирозга оғиз жуфтлаган эди, Асадбек шарт ўрнидан туриб, «гап тамом!» дегандай стулни нари сурди-да, эшик томон юрди, остоңада буйруқка маҳтал турган Қорақош тисарилиб, хожасига йўл бўшатди. Асадбек хонаси томон бурилаётиб унга буюрди:

– Акангни кузатиб қўй. Кўчага чиккунича иззат

кил, останани ҳатлаб ўтгач, оркасини тепкинг билан бир сийлагин-ки, қайтиб қўзимга кўринмайдиган бўлсин.

Хонасига кириб, жойига ўтириди. Қиладиган зарур иши йўқ эди, хонаси қўзига тор кўриниб, юраги сиқилди. Жамшид кайтгунига қадар эзгин бир ахволда ўтириди. Кейинги ҳафталар ичи бундай ҳолат кўп тақрорланадиган бўлиб колган эди: юрагига қил ҳам сиғмайди, бирор билан гаплашишни ҳам истамайди. Каёкларгadir кетиб колишни хоҳлади. Тоғу тошларда бир кулбаси бўлганида ҳозирнинг ўзида шаҳардан чикиб кетарди. Манфаат дўстлари кўп, аммо дард ўртоғи бўла оладиган одам кам...

Шунака бетайин дунёда яшаш осонми?

Оғир, жуда оғир...

Худо пўлат сандикни пулу жавҳарларга тўлдирмай, атрофини дили субхи содикдек соф дўстларга тўлдиргани яхширок эмасмиди? Қалбини дард сика бошлаган кезларда хасратини пўлат сандикқа айтадими?..

Кўнгли ёлғизликни истайди. Ҳозир хонада бир ўзи ўтирибди, лекин унга бунака ёлғизлик керак эмас.

Ёлғиз ўзи тезокар сой бўйида ўтиrsa...

Кушлар чуғиридан бошқа овоз қулоғига кирмаса...

Ким бўкиб ўляпти, ким оч коляпти – иши бўлмаса...

Абдураҳмон табибинида даволанаётганида узоқ кишлoқларда яшайдиганларга ҳаваси келган эди: тонгда туряди, мол-ҳолга қарайди, нонуштадан кейин ё бокка, ё далага жўнайди. Оқшомда қайтгач, бир коса маставасини хўриллатиб ичib, ёнбошлаганича телевизор томоша килади. Қишлоқда тўй бўлса, тўйгунича ичади-ю, эртасига боши тарс ёриладиган даражада оғриб, хотинининг жаврашларини эшишиб ётаверади. Қозони кунда бир қайнаб турса, бас, улардан баҳтлироқ одам йўк...

Шу шинам хонасини ёмғир ёғса томидан чакка

үтиб туралынан кулбага алмаштиришга ҳам тайёр эди.
Атрофда кенглик бўлса бас...

Кўнгли кенгликни қўмсайди.

Кенглик... қаерда бор? Сиқик кўчаларга, сиқик ховлиларга кўз ўрганган, аммо кўнгил кўниколмайди. Дунё тор... бир қарич ҳам бўш ер йўқ. Нахот шундай? Ахир қаердадир кўнгилга таскин бера олувчи кенглик бўлиши керак-ку? Ёруғлик бўлмаса ҳам майли, аммо поёни уфққа тулашиб кетадиган кенглик зарур. Кенглик ҳамма томондан ўраб олинган, сиқиқда қолган. Кўнгил шу чегарани ёриб ўтишни истайди.

Тепадаги уч қаватли бинода ташвишли кун қайнаб ётибди. Пастда осудалик ҳукмрондай гўё. Осудалик... кенгликдан нишонами? Одатда кенглик осудаликни, осудалик эса кенгликни тақозо этади. Бири бирисиз вужудга келмайди. Уч қаватли иморатнинг ертўласида нима учун осудалик ҳукмрон? Кенглик эса сикиб қўйилган... Табиатнинг азалий қонуни ўзгардими, даврга бўйсунишга мажбурми?

Бўш кенглик хеч ерда йўқ... Ҳатто хаёл ҳам банд. Бу сиқик шаҳарда яшайвериб, тасаввури ҳам кенгликни унуглан. Энди кўнгли нимани хоҳлади, нимани излайди? Кенглик – балки ўлим чохидир? Шу чоҳ уни балки кенгликка олиб борар? Агар шундай бўлса, ҳаракати бесамара. У изляяпти, ўлим эса ундан қочялти. Нахот қолган умри беркинмачок билан ўтса?

Ҳатто Кесакполвоннинг кўнгли ҳам ёлғизликни қўмсаб қоларди. Бунақа пайтда у Асадбек сингари сиқилиб ўтирасди, кўнгил хузурини осонрок йўл билан топарди: қозихонасига борарди-ю, чети учган пиёлани сассик ароққа тўлдириб бир нафас билан кўтарарди-да, аччиқ пиёзни ё саримсоқни чайнаб ташларди... Баъзан Асадбекни ҳам шундай қилишга даъват этарди. «Бу ялтири-юлтири маишатларинг жонимга тегди, чойхонадаги ирkit кўрпачага ўтириб, кир дастурхон устида пашша талаб ётган бодрингни газак қилгим келяпти», деб қоларди...

Асадбек хозир нима қилсин? Кўнгил хотиржамлигини ўша қозихонадан изласинми?

Бемаънилик!

Асадбек хаёлига келган бу фикрдан ғашланиб, ўрнидан туриб кетди.

«Махмуд Юсуфхонадан жой қўриб келганди, шу ёзда битта кулба бўлса ҳам тиклаб олишим керак. Бу ғалвалардан қочмасам, жинни бўлиб ўламан», – деб ўйлади у.

Жамшид қайтиб, ўлик олиб кетилганини хожасига айтди. Кимга учрашиб, масалани қандай ҳал килганини баён этмади, Асадбек ҳам суриштирмади.

– Жанозани пешин намозидан кейин маҳалла масжидида ўкишаркан.

Жамшид жанозага бориш хусусида сўрамаган саволига жавоб олиш мақсадида бу хабарни айтди. Асадбек индамай ташқарига чиқиб, машинага ўтириди. Жамшид «жанозага кетяпмиз» деб ўйлаган эди. Шу сабабли хожаси «Тарзанинг анхор бўйидаги жойига хайда», деганида ажабланди.

Тарзанинг жойи ҳамиша саришта ва озода тутилса ҳам, Асадбекни кўрган чойхоначи довдираб қолди. Асадбек соҳилга тушиб, атрофни синчилаб кузатдида, «Кесакнинг фаросатидан дурустров экан», деган тўхтамга келди. Сўридаги шахмат тахтасига кўзи тушиб, биринчи сухбатда Сур айтган гапларни беихтиёр эслади: «сиз шоҳсиз, тўғрими? Мен шоҳларга ачинаман... Шоҳ ёлғиз, бечора ҳамиша ҳимояга муҳтоҷ. Вақти келса, битта пиёдага кучи етмайди. Битта пиёда сурилиб келиб, мот килиб қўйиши мумкин»...

«Мен «мишики», деб назарга илмаганим билан, бу «пиёда»ларда гап кўп, индамасам, писиб келиб, суриб ташлайди», деб ўйлаб, Жамшидга қаради:

- Шахматга ишқибозми дейман, укаларинг?
- Тарзани зўр ўйнайди, деб эшитганман.
- Ўзинг-чи, ўзинг суришмаганмисан?
- Ўйнашни билмайман.

– Билмаганинг чатоқ... От юриш қилиб, тепиб колса, кочгани жой топа олмайсан.

Жамшид хожасининг бу гапни айтишдан мақсадини англамади.

Асадбек сув устига қурилган темир шийпондаги кўрпачага ёнбошлади. Сувга тикилиб ётиб, окиб келаётган ахлатларни кўрди-ю, «ҳамма ёқни ахлат босиб кетди», деб ўйлаб, кўнгли ғашланди.

– Бек ака, димлама тайёр экан... ё қозон кабобни кутамизми? – деб сўради Жамшид.

– Буларинг хўрда-маставани писанд қилмайдими? – деди Асадбек ётган жойида керишиб.

– Бир пасда гатоп қилиб ташлаймиз, – деди сал нарида қўл ковуштириб, буйруққа маҳтал турган чойхоначи.

– «Нон палов» деган овқатни ҳам биласанми? – деб сўради Асадбек унга караб.

– Картошка билан нонни ковуришми? Кўнглингиз шуни тусаётган бўлса, қийма тайёр, шест секундда гатоп қилиб ташлаймиз.

– Қиймангни қўй... – Асадбек шундай деб енгил хўрсинди. – Уруш пайтида онам раҳматли ярим пиёла паҳта ёғига озгина нон билан картошкани ковуриб олардилар. Менга шу шоҳона овқат ҳисобланарди. Ҳозир қуйруқ ёғи соласан, кўзи гўштими ё қиймами қўшиб қовурасан, лекин барибир онам пиширган нон-паловга етмайди...

– Бек ака, бир уннаб кўраверсин, кўли ширин бу одамнинг.

– Уннасин, уннасин, фақат «шест секунд» деб шошилиб, овқатни моховга ошна қилиб қўймасин.

Чойхоначи таъзим килгач, орқасига қайтди. Асадбек хонасида юраги сиқилиб ўтирганда ёлғизликни, кенгликни кўнгли кўумсаган эди. Шу ерда истаганини топгандай бўлиб, кўзи уйкуга кетди. Овқат пишганда ҳам Жамшид хожасини безовта қилмади. Асадбек пешиндан ошганда уйғониб, юз-кўлини анхорда

ювмокчи бўлди, лекин ҳануз оқиб келаётган ахлатларни кўриб, фикридан қайтди. Жамшид мактай-мактай дастурхон ўртасига қўйган таомдан бир-икки кошик еб, тўхтади.

– Ёқмадими? – деб сўради Жамшид, хавотирланиб. – Қозон кабоб олиб келсинми?

– Кўли ростданам ширин экан, ёқишга ёқди, – деди Асадбек, кейин ўйчан тарзда қўшиб қўйди: – Лекин қаҳатчиликдаги ош барибир бошқача totли эди...

2

Таомдан кейин бир-икки пиёла чой ичишгач, уйга қайтишди. Асадбек қўшнисиникига кириб фотиҳа ўқиди, Қамариддин унга миннатдорчилигини изхор қила бошлагач, эшитгиси келмай, уйига чиқиб кетди.

Дам ўтмай дарвоза кўнғироғи жиринглади.

– Сизни сўрашса, нима қилай? – деб сўради Жамшид.

– Бошим оғриб турибди, мени тинч кўйларинг, – деди Асадбек пешонасини тириштириб.

Кўнғироқни чалган одам тинч кўядиган тоифадан эмасди: дарвазахонада Жамшид билан шошилиб сўрашиб, ҳовлиги қирган Жалилнинг рангига ранг йўқ эди. Дўстини ҳеч бу ахволда кўрмаган Асадбекнинг юрагига хавотир оралади.

– Асад, шўримиз қуриб қолибди, – деди Жалил у билан кўришаётib.

– Нима бўлди? – Асадбек уни икки елкасидан тутиб, кўзларига тикилди.

– Абдураҳмон акамизни ўлдириб кетишибди, – деди Жалил йиғламсираб. Кейин ғазаб билан қўшиб қўйди: – Шундай одамни-я!

– Ким ўлдиради? – деди Асадбек уни силтаб.

– Телевизор кўрмаяпсанми? Каллангни ишлатиб, хабар олгани борсанг ўлармидинг!?

Асадбек бўшашиб, дўстини қўйиб юборди. Оёқла-

ридан жон қочгандай бўлди. Телевизорга кўзи тушиб эди. У томонларда бўлаётган ғаламисликлардан хабар топиб эди. Аммо... Жалил ҳақ! Каллани ишлатмабди... Ҳатто... ҳали Орзубек бу ҳақда гап очганида ҳам, ўт ичидаги уйлардан бирида Абдураҳмон табиб борлиги мумкинлигини ўйлаб кўрмабди.

Зулм сели Абдураҳмон табибнинг қишлоғини ҳам мотам чодирига ўраб ўтганини эшитиб, нима дейишини ҳам билмай гарангсиб қолди.

– Отлан, Муҳиддин отага айтдим, тайёр турибдилар, – деди Жалил уни шошириб.

Жалилни кутиб олиб, ўзи берирокда қолган Жамшид Асадбекка айтилган бу гапни эшитиши ҳамон, хожасининг амрини кутмаёқ, машина сари юрди. Жалилнинг келганини кўрган Манзура ошхонадан чиқди-ю, аммо меҳмон билан кўришишга ҳам, хайрлашишга ҳам улгурмай қолди. Эрининг бирданига қаёkkадир отланиши, индамай жўнаб колиши Манзура учун янгилик эмасди, лекин шошиб келган Жалил билан бирга кетишни уни хавотирга солди.

Довондан ошишганда шом қоронғуси тушган эди. Йўлнинг ўнг томонида кўринган кишлоқ томон бурилиб, масжид қаердалигини суриштиришди. Эллик-олтмиш кишини сифтирадиган, хавоси димиқиб, заҳхиди анқиб турган масжидга кириб шом намозини ўқишиди. Бу вақтда Асадбек билан Жамшид машинада ўтиришди. Намоздан сўнг йўлда давом этишни мўлжаллаб турган Асадбек Жалилнинг чиқиб: «Бугун Аллоҳнинг уйида меҳмон бўламиз», деганига тушунмади.

– Ичкари кирларинг, бугун шу ерда ётиб қоламиз.
– Нега? – деб ажабланди Асадбек.
– Бировникига ярим кечада кириб борамиزمи?
– Шунинг учун эрталаб йўлга чиқиши керак эди, – деб тўнғиллади Асадбек, жойидан жилгиси келмай. – Кўкондами ё Андижондами меҳмонхонада ётамиз, бу ер бўлмайди.

– Бўлади! – деди Жалил ўжарлик билан. – Югурдакларинг билан сайру саёчатга чиқсанг, меҳмонхонангда талтайиб ётаверасан. Биз фотиҳага кетяпмиз, кечаси билан шу ерда хатми қуръон қилиб, савобини Абдураҳмон акага бағишлаймиз. Имом ҳофизи қуръон экан, таклифимизга рози бўлди.

Асадбек кечаси билан бўладиган хатми қуръон нима эканини билмагани учун, эътиroz билдиришга гап тополмай қолди.

– Сен кириб туравер, – деди бир оз ўйлангач.

– Ҳа, маслаҳатни пишириб кейин кирасанми? Бўпти, каллангни ишлатавер, – деб Жалил орқасига бурилди. Тўрт-беш қадам босгач, тўхтаб ўгирилди: – Масжидга бетаҳорат кирилмаслигини биласан-а? Масжид курдирган одам Аллоҳнинг уйида хатми қуръонни эшитса, савоби кўпроқ бўлади.

Жалил кириб кетгач, Асадбек «Нима килдик?» дегандай савол назари билан Жамшиидга қаради. Бундай ҳолларда Махмуддан жўяли маслаҳат чикарди. Ҳайётнинг аччик-чучугини етарли даражада тотган Жамшиид устозининг ўрнини босиши мумкин, фақат фикрини баён этишга журъати етишмайди. Шу сабабли хожасининг савол назарини жавобсиз қолдирди.

– Биз Кўконга бораверсак-чи, эрталаб келиб буларни олиб кетамиз, – деди Асадбек мужмал бир оҳангда.

– Борсак бораверамиз-у... отахоннинг кўнгиллари ранжирмикин...

Кирамизми?

– Бир кеча минг кеча эмас...

Тунни қишлоқнинг эски масжидида ўтказиш аҳди Асадбекка ёқмади. Ўғлининг вафотидан кейин «менинг Худо билан шартномам бор: энди мен унинг уйига қадам босмайман, у меникига кирмайди», деб юборганини эслаб, юраги эзилди. Гарчи ўша ондаёқ Жалил ва Мухиддин отанинг даъватлари ила тилида тавба қилган бўлса-да, ўғлидан айиргани учун

Аллоҳга даъвосини ҳали тўхтатмаган эди. Ҳаёлига «Кечаси билан куръон ўқиб чиққани билан бир нарса ўзгарадими, ўлган табиб тирилиб келадими?» – деган фосикона фикр келиб, ошнасининг қилиғидан ранжиди. Жалилнинг ўзи бўлганида, масжидга кирмай, жўнаворар эди. Жамшид ҳақ, Муҳиддин ота ранжиди. Иложсиз ҳолда масжид томон юрди. Жалил ошнасининг калбдаги иймон нури билан эмас, нохуш бир иложсизликнинг зўри билан кирганини англаса-да, ичига «шунисига ҳам шукур», деб қўйди.

Хуфтон намозидан кейин давра тортиб ўтиридилар. Хатми куръон бўлишини эшитган қишлоқ аҳлидан бир неча киши колди. Тиловатни Муҳиддин ота бошлаб, имом ширали қироати билан давом эттириди. Ярим кечада Асадбекни мудрок босиб, дераза токчасига суюнганича ухлаб қолди. Жамшид ўтирганларга сездирмай аста ташқарига чикиб, машинанинг орка ўриндиғига ётди. Энди кўзи илингандা ойнакни кимдир такиллатди. Қаддини кўтарган эди, ташқаридаги милиционер йигит эшикни очиб, «бу ерда нима бўляпти?» – деб сўради.

– Бу ердами? – деб саволни такрорлади Жамшид ташқарига чиқиб, кейин кесатик оҳангода аниклаштиrmокчи бўлди: – Машина ичидами? Мен ухляяпман. Мана энди уйғондим, саломлашсам ҳам бўлади.

– Мачитда нима бўляпти? – деди милиционер унинг киноясига парво қилмай.

– Хатми куръон бўляпти, – деди Жамшид керишиб.

– Ким рухсат берди?

– Рухсатми? – Жамшид «шунга ҳам рухсат керакми?» демокчи эди, гап чувалашиб кетиши мумкинлигини фаҳмлаб, жиддий оҳангга кўчди: – Ким бўларди, Тошкентда ўтирадиган муфтий беради-да бунака рухсатни, – деб эснади.

– Коғози борми?

– Коғознинг нима кераги бор, ўзлари шу ердаларку? Номерга қаранг, укахон, мошина кимникилигини билмайсизми? Милиса деган сал зийракрок бўлиши керак.

– Ўзимам мошинга қараб, Тошкондан муфтий ҳазрат келгандирлар, деб ўйловдим. Анави шеригим, – у сал нарида турган милиционерга қараб олди, – «бегоналар кириб олганга ўхшайди» деб ваҳима қилиб мени чалғитди-да...

– Корининг овозини эшитмадиларингми?

Дарҳакикат, корининг овози ташкарида ҳам эшитилиб турган эди.

– Омма имомимизнинг кироати зўр-да! – деди милиционер фахрини баён этиб. – Тошкондаги кориларнинг мусобақасида учинчи ўринни олибди. Ўтган ҳафта тоғам қайтиш кифанида уйларига бориб, кечаси билан ўқиб берди.

– Ҳа, ана, билар экансиз-ку. Хоҳласангиз киринг, мазза қилиб эшитинг.

– Йўқ, ака, биз хизматдамиз, бизга мумкинбас.

Милиционер шундай деб изига қайтди.

Бомдодни ўқигач, йўлга тушишмади, хатмни кутишиди. Кун терак бўйи кўтарилганда имом охирги сурани ўқиб, дуога қўл очди. Масжиддан чиккан Жалилнинг кўзлари мамнун бокарди. Уйкусизлик чарчоги сезилмас эди.

Жалил Жамшиднинг ёнига, олд ўриндиқка ўтирди. Асадбек билан Муҳиддин ота орқадан жой олдилар. Жалил имомни хурсанд килган экан шекилли, у алоҳида тавозе билан кузатди.

– Шу ишимиз яхши бўлди, қуръонни эшитганда ҳар кандай тош калб ҳам эриб кетади, – Жалил шундай деб ўгирилиб, «тўғрими, бу гап сенга тегишли», деган маънода Асадбекка қаради. Асадбек бу қарашга жавобан: «ўзинг обдон эриган бўлсанг, етарли» демокчи эди, «отанинг олдида яна бобиллаб бермасин», деган хавотирда индамай кўя колди.

- Раббим тош қалбларга назар солмайди, түғрими? — деди Жалил энди Мухиддин отага қараб.
- Қалбнинг тошга айланиб қолишидан Ўзи асрасин, — деди Мухиддин ота. — Бу томонларда жанозадан кейин хатми куръон қилиш одати бор. Аллоҳнинг каломини сомеъ ҳолда тинглаш фарз. Савоби бор. Лекин... фақат эшитишнинг ўзи билан муддаога эришилмайди-да. Аллоҳнинг илоҳий китоби фақат эшитиш учунгина эмас. Куръони Карим маънолари дарёи азимдур. Бу дарёдан ҳар ким ўз зеҳнига лойик сув олади. Банда ўзи ўқиса, тушунса, амал қилса савоб даражаси баландроқ бўлади. Басир кўз учун каломуллоҳни ўқишдан ҳам ортиқрок баҳт борми? Ҳар бир одамнинг кафани бошқа, лаҳади бошқа. У дунёдаги савол-жавоби ҳам ўзига яраша бўлади. «Мусҳафни ўқидингми, унга амал қилиб яшадингми?» деган савол берилса жавоб қандай бўлади? «Тингладим, аммо тушунмадим, шу боис амал қила олмадим», дейишдан Худо асрасин! Аллоҳ таборак ва таоло дейдики: «Эй Одам фарзанди, сенга уч нарсани ихтиёр қилдим: яъни оила аҳлингни, молу дунёингни ва амалингни. Сен ўлиб, оёғинг ердан узилиши билан мол-дунёинг орtingда қолади. Оёғинг уйдан чиқиши билан оиласнг ҳам ажраб қоладилар. Кейин қабрда бўласан. Киёмат кунида фақат яхши амалинг фойда беради. Амалинг тузук бўлса, сени ҳам тузатиб қўяр, агар ёмон бўлса, сени ҳалок қилгувчи ерга топширас». Куръон ўкишни ўрганолмаётган Жалил бу танбехнинг ўзига ҳам тегишли эканини фаҳмлаб ўнғай-сизланди, бир оз жим кеттач, ўзини ва ўзи кабиларни оқлашга қаратилган баҳонани айтди:
- Худо ҳаммани бир хилда зеҳни қилиб яратмаган-ку? Ҳамма ҳам кори бўлавермайди-ку?
- Бу галингиз ҳак, бўтам. Агар барчанинг зеҳни-фаросати, хотира кучи бир хил бўлганида Аллоҳ Куръони Каримни тўла ёд олишни бандаларига фарз киларди. Лекин хотирам заиф, зеҳним паст, деб ёд

олишга ҳаракат қилмаслик ҳам дуруст эмас-да. Хотира кучи заиф бўлган одам ҳам кунда бир кичик оятни ёд олиши мумкин. «Ихдинас сиротал мустакийм» – эй Парвардигоро, бизларни тўғри йўлга солгин, оятини заслав колиш мушкулми? Агар кунт қилиниб, кунда бир оят ёдланса, йилда уч юз олтмиш оят ёдланган бўладими?

– Бу гапингиз ҳам тўғри, – деди Жалил баҳсада енгилганлигини тан олиб.

– Ҳибса эканимизда бир артист бор эди. Ўнлаб саҳна асарларини ёд биларди, Куръон илмида эса алифни калтак дейдиган даражада эди. Бир куни «шунча монологларни ёдлаб нимага эришдингиз? Бунинг ўрнига Куръонни ёдлаганингизда хидоят топиб, охират мукофотига эга бўлардингиз», деб эдим, гапимдан таъсирланибди. Ўн тўкқиз порани мукаммал ёд олганда умри вафо қилмади. Жон берар чоғи ўз ишидан мамнун бўлиб, хидоят берган Аллоҳга шукурлар килди. Охиригача ёд олишга улгурмагани учун армон билан кўз юмди. Чиндан ҳам Тангри таоло у биродаримнинг қалбини Куръон нури билан ёритиб хидоят берди. Аллоҳ Ўзининг элчисига мурожаат этиб марҳамат қиласики, «Эй Мухаммад, Сиз кофирларни Худонинг азобидан қўрқитсангиз ҳам ё қўрқитмасангиз ҳам, уларга барибир. Улар иймон келтирмайдилар. Сизнинг насиҳатингиз, яъни огоҳлантиришингиз шундай зотларга фойда берадики, улар зикрга – Куръонга амал қиласидилар. Худони қўрмасдан туриб, ғойибона Ундан қўрқадилар. Сиз уларга Худонинг кечиришидан ва улуғ ажр беришидан хабар килинг». Улуғ ажр насиб қилганларни қўрдик. Ҳидоят топмаганларнинг қанчасини кўяпмиз? Эшитинг-а: «Инна жаъална фий аъноқиҳим ағлалан фаҳия илал азқони фаҳум мукмаҳун» – оянинг маъноси бундай: «Албатта кўп кофирларга Худонинг ваъда қилган азоби собит бўлган. Улар иймон келтирмайдилар, гўёки Биз у кофирларнинг

бўйинларидан то иякларига қадар ҳалка-кишан солганимиз. Уларнинг бошлари юкори бўлиб, фўддайиб колганлар, ерга эгилмайдилар». Тушундингиз-а, Парвардигор уларнинг саркашликларини бўйнига кишан солинган одамга ўхшатяпти. Яна Аллоҳ дейдики: «Биз уларнинг олдиларидан ҳам, орқаларидан ҳам пардатўсик яратдик, бас, улар ҳеч нарсани кўрмайдилар». Мана шу огохлантиришни ҳеч бир банда, ҳеч қачон унутмаслиги керак. Бўйинга кишан тушиб қолишидан Аллоҳнинг ўзи асрасин!

Муҳиддин ота шундай дегач, бошини згиб, жимиб колди. Жалил унга бир қараб олиб, бошқа гапирмади. Асадбек ҳам, Жамшид, ҳатто Жалил ҳам бу гаплардан ўзларича мутаассир бўлдилар. Жамшид билан Асадбек ўзларини кишандаги банда киёфасида кўриб, ғашландилар. Бундан ташқари, Асадбек Сибирдаги қамоқхона тилга олингани учун отасини эслади. «Адам қандай эдилар? Қай ҳолда кўз юмганлар? Қандай армон билан кетганлар?» деган савол уйғониб, юрагини таталади.

Андижонга яқинлашганларида тун чарчоғи хукмини ўтказиб, Жалил ухлаб қолди. Ўшга етганларида харбийлар уларни тўхтатдилар. Жамшид уларга максадни тушуниришга уринди. Зобит кўнавермагач, Муҳиддин ота машинадан тушиб, ёрдамга эмас, фотиха ўкиб, таъзия билдириб, кўнгил сўрашга кетаётганларини англатгач, йўл очилди.

Кишлоққа кираверишдаги ёнган уйларнинг корайиб турган деворларига кўзлари тушиб, маъюсландилар. Бу деворлар ортида канча баҳтиёр оиласлар канча саодатли онларини ўтказган эдилар. Қанчалари тўй қилиб, элга дастурхон ёзиш ниятида яшаётган эдилар. Саодат қуёшини сўндиришга бир неча дақиқа кифоя қилди...

Олов тили Абдураҳмон табибининг уйига ҳам етиб келган, бир қанотини ёндирган, одамларнинг ҳаракати билан ўт ўчирилиб, қолган қисми омон қолган эди.

Хатар нари бўлганига ишонган кишлоқ аҳли бу кун уйларини офат ёпинчиларидан тозалашга киришган эдилар.

Абдураҳмон табибнинг айвонида Мирзаали, Гўрўғли, Жўлон қирғиз гурунглашиб ўтиришган эди. Улар машинадан тушибган меҳмонларни танимасалар хам, иззат билан кутиб олдилар. Мирзаали ичкарига ўтган эди, табибнинг келини меҳмонларнинг кимлигини билдириб, чой дамлаб берди-да, ўзи овқатга уннади.

Дуойи фотихадан сўнг бир-бирлари билан танишдилар. Мирзаали гапни Абдураҳмон табибнинг Ўшга хавотирланиб борганидан бошлаб, бўлиб ўтган воқеаларни эринмай баён этди.

– Боши бузуклар авжга чикиб, бу томонга бостириб келишаётганда ошнам бу Жўлон биродаримиз билан биргаликда уларни тўхтатмокчи бўлибди. Ваҳший кўзига кон куйилса, одам танийдими? – деб ҳикоясига якун ясади.

– Уриб ўлдиришдими? – деб сўради Жалил.

– Уришларига Жўлон йўл қўймаган. Уйда тек ўтираверганида жони омон қоларди. Кўшнининг уйи ёнган экан, ичкарида қамалиб колган болаларни олиб чиқаман, деб ўзини ўтга урибди-да... Икки боланинг жонини сақлабди, учинчисига кирганда нафаси бўғилибди. Жўлон ўт ичига кириб, биродарини олиб чиқибди. Куйишга каттик куймаган-у, тутунда бўғилгани учунми, юраги дош беролмай, тўхтабдида...

– Бундай одамларни Аллоҳ ўтда куйдирмайди, – деди Муҳиддин ота енгил хўрсиниб. – Қадим замонларда Бағдодга ўт тушиб, уйлар кетма-кетига ёнибди. Бир уйда гўдаклар қолиб кетган экан, валий одам ўтаётиб, ота-онанинг фарёдини эшитибди-ю, ўйлаб хам ўтирамай, ўт ичига кириб, болаларни олиб чиқибди. Битта туки ҳам куймабди. Болаларнинг отаси қувониб унга ўн тилла суюнчи узатса, у валий: «тиллаларни оладиган одам бўлсан, ўтдан соғ чиқмас

эдим», деган экан. Абдураҳмон табиб ана шунақа валий қаторидаги ажойиб одам эдилар. Аллоҳ суйган дүстини бу дунёда ҳам, у дунёда ҳам ўт азобидан асрайди.

Бу гап Гўрўғлига маъкул келиб, «яхши айтдингиз», деган маънода меҳмонга мамнун қарали-ла, сұхбатта қўшилди:

— Гўр казишга қўлим бормади. Кетмонни ерга ураман-у, «Абдураҳмонга кавляпманми?!» деб ўпкам тўлади. Омма, гўр ниҳоятда силлиқ чиқиб, ўзиммиям ҳайрон қолдирди. Лахад кенг бўлди, айвонини атай силликласа ҳам бунақа чикмайди. Яхши одамнинг гўри шунақа бўлди: кетмон урсам, тупрок сачраб кетади, девор уваланиб тушаверади. «Бу бадбахтни ер олгиси келмаяпти», деб ўйладим. Охири, Кўкшапканинг гўрини очиб, ўша лаҳадга қўйдим. Ота-болага бу ҳам хайф. Барибир Худога менинг айтганим маъкул бўлди. Абдураҳмон бир кечаси валади зинони бошлаб келди. Эртасига ўзи келди. Қарашлари паришон эди, нимадандир хавотири бор эди. «Кеча Коравой бир шумликдан дарак берди. Уйлай-ўйлай нималигини билолмадим. Эҳтимол, сиз сезгандирсиз?» — деб сўради. Мен дангалчи одамман, дангалини айтдим: «Шумқадамдан ёмонликдан бошқа яна нима кутиш мумкин? — дедим. — Кўнглим бир нарсани сезиб турибди: шу икки-уч куннинг ичидаги валади зино ўлса керак. Унга янги гўр кавламайман. Кўкшапканинг лаҳадини очаман-у, суюкларини суриб, шунинг ёнига кўяман. Икки фосик биргалашиб ётаверади... Сенам... «Жаноза ўқиймиз», деб хархаша килмайсан». Абдураҳмон раҳматли кенг одам эди, бу гапимга унамади: «Мусулмоннинг боласига жаноза ўқиши керак», — деди. Бу гапидан аччиғим чиқди: «Қанака мусулмонликни айтасан? Ким эди мусулмон? Кўкшапками? Унга ҳам жаноза ўқиган эдиларинг.

Қанчадан канча иймон эгасини қурилди? Ўша ҳам мусулмонмиди?» – деб юбордим. Абдурахмон қайсар эди, гапимни олмади: «Кўйинг бу ўтган гапларни, гуноҳларига ўзи жазо олади у дунёда», – деди. Менам бўш келмадим, ғазабимни яширмай: «Ўтган гаплар, дейсанми? Гўрга киргач, ҳаммаси унутиладими, тупрок ҳамма абллаҳликларни кўмиб ташлайдими?» – деб бобиллаб бердим. «Юки енгиллар нажот топади, гуноҳи оғирлар дўзахга тушиди», деб менга сал ён босгандай бўлди. Гап талапиб колсак, «илеммий йўқ», деб турарди-ю, лекин ҳар балога акли етарди. Мен алифни калтак дейдиган оми одам бўлсан ҳам, ҳар гапга кўнавермайман. Жони чиккан ҳар одамга ҳам жаноза ўқийвермаслик керак. Кўкшапка тоифасидаги-ларга жаноза ўқилмаса, унга ўхшаган фосиқларнинг кўзлари очиларди. «Менам шу кўйга тушмай», деб гуноҳдан тийилишарди. У дунёдаги жазо қанака бўлишини ким билиб ўтирибди?! Бу дунёдагисини ҳам кўрсатиб туриш керак-да, тўғрими? Абдурахмон бу гапимни ҳеч маъкулламасди. Ўша куни менинг ўжарлигим тутиб: «Сен нима десанг деявур, Коравойга ўзим кўрсатаман. Унинг бу ерга келишига яқин колди. Аслида унга бу ердан жой бермаслик керак», – дедим. Мен кичкина одамман, ўликларни кўмишдан ўзга ишим йўқ. Бундан бошқа масалаларда мендан бирор маслаҳат ҳам сўрамайди. Бу ёғини сўрасангиз, кўп ёмонликлар қилиб ўтган одамга гўр кавлагим келмайди. «Бунақаларга жаноза ўқиш керакмас», деб факат Абдурахмон табибга айтганман. Азбаройи юрагим кон бўлиб кетгани учун шундай деганман. Аслида дунёдаги ғаламисликларга эътибор килмасам ҳам бўлади. Менга нима! Битта қорнимдан бўлак ғамим йўқ. Дунёда ким гўрковни подшо қилиб кўтарибди-ки, мен буни орзу килсан! Худо одил, ба-рибир менинг айтганим бўлди – валади зинога жаноза насиб этмади.

Гўрўғли ичини куйдираётган гапларини айтиб олиб

совугач, Мирзаали Мухиддин отага караб, Кўкшапка билан валади зинонинг кимлигини маълум қилди.

– Қоравой деганимиз қамалиб кетган эди, бу ёвузликлар бошланмасидан олдин, ўзига ўхшаганлар билан пайдо бўлибди. Абдураҳмон уларнинг мақсадини фаҳмлаб, Ўшга тушган эди. Ҳамма ваҳшийликларни Қоравой қамоқхонадан бошлаб келган ҳаромилар қилгани аник. Қилғиликни килиб, гумдон бўлишди, излари ерда ҳам йўқ, кўкда ҳам йўқ. Лекин олатасирда Қоравой одамларни ҳимоя қилганмиш, деб эшитдим. Зўрланаётган кизни куткараман, деганда шериги пичок тортиб юборганимиш. Улигини бирор кафандаб, мозористонга бирор кўтариб боргани йўқ. Эмаклаб ўзи борибди. Онасининг гўри устига бориб, кон қусиб ўлибди. Қолган гапни ўзингиз эшитдингиз...

– Абдураҳман Кудай берген достэли, ани қирғиздар ўлтиргени жок, – деди бош эгиб ўтирган Жўлон худди ўзига ўзи гапиргандай.

– Ҳадеб шунака деяверма, хеч ким қирғизни айблётгани йўқ, нима бўлганини кўриб-билиб турибмиз.

Жўлон бу танбехга эътибор бермай, ҳолатини ўзгартирмаганича давом этди:

– Аилимде ким суриса, Абдураҳманга чобатэли, дохтирга бормайтэли. Туувғаним дари-дармек бериб, оқча олмабайтэли. Дўхтир неверемди қайтиш болат, дегенда, Абдураҳман сактаб қалған... Ул бул дунёнин адами эмесэли. Кудайим аға беиншден орин берет.

Бу гапларни эшитиб ўтирган Жалил ўзини тутиб турга олмай:

– Шундай табибнинг кадрига етмадиг-а! – деб юборди. Барчанинг нигоҳи ўзига қаратилганини кўриб, фикрини давом эттири: – Дўхтир зоти оқ ҳолатни кийиб олиб, гердайиб юради, димоғидан курт ёғилади-ю, даволашидан дарак йўқ. Битта дўхтирга дангал шундай десам, «табиблар хеч нима билмайди, ўтлар билан ҳозир даволани мумкинмас», дейди.

Олдинги замонларда шу ўтлар билан даволашган-ку, тўгрими? Ҳозиргидака укол бўлмаган-ку?

Жалил фикрини тасдиқдан ўтказиш мақсадида Муҳиддин отага каради. Жалил гарчи, мавзуни бутунлай бошқа томонга буриб юборган бўлса-да, табобатнинг афзаллиги хусусидаги фикрлар марҳумнинг номини шарафлашга хизмат қилгани учун Муҳиддин ота бош ирғаб, гапга аралашди:

– Гапингиз тўғри, бўтам, ҳозирги тиббиётнинг ожизлиги – ўтмиш табобатидан юз ўғирганлигига. Электр лампочка шамчирокни менсимай, гердайиб: «Менинг нурим ғоят ёруғ» деганда, шамчирок: «Тўғри, сен нурлироқсан, лекин сени менинг нуримда яратишган», деган экан. Сибирда ҳам ўт билан даволайдиган табибларни дўхтирлар чикиширишмайди.

– Үрисларда ҳам табиб борми? – деб ажабланди Гўрўғли.

– Сибирда, биродар, азалдан туркий қавм яшаган. Ҳозир ҳам яшайди. Табиблик кўпроқ ўшаларда. Уларнинг давосига ишонадиган үрислар ҳам кўп.

– Одам дори ичавериб бўкиб кетади-ю, лекин таъсирини сезмайди, – деди Мирзаали.

– Сиз айтган дорини Оврупода ёки Америкада кашф қилишади, ўша ердаги одамларда синаб кўришади, – деди Муҳиддин ота. – Уларда «иссик мижоз», «совуқ мижоз» деган тушунча йўқ. Битта одамга шифо бўлган дори иккинчисининг касалини баттар қиласи – ёки бопиқача хасталик уйғотади. Табобат хақидаги доно китоблар кўп. Бу соҳага сўзи ўтадиган катта амалдор бўлганимда, тиббиётта ўкиётганлар Ибн Синони тўла ўзлаштирмагунларича қўлларига диплом бердирмасдим. Беморнинг якинига йўлатмасдим. Тил биладиган олимлар «Тиб конунлари»ни ўзбекчалаштириб беришди. Шу китобни кўлига олган ақлли талаба бормикин? Бу ёғини суриштирсангиз, устозлари ҳам ўкишмаган. «Шу илмий асар нима учун минг йилдан бери ҳаёт? Нима

учун Оврупо тан беради-ю, ўзимиз инкор этишимиз керак?» – деб ўзларига савол бермайдилар. Бир овқат ёқмаса, «шўр бўлибди» ёинким «ёғи доғ бўлмабди», деб камчилигини айтамиз. Минг йил яшаб келаётган илмни рад этадилар-у, сабабини тушунтириб бера олмайдилар. Чунки уни ўкиб кўрмаганлар. Ўқимасдан туриб рад этишни нима деймиз?

– Аҳмоқлик! – деди Жалил дангал.

– Сал қўполроқ айтдингизми, бўтам, бу бир нодонлик ёинким жоҳиллик десак ҳам бўлар.

– Иккаласи бир эмасми?..

Жалил одатига хилоф қилмай, баҳсни бошламоқчи эди, ичкаридан келиннинг енгил йўталгани эшитилиб, Мирзаали ўрнидан турди. Дам ўтмай қўлида икки коса билан қайтиб, бирини Мухиддин отага узатиб:

– Насиба-да, кудаларникидан келибди, – деб изох берди.

Яна икки коса узатилгач, «биз яқингинада тановул қилдик, сизлар баҳузур», деб узрини айтди. Илиб колган ошдан уч-тўрт кошиқ насиба олган бўлишиб, миннатдорлик билдиришди. Асадбек қарияларнинг сұхбати давом этмай туриб, улардан кечирим сўраб, ишком остидаги супага ўтди. Жалил дўстига норози назар билан қаради-ю, жойидан жилмади. Жамшид эса хожасига эргашди.

Даволанишга келган кунлари уй ичидаги нафаси сиқилганда, ховлига чикиб, шу супада ўтирса, сал дарди аригандай бўларди. Ҳозир айвонда ўтиргани билан, руҳи эзилгани сабаблими, нафаси сиқилди. Қариялар даврасидан четланиб, шу супада нажот истади.

Чой ичаётган Мухиддин ота Гўрўғлиниң ўзи томон тикилаётганидан ўнгайсизланди.

– Биродар, бирорвга ўхшатдингизми? – деб сўради у хилмлик ила.

– Ўхшатмадим, – деди Гўрўғли ундан кўз олмай. – Сизнинг юзингиздан бир чиройли нур таралиб туриб-

ди. Шунга маҳлиё бўлдим. Омма, бошингизга кўп аламлар ёғилган экан.

– Фолбинмисиз, дейман? – Муҳиддин ота шундай деб жилмайди.

– Гўрковман, дедим-ку, тўпорилигимдан ранжиманг. Нимани ўйласам, шуни гапираман. Ўликни лаҳадга қўйиб, юзини очганимда баъзи нарсалар менга аён бўлади.

– Аён бўлса... унда авлиё экансиз? – деди Жалил, сухбатга аралашиб.

– Масхараламанг, авлиё қайда-ю, мен қайдаман? – деди Гўрўғли ранжиб.

– Масхаралаганим йўқ, – деди Жалил хижолат бўлиб. – Худо ўзига ёқкан одамларга бир нарсаларни билдириб тураркан.

– Бўтам адашдилар, айбситманг. Валиуллоҳлик бошка нарса. Аллоҳ суюкли бандасини ўзига дўст тутса, айрим кароматларни аён килиб беради. Валиуллоҳлик улуғ мартаба, ҳамма ҳам эришавермайди.

– Бу гапингиз тўғри, меҳмон. Мен намозни ҳам эплаб ўкиёлмайман. Раҳматли Абдураҳмон ўргатганича ўқиб тураман. Келиб-келиб, Худо мени ўзига дўст тутадими? Лекин ўликларнинг юзига караб, тириклигида қанака одам бўлганини билишим тўғри. Баъзи тирикларнинг қўзига қараб, юрагида қанака шумлик борлигини ҳам биламан. Анави икки йўлдошингизнинг ичлари коп-кора, каттаси кўп ёмонликлар қилган, кичиги ундан баттар.

– У биродаримизни мулла Абдураҳмон даволаган эдилар...

– Жисмини даволабди-ку, руҳига қарамабди-да. Раҳматлининг шунаقا одати бор эди, ким бўлса, даволайверарди. Баъзи ёмонларни даволаб овора бўлма, бунақаларнинг тезрок ўлгани яхши, десам, менга танбех берарди.

«Руҳига қарамабди-да»...

Қараган эди...

Абдулҳамидга шифо истаб келган кунлари намоз ўқиб бўлишгач, Абдурахмон табиб Муҳиддин отага синовчан тикилиб: «Ёдингизда бўлса, худди шу ерда ўтириб, инимиздаги рух хасталигининг чекинмоғига умид қилиб эдик. Умидимиз сароб бўлиб чикибди. Инимиз зулмни аввалгидан кучлироқ ҳолда касб килибдилар. Ожиз иймонлари янада ожизлашибди», деган эди. Шунда Муҳиддин ота «Замон буларнинг тилини ҳам, дилини ҳам тош қилиб қўйган... На илож... ҳар ҳолда Аллоҳдан умидимиз бор», деб, айбни замонга юклаб қўя қолганди. Абдурахмон табиб бу баҳонани қабул қилмаган бўлса-да, баҳслашмаганди. Муҳиддин ота ҳозир Гўрӯғлига шу гапни айтса, у шубҳасиз, «замон ёмон йўлга солган бўлса, ўзининг кўзи кўрмиди, акли йўқмиди?» деган маънода бирон гап гапириб, кайириб ташлаши мумкин эди. Шу сабабли индамай қўя қолди.

Муҳиддин ота Гўрӯғлининг гапини эшитиб, дастлаб келган кунларини, Дев аканинг қиликларини эслади. Кўришаётиб «сенга миллион сўм бераман», деган, Асадбекка эса ноҳуш назар билан қараган эди. Девона бўлса ҳам, Асадбекнинг кўзларига караб, ичидаги коронгуликни кўрган эди. Фисқ зулматини бир девона кўрганида Гўрӯғлининг сезишидан ажабланмаса ҳам бўлади.

«Бу ерда шифо умиди билан турганимизда бўтам хидоятга яқинлашиб қолган эдилар. Кейин тислана бошладилар. Фарзанднинг ўлимидан кейин янада узоклашдилар. «Худо уйимга кирмайди, мен унинг уйига кирмайман», деган шаккокларнинг гапини дилдан чикариб, билиб айтувдилар. У дамда бизнинг зўримиз билан, тил учидаги тавба қилиб эдилар. Саждаларда астойдил тавбалар билан турсалар, қалблари йиғласа, меҳрибон Аллоҳ кечира... Лекин тавба қилармикинлар...»

Муҳиддин ота шуларни ўйлаб, супа томон қаради.

Асадбекнинг бош эгиб, маҳзун ҳолда ўтирганини кўриб, юраги эзилди. Хаёлан муножот қила бошлади:

«Аллоҳим, дунёга келиб яхшини ҳам кўрдим, унданда кўпроқ ёмонни кўрдим. Бўтамнинг ахволи Ўзингга аён, уни кечир, истиғфор айтувчилар сафига кўш, бўйнидаги кишанни олиб ташлаб, хидоят бер. Биламан, бандаларингни: «Мен бирон бандамнинг баданига ё боласига ёки мол-дунёсига мусибат юборсам, у Менинг мусибатимни сабр билан кутиб олса, Мен Қиёмат кунида унинг номига тарози тикишдан ёки унинг аъмол дафтарини очишдан ҳаё қиласман ва азоб бермайман», деб огохлантиргансан. Сабрли банданинг амаллари тарозига сифмайди, Ўз фазли караминг билан аъмол дафтари нұксонларини беркитасан. Афсусим шуки, бўтам бу ҳакиқатни англашда сустлик қиляпти... Олдиларидан ва орқаларидан қўйган тўсикни Ўзинг олиб ташла, хеч нарсани кўрмайдиган бандаларинг сафидан чикар. Унинг хидоят топганини кўриб, сўнг ўлсам, армоним қолмас эди. Отасининг кўзлари очиқ кетган эди. Азроил жонимни олгач, менинг кўзларимни очиқ қолдирма. Отасининг хузурига хушхабар билан бориши мен нотавонга насиб эт...»

– Йўллар очиқ эканми, қийналмай ўтдингларми?

Мирзаалининг саволи уни хаёл дунёсидан ташвишли аччик ҳаёт оламига тортиб олди. Жалил «Анжонгча яхши келдик», деб гап бошлаган эди, томок кириб, уни тўхтатди-да, хотиржам оҳангда жавоб кайтарди:

– Чегарада аскарлар туришибди, беғараз одамларга монелик қилишмаяпти.

– Ишқилиб, тинчигани рост бўлсин, – деди Мирзаали.

– Мехмон, сизлар ҳам эшитгандирсизлар, кўкрагида ўти бор анжанли йигитлар бу ёкка ўтмокчи бўлганларида янги каттаконинглар йўлларини тўсганиш-ку? – деди Гўрўғли.

– Ростдан шунаقا бўлибдими ё миш-мисш гапми бу? – деб сўради Мухиддин ота.

- Рост – деди Мирзаали, – чегара бўйлаб одамларни қўйиб ташлаган.
- «Одамлар» деганингиз сиз-у бизга ўхшаганларми ё ўриснинг аскарларими?
- Асосан ўзимизга ўхшаганлар, омма милисалар хам бор.
- Агар шундай бўлса, каттаконимиз тўғри иш килибдилар.
- Мехмондан аксинча гапни, каттаконларни қоралаши кутган Гўрўғли ҳам, Мирзаали ҳам, ҳатто Жўлон қирғиз ҳам унга ҳайрат билан қараб колишли.
- Гапингиз кизик-ку?! – деди Мирзаали. – Ёрдамга шошганлар йўлини тўсишда яхшилик борми?
- Эй-й биродар, сиз муаллим экансиз, бошқалар тушунмаса ҳам сиз билишингиз керак бунақа сиёсатни. Мен советнинг турфа иғволарини кўравериб, мана бу ерим, – Муҳиддин ота чап кўкрагини ушлади, – зада бўлиб кетган. Мана, ўтган урушни лаънатлайверамиз-лаънатлайверамиз. «Газанда», деб фашистни балчикка булаб ташлаймиз. Ўша фашистнинг ҳарбий учувчиларини ўттизинчи йилларда советнинг ўзи ўқитиб, тайёрлаб берганига нима дейсиз?
- Йўғ-е, Европани бўлиб олиш тўғрисида Гитлер билан шартномаси борлигини эшигтанман, буниси салғалати-ку?
- Сиз-у бизга ғалати туюлади. Биринчи Жаҳон урушидан кейин немисларнинг ҳарбий қувватини сикиб қўйиш мақсадида кўп нарсалар чеклаб ташланган. Шунда совет махфий равишда уларга ёрдам берган. Оқибатда, ўзи ўқитган одамлар ўзининг ерларини бомбалаб ташлади. Тарихнинг варакларини титаман, десангиз, фитналарга гувоҳ бўлавериб, эсингиз тескари бўлиб кетади. Бугун кўриб турганимиз ҳам бир иғво. Икки миллат бир-бирини қирсин, деб атайнин уюштирилган иғво жанжали. Агар каттаконимиз сизлар айтган «кўкрагида ўти бор»ларни тўスマганида

қирғин алангаси янаям ваҳшатлирок бўларди-ку, тўғрими? Советга худди шу нарса керак. Йигитларнинг кўкрагида ўт бўлгани яхши. Лекин бунақа ғавғолар кўкракдаги ўт билан эмас, бошдаги ақл билан ечилгани дуруст. Мана, Жўлон биродаримиз хижолат бўлиб, «қирғиз ўлдирмади», деяптилар, сиз эса «кўриб-билиб турибмиз», деяпсиз. Шунақа экан, кўкрагида ўти борларга не хожат?

– Бу гапингизда жон бор, меҳмон, – деди Гўрўғли. – Менинг бошим гаранг эди. Илгари ҳам ўзбекми, қирғизми, тоҷикми, қозоқми... ишқилиб, болалар бир-бири билан гап талашган, гапга тўймаса, муштга тўйган. Бу ҳам етмаса, аҳмоқроқлари пичоини киндан чиқарган. Айби зўррок бўлса, милиса олиб кетиб, жазосини берган, камрок бўлса, эртасига бир-бирлари билан яна тил топишиб кетаверишган. «Беганас билан Тошпўлат тоzza бир-бирини муштлабди», деб эшитардик. Лекин «қирғиз Беганас билан ўзбек Тошпўлат муштлашибди», демаган ҳеч ким. Қирғиз ўлса, тобутнинг бир чекасини ўзбек кўтарарди, ўзбек ўлса, қирғиз. Ана, Жўлон, тобутнинг бир томонини кўтарганича, ҳеч кимга тутқизмай, мозоргача келди. Ўзбек қирғиз ошнасининг жанозасига уч тоғ ошиб бўлса ҳам борарди, қирғиз ҳам тоғлар ошиб келарди. Шундай одамларнинг болалари бир-бирларига ваҳшийлик килишига ишонмайман. «Иғво» деганингиз тўппа-тўғри! Мулла Абдураҳмон шуни сезган бўлса керак, Коравойни мозорга бошлаб келганидан кейин ташвишланиб, Ушга тушиб чиқувди. Ташвишланганини бетига караб билувдим, лекин ўзи дардини очмаганди.

– Ҳак рост, – деди Мирзаали уни қувватлаб, – бу телевизор жавраётганидай миллий масала эмас, иғво масаласи! Қадимги Римнинг сultonи Юлий Сезар: «халкларни бир-биридан айри-айри килиб ташлагину, хукмингни мазза қилиб юритавер», деган экан.

— Хўп, масала иғвода бўлса бўла қолсин, — деди Гўрғли. — Омма ваҳшийлик анов-манов даражада бўлмади, жавобини ким беради?

— Хитойликлар пайғамбар даражасида кўрувчи донишманд Конфуцийдан: «Яхшиликка нима билан жавоб бериш керак?» деб сўрашганда «Яхшилик билан», деб жавоб берибди. «Ёмонлик, зулмга-чи?» деб сўрашганда «Адолат билан», деб жавоб берган экан.

— Дуруст айтибди. Яхшилик қилиш хар бир одамнинг кўлидан келади. Бирок, бирорнинг ёмонлигини кечириб, унга яхшилик қилиш факатгина мўъминга хос. Ҳақиқат шуки, Хитой донишманди айтган адолат тарозуси советда аллақачон бузилиб кетган, — деди Муҳиддин ота. — Телевизорда кўрдим, муҳбирлар ҳам, сиёсатдонлар ҳам «жиноятчилар конун олдида жавоб берадилар», деб жаврашяпти. «Қонун, қонун!» деймиз-у, қани ўша конун, қани ўша адолат? Борми шунақаси?.. Бўлганида ҳам, конун жамиятда тўла адолат ўрнатолмайди. Зулм даражасини пасайтира олади, холос. Ҳеч кайси давлат жамиятда жаннат яратиб бера олмайди. У жамиятнинг дўзахга айланиб кетмаслиги чораларини кўра олади. Лекин совет бундай чора кўришга ожизлигини билдириб қўйди. Дўзах эшиклирини ўзи очиб беряпти... Ҳақиқат билан куч кундошга ўхшайди. Ҳозир куч кундошининг кўлидаги заҳар иш беряпти. Одамлар ҳақиқатни ким заҳарлаётганини билib қўйсалар ёмон бўлмасди.

Қарияларнинг сиёсат бобидаги ўзларига хос сухбатларига жимгина кулок тутиб супада ўтирган Асадбекнинг кўз олдига Орзубек келди. Унинг «ярмимиз кирилиб кетсан ҳам», деганига жавобан сўкиб берганини эслаб, «яхши қилган эканман», деб ўзидан мамнун бўлди. Ҳозир Мирзаалининг тилидан Рим сultonи айтиб кетган гапни эшишиб, юрагида санчик турди. Гўё дард яраси очилгандай бўлди. Чувринди-Махмуднинг фожиали ўлимидан кейин у иттифоксизлик ҳақида

кўп ўйларди. Ўлим билан якунланувчи ноаҳиллик сабабини билолмай гаранг эди. Пул талашишади, деса, ҳаммаси пулга кўмилиб ётибди. Амал деса... қизик, пул окиб келиб турганидан кейин амалнинг нима кераги бор? Асадбек шуни тушуна олмайди.

Ҳамма бир-бирига тиш қайрайверса, миллатнинг тақдири нима бўлади?

Асадбек буни ўйламайди. Унда ўз отасининг, айвонда ўтирган ота қадрдонининг, хатто «гўр қазишдан бошқа нарсани билмайман», деб ўтирган одамнинг юраги йўқ...

Муҳиддин ота Асадбекнинг бетоқатланаётганини сезиб, Мирзаалидан кетишга изн сўради. Мирзаали «хозир, хозир», деб ўрнидан туриб, ичкарига қараб юрди. Бир пиёла чой ичилгунча вақт ўтгач, кўлида икки коса билан қайтди.

— Бир чиннидан шўрва ичмай кетсангиз, келинимизнинг кўнгли ранжийди, — деди кулимсираб. — Ошнамизнинг хотирасини сийлаб келибсизлар, сизларни Худо сийласин. Гап инимизнинг табибдан шифо топишида эмас, Абдураҳмондан шифо топгандарнинг ҳисоби йўқ, гап одамийлик фазилатининг гултожи бўлган — меҳр-окибатда! Окибат қилибсизлар, Худо сизларга хайрли окибат берсин. Дийдорга тўйганимизча йўқ, бугунча ётиб қолсангиз яна ҳам хайрли бўларди-да.

Муҳиддин ота айвон сари яқинлашаётган Асадбек билан кўз уриштириб олиб, мезбонга лутфи учун миннатдорчилик билдириди. Келин яна косаларни узатгач, Гўрўғли шўрвага нон тўғрай бошлади.

— Мулла Абдураҳмоннида таом есак, савоби арвоҳига етиб боради. Шу бир коса овкат кечгача ҳаммамизни тўқ тутади, шунаками? — Гўрўғли негадир Асадбекка қараб олди-да, гапини давом эттириди: — Одамларга хайронман, ҳамма яхши яшашнинг қанақа йўли бор, деб бош қотиради. Серҳашам уйни орзу килади, етишса, энди саройни орзу қилади. Кейин

чиройли мошинларни ғизиллатиб юришни хохлайди. Мошинга етишса, кўнгли самолётни тусаб қолади. Саройда ўн йил яшар, боринг, ана юз йил яшасин, момик тўшакларда талтайиб ётсин. Кейин барибир менга ўҳшаганларнинг қўлига келади-ку? Серҳашам уйда яшаганми ё кулбадами, менга фарки йўк, бўй-бастига караб бир хил лаҳад кавлаймиз. Бойнинг бошига кўядиган гувала ҳам, камбағалга кўйиладигани ҳам бир хил бўлади. Қўлимга қайси гувала илинса, шуни қўяман. Ҳеч қайси гўрков бойнинг бошига пар болиш қўймаган. Лаҳад куртларига ҳам барибир. Бир чекадан кемираверади. Одам, истайдими ё йўқми, бир куни бошига барибир ўлим келади. Одамлар «нима учун дунёга келдиму нима учун яшаяпман?» деган саволдан узоклашиб кетишиди. Мулла Абдурахмон билан бу ҳақда кўп гаплашганмиз. У ҳам ҳайрон эди. Яхши гаплари бор эди, камбағалликдан нолиганларга: «Агар Аллоҳ наздида мол-дунёнинг заррача қадри бўлса эди, уни аввал пайғамбарларига, кейин авлиё-анбиёларига раво кўрган бўларди», деб уларнинг юмук кўзларини очарди. Кейин: «Парвардигоро мол-дунёга хирс қўйишдан ва унинг фитнасидан ўз пано-хингда асрар!» – деб кўп дуо киларди.

– Минг йиллар давомида кўп донишмандлар бизга ўҳшаган нотавонлар учун ҳикматларни қолдириб кетишган, – деди Муҳиддин ота, Гўрўғлининг гапларини кувватлаб. – Сиз айтган саволдан узоклашиш – иймондан узоқлашиш дегани. Раббимиз «бир куни эллик минг йилга teng келадиган Қиёмат келмасидан илгари Мендан кўркинглар ва амалларингизни қилиб олинглар», деб буюрган. Қиёматнинг бир куни эллик минг йилга teng деган ҳисобга тақкосласак, демак, умримиз бир неча дақиқага бориб-бормас экан. Нух алайҳиссалом минг йил умр кўрган эканлар. Кичкинагина чайлалари бор экан, ётсалар, оёклари чиқиб тураркан. Қазо вакти келиб, Азроил алайҳиссалом ха-

бар берганларида «Умр шунчалик тез ўтишини билганимда, овора бўлиб бу чайлани курмас эдим», деган эканлар. Инсонларнинг баҳтли яшапларига монелик киладиган нарса – уларнинг мол тўплаш касалига мубтало бўлиб қолишларидир. Мол тўплашни инсон тотиб кўриш, хидлаш, сезиш каби эҳтиёжларини кондириш учун қиласи. Лекин бу сезгиларнинг ҳеч бири мақсадга етиш учун кифоя килмайди. Инсонга мол-дунё насиб бўлса-да, у дунёда ҳам, охиратда ҳам зиёндан бошқа бир нарса келтирмайди. Кимлиги ёдимда йўқ, ақлли шоир айтган экан:

Ўзингча тижорат қилгани келдинг,
Уй қуриб, иморат қилгани келдинг.
Бу дунё беш кунлик зиёратгоҳдир,
Аслида зиёрат қилгани келдинг.

– Бу гапингиз раҳматли мулла Абдураҳмон айтиб берган ривоятни эсимга туширди: Бир девона киши бор эди. Унинг маскани кеча-кундуз вайронана эди. Ҳар дам ўша вайронанинг бир ёнини казиб, ўз умрини хазинага эришиш умиди билан ўтказар эди. Иттифоқо, шунча машаққат чеккандан сўнг баҳти чопиб, хазинани топиб олди. У казиётган чуқурда бир эшик кўринди. Эшикни очиб, ичкари киргач, катта бир саройни кўрди. У ерда тиллаю жавҳарларга тўла қиркта хум тураг эди. Девона бу бойликни кўрди-ю, хушидан кетди. Шу онда бу ерга бир абллаҳ киши етиб келди. Хазина остонасида бехуш ётган девонани кўрди ва ҳеч бир иккиланмай унинг кўксига ханжар санчиб, бечоранинг қонини шу хазина устига тўқди ва барча бойликка эга чиқди. Яашадан бирдан бир мақсади хазинага эришмоклик бўлган девона эса бору йўқ сармоясидан – ҳаётидан ажралди.

– Низомий ҳазратларининг бир ҳикматлари бор, – Мирзаали сухбатга қўшилиб, кўзларини хиёл юмганича ғазал ўқий бошлади:

«Бир кун Яман шоҳин гўри устига борсам,
Кўл чўзди-ю тутди кафан, кўрсатиб карам.
Ва деди: «Бу саховатим айб айламагил,
Бу дунёда бундан бошка йўқ бирор нарсам».

Мирзаали «айтилган ҳикматнинг мағзини чақиб олинглар», дегандай тин олди. Ўтирганлар «гапининг давоми бор шекилли?» деб ўйлаб, сабр қилишиди. Мирзаали ўқигани давра ахлига таъсир қилганидан хузурланиб, давом этди:

– Шайх Саъдий ҳазратларида яна маъно бор:

Агар султон ғаний ва комрондир,
Ва гар дарвеш хожатманди нондур,
Икков ҳам элта олмас жонпарвар ҳол,
Кафандин ўзга даҳр амволидин мол.
Чу килғунг мулк молингдин жудолик,
Эрур шоҳлиқдин авлорок гадолик.

Ҳикмат барчаларига маъкул келди. Гўрўғли билан Жалил негадир Асадбекка қараб олишди. Асадбек қўлига қошик ҳам олмаган, шўрва ичгиси йўқ, буларнинг гапи тезрок тугаса-ю, кета колсак, деб бетокатланарди. Мухиддин отанинг баҳузур ўтириб сұхбатлашиши ёқмаса-да, бир нима деб кўнглини оғритишни истамай, қовок уйганича жим ўтираверди. Қарияларнинг сұхбати айтилган ҳикмат билан якун топар, деб ўйлаганда, гапга Жалил аралашиб, ғашини келтирди.

– Ўтиб кетганларнинг ғазаллари зўр, лекин бу гунгиларники ҳам қолишмайди, – деди Жалил. Кексаларнинг доно сұхбатига аралашиш хусн саналмаслигини билгани ҳолда сўз бошлиб қўйганидан хижолат бўлдими, худди бирор оғзидан гапини олиб қўядигандай, шошилиб гапирди. – Газитда бир шоирнинг шеърини ўқиб ёдлаб олган эдим, ҳозирги гапларингга узукка кўз қўйгандай бўлади.

— Айтинг меҳмон, шўрва гурунглашиб ичилса, тотлирок бўлади, — деб Гўрўғли унга далда берди.

Жалил «тумтаявермасдан эшит», дегандай Асадбекка қараб олиб ўкиди:

— Ўлимга барибир: гулдай дудоклар,
Ҳалол юрганлару ҳаром томоклар.
Уст-боши бутлардан чопонни ечгай,
Ковуш кийиб кетмас ялангоёклар.

— Жуда-а топиб ёдлабсиз, меҳмон, барака топинг, — деди Гўрўғли уни алқаб, кейин Мухиддин отага юзланди: — Галираётганингизда, мулла Абдураҳмоннинг ривояти ёдимга тушиб қолиб, фикрингизни сал бузиб кўйдим. Назаримда, ичингиздаги гапнинг ҳаммасини айтмадингиз-а?

Мухиддин ота кулимсираб кўйди:

— Буни ҳам сездингизми? Бир ҳикматни айтмокчи эдим, эҳтимол кейинги сұхбатга қолдирамиз. Шўрва совимасин.

— Дийдор ғанимат, меҳмон, айтинг, гапираверамиз ҳам, шўрвани ичаверамиз ҳам, биз қишлоқиларнинг одатимиз шу.

— Ака, меҳмонни толиктириб кўймайлик, — деди Мирзаали узр оҳангига. Бу гап Асадбекка ёқиб, унга миннатдор назари билан қараб олди. Жалил эса унинг яна ғашини келтириб, гапга аралашди:

— Гўрўғли акамиз тўғри айтяптилар, отахонимизнинг ҳикмат хазиналари жуда бой, фойдаланиб қолиш керак.

— Бўтам, пича оширвордингиз, кишини бундай хижолатга кўйманг-да, — деди Мухиддин ота Жалилдан ўпкалаган бўлиб, кейин Гўрўғлига юзланди: — Сазангиз ўлмасин, битта ривоятни айтиб берай. Издиҳомларда ҳикмат-у ривоятлар айтишнинг бир шарти бор: сұхбат аҳли эшитганларини эслаб қолиб, бошқаларга, айниқса, фарзандларга етказиши

керак. Айтмоқчи бўлганим, ривоят сиз баён қилган ҳикматларнинг бир исботи, – Муҳиддин ота ривоятни эслашга ҳаракат қилгандай ўйланди, косани сал нари суриб қўйиб, гапини давом эттири: – Бир одам кутурган туждан халос бўлмоқ учун жар устига эгилган икки шохга осилиб, жар ёқасига оёқ қўяди-ю, оёғи остидаги индан тўрт илон бош чиқариб турганини кўради. Жарнинг тубига назар ташласа, у ерда бир аждаҳо оғзини катта очиб, унинг тушишини кутиб турибди. Юқорига қараса, оқ ва қора сичқон у осилиб турган шохларни тўхтовсиз кемирмокда. Бу ахволдан кутулиш йўлини ўйлаётган онда сал нарироқдаги асалари уясига кўзи тушади-ю, боши узра тўпланаётган бало булутини ҳам унутиб, бармоғини болга ботириб, ялай бошлайди. Асалнинг ширинлиги унинг бопини шу даражада айлантиради-ки, натижада, у ўзининг қандай ахволдалигини унутади. Оёқларини тўрт илон боши устига қўйганлиги ва бу илонлар ҳар онда чакиб олишлари мумкинлиги, сичқонлар шохларни кемира-кемира синдиришгач, аждаҳо комига тушиши мукаррарлиги хаёлидан кўтарилади. Жаҳолат пардаси акл нурини тўсиб қўйгани туфайли оз фурсат ўтмай, жарга қулаб, ҳалок бўлади.

Муҳиддин ота «ривоятга яширинган маънони англайдингларми?» дегандай даврадагиларга бир-бир қаради.

«Бир нодон асал ялайман, деб жарга йикилибди» – Асадбек, Жамшид, ҳатто Жалил ҳам буни шундай тушунишиди.

– Чакилиши қийин бир ёнғоқни фаросат дастурхонимизга қўйдингиз, – деди Мирзаали бош чайқаб.

– Сўфийларнинг фалсафа ёнғоғи-да, бу, – деди Муҳиддин ота қулимсираб, кейин баёнга ўтди: – Ривоятдан англашиладиган маъно: даҳшатли ва чукур жарлик – дунё. Қора ва оқ сичқон – кеча ва кундуз. Улар инсонлар умрини озайтириш, ҳалок этиш учун узлуксиз бир-бирини алмаштириб туради. Тўрт илон –

борлиқнинг моҳиятини ташкил этган тўрт унсур: ҳаво, тупрок, ўт, сув. Булардан биронтаси ўз мувозанатини йўқотса, инсон ўша заҳоти маҳв бўлиб кетади. Асал – азоби кўп, фойдаси кам бўлган, одамларни тўғри йўлдан оздириб, уларга најот дарвозаларини беркитган фоний дунёдир. Аждаҳо – ҳеч ким қочиб қутула олмайдиган ўлимдир. Ажал шарбатини ичишга тўғри келганида, ажал фарипитаси тепангга келиб турганида ўлимдан кутулиб бўлмайди. Пушаймонлик ҳам фойда бермайди. На тавбага вакт қолади, на дуо ўқимокка мажол. Бобораҳим Машрабbekорга изтироб чекиб айтмаганларки:

«Бир гуноҳнинг устига юз минг надомат яхшидур,
Юз туман ёзуқларим бору пушаймон манда йўқ».

– Ҳак, рост! – деди Гўрўғли. – Бунакаларнинг кўпини кўрдим.

– Ҳа... – Мухиддин ота енгил тин олди-да, сўнг давом этди: – дунёнинг лаззати чақмоқ каби, булат сояси каби бир зумда ўтиб кетади. Шу боис ҳам унга ружу қўймоқлик нодонлик ҳисобланади. Пайғамбаримиз алайҳиссалом: «Дунёга рағбат қилмаслик, аҳамият бермаслик, дунё ишларидан йирок обид ва зоҳид бир кул бўлмоқлик кўнгил ва баданга роҳат бағишлайди. Дунёга рағбат қилмоқлик, уни севмоқлик ғам ва маҳзунликни зиёда қиласди», деганлар. Бу оддий гап эмас, мағзини чақишига уриниб кўрайлик-чи: дунёни севмасликнинг кўнгил ва вужудга роҳат бағишлаши нима? Бундай одамда ҳирс, ҳаксизлик, кину адоват қилиш туйғуси бўлмайди. «Қандай қилиб фалончининг оёғини чалсан, фалончининг молини ёки мансабини тортиб олсан», деган васваса киши қалбини безовта килса, виждони «гуноҳдан кўркмайсанми, одамлардан уялмайсанми?» деб тергайди. Чунки у биладики, Аллоҳ таоло «Инсон ўзини бой-бехожат кўрса, бас, тугёнга тушади, хаддидан ошади. Албат-

та, қайтиб бориш Раббингнинг Ўзига, бошқага эмас», деб огох этган. Атрофимизга зийрак боқайлик: чиндан ҳам киши бойлиқ, мансаб орттирса, дарров туғёнга кетади, ҳовликади, ҳаддидан ошади. Лекин Қиёмат куни барибир Аллохга қайтади-ку?! Ўшандада хар бир нарсаннинг аниқ ҳисоб-китоби бўладики, буни унутмаслиги шарт. Раббимизнинг огохлантиришига эътибор берайлик: «Билингларки, бу дунё ҳаёти фақат ўйин-кулги, кўнгил эрмаги ва зеб-зийнатdir, ўрталарингиздаги ўзаро мактанишдан ва мол-мулкни ҳамда фарзандларни кўпайтиришдан иборатdir. У худди бир ёмғирга ўхшарки, унинг ёғиши сабабли униб чиқсан ўт-ўлан дехконларни ҳайратта солиб, ақлларини банд килиб кўюр, сўнгра у курир, бас, уни сарғайган ҳолда кўурсиз. Сўнгра у хас-чўпга айланиб кетади. Дунё ҳаётининг ҳоли ҳам шундан ўзгача эмасдир. Охиратда эса ўша дунёга алданиб қолганлар учун қаттиқ азоб ва иймон-эътиковд билан яшаб ўтганлар учун эса Аллоҳ томонидан мағфират ва розилик бор. Бу дунё ҳаёти ғурурга кетказувчи матодан ўзга ҳеч нарса эмас». Аллоҳ таоло бу дунё ҳаётини «ўйин-кулги, кўнгил эрмаги, зеб-зийнат» деб таърифляяптими? – Муҳиддин ота шундай деб беихтиёр Асадбекка караб олди. Бош эгиб тинглаётган Асадбек бу қарашни сезмади. Сезганида «бу гапларнинг ҳаммаси менга қаратилган экан-да, бунча менга ёпишиб олишди, бу чоллар?!» – деб ғазабланиши аниқ эди. Муҳиддин ота кўзини ундан олиб, Гўрўғлига қараганича давом этди: – «Муту қабла ан тамуту» – Пайғамбаримиз алайҳиссалом «ўлмасдан бурун ўлинглар», деб марҳамат килганлар. Бунинг маъноси – киши тириклигида охират синовига тайёрланиши керак. Ажабки, одамлар ўлчови билан каралганида, ҳаёт беш кунлик дунёда ўйнаб олиш учун ажратилган фурсатга ўхшаб туюлади. Ўзингиз айтганингиздай, қаёқка қарамайлик, одамлар кийим-бош, емок-ичмок, ҳовли-жой, зеб-зийнат ортидан кувгани-кувган. Ўз обрўлари, мансаблари, ҳасабу

насаблари билан фахрланишган, мол-дунё ва болачакани кўпайтиришга урингани-уринган. Аслида эса бу нарсалар арзимас, эътиборсиз ашёлардир. Бу дунё хаёти шундай бир ёмғирга ўхшайди-ки, у ёқкандан сўнг чиккан наботот деҳконларни ҳайратга солади, завклантиради. Аслида эса бу ҳол ўткинчидир. Яъни ўсимликлар тезда курийди, ранги сарғаяди ва куриб, ковжираб, укаланиб кетади. Ҳа, бу дунё хаёти ҳам шу каби алдамчи бўлгани сабабли у билан алданиб колмаслик керак. Чунки охиратда кофирларга азоб, мўъминларга Аллоҳнинг мағфирати ва розилиги мавжуд. Одам ҳаром-ҳарин воситалар билан мол-дунё, хузур-халоват топса ҳам, лекин маънавий жиҳатдан хақир бўлиши муқаррар.

— Абдураҳмон буни ҳам айтган эди менга, — деди Гўрӯғли. — Унинг ўзи бойликка паст назар билан қаарди. Тарозининг битта палласига тилла-ю жавоҳир, иккинчисига бир камбағалнинг дуосини кўйиб, «танла», дейилса, ўйлаб ҳам ўтирмай, дуони танларди. Бир одам тухум сотмокчи бўлиб, бакколга борибида-да, «тухумларимни неча пулдан оласан?» деб сўрабди. Бақкол кўрадиган фойдасини чамалаб, «Ўнтасини бир сўмга оламан», дебди. «Йў-ўқ, — дебди деҳкон, — бир сўмга йигирматасини сотаман». «Ундей бўлса, майли, бир сўмга ўн иккита тухумингни ола қолай», дебди бақкол. Бечора, ортиқча фойданинг гуноҳидан кўрқар экан-да... Деҳкон: «Йў-ўқ, — деб унинг таклифига унамабди, — Бир сўмингга ўн саккизта тухум бераман». Ғалати савдо, а? Шунақа инсоф эгаларини кўрганмисиз бу юртда? Ҳа-а... Абдураҳмон ҳикматларни шунчалик айтиб қўя қолмас эди, аввало ўзи амал киларди.

— Мулла Абдураҳмон билан сұхбатлашганингизда у киши кўп ҳадислардан мисоллар келтиргандирлар. Биз бу куттуғ хонадонда бир неча кун яшадик, сұхбатларидан хўп баҳраманд бўлдик. Тўғри айтдингиз, дунёга кўнгил кўймаган эдилар. Бир сұхбатимизда

«Охиратни олиш учун дунё молини сотиш мумкин, дунё моли деб охиратни сотиш жохилликдир. Инсон дунёнинг бўм-бўшлигини билган куни ибрат ва ҳикматга эришган бўлади. Зулматдан нурга чикади», деган эдилар раҳматли. Бир шарафли ҳадис хусусида фикр юритганимиз ҳам эсимда: «Икки иллат борки, сизларга улар туфайли зарар етишидан ҳавфдаман, – деганлар Пайғамбаримиз алайҳиссалом. – Бу кибру ҳавога эргашиш ва орзу-ҳавасга берилишдир. Кибру ҳавога эргашиш – Ҳақдан тўсилиш, орзу-ҳавасга берилиш эса, дунёни яхши кўришдир. Огоҳ бўлинглар! Аллоҳ таоло дунёни суйган бандасига ҳам, сўймаган бандасига ҳам беради. Иймонни эса, фақат суйган бандасига ато этади. Эсда тутинглар! Диннинг ҳам, дунёнинг ҳам фарзандлари бор. Сизлар дунё фарзандлари эмас, дин фарзандлари бўлинглар. Билинглар-ки, дунё сизларга орка ўгирувчи, охират эса пешвоз чиқувчидир. Огоҳ бўлинглар! Бу кун амал куни, унда ҳисоб йўқ. Яна огоҳ бўлинглар-ки, ҳисоб куни якин, у кунда амал қилиш йўқ!» Бойликка ружуъ кўймаслигимиз учун бизларга яна қандай огоҳлантириш даркор? Сўзни муҳтасар килолмадим, айбситманг...

– «Иймонни суйган бандасига ато этади» дедингиз-а? – деб сўради Мирзаали. – Абдураҳмон дин фарзанди эди, шунинг учун Худо уни суйган. Абдураҳмондан менам кўп ҳикоят эшитганман. Шуларнинг биттаси ҳозирги сухбатимизга мос, малол олмасангиз менам айтсан?

– Айтинг, айтинг, бу ҳам бир амри маъруф, Худо хоҳласа, амри маъруфнинг савоби мулла Абдураҳмоннинг руҳларига етади. Илм олиб, бошқаларга тарқатиш – садакотул жория саналади. Мулла Абдураҳмондан эшитганларингизни каерда ва қачон тилга олсангиз, аъмол номаларига савоб ёзилаверилади.

Бу гапдан илҳомланган Мирзаали баённи бошлиди:

– Бир ҳаким чиройли товусни кўрди. Унинг

гўзаллиги ҳакимни ҳайратга солди. Лекин товуснинг хунук қагиллаши, чиройли патларини юлиши ҳакимни ажаблантириб сўради-ки:

– Эй товус! Шундай гўзал патларингни нега юляпсан? Бундай чиройли патни ерга ташлашга кандай қилиб кўзинг қийди? Бу ишинг Аллоҳ берган неъматга ношукурлик эмасми?

Товус ҳакимнинг бу гапини эшитиб, фарёд қилиб ийғлади ва ҳакимга деди-ки:

– Эй ҳаким! Сен сувратнинг жозибасига қараб ҳукм қиляпсан. Менинг бу гўзал патим, бу гўзал қанотларим бошимга минг турли балолар келтириди. Барча чеккан заҳматларим, мана шу гўзал патларим туфайлидир. Бу патлар менда экан, ўзимни ҳимоя қилишга ожизман. Кошки кўримсиз бир қуш бўлсам. Халқнинг назарида бўлмасам, ана ўшанда озод яшардим. Хоҳлаган жойимда эркин кезардим. Эй ҳаким! Бу зийнат, бу сифатлар менда бўлгани учун душманларим жуда кўп.

Мирзаали баённи тугатиб, «фалсафасини ўзингиз изоҳлаб берасизми?» дегандай Мухиддин отага қарди.

– Кимса олтин ва кумушни кўрмаса ҳеч тап эмас. Бирок уларни кўргандан кейин жуда кўп нолойик ишларни қилиб юбориши мумкин, шуниси чаток-да! – деди Мухиддин ота. – Дунёда гўзал ва жозибали нарсалар ғоят кўп: уюм-уюм пуллар, турли русумли мосиналар, тилла-жавҳар безаклар, қиз-жуонлар, фарзандлар... Булар ҳар бир кишининг истагида оз ёки кўп даражада мавжуд. Бирок, буларнинг барчаси ҳаёт учун аҳамиятли нарса эмас. Дунёни ясанган келинга ўхшатадилар. «Фоний дунё хуштур, аммо окибат мавт ўлмаса». Ҳа, окибат – бу дунёда ўлим бор. Ҳеч ким абадий қолмас. Яна ўлимдан сўнг ҳисоб-китоб бор. Оманно ва саддакно! Шак-шубҳасиз бор!

Асадбек ҳам, унинг аъёни ҳам қарияларнинг сұхбатидан ҳикмат олиш ўрнига «тезроқ кета қолсак эди»,

деган ўйда бетоқатланиб, ғашланиб ўтирилар. Асадбек ўзини қанчалик зўрламасин, томогидан шўрва ўтмади. Икки қошиқ билан чекланди. Аввал Гўрўғлиниг, сўнг Мухиддин отанинг узун дуоларидан сўнг хайрлашиб, йўлга тушдилар.

Бир томони узок йўл чарчоғи, яна эшитган кўрганларидан кўнгли ғашланган Асадбекнинг гаплашишга ҳуши йўқ, Мухиддин ота толиққанмиди, у ҳам жим эди. Давра сухбати таъсиридаги Жалилнинг эса жим кетгиси йўқ эди. Орка томонга бир-икки караб олгач, Жамшидга:

– Радионинг қулоғини бурасанг-чи, ҳаммаёқ хуфтон бўлиб кетди-ку? – деб буюрди.

Жамшид «акахоннинг амрларини бажарайми?» дегандай пешкўзгу орқали хожасига караб олди. Асадбекнинг эътиборсиз ўтирганини кўриб, радио мурватини буради. Янграган куйни эшишиб, Жалилнинг баҳри-дили яйраб кетди. Бу қўшиқни неча минг марта эшитган бўлса, яна тинглагиси келаверарди. Ҳозир ҳам жон қулоғи билан тинглади:

«Агар ошиқлиғим айтсан, куюб жону жаҳон ўртар,
Бу ишқ сиррин баён этсан, таки ул хонумон ўртар.
Кишига ишқ ўтидин заррайи тушса бўлур гирён,
Бўлур бесабру бетокат, юрак-бағри ҳамон ўртар».

– Ох-ох, бунақа ашула учун жонингни бериб юборсанг арзийди, – деди Жалил кўнгил хушлигидан маст бўлиб.

– Жонингни асраб тур, арзийдиган нарсага керак бўлиб колар, – деди Асадбек кесатиб.

Бу киноя ортида «жим кетсанг-чи!» деган маъно яширинганини Жалил англади. Агар ёлғиз ўзлари бўлишганида «сен санъатни тушунармидинг, сен ишқи йўқ эшшак, дарди йўқ кессаксан», дейишдан тийил-маслиги аниқ эди. Ҳозир Мухиддин ота хузурида одоб чегарасига риоя қилиб, бундай дея олмади.

– Сен тушунмайсан, бу Отабекнинг ашуласи. Кумуш бибига ошиқ йигитнинг дарди вулқон бўлиб отилиб турибди, – дейиш билан чекланди.

– «Отабекнинг ашуласи» дедингизми? – Мухиддин ота ажабланиб, сухбатга қўшилди. – Китобда бунақа ашула йўқ-ку?

Жалил «Уткан кунлар»нинг киносини кўрган эди. Китобини ўқимаганлигини тан олгиси келмай, изоҳ берди:

– Кумуш ҳайдаганидан кейин Отабек бўзахонага киради-ку? Уша ерда айтилади-да, бу ашула.

– Ажиб... ажиб... – деди Мухиддин ота ўйчан оҳангда. – Аввали шуки, бўтам, Отабекни Кумуш биби ҳайдамаганлар. Дадалари Мирзакарим кутидор ҳайдаганлар. Агар хотирам фаромуш бўлмаган бўлса, деганларки: «Уятсизга манинг уйимдан ўрин йўқ, уятсиз билан сўзлашишка ҳам тоқатим йўқ... Борингиз, манинг эшигим ёнида тўхтамангиз!» – деганлар. Шундан сўнг уста Алимга дуч келиб, унинг уйида мавиз ичадилар, кейин Тошкентга қайтадилар... Тунда масталаст келганларида Ҳасаналидан дакки эшитадилар, сўнг яна бир Марғилонга борадилар, кейин Оқмачитга бориб-келадилар-да, Чукур қишлоқ бўзахоналарида кўнгилларига таскин излайдилар. Бўзагар у кишимни алоҳида хужрага олиб киради, а? Отабек «машшоғингизни ҳам кирғизинг» дейди, машшоқ кириб, «Қандай куйни чалиб берай, бек ака?» – деб сўрайди. «Билсангиз, ҳайдалиш куйини чалингиз, ажралиш куйини чалингиз», – дейилади, адашмадимми?

Ҳамроҳларидан биронтаси ҳам бу китобни кўлга олмаганини билмай туриб, савол бериши ғалат бўлди. Қамалгунига қадар бу китобни қайта-қайта ўқийвериб қарийб ёд килиб олган одамнинг саволга жавоб кутиши ажабланарли эди. Гапни Жалил бошлагани учун савол ҳам унга қаратилди, деб ўйлаган Асадбек ўнгайсизланмади ҳам. «Буларнинг сухбатига

аралашишга ҳаққим йўқ, менинг вазифам – хизматларини бажариш», деб ҳисоблайдиган Жамшид эса, Муҳиддин отанинг гапларига мутлақо парво қилмади. Жалил эса дарров жавоб беради қолди:

– Худди шу ерда айтади бу ашулани.

– Ажиб... Китобда машшоқ дуторда «Наво» куйини чалиб беради.

– Мен киносини айтяпман, – деди Жалил.

– Киносини кўрмаганман. Китобда айтилишича, «Наво» куйин Отабекнинг ҳасратини сўзлагандек, бўлади. Агар кинода бу ашулани айттиришган бўлса, Отабекнинг ҳасратига мос келмайди.

– Нега?

– Негаки, ашула қилинган бу ғазал дунёвий севги баёни эмас. Бобораҳим Машраб илоҳий ишқни, яъни, Аллоҳга бўлган банданинг ишқини баён қилганлар. Соддароқ тушунтирилса, бу «Менинг Раббимга бўлган ишқим шу даражада кучли-ки, бир-бир айтсам, бутун ер юзи ёниб-куйиб, кул бўлади», дегани. Гапга алаҳсиб, охирига дикқат қилмадингиз шекилли, «Агар Машрабда ох урсам, Биҳишти жовидон ўрттар» – агар Аллоҳ ишқи кўйида хонумонидан, дунёвий орзуҳавасларидан, ўзлигидан, борингки, бу фоний дунёда Аллоҳдан бошқа барча нарсадан мосуво мард ва фидойи ошиқи девона бир ох урса, абадий жаннат ҳам ўртаниб кетаркан.

Уларнинг бир ғазал хусусидаги сухбатлари давом этаётган паллада иккинчи қўшиқ ҳам охирлаб қолган эди. Жалил Муҳиддин отанинг изоҳларига қаноат қилиб, сукут саклади.

«Гар фалак куйдурса мундоғ неча кунлар айланиб,
Бул жаҳонда қолмағай ному нишонлар, алвидо.
Нури дийдам, куввати жону дилимсиз, дўстларим,
Йиғламоқдин кўзларимдин оқти конлар, алвидо!
Ҳар на бўлса Машраби бечорадин айланг биҳил,
Хуш каломи булбули боғи жаҳонлар, алвидо!»

Қўшиқ охирлагач, Муҳиддин ота енгил хўрси-ниб, ҳасратдан бўғилаёзган кипининг паст овозида деди:

— Раббимнинг меҳрини қозонган валийлар ўтган табаррук жойларда инсон қони тўкилса-я...

Қўшиқлар сўнгида ёшларнинг мушоираси бошлианди. «Қошу қўзингдан акагинанг айлансин», деган мазмундаги биринчи шеърдан Жалилнинг ғаши келди. «Иккинчиси ҳам шунақа бачканга бўлса, овозини ўчираман», деган қарорда охиригача чидаб эшилди. Иккинчи шоир шеърини ҳаяжон билан ўкиб, барчаларининг диккатини тортилди:

Деразамдан Ой бокди ярим тунда хонамга,
Юзлари ўхшаб кетди меҳри нурли онамга.
Анча хомуш ва ҳорғин, кўнглим кетди зиркираб,
Киприклари зил ёшни кўтаролмай пирпирап.
«Унутмагин, жон болам, жоним гиргиттон болам!
Найранги, иғоси кўп, бу талотўп замонни –
Кўриб бағрим хун бўлди, дардли Ўзган томонни...

Жон куйдириб шеърини ўқиётган шоир гўё бир неча дақиқа бурун Абдураҳмон табибининг уйида карияларнинг сухбатига гувоҳ бўлган-у, ундаги изтиробларни қаламга олиб, коғозга туширгандай эди. Жалил ҳаяжонланиб, Муҳиддин отага ўгирилиб караганича шеърнинг давомини эшилди:

Ўшдаги жоҳилликдан тоғлар ранги сомонми?!
Бобур Мирзо қурдирган ҳужра бутми-омонми?!
Жоним-жаҳоним болам, жоним гиргиттон болам!
Кўзингни оч, билиб ол, яхши билан ёмонни,
Эътиқодсиз – оломон, демак, сўкма замонни.
«Ал қасосул минал ҳак», осмонга от камонни...
Ярим тунда хонамга ўқсиб-ўқсиб Ой бокар,
Табиб оғамнинг руҳи чирқиллаб қанот қокар...

Охирги сатр барчалари учун кутилмаган бўлди.

– Абдураҳмон табибни айтятими? – деди Жалил ажабланиб.

– Шунақага ўхшайди, – деди Мухиддин ота мутаассир ҳолда.

– Ақлли бола экан, отасига раҳмат, – деди Жалил.

Бошқа гапга ҳожат қолмаган эди. Радиодаги мушиоира давом этиб, шоира «бирорвинг ёрини олдим омонат», деб шеър бошлиганда Жалил ғашланиб, минғирлаганича радиони шарт ўчириб кўя колди.

Хуфтон намозини кечаси хатми Куръон килинган масжидда ўқидилар. Мухиддин ота билан Жалил масжидга кириб кетгандарида Асадбек «ошнам яна бир ғалвани бошлаб қолмасайди», деган хавотир билан кутди. Ҳатто «агар яна хатми Куръонни эшитгиси келиб колса, шу ерга ташлаб кетавераман», деган хаёлга ҳам борди. Бахтига, кутгани бўлмади. Жалил жимгина чиқиб, машинага жимгина ўтириди-да, Жамшидга «хайдамайсанми, аравангни!» дегандай караб қўйди.

Асадбек уйига ярим кечада кириб келди. Машина овозини эшитган Манзура шошилганича ховлига чиқиб, эрини хушнудлик билан қарши олди. Салом бергач:

– Фазлияхоннинг болалари топилибди! – деб сүюнчилади.

– Келишдими? – деб сўради Асадбек.

– Келишмади. Ишхонангизга қайсиdir шаҳардан кўнфирик қилишибди. Худога шукур, болалар соғомон экан.

– Энди кўнглинг жойига тушдими? – деди Асадбек уй томон юриб. Бу орада Фазлия хонасидан югуриб чиқиб салом бергач, Асадбекни дуо кила кетди.

– Бўпти, бўпти, дамингизни олинг, менам чарчаб келдим, – деди Асадбек унинг миннатдорлигига жавобан.

Болаларнинг топилганини эшитганда Манзура худди ўғли тирилиб келгандай кувонган, бегона бир

аёлнинг қувонганини кўрган Фазлияниң кўнгли яна-да чароғон бўлганди. Ҳозир Асадбекнинг хушхабарни совуққонлик билан эшитиши уни ҳайрон қолдирди. Асадбекнинг феъл-атворидан бехабарлиги учун «Ўз-ларининг хизматлари туфайли болаларим топилди, нега эътиборсиз бўлдилар?» – деб ажабланди. «Нега кайфиятлари йўқ?» – дейишдан истиҳола қилиб:

– Чой дамлайми, овқатни иситайми? – деб сўради Манзурадан.

– Дамингизни олаверинг, чой ичгилари келса, ўзим дамлайман.

Манзура шундай деб эрининг изидан ичкари кирди. «Чой ичасизми?» деган саволга Асадбек бош чайқади-да, жавонни очиб биллур кадаҳга коńъяк кўйди. Унинг ярим кечада ичадиган одати йўқ эди. Шунинг учун Манзура хавотир билан эрига яқинлашиб, елкасига кафтини қўйди. Аммо «Нима бўлди, нега ичмоқчисиз?» деб сўрашга журъати етмади.

– Мохора қилган эдим, олиб келайми? – деб сўради меҳр билан.

Асадбек нўхот шўрвани яхши кўради, лекин бу он ҳеч нима егиси йўқ эди. Кадаҳни бирпас кўтариб турди-да, коńъякни ичмай, жойига қўйди. «Чарчадим», деб хобгоҳи томон юрди.

3

Фазлия ўтирган жойида мудраб қолган эди. Аzon товушини эшитиб, уйғониб кетди. Тезгина туриб, таҳорат билан покланди-да, шийпон томон шошилиб, тасбех ўгириб ўтирган Манзураниң ёнидан жой олди. Аламли ҳаёт осмони остида сабр шарбати билан жон саклаётган бу икки муштипарни бу он четдан кузатган киши опа-сингил деб ўйлаши мумкин эди. Вокеан шундай: Фазлия бу хонадон осто-насини босиб ўтганидан бери Манзура жондан азиз синглисини шафқат билан бағрига босиб, юрак яра-

сига меҳр малҳамини босувчи опа мартабасида эди. Гарчи, тил билан изхор этиб, опа-сингил тутишишмаган бўлишса-да, бир-бирларини руҳан қовуштирувчи туғишганларга хос меҳр ҳалкаси пайдо бўлганди. Фазлия бу аёл билан танишгунга қадар ўзини дунёдаги энг дардли инсон деб ҳисобларди. Гўё ғамли осмон устуни синган-у, дунё дардлари остида колиб кетгандай хис қиласди ўзини.

Дакиқалар, соатлар, кунлар ғилдираги уни аёвсиз равища босиб, янчаётган эди. Қамоқдалигида болаларини кўриш орзуси билан яшаган бўлса-да, бу орзу ишонч билан қувватланмаган, балки, гумон заҳри билан заҳарланиб турарди. «Болаларимни кўрмай ўлиб кетсан керак», деган фикр ҳам бот-бот уйғониб, ўлимтик юрагидаги сўнгти томирларни бир-бир кесгандай бўларди. Қамоққа тушгунига қадар бу дунёда қандай номаъқулчилик бўлса барчаси эркакларга хос, бузук гаплар ҳам эркакларнинг тилидангина учади, деб ўйларди. Унинг эри эҳтиётсизлик қурбони бўлди. Ўша ичувчи, ўша кимор ўйновчи, борини ютқизувчи, ҳатто болаларини тикишдан қайтмайдиган аҳмоқни у эр деб биларди. Риоясини қиласди. Ютқизмай келса, «Худога шукур», деб кўярди. Баъзан эса, болаларининг луқмасига ҳаром аралаштириб бераётганини фаҳм этмай, эрининг ютиб келганига қувонарди. Шу нодон эрнинг кўнглига караб яшаш – унинг учун ҳаётнинг ягона қонуни эди, Аллоҳ буюрганига эса эътибор бермасди. Қамоққа тушгач, эрини ўз қўли билан қасдан ўлдирган ёки қотил ёллаб ўлдиртирган, бу ишидан афсусланиш ўрнига қувонган, ҳатто фахрланувчи хотинларни учратиб ҳангуманг бўлди.

Эрининг ўлимини хоҳламаган эди, қолган умри армон билан ўтади. Агар қўлидаги санчки санчилмай, эри ўзини остан тақдирда ҳам, бу аҳмокона ўлимнинг олдини ололмагани учун ўзини айблаб яшаган бўларди.

Қамоқхонага арок ёки корадорининг қандай кириб

келиши унга номаълум, билишга кизикиб кўрмаган ҳам, билгани – маст-аласт хотинларнинг бузук ишлари... «Жаҳаннам азобидан кўркинглар», деган гапни, дўзахда олов ёниб туришини эшитган, бирок бу ҳақда бошка нарсани билмайди. Билиб олгани – камоқхона азоби дўзахнидан кам бўлмаса керак. Эркакнинг эркакка зулм қилишини табий нарсадек қабул қилиш мумкинdir, лекин нафосат олиҳаси сифатида яралган аёлнинг ёмонликлари...

Хотин кишининг зулм бобида ўнта эркакка дарс берса оловини тасаввур этишнинг ўзи даҳшатли ҳол...

Эҳтимол, Аллоҳнинг аёлга бу дунёда раво кўрган энг олий жазоси – уни раҳм-шафқатдан жудо қилганидир?..

У ўлмай туриб кўриб тургани дўзах азобидан эсономон қтулиб қолишига баъзан ишонмасди. Фазлия каби итоаткорлик билан умр кечириб, бир тасодиф билан қамоқка тушганларнинг ахволи айниқса ачинарли... Эрига бўлган итоати, фарзандларига бўлган меҳр-мухаббати туфайлимикин балки... Худо уни қамок азобларидан куткарди.

Қамоқхона ахли факат эрини ўлдирган котиллардан иборат эмасди. Бунда дунё юзида мавжуд жиноят турларининг исталган турини учратиш мумкин эди. Ўзларини «адолатсизлик курбони» деб билувчи хотинлар адолатсизликнинг турфа хилини шу ерда намойиш этардилар. Ўғри хотин ўғри билан, товламачи товламачи билан, порахўр порахўр билан тезгина тил топишиб оладиган жойда эрини ўлдирган котилларнинг жамланишига ажабланишнинг ҳожати йўқ. Маҳкаманинг шафқатсизлик билан чикарган ҳукмига кўра, Россиянинг совук ўрмони бағрига жойлашган қамоқхонага келтирилган Фазлия кўтариб кирган ўрин-кўрпасини тўшашга улгурмай, сочи устарада олинган, такир бошига дурра ўрамаган хунук хотин унга яқинлашиб, «бу ёкка юр», деб буюрди. Бу камерада ўғриларга нисбатан қотилларнинг мавқеи ба-

ланд бўлгани учун хона тўрини шулар эгаллаган эдилар. Қамоқ оламининг ўзига хос қонунлари, ҳукмлари борлигидан бехабар Фазлия кетма-кет сигарет тута-таётган хотинлар тўдасига қўрқув билан якинлашди. Газета парчасидан иборат «дастурхон» устидаги бир шиша ароқ, пиёз, тузлаган бодрингга, сочилиб ётган карталарга кўзи тушиб, боши узра бало булатлари тўпланаётганини ҳис этди. Лабига сигарет қистириб олган хотин, тутун таъсириданми бир кўзини хиёл қисиб, Фазлияга бошдан оёқ разм солди-да, ёнидаги аёлга имлаб қўйди. Даврага хизмат қилаётган аёл пачоқ алюмин кружкага ароқ куйиб Фазлияга узатди.

– Ич, – деб буюрди лабига сигарет қистирган хотин.

– Мен... ичмайман, – деди Фазлия титрок овозда, кейин изоҳ берди: – хечам ичмаганман.

– Олдин ичмаган бўлсанг, энди ичасан, бу ерда Катка-бигизнинг айтгани – конун, – деди сочини устарада қирдирган хотин.

Ажал тифига рўпара келгандай қўркувдан титрай бошлаган Фазлия кружкани қўлига олиб, лабига теккизди, ароқнинг кўланса ҳидидан кўнгли айниб, қалкиб кетди.

– Ичолмайман... – деди йиғламсираб.

– Анаконда, кийнама буни, ол қўлидан, – деб буюрди Катка-бигиз, сочини устарада қирдирган хотинга, кейин Фазлияга «чўк» деб амр қилди.

Фазлиянинг қотиллар даврасига қўшилиши шу тарзда бўлди. Денгиз пўртанасидаги хаснинг тақдири нима бўларди? «Катка-бигиз» номи билан ҳукм юритувчи хотин Фазлияни каноти остига олмаганда бу муштипар аёл хасдан баттар ҳолга тушарди. Хотинлар Катка-бигизнинг бу марҳаматига тушунишмади. Ҳатто Фазлиянинг ўзи ҳам бундан ажабланди. Бир куни Катка-бигиз иситмалаб, камок дўхтиронасига чиқиши истамай, Фазлияни ишдан олиб колди. Катка-бигиз оёкка тургунича Фазлия унинг хизматини

қилди. Иситма тушиб, дармонга кира бошлагач, Фазлияга ўзини танитди:

— Келган кунинг арок ичмадинг-а? Менинг буйруғимни бажармаган хотиннинг аҳволи нима бўлишини кейин кўргандирсан. Ўшанда ичишга зўрламаганимнинг сабабини айтайми? Сенларнинг одатларинг менга ёқади: ичмайсанлар, чекмайсанлар, нак фариштанинг ўзисанлар. Мен бу ерга келмасимдан олдин ҳам ичардим, чекардим. Касбим шунака эди-да... Мен геолог эдим, сенинг юртингда кўп ишлаганман. Бир куни илон чақиб, ўладиган холга тушдим. Врачга олиб боришгунча ўлишим тайин эди. Базамизга якин қишлоқда яшайдиган бир кампирга олиб боришиди. Мени ўша сақлаб колди. Уч-тўрт кун уйида ётдим. Ҳамкасбларим кўргани келишганда ўлимни енгганимни нишонлаш учун ичиб, чекиб ўтирган эдик, кампир келиб қолди. Мени бу ахволда кўриб, шунақангি бакириб берди-ки, росманасига кўркиб кетдим. Гапларига тушунмасам ҳам, ичаётганимдан ғазабланганини англадим. Кампир бакириб-бакириб келиб, юзимга бир шапалок туширди. Хотин кишининг арок ичиши, чекиши гунохлигини ўшанда билдим. Бўкиб ичмасдим, лекин тўхтовсиз чекардим. Унисини ҳам, бунисини ҳам ташладим.

Онам билан кизимни соғинган эдим, кишга якин Ленинградга қайтдим. Илмий иш билан ҳам шуғулланардим. Кутубхонада бир одам билан танишиб, яхши кўриб қолдим. У ҳам севги изҳор қилғач, кичкинагина тўй билан тақдирларимизни боғладик. Ҳисобли севги билан уйланганини мен аҳмок билмабман. Бошка шаҳарлардан келганларнинг Ленинградда кўним топиши кийин эди. Кўплари товламачилик қилишиб, ленинградликка уйланарди, иши битгач, ажралишарди. Менинг пешонамга битгани бундан ҳам баттар экан. Бир куни илмий кенгашда ўтирган эдим, кўнглим кандайдир нохушиликни сезиб, бетокатланавердим.

Охири, чидолмай, уйга учиб бордим, қарасам, қизим бир ахволда... Ҳали ўн тўртга кирмаган эди қизим бечора... Аблаҳ абллаҳлигини қилибди. Кўзимга қон тўлди, ошхонада чой ичиб ўтирган экан, қўлимга илинган нарса билан уравердим... уравердим... Қўлимга бигиз илинган экан, шунинг учун «Катка-бигиз» деган ном олдим. «Геология фанлари доктори, профессор Екатерина Сафина» деган мартаба билан кенгашларнинг раёсатида ўтириш ўрнига «Катка-бигиз» номини олиб бу сассик хоналарда ётиб юрибман. Фазли, энди мен бу ердан чиқмайман. Озод хаёт менга харом. Аблаҳни ўлдирганимдан мутлако афсусланмайман. Агар вакт ортга қайтса, уни яна бундан баттарроқ қийнаб ўлдирадим. Эрга текканим учун ўзимни ўзим кечира олмайман, энди қизимнинг кўзига карай олмайман. Онам билан қизим кўргани келишганда чиқмадим. Уларга хат ҳам ёзмайман. Мени унтишсин, дейман, қарғаб-қарғаб, лаънатлаб-лаънатлаб унтишсин, дейман. Ичим ёнган пайтда аламимни бу ердаги хотинлардан оламан. Анаконданинг баъзан ваҳшийлашиб кетиши ҳам бесабаб эмас. Сен билмайсан, бузукликнинг турлари кўпайиб кетган. Аҳмок эрга битта хотин кам, битта ўйнаш ҳам етарли эмас. Ҳафтада ё ойда алмаштириб турмаса, кўнгли ўрнига тушмайдиган бузуклар кўпайиб кетган. Анаконданинг эри шунақа тоифадан экан. Кўл-оёкларини каравотига боғлатиб, майшат киларкан. Анаконда шунака майшатнинг устидан чиқиб қолибди. Эрини камар билан савалайверибди, савалайверибди... Жони тошдан экан, ўлмабди у абллаҳ, лекин хотинни егти йилга қамаворишибди. Шу ҳам адолатми? Оилани бузган бузук хотин билан бузук эрга гард ҳам юкмайди. Но-муси булғангандан хотинни эса қамокка тикишади. Анаконда Эрини мажруҳ қилиб кўйганидан армонда эмас, ўлдира олмаганидан афсусланади. Хатосини камоқдан чиққанидан кейин тузатишга аҳд қилган. «Эримни ўлдирмагунимча шундай юраман», деган аҳдининг

катъйлигини билдириш учун сочини кирдириб ташлаган.

Катка-бигиз дардини шу тарзда баён қилган эди. Номуси булғанган аёл қалбининг нечоғли қонсирашини Фазлия бу ҳикоядан сўнг бир оз англагандай бўлди. Катка-бигиз «сенинг юртингни яхши кўриб колганман», деб Фазлияни қанотига олган эди. Бир куни яна бошқа армонини айтди:

– Газли атрофида юрганимизда бир ўзбек ишчи менга ошиқ бўлиб қолган эди. Менинг хам кўнглимда илиқлик бор эди, лекин аҳмоқлик қилдим, «маст-аласт ётувчи исқирт бўлса ҳам, ўзимнинг миллатимга тегаман», дедим. Худо мени бундан баттарроғига рўпара қилди. Уша ишчига текканимда бунака кўргиликлар йўқ эди. Фазли, эшитгандирсан, мени этапга тайёрлаб кўйишди. Ишимда ҳам кўним йўқ эди, қамоқда ҳам бир жойда ўтирумайман. Сени Анакондага топшириб кетаман, кўзингдан ёш оқизмай яша. Ақлинг бўлса, бошқа эрга тегма. Эрсираб қолган тақдирингда ҳам чида, ҳеч бўлмаса, қизларингни узатиб юборгунингча чида, кейин кимга тегсанг тегавер.

Фазлия эрга тегишини хаёлига ҳам келтирмаётган эди. Шу сабабли Катка-бигизнинг армонли овозда айтиган насиҳатини эътиборсиз тинглади. Унинг болалари дийдорига етишдан ўзга умиди йўқ эди. У болаларига интиларди, Катка-бигиз эса кизи билан учрашувдан кочарди. Икки хотиннинг ҳаёти дарёнинг икки соҳили каби айри-айри: бир соҳил жаннат боғларига, иккинчиси дўзах оташида куя бошлаган тақир чўлга туташ эди.

Қамоқдан чикиб, Асадбекнинг ёрдамига умид килган ондан бошлаб, соат миллари янада секинлик билан ҳаракат қиласди гўё. «Кутиш азобига юрагим чидолмай ёрилиб кетса-я!» деб қўркарди. «Ўлиб қолсам, болаларимнинг қисмати нима бўлади?» деган ўй уйғонса, баданини музлатиб юборади. Эшик тиқ этса, кимнингдир суюнчилаб кириб келишини

кутади, телефон жирингласа, хушхабар етказилишига умид қиласи. У қишлоғида Тарзан билан Ахтамни күрганидан сўнг уларнинг нима ишлар билан шуғулланганларини билмайди. Болаларнинг изини топиб, Барнаулга кетганларидан ҳам бехабар. Болалар қай йўсинда изланаётгани ҳатто Манзурага ҳам маълум эмас. Бирон умидли хабар эшитиш истагида эрининг кўзига бокади. Асадбек бу қарашлардаги савол аломатини фахмласа ҳам, индамайди. Хотини саволни тилига чиқарганда ҳам «ишинг бўлмасин» ёки «хушхабар бўлса эшитарсан», деган тўмток жавобдан бошқа гап эшитмаслиги аник эди. Жон олғувчи айрилиқ заҳрининг нечоғлик азоб бериши Асадбек учун бегона бўлмаса-да, хонадонидаги бу икки аёлнинг дардига у шерик бўла олмас эди. Фазлия ва Манзурага насиб этилган сабр ва шукурдан у анча нари эди. Бунинг ўрнига нафрат ва қасос ўти берилган эди унга. Бу борада унга қизи Зайнаб яқин эди.

Фазлияning тевараги коронғи, осмони ҳам коронғи эди. Олачалпоқ булатлар орасидан дам-бадам кўриниб коладиган хира юлдуз бу қораликларни ҳайдай олмагани каби умид юлдузи унга ҳаёт нашъасини бера олмас эди.

Манзура эридан ҳар куни, ҳатто ҳар соатда қандай хушхабар кутса, Фазлия ундан ҳар нафасда кутади. Манзура бу муштипарнинг қарашларидаги мунгли умид учкунига дош беролмаган кезлари «яна озгина сабр қилинг, синглим, Худонинг Ўзи меҳрибон», деб овутишдан ўзга чораси бўлмасди.

Ярим тунда юраги кафасдаги қуш каби потирлаб, Фазлия уйғониб кетди. Ўзининг уйида бўлганида ҳовлига чиқиб айланган бўларди. Бироннинг хонадонида, яна кундузгидай ёп-ёруғ ҳовлида бир ўзи юра оларми... Қамоқхонада ҳам шундай бўларди. Ўйкуси ўчиб, нафаси кайтарди, юраги потирлаб, жон озодлик истаб беҳаловат бўларди. Жоннинг озодликка чиқиши нима экани эса маълум...

Накш билан безатилган шипга тикилиб ётишдан ўзга чораси йўқ...

Кимлардир ана шунака безакларни ёқтиради, солаб тикилиши, завқланиши ҳам мумкин. Кайсиdir уй эгалари эса завқланишмайди, безакли уйларини кўз-кўз килиб мактаниши ёқтиришади. Асадбек ҳам, Манзура ҳам бу тоифадан эмас, уйни безатиш Кесак-половнинг кўрсатмаси билан бўлган.

Фазлияning ота уйи томига қамиш ёпиленган эди. Шипга ёпиширилган қоғознинг вазифаси хонага чирой бериш эмас, балки томдан ёғиладиган чанг-губорни ушлаб қолиш эди. Баъзан қоғоз устида сичконлар юргилаб колишарди. Ёмғир ёқкан кезлари чакка ўтиб ивиган қоғоз тешилиб, сичкон пастга тушиб кетарди. Бир марта Фазлияning косасига тушганда ҳамма маза қилиб кулган эди. Аввалига озгинагина қўрккан Фазлия ҳам уларга қўшилиб мирикиб кулган, эртасига синфдошлирига айтиб бериб, уларни ҳам кулдирган эди. Камбағал яшар эдилар-у, аммо ғамлари йўқ эди. Аксинча, ўзларига хос бахтли кунлари кўп бўларди. Қозонга гўшт тушса – хурсандчилик, янги калиш олиб берилса – бахтиёрлик... Тогаси эски телевизорини совға қилган куни ҳақиқий тўй кувончи хукмрон бўлган эди. Бунака серҳашам, безакли, данғиллама уйлар мавжудлигини орзу килиш у ёқда турсин, тасаввур ҳам эта олишмасди. Фазлия бу уй сохибларини энг бахтиёр одамлар деб ўйлаган эди. Бу хонадонда яшаб, уларнинг чехрасида саодат офтоби нурини кўрмади. Ҳозир безакли шипга қараб ётиб, яна шуни ўйлади. «Серҳашам уйда серташвиш яшагандан кўра, қамиштомли уйда бахтли ҳаёт кечириш минг марта афзал», деган тўхтамга келди. Бир томонига кишлик хашак, иккинчи томонига ғўзапоя бостирилган бостирмасини, атрофи чала ўралган, шамол ғувиллаб турадиган ошхонасини қўмсади. Бу уйда неча кундан бери яшаётган бўлса, шаҳарликлар «қулайлик» деб атайдиган ҳашамларга ҳаваси кел-

мади. «Менинг ошхонам ҳам шундай бўлсайди», деб орзу қилмади. «Меникида ҳам шунаقا ҳаммом бўлса эди», деган ўй хаёлига ҳам келмади.

Кундузи Афрузаникага бориб келган Манзура Фазлияга китобча бериб: «Ажойиб китоб экан, биттасини сизга атаб олдим, ўқирсиз», деган эди. Ҳадеб шифтга тикилиб ётаверишдан безиб, чироқни ёқди-да, китобни қўлига олди.

«Эй Одам фарзанди, факирликдан бўлган хавфинг дўзахдан бўладиган хавфни дилингдан чиқариб юборади», деган Худонинг гапини ўқиб, «Буниси менга тегишли эмас, камбағалликдан қўрқмайман. Одам бир нарсасини йўқотишдан қўрқади, мен нимани йўқотаман?» – деб ўйлади. Шу хаёл оғушида ўқишини давом эттирди:

«Дунё ишларида килинадиган кўп ва узок орзу-ҳаваслар охират ишларини қилишдан тўсиб қўяди, дунё молига муҳаббат Менинг муҳаббатимни дилингдан чиқаради...»

«Бунинг ҳам менга алоқаси йўқ, – деб ўзича хулоса ясади Фазлия. – Охират ишларини тўсиб қўядиган орзу ҳаваслардан узокман. Битта-ю битта орзуим – болаларимни бағримга босиш. Ўзим бир тишлам нонга зор бўлсан ҳам майли, болажонларимнинг дийдорига тўйсан бас...»

«Мендан бошқадан иззат исташ Менинг назар-рахматимдан сени йироқлаштиради...»

Аллоҳнинг бу каломи Фазлияни бир сескантирди. Кейин ўзини оқламоқчи бўлди:

«Мен булардан иззат истамадим, ёрдам сўраб келдим...»

«Менга ибодат қилувчиларни дўст тутишинг Менинг сенга бўлган муҳаббатимни яқин қиласди ва Мени ёмон кўриб ибодат қилмайдиган кишиларни ёмон кўришинг сени балолардан аритади...»

«Эй Худойим, бу амринг борлигини билмасам ҳам, Сенга ибодат қилувчига яқинлашдим, ёмон-

лардан ҳамиша нафратланганман, энди балоларни күтаришингга умид қилиб яшаяпман. Мархаматингга эришиш учун яна қанча яшай? Болаларимни кўриш учун ҳар қандай азобга чидашга тайёрман. Менга яна қанча азоб тайёрлаб қўйгансан, майли, бошимга кулфат тошларини аямай ёғдиравер. Дўлдан кейин барибир булат тарқайди-ку? Бошим устидан ари маётган булатлар качон тарқайди, офтобим качон чараклайди?»

Кўлда китоб, кўзда ёш билан узок ўтирди.

Ўтирган жойида уйқу элитдими ё кўзига эрининг арвоҳи кўриндими – аник билмайди. Ҳарҳолда эрини яна ўша аҳволда кўрди: кийимлари титилиб кетган, бўғзи конталаш... Қамоқхонадаги биринчи тунда кўрганида санчки санчилган бўғзидан қон отилиб турарди, кейин кўрганларида яра котган эди... Тушиди неча марта кўрган бўлса, эри ҳар сафар юм-юм йиғлаб, «Фазли, кийналиб кетдим, мени ўлдира қол, азоблардан куткаргин», деб ялинарди. Фазлия уйғонганида «тушимнинг маъноси нима экан», деб ўйланарди. Қамоқдалигида бир лўли хотин фол очиб, «Эрингдан рози бўлмагунингча у нариги дунёда кийналаверади», деган эди. Тилида рози бўлди, лекин ризоликни дилига жойлай олмади.

Ҳозир эса...

Ҳали ҳам жулдур кийимда...

Ҳали ҳам бўғзи конталаш...

Факат... катта йўлдамиш. Йўлга ёнғоқларни сочиб ташлаганмиш.

Кейин ёнғоқларни бир-бир теришни бошлади...

– Нима қиляпсиз? – деб ажабланди Фазлия.

– Ахмоқлик қилиб сочиб юборибман. Машиналар босиб, янчиб ташламасидан йиғиб олай...

Фазлия унинг ёнига тушиб, биргаликда ёнғоқларни тераверди-тераверди. Ҳориб-чарчаб, кора терга ботди. Қаддини кўтариб караса, эри йўкмиш. Ёнғоқлар терилиб, учта копга жойланганмиш. «Фазли, ёнғоқларни

уйга олиб бориб кўй, бирорга берма», деган овоз келгач, атрофга аланглаб, эрини ахтарди...

Шу онда азон товуши эшитилиб, кўзларини очди.

Бомдод намозини ўқиб бўлишгач, Фазлия нонушта тайёрлашга уннади. Манзура шийпонда қолиб, қўлига китоб олди. Афрузанинг насиҳатига кўра, ҳар тонг намоздан сўнг китоб ўкишни одат қилган эди. Фазлия бу хонадонда ўзини чўри деб билгани учун уй бекаси билан бир дастурхон атрофида ўтиришдан ийманарди. Манзура эса уни меҳмон, ҳатто сингил ўрнида кўргани сабабли ёнидан жой олишини истарди. Кун ўтган сайин Фазлияга ўрганиб борар, ҳатто «болалари топилиб, уйига кетса, яна ёлғиз коламанми?» деган хавотирда юраги эзиларди.

Иштаҳаси йўк икки аёлнинг нонуштаси нима бўларди? Бир пиёладан чой, бир бурдадан нон... Иситилган шавлага кўл ҳам узатилмади, қаймок тўла пиёлага қараб ҳам қўйилмади. Дастурхонга шукронда дуоси ўқилгач, неъматларнинг барчаси болохонадаги йигитларга узатилди. Ўн-ўн беш дақиқадан сўнг йигитлардан бири бўшаган идишларни олиб тушиб, раҳмат айтди. Манзура яна бир оз китоб ўкиган бўлди-да, Афруза билан сухбатлашгиси келиб, йўлга отланди.

Афруза кимникигадир мавлуд ўқигани кетган экан, пойлаб ўтирмай, тезгина изига қайтди. Дарвазадан кираверишда уни йигитлардан бири қаршилаб, хушхабарни айтди. Болаларнинг топилтганидан кувонган Манзура бу жонбахш хабарни Фазлияга етказишга шошилди.

«Болалар топилибди!»

Икки сўздан иборат бу хабар Фазлияning ўлаёзган руҳи учун айнул-ҳаёт эди.

«Қаерда экан? Қачон келишади?»

Бу саволларга жавоб йўк эди. Демак, интиқ кутиш охирига етмабди. Хабарнинг келгани ҳам бир баҳт, лекин болаларни бағрига босиш саодати ўзгача...

У фарзандларини нажот умиди билан кутди. Аллоҳ бу муштипарни умиди учун гўзал мукофот берди. Шундай экан, қирқига чидаганинг кирк бирига чидашдан ўзга чораси йўқ. «Ал-муриду ятлубу вал-муроду яхрабу» – хоҳловчи мурид талаб қилади, муроду максад эса қочади, деганлари балки шунинг ўзири?..

Фазлияning юрак дукури босилмай туриб, телефон жиринглади. Гўшакни қулоғига тутган Манзурага Тарзан яхши таниш бўлмагани сабабли овози ҳам бегона эди. Шу боис унинг нима деяётганини аввалига тушунмади. «Бек акамнинг топширикларини бажардик, болаларнинг онаси шу ерда бўлса, ўғли билан гаплашиб олиши мумкин», деган гапдан кейин шошиб колди.

– Фазлияхон, тез келинг, ўғлингиз чакирияпти, – деди ҳаяжон билан.

Ўғлингиз чакирияпти?!

Фазлия қулоқларига ишонмай, «Меними?» деб юборганини ўзи ҳам сезмади. Кейин югуриб келиб, гўшакка ёпишди. Фурқатнинг раста бўлган овозини танимади. Фурқат «Аяжон! Аяжон!» деб уч-тўрт марта такрорлагач, кувончдан ҳаприқиб кетган юраги гўё тўхтаб колгандай туюлиб, хушидан кетишига оз колди. Кўз олди қорайиб, ўзи чайқала бошлаган Фазлияни Манзура маҳкам кучоқлаб олди.

XIV б о б

1

Барнаулдаги почтахонага аввал Ахтамнинг ўзи кириб, хожасининг уйига кўнгирок қилди. Болохонадаги йигитдан «Хўжайин сафарда, кеннайим қаёkkадир кетдилар», деган жавобни эшлитиб, топширик бажарилганини маълум қилиб кўйишни тайинлади. Кўчага

чиққач, машинада ўтирган Тарзани имлаб чакирдида:

– Болаларнинг онаси хўжайнинида экан, ўғлини телефонга олиб кириб гаплашиб чикларинг, – деди.

– Шартми? – деди Тарзан малоллик билан. – Учтўрт соатдан кейин етиб борамиз-ку?

– Учтўрт соатдан кейин бормайсан. «Учтўрт кундан кейин етиб борамиз», деб онасини тинчтиб қўй.

– Нега?

– Негалигини кейин биласан, – деб гапни калта қилди-да, машинага якинлашиб, эшикни очди: – Фурқат, туш, аканг билан почтага кириб чик.

Фурқат мутелик билан машинадан тушиб, Тарзанга эргашди. Фазлия болалари билан учрашувни қанчалик изтироб билан кутган бўлса, Фурқатнинг изтиробли согинчи унивидан кам эмасди. Қиморбозлар қўлидан қачон ва қандай қилиб кутулиб чиқишини билмасди. Агар бир ўзи бўлганида қочишнинг йўлини қиласди. Сингилларини ташлаб, қаерга қочсин? Отада бўлмаган виждан шу болада мавжуд эди. Сингиллари тақдирига бефарқ карашнинг нақадар пасткашлик эканини унинг онги фаҳм этарди. Бу кеч ертўла копкоғи очилиб, нажот сўзларини эшитганда ҳам, юкорига чиқиб, шахмат доналарини тераётганида ҳам кутулиб кетишига ишончи йўқ эди. Назаридаги Фима барчадан кучли, барчанинг пачағини чиқариб юбора оладиган курдатга эга эди.

Шаҳарга кайтиб, телефонда онасининг овозини эшитгач, «Аяжон! Аяжон!» дейишидан бўлак сўз айта олмади. Фазлиянинг «қаердасизлар, қачон келасизлар?» деган саволини эшитган Тарзан гўшакни қўлига олиб, унга жавоб берди:

– Учтўрт кундан кейин борамиз.

– Нега учтўрт кундан кейин?

Бу саволга жавобни Тарзанинг ўзи ҳам билмас эди, шу сабабли гапни мавхум қилди:

– Шароит шунақа.
– Ўзингиз кимсиз?
– Қишлоғингизда күришган эдик, эсингиздами?
Сиз хавотир олманг, қизларингиз ҳам соппа-соғ, эртага яна құнғирок қиламиз, ҳозир вақтимиз зик.

Шундай деб гүшакни жойига илди-да, Фурқатнинг елкасига кафтини қўйди.

Аэропортга боришгач, Ахтам ичкари кириб, қила-диган ишлари режасини пишитиб чиқди-да, Тарзанни бир четга имлаб чақирди.

– Тошкентга самолёт икки кундан кейин учади. Бу ерда икки кун пойлай олмаймиз. Учта йўналишга бир хилда чипта оламиз, рўйхатдан ўтқизамизу-у, лекин учмаймиз. Икки соатдан кейин Олмаотага поезд жўнайди. Сенлар ўшанда кетасанлар. Мен Краснояр орқали учиб, сенларни Олмаотада кутиб оламан.

Ахтам режасини буйруқ оҳангига баён қилган бўлса-да, Тарзан эътиroz билдириди:

– Жуда-а ошириб юбормаяпсанми? Самолётда учаверамиз.

– Каллангни ишлатсанг-чи! – деди Ахтам жер-киб. – Фима бизларни менсимай янглишганини тушуниб олган. Болаларни олиб кетганимизга чидаши мумкин-у, лекин пулдан айрилганига чидолмайди. Ертўладан кутулиши билан бор пулларини сочиб бўлса ҳам, хатосини тузатишга уринади. Сен кимлар билан олишаётганингни ҳали ҳам тушунмабсан.

– Хўп, бунисига энди тушундим, лекин Красноярга нега учмокчисан, бирга кетаверсанг бўлмайдими?

– Тўғрисини айтайми? Онамни зиёрат қилмок-чиман. Бек аканг «ўлиги ёлғиз ётмасин, хилхонанг-га олиб келиб кўм», деган эди, йўлинни килсам, балки олиб кетарман.

Бу гапдан кейин Тарзан бошқа эътиroz билдирамади. Амрга бўйсуниб, машина сари юрганида Ахтам кўшимча қилди:

– Агар Фима улгурса, икки кундан кейин Бек

акангнинг козихонасида ўтирган бўлади. Шуни хам ҳисобга олгин-у, пулларини ишлатиб қўйма.

Тарзан «хе, пулини ҳам, ўзини ҳам...» деб мингирлаб сўкиниб қўйди-да, машина томон юрди.

Краснояр орқали учишига Ахтамнинг зиёратдан кўра муҳимрок боптқа маҳфий мақсади бор эди. У Тошкентга олдинрок бориб, Тарзан йўклигига отасига аталган жазони амалга ошириши шарт эди. Асадбекнинг «анави сўтакка яқинлашма, унинг менга керакли томонлари бор», деб огоҳлантиришини унутмаган, лекин хожасининг буйруғидан кўра, онасининг васияти унинг учун қадрлирок эди.

«Уч йўналишга чипта олиб, Фимани чалғитамиз», деб Тарзанни алдади. Шерикларини кузатди-ю, ўзи Красноярга учди. Бироқ, онасининг қабрини зиёрат қилишга вакт йўқ эди. Бир самолётдан тушиб, иккинчисига чипта олишга, Тошкентга қўнғироқ қилиб, эски ошнасига топширик беришга улгурди, холос. Окшомда Тошкентга учиб келиб, тўғри «Зўр»ни книга йўл олди. Сибирда ўпкасини совукқа олдириб, силга йўлиқкан «Зўр» қамоқдан чикқач, қасос олишга ҳаракат ҳам қилмай, Ахтамнинг ишлари яхши кетаётганини билиб, унга тобе бўла колган эди. Тарзан «Зўр»ни ёқтирамас, айниқса, у йўтала бошлагандан юзини намойишкорона буриб, бурнини жийирарди. «Шу искиртингни йўқот!» деб талаб қилганида «мен шерикларимга хиёнат қилмайман, агар пешонамга сил бўлиб ўлиш ёзилган бўлса, сен – «пок» боладан эмас, шу искиртдан юқишини хоҳлайман», деган кескин жавобни эшитганди. Асадбекнинг қаноти остига ўтишгач, Ахтам «Зўр»ни бу томон чорламаган, аммо кўкрагидан нари итармаган ҳам эди. «Зўр» ва яна тўрт йигит, Ахтамнинг хоҳишига кўра, панада пайт пойлайдиган шерик сифатида иш юритаётганди. Ахтам Барнаулга отланганида «бир хунасини боплаб адабини бериш» режасини «Зўр»га юзаки равишда маълум қилган, беш-олтита каламуш топишни, қабристонга

бориб, битта қаровсиз гўрни очтириб, ўликнинг сұякларини чиқариб кўйишни топширган эди.

«Зўр» топшириклар «юз фоиз» адо этилганини маълум қилгач, Ахтам икки йигитни олиб қолиб, биттасини кабристонга жўнатди-да, режасини амалга оширишга шошилди. Бу тун касос шарбатидан лаззатланишни, эртасига эса худди ҳеч кандай фожиа содир бўлмагандай, хожасига рўпара келишни мўлжаллаган эди.

Биринчи учрашувда бадбаҳт отасига жазо бермай, бошка гуноҳкорларни ҳам топишни ўйлаган эди. Махкама жараёнида «шу хотин ўғри, давлат мулкини талон-тарож қилган», деб ёлғон гувоҳлик берганлардан бирини топгач, бу аҳдидан воз кечди.

Барнаулга отланмасидан аввал гувоҳлардан бирининг дарагини топиб, кариялар уйига борди. Офтобга оркасини қилиб ўтирганича нимадир тўкиётган кампир унинг кимни сўраб келганини билиб, «хайрият-е, бу шумкампирни йўқлаб келадиган инсофли одам ҳам бор экан-а», деб минғирлаб қўйди-ю, Ахтамнинг бўш келганидан ажабланди. «Иккита нон кимни ўлдирибди, шунақаям хасис бўладими», дегандай чимирилиб қўйди-да, ичкарига боплади. Бир хона эшигини очиб, бурнини жийирди:

– Оббо... яна боплабти, шумкампир, кираверасизми ё тозалашгунича кутасизми? – деб сўради.

Ичкаридан уфурган қўланса хид Ахтамнинг димоғига урилиб, «тозаланглар», деди-да, оркасига кайтди. Кампир фаррошнинг «вазифасини эслатиб» кўйгач, Ахтамга эргашиб ҳовлига чиқди.

– Кимингиз бўлади, бу хотин? – деб сўради дабдурустдан.

Унинг муомаласи Ахтамнинг ғашини келтирди:

– Ўлиб кетган катта поччамнинг таниши, – деди пичинг билан. Хотин гап оҳангига парво қилмай деди:

– «Битта ўғлим бор», дер эди, сизни ўша бемехр деб ўйлабман.

«Онам тирик бўлганида уни бунака жойга ташлаб кўймай, бошумга кўтариб юрардим»...

Ахтам шундай деб ўйлади-ю, хотин билан гаплашгиси келмай, юзини бурди. Кампир эса гапларини эшигадиган тайёр қулок борлигидан кувонибми, гапни давом эттириди:

– «Шумкампир» деганимга ажабланманг. Жағи тинмайди унинг, иғводан бўшамайди. Бир тийин устида юз думалайди. Тагини тозалаб кўядиган санитарга ўн тийин бериб қўйиш у ёқда турсин, «Сенларнинг вазифаларинг бу» деб раҳмат ҳам айтмайди. Шу кампир ўлса, ҳаммага байрам бўлиб кетса керак. Умри давлатни шилиш билан ўтган, ўлигини ҳам давлат ҳисобидан кўмишади. Неча йилдан бери шу ерда ётибди, ит ҳам, бит ҳам хабар олмайди. «Бечорагина» дегим келади-ю, тилим бормайди. Кўргуликлари феълига яраша-да! Мен унинг яп-янги машиналарда керилиб юрганини кўп кўрганман. Ўзи бир дўконда ишларди-ю, димоғи министрнидан баланд эди. Унча-мунча одамни менсимасди. Бойлигига тўнкаярди-да! Нукул «ўғлим bemexр чиқди», деб минғирлайди. Ёшлигига тарарабедод билан овора бўлиб, кичкина боласига меҳр бермаганидан кейин энди нимага дод дейди? Олдин болангни меҳр билан тарбиялагин-да, кейин ундан окибат тила. Гапларим тўғрими?

Она меҳри нималигини билмай ўсган Ахтам нима десин? Агар онасининг ўлими ҳақидаги хабар ёлғон бўлиб, ҳозир уни топса, «меҳр кўрмаганман», деб шунака жойга ташлайдими? Йўқ! Буни ўйлашнинг ўзиёқ вужудини титратиб юборди.

– Ўзингиз нима қилиб юрибсиз бу ерда, сизнинг ўғлингиз ҳам bemexрми? – деди совук охангда.

– Афсуски, Худо менга ўғил бермаган. Ўғлим бўлганида мени бунака хорлаб кўймасди. Қизим бор. Ҳафтада бир хабар олиб туради. Ўлсам, олиб чиқиб кўмади. Куёвим ҳам яхши бола. Фақат... бирга тургим келмади. Яхши бўлгани билан номи «куёв»-

да. Биласиз-ку, йигитлар ичкуёв бўлишдан но-
мус килишади, шунга ўхшаб, менам қуёвимга юк
бўлишни хоҳламадим-да. Пешонам шунақа экан, нима
килай? Уруш пайтида етимхонада «мени бирон яқин
кариндошим келиб олиб кетармикин», деб дарвозага
кўз тикиб кун ўтказардим. Ҳозир олиб кетишларини
хоҳламасам ҳам, барибир, йўлга қарайман. Бу ердаги-
ларнинг ҳаммаси умид билан йўл пойлади. Кетиш-
ни истаганлар кўп, лекин олиб кетишни хоҳловчи ин-
софлилар йўқ. Ноинсофларнинг кисмати нима бўлади,
биласизми? Улар ҳам қариганларида шунақа жойда
мўлтиллаб яшайдилар.

Фаррош чиқиб, хона тозаланганини маълум қилгач,
кампир яна ичкарига йўл бошлимоқчи эди, Ахтам:
«Сиз овора бўлманг, ўзим кираман, пайпоғингизни
тўкийверинг», деб тўхтатди. Кампир «пайпок эмас, не-
варамга жемпер тўкияпман, нариги ҳафтада туғилган
куни», деб жавраганича қолди.

Фаррош тозалаб, дераза дарчасини очиб қўйгани
билан хона деворларига сингиб кетган қўланса ҳид
тарқамаган эди. Ичкарига кирган Ахтамнинг кўнгли
айниди. «Бу кампирни Худо уриб қўйибди-ю, нима-
ни гаплашаман?» – деган ўйда орқасига қайтмоқчи
ҳам бўлди. Фаррош «сизни бирор сўраб келди», деб
огоҳлантиргани учун кампир эшикка кўз тикиб ётган
эди. Ахтам остона ҳатлаши билан у кексаларга хос
майин ва мулоийм овозда эмас, қўрслик билан:

– Кимсан? Сенга нима керак? – деб сўради.

Унинг дағал овозини эшитган Ахтам «бекорга
«шумкампир» дейишишмас экан», деб ўйлаб, саволга
яраша жавоб килди:

– Мен сиз каматиб юборган Рихсиянинг ўғлимани,
эсингиздами?

– Рихсиянинг ўғли йўқ эди.

– Мен қамоқда туғилганман. Онамни қаматганинг
эсингдами?

Нотаниш йигитнинг сенсирашга ўтиб, отнинг кал-

ласидай гунохни зиммасига қўйипи кампирни сароси-
мага солди. Аввалги шашти қайтди:

– Рихсияни мен қаматмаганман, паразит Данияр
қаматган.

– Ёлғон гувоҳлик берганинг-чи?

– Паразит Данияр талаб килган, гувоҳликка ўтма-
санг, ўзинг камаласан, деб қўркитган. Онанг ўша па-
разитни жуда-жуда яхши кўрарди. Камомадда айби
йўқ. Бир сўм олган бўлса ҳам, ўзи емаган, паразит
совурган. Амал оламан, деб хўжайнларга роса пах-
та кўярди. Онангни севаман, дерди-ю, ўзи бошқалар
 билан майшат қиласди. Рихсияни туғишган синглим-
дек кўярдим. Мен уларга уйимдан жой берган эдим.
Онангнинг мендан қарзи колган.

– Қарзи? Туғишган сингилдек бўлган хотин сиздан
қарзими迪?

– Ҳа. Бир ишини тўғрилаб берганинда фойданинг
ярмисини вაъда қилган эди, камалиб қолиб, топга-
нини ўзи еб кетди. Қамоқдан кутулиб чикқанида бе-
рар, девдим, кораси учди. Ўн икки йил беришган эди,
аллақачон чикқандир, қарзларини тўламай қаёкларда
беркиниб юрибди?

– Қамоқка тикқанларингдан кейин... тўртинчи
йили ўлган, – деди Ахтам ғазаб билан. Кейин ёнидан
пул чиқарди-да, иккита юз сўмликни унинг кўрпаси
устига ташлади. – Қарзингни олиб қўй, ўлганингда ке-
рак бўлиб колади.

Кампир коқсуяқ кўллари билан пулни ғижимлаб
олиб, Ахтамга нурсиз кўзларини кадади:

– Бунинг кам, – деди ютиниб.

Ахтам чўнтағидаги пулларни олиб «Ма, тўй!» деб
унинг оғзига тиқмокчи бўлди. Лекин ночор кампир
 билан пачакилашгиси келмади. «Бундай одамнинг
ётоғи гўр, либоси дўзах алангаси бўлиши керак»,
деганларидек, ортиқча гапга ҳожат йўқ эди. Ахтам
соғинган кўнгил ҳузурига ета олмаганидан ғашланиб,
шарт бурилди-ю, чикиб кетди.

Жазо бериш учун Дониёрни уйидан олиб чикиш йўлини ўйлаб топиш, хийла ишлатиш шарт эмас эди. Тун яримлаганда «Зўр» битта шериги билан унинг уйига бостириб кирди. Сароймонанд ҳайхотдай уйда уч киши, ҳар бири алоҳида-алоҳида хонада яшарди. Эр-хотиннинг бу уйга келин тушириш, набиралар шодон қийкирикларини эшлиш умиди ҳануз сароблигича колаётганди. Дониёр ўғлининг уйланмай юришини қораласа-да, оила куришга кўпам зўрламасди. Хотини тўй ҳакида гап очавергач, бир куни: «келин тушираман, орзу-ҳавас кўраман, деб харҳаша қиласанлар-у, чилласи чиқмай, ғидинг-бидингларингни бошлайсанлар, келин йўғида мазза қилиб яшаб олсанг-чи!» – деб қайириб ташлаган эди. Эрининг суюкоёклигидан, ўғлининг саёқ юришидан безиб, асаби хасталангани хотин уйқусизликни енгиш учун ётишдан олдин дори ичишни одат килган эди. Зўравонлар кириб, шира-кайф ҳолича ухлаб ётган Дониёрни таппа босишганини, унинг кўлларини боғлаб, оғзига латта тикиб судраганча олиб чиқиб кетгандарини хотин билмай колди. «Зўр» у ётган хона эшигини кия очиб, енгил хуррак овозини эшифтгач, хотиржам равишда кетмоқчи бўлди. Кейин фикри ўзгариб, хонага кирди-да, уйқудаги хотиннинг бошига бир мушт уриб, кўл-оёқларини боғлаб, оғзига латта тикиб, кўнгли хотиржам бўлди.

Дониёрни шахар четидаги қабристонга олиб боришиди. Ахтамнинг топшириғига кўра, ташландик бир гўр очилиб, одам суяклари олиб қўйилган эди. Тўлин ой нурида қабристон қўркинчли, айни дамда сирли кўринишни олган эди. Дониёр бу жойга ёлғиз ўзи келиб қолса, бир нафас туришга ҳам юраги дов бермаган бўларди. Одам суяигига кўзи тушгач, кўпчилик куршовида туришига қарамай, кўркувдан тили котиб колгандай туюлди.

– Идорангда мен билан гаплашгинг келмаган эди, кўнгилни кўнгилга улаб гаплашадиган энг гўзал жойни қидира-қидира шу гўристонни топдим. Отада

боланинг дилтортар сұхбатига гувоҳлар керакми? Кепрак! – деди Ахтам унга яқинлашиб. – Шу ерда ётган ўликлар энг яхши гувоҳ ҳисобланади. Аввалги учрашувимиздан кейин дарров Бек аканғга йиғлаб борибсан-а, сұтак?! Бек аканғ ким ўзи? Худоми? Агар у Худо бўлса ўзинг кимсан? Пайғамбармисан? Ҳа-а... Эсимга тушди: Бек аканғ – «ўқ илон!» Қасд қилсалар, товондан кириб, мияни ўпиріб чиқишлиарини биламан. Лекин мен илонга товонини тутиб берадиган лақмалардан эмасман.

– Бек акамга шикоят қилмаганман, – деди Дониёр ютиниб. – Красноярдан ёғоч олаверайми, деб сўраганман.

– Шикоят қилғанмисан, қилмаганмисан – менга фарки йўқ. Бек аканғни сенга қўшганда ҳам сарик чақага олмайман. Бек аканғ – кечаги бек. Ҳозир Худо бўлганида ҳам сенга ёрдам бера олмайди. Менинг бу гапларимни энди Бек аканғга етказа олмайсан. Гўрингда бир-икки йил чидаб кутсанг, Бек аканғни ўзинг кутиб олиб, ҳасратингни дастурхон килаверасан.

– Хўп... – деди Дониёр синиқ овозда, – Рихсиянинг олдида гуноҳим бор. Тушларимга кирганида ундан кечирим сўраганман... мени кечирган.

– Тушингда онам кечирган бўлса, кечиргандир, сенга кўйиб берса, «Худо ҳам кечирди», дейсан, лекин мен кечирганим йўқ. «Орага бошқалар ҳам аралашишган», деб уларнинг кимлигини айтмаган эдинг-а? Айтмасанг ҳам билдим. Шерикларингдан биттаси қариялар уйида ўзининг ахлатига беланиб, ўлолмай ётибди. Сени «паразитларнинг паразити!» – деб мақташдан бўшамайди. Асосий шеригингни, ана, кавлаб олдик, танияпсанми?

Дониёр сұяклар томон қарашга ботинмади. Кўкрагида уйғонган кўркув куши бу вужудни поралаб чиқиб кетар даражада потирлай бошлаган эди. Ахтам унинг иягини чангллаб, бурди:

– Эски кадрдонлардан тониш ўғил боланинг иши эмас. Ўлик бўлса ҳам, инсофи бор экан, келишингни билиб, жойини сенга бўшатиб чиқди. Қара, саломлаш. Тириклигига икки букилиб салом берардинг-ку? Одамлар «қамоқдан сақлаб қол», деб терговчига пора берарди, сен «исини чиқармай, бир ўзини қамат», деб чўзганмисан? Ҳа... яхшилаб қара, гапингни икки килмаган терговчининг суюкларига тўйиб-тўйиб қараб ол. Берган пулингга кафандик олиб қўйган экан, чириб адо бўлгунича сени дуо қилиб ётиби. Бу хунасанинг суюгини топиб бўлса ҳам ёқаман, деган эдим, мана, вакти етди – ёқаман!

– Сен... бунақа ваҳшийлик кила олмайсан...

Ахтам заҳарли кулимсираб қўйиб, энди унга жон олғувчининг қонсираган нигоҳи билан қаради:

– Нега кила олмас эканман? Ўйлаб кўр-чи, сендан яна қанақа ўғил туғилиши мумкин? Нопок ва номарддан фақат ваҳший туғилади! Ўғлинг шахматга уста, а? Ўзинг ҳам ўйнаб турасанми? Бир юришда мот кила оласанми? – Дониёр унга қараб қўйди-ю индамади. Ахтам бу қарашни жавоб ўрнида қабул қилиб, давом этди: – Мумкинмас, дейсанми? Мумкин! Бир юришда мот қилолмаган одам бу дунёда яшамаса ҳам бўлади.

Лойка сувда ўз аксини кўрмоқни истаган одам лойни кўради, деганларидек, Дониёр хозир шу ҳолга тушиб, инграб юборди.

Рихсиянинг «Иш»ини олиб борган терговчининг автоҳалокатда жон берганини Дониёр ҳам эшитган эди. Шу сабабли Ахтамнинг гапларига чиппачин ишонди. Аслида Ахтам терговчининг ўлганини билгач, гўрини кидирмади. Унинг суюкларини топиб ёқиши қарори ҳам йўқ эди. Шундай қилса, милициянинг назарига тушиб қолиш хавфи борлиги учун ҳам ўзини тийганди. Лекин Дониёрни обдон қўркитиши учун суюкларни ёқиши фикридан воз кечмаганди. Агар хозир ён-атроф ёругрок бўлганида Ахтамнинг лабла-

ридан тўкилган ёлғонларни кўз кўзгуси ошкор қилиб кўйиши мумкин эди.

Ахтам бир оз сукут қилгач, ҳалиги гапига қўшимча килди:

— Мен совук ўлкада туғилдим, онам ҳам совукда дилдираб ўлди. Шунинг учун сенларни ёкиб, исиниб олишим керак.

Киши ширин умид учкунни билан кун кўради. Ахтамдаги қасос умиди учқун эмас, юракни куйдирувчи чўғ эди. Мана энди у чўғни аланга олдиради. Қасос алангасида хузурланади. Унинг роҳатланишидан огоҳ бўлган киши беихтиёр: «Эй буюк Раббим! Шу бандангга озгинагина шафқат бера колсанг, меҳр хазинант камайиб колмас эди-ку?!» деб юборгиси келарди.

Ахтам имлаб кўйган эди, йигитлардан бири шиша идишдаги бензинни суяклар устига куйиб ёкиб юборди. Яна бир имлаганда Дониёрни олов сари судрадилар. Дониёр оловга ташлайдилар, деб ўйлаб додлаб юборди. Икки қўлтиғидан олган икки йигит гулхандан бир қадам берида тўхтади.

Осмонга ўрлаётган олов тиллари...

Суяқдан сачраётган учқунлар...

Худди шайтонлар базми бошланганга ўхшайди...

Воқеан гўристонда шайтон измидаги кимсалар тўпланган, улардан бири кўнгил роҳатини истаса, иккинчиси жон талвасасида эди. Бу одамнинг ота экани, такдери ўғли қўлидаги ажал сиртмоғига илиниб тургани ғоят таассуфли ҳол эди.

Олов пасая бошлаганда йигит яна бензин сепгач, аланга баландрок ўрлади. Дониёрнинг юзига олов иссиғи урилса-да, назарида ўлик совук лаблари билан унинг юзларини ялагандай туюлди-ю, тошкін бир кўркув билан чекинмокчи бўлди. Лекин икки йигитнинг темирдек панжасидан чиқа олмади.

...аланга тиллари эса кўзига ўлим сиртмоғи бўлиб кўринди.

Ахтам «қамокдан чиккан куним биринчи бўлиб кимни кўраркинман?» – деб кўп ўйларди.

Кимдир кадрдон дўстини кўришни истайди – қани ўша дўст?!

Кимдир онасини кўришни истайди – қани ўша она?!

Хатто... отаси билан кўришишни ҳам орзу килган...
Ана, ўша ота...

У болалик бахтидан маҳрум бўлди. Унинг қалбидаги бунинг эвазига номус ва нафрат колди. Уч ёшга тўлиб, камоқ боғчасидан болалар уйига чиқарилгандаёк бу гўдак «Мен уларнинг ҳаммасини ўлдираман!» деб касам ичган эди. Қасоснинг, хусусан ўлдиришнинг турлари кўп эди. Лекин гап факат ўлдиришда эмас, ўлдира туриб роҳатланишда эди. Қотил ёллашнинг ёузоқдан туриб отиб кетишнинг у учун хеч бир кизиги йўқ эди. У ажал куйи янграй бошлаганида отасининг ўлим талвасаси раксига тупшишини ўз кўзи билан кўришни истарди.

Юзи ўлик рангини олган, кўзлари косасидан чиқкудек бўлиб аланг-жаланг килаётган Дониёрга караб, кибр ва ғурур оловидан баҳра олаётган Ахтам ўз ишидан мамнун эди. У аланганинг бу томонига, бадбаҳт отасининг қаршисига ўтди:

– Мен бу исқирт каллангни узиб, онамнинг қабрига кўймоқчи эдим, – деди-да, йигитнинг кўлидаги шиша идишни олиб, оловга бензин сочди. Аланга ўйинига маҳлиё бўлгандай бирпас жим колди, кейин хўрсиниб кўйиб, гапини давом эттириди: – Қабрни булғагим келмади. Сен ўлмайсан. Лекин ўлим азобида яшашинг учун барча шароитни мухайё килиб бераман. Эркак бўлиб туғилганингга пушаймон ейсан!

Дониёр «сен ўлмайсан», дейилгач, бу марҳаматнинг чин ё ёлғон эканини ажратолмагани сабабли кўрқуви камаймай, жавдираб караб тураверди. «Эркак бўлиб туғилганингга пушаймон ейсан», деганида нимани назарда тутганини ҳам англамади. Ахтамнинг

ишораси билан келтирилган қафасдаги учта каламушни кўрганида ҳам фаҳм этмади. Сонлари чилвир билан боғланиб, каламушлардан бири иштони ичига ташланганида даҳшатга тушди. Жонивор ишини бошламай туриб, у дод-войини бошлади. Уч каламуш бир бўлиб, моягини ғажий бошлаганида типирчилай-типирчилай, хушидан кетди.

Конга беланган беҳуш жасадни уйига олиб келиб, ертўласига ташлаб, каламушларни қафасдан чиқариб юборишгач, йигитлардан бири «03»га қўнғирок килиб, «адамни каламушлар талаб ташлашди», деб, манзилни айтди.

Ҳам дори, ҳам мушт таъсиридаги хотинни «Тез ёрдам» враchlари хушига келтиришди...

2

Хато йўлга кириб колиш ёмон, бу йўлда қайсарлик билан давом этиш аҳмокликдир. Ёмонлик сари бурилиш нуқтасида тўғри йўлга чорлаётган воизнинг юзидаги иймон нури эмас, гуноҳкорнинг бетидаги зулм сояси унинг учун ёқимлироқ эди. Ҳаёт фалсафасини нотўғри англаган одамнинг акли ухлаши, унинг хеч қаҷон ҳақиқатга етолмаслигини эса ўша дамларда билмас эди.

Ахтам одам суюкларини ёқиб, отасининг талвасасидан хузурланаётган пайтда «Барнаул – Олмата» йўналишидаги поезд йўловчиларининг аксари ширин уйкуда эди. Юмшоқ купенинг тепа қисмини Тарзан билан Фурқат, пастини эса Ҳалимжон билан опа-сингиллар эгаллашган эди. Тарзан пастга жойлашмоқчи бўлганида Ҳалимжон «бирон хатар юз берса, мен бу соҳада тажрибалироқман», деб уни тепага чиқарганди. Уйкусиз тун ва кун ўз кучини кўрсатган, болалар ҳам, Ҳалимжон ҳам ухлаб колишган эди. Тарзанинг кўзига уйку илинди-ю, бирдан юраги ҳаприқиб уйғониб кетди. Гавдасини

сал кўтариб, пастга хавотирланиб каради: бир-бирини ачомлаб олган қизчалар ширин ухлашар, Ҳалимжон эса енгил хуррак отарди.

«Хатарга қарши чикадиган тажрибали одамнинг ахволи бу», деб ғашланган Тарзан ёстиғига бошини кўйиб, кўзларини юмди. Бирок, уйқуси ўчиб, турли хаёллару фикрлар карвонини бошқаришга курби етмай қолди.

Тарзан зулм дарёсига ҳаёт қайиғини жаҳл билан, ўсмирилик нодонлиги билан туширган эди. Дастлабки гирдобдаёк эшкак эшишга курби етмай, кемани саркаш дарё оқимлари ихтиёрига ташлаб кўйди. Шайтанат дарёсининг асирига айланиб колганини ўзи ҳам сезмади. Оқим мавжлари аввалига сокин туюлгандай эди. Кейин кучайгандан кучайиб бораверди. Тошдан-тошга урилувчи тўлқинларда нажот йўқ эди. Дарё тўлқинлари уни Барнаулга ҳайдаб келди, энди Олмаотага караб боряпти. Яна қайси гўрларга ҳайдаб олиб боради – билмайди. Билолмайди! Улғайиб, Мурда – Ахтамнинг босган изидан юриб, онгининг юмуқ кўзлари очила бошлаганда парда кўтарилиб, дунё ҳаёти бутун яланғоч шармандалиги билан кўринганида кўркиб, тисарилмоқчи ҳам бўлди. Лекин орқага ҳам, ён-бериларига ҳам тўсиклар кўйиб ташланган, «Ажал келмасидан аввал ўлиш – жувонмарг бўлиш» деган манзилга олиб борувчи аянчли қисмат йўлигина очик эди. Шошиб кетаётган бу поездда Олмаотага етиб олишадими ё «жувонмарг бўл!» бекатида тушиб қолишадими – валлохи аълам!

Поезд ғилдиракларининг «така-туки» кучайиб, кўкрагига гурзи зарби билан урилаётгандай бўлди. Кейин «така-туқ, так-туқ» товуши унинг қулоғига «баттар бўл, баттар бўл!» – деган садо билан урилаверди.

Ҳаёт завқини топиш мақсадида Асадбек қаноти остига кирган эди. Разолат балчиғини титиб топгани нима бўларди? «Исхаб ан-носа камо тасҳабун-нора хуз

манфаатаҳо вахзар ан тухриқака» – одамлар билан муомаланг олов билан муомала қилгандек бўлсин – манфаатлангину куйдиришидан эҳтиёт бўл, дейилганидан бехабар бу banda факат манфаатдан умидвор, аммо манфаатнинг аёвсиз гулханида куйиб адо бўлажаги етти ухлаб, бир тушига кирмас эди.

Уйкусизлик азобида тўлғона-тўлғона, поездда кетиш азобига рўпара қилган Ахтамни сўка-сўка, ҳатто поездда кетиш амрига осонгина бўйсунгани учун ўзини ҳам лаънатлай-лаънатлай, тонгга яқин кўзи илинди. Нонуштага чой олиб кирган вагон оғасининг дўриллаган овозидан уйғонди-ю, тошдай зил бўлиб колган бошини аранг кўтариб, пастга қаради: Ҳалимжон пишлок кесарди, бир-бирининг пинжига кирган aka-сингиллар эса унинг ҳаракатларини жимгина кузатиб ўтиришарди.

– Ана, Марлен амакинглар ҳам турдилар, энди биллашиб чой ичамиз., – деди Ҳалимжон тепага бир кўз ташлаб олиб. Кейин болаларга қаради: – Фурқатбек, уйингларда аянглар эрталабга ширчой қилиб берармидилар, ҳа... шунака чойни менам соғинганман. Эрталаб вақтли туриб, аям сигир соқкунларича мен тандирга ўт ёкардим. Ёзапоянинг чирсиллаб ёнишини ҳатто тушларимда кўраман. Пиёз аралаштириб ёпилган нонни ҳам соғинганман. Ноннинг қанақа тури бўлса еб кўргандирман, лекин пиёзли ноннинг таъмини ҳеч бирида тотмадим. Икки кундан кейин бунака пайтда кишлоқдаги уйингларда қаймокқа нон ботириб еб, мазза килиб ўтирган бўласизлар. Шаҳардаги ўқишлирим, ишларим битса, менам қишлоғимга кайтиб бораман. Сигир-қўй бокаман, томорқада кетмон чопиб топадиган роҳатимни ҳеч нарсага алишмайман.

Ҳалимжон дилидаги орзусини болаларча соддалик билан баён қилаётган эди. Унинг гаплари болалардаги соғинч ўтини баттар аланга олдирди. Ҳатто

Наргизанинг киприклариға ёш томчилари илинди. «Тезрок етиб бора қолайлик», деган илинжда акаси билан опасига мұлтиллаб қаради. У аясининг сигир соғиб, нон ёпганини эслай олмасди. Норхол билан Фурқатнинг күзлари олдида тиним билмас онала-ри гавдаланиб, юраклари янада баттар эзилди. Поезд ғилдиракларининг «така-тук-тақ»и уларнинг кулоги остида «тез-тез-тез», деб жаранглагандай бўлаверди.

Тарзан туриб, ювениб келгач, биргалашиб нонушта қилдилар. Сафар чоғи дилкаш сухбатдош бўлмаса, киши зерикиб, юрак-бағри қон бўлиб кетади. Бу ку-педаги болалар ҳам, катталар ҳам шу аҳволга тушдилар. Тарзан Ҳалимжон билан кайси мавзуда сухбат курсин? Нечта лақмани ресторонларда чув туширганлариними? Ҳалимжон-чи? Асли ким экани, қандай топшириқни бажараётганини айта олмагач, тилига келганини қайтармай валдирайверсинми?

Болалар-чи?

«Ўрага сичқон тушди – гулдир-гуп!» қабилида яна икки кунни ўтказиш осон эмасди. Катталар ўзаро гаплашишмаса-да, болаларни чалғитишлари, овутишлари, уларни бир неча йиллик кўркув зиндонидан қутулишларига оз бўлса-да кўмаклашишлари шарт эди. Надоматки, иккови ҳам бола тилини, бола феълини билмасди. Айникса, болаларнинг хавотирли юрак дукури улар учун бегона эди. Шундай бўлгач, нима килишсин? Барнаулда бирон дўконга кириб, болаларбоп ўйинчок олмаганларидан афсусланишди. Поезд каттароқ бир бекатда тўхтаганда Ҳалимжон тушиб, иккита қўғирчоқ олиб чикди. Лекин опасингилларга бу малласоч қўғирчоқлар овунчоқ бўла олмади. Совғани «рахмат», деб олдилар-у, кераксиз буюмдек кўтариб ўтиравердилар. Ҳалимжон уларнинг қарашларида ғалати хавотир, ҳатто кўркув борлигини сезди-ю, аммо сабабини англай олмади. «Биздан ётси-рашяпти», деб кўя колди.

Поезд күзғолгач, Тарзан вагоногасининг хонаси ёнидан ўта туриб, унинг столи устидаги шахматга кўзи тушди.

– Ишқибозмисиз? – деб сўради Тарзан ундан.

– Ўзим билан ўзим ўйнаб вакт ўтказаман-да, – деди вагоногаси кулимсираб.

Тарзанинг «бир ташлашайлик», деган таклифи маъқул келиб, даррон доналарни терди. Ўзи билан ўзи ўйнаб, вакт ўтказувчи одамнинг даражаси маълум: ўн учинчи юришда мот бўлиб, «ие!» деганича иягини қашиб қолди. «Йиқилган одам курашга тўймайди», деганларидек, яна икки марта ютқизгач, кичик бекатта яқинлишиб қолишгани сабабли ўрнидан туриб, байроқчасини кўтариб, вагон эшиги томон шошилди. Тарзан ундан шахматни сўраб олиб, купега қайтди-да:

– Фуркатбек, давом эттирамизми? – деди.

Фуркат у узатган шахматни олиб, эътиборсиз равишда стол устига қўйди-да, паст овозда:

– Ўйнагим келмаяпти, – деди.

– Реванш олиш имкониятинг бор, – деди Ҳалимжон кулимсираб.

– Амакимни хоҳлаган пайтимда ютишим мумкин, – деди Фуркат ишонч билан.

– Акам ҳаммани ютадилар, – фахрини яширолмаган Наргиза шундай деб акасини кувватлади.

– Димоғинг бунча баланд десам, зўр муҳлисларинг бор экан-а? – деди Тарзан, кулимсираб. – Мактанишни Фимадан ўрганганимисан?

Бу савол Фуркатга ёқмади. Ковоғини уюб:

– Мен мағтанмайман, ютгим келса ютаман, – деди.

Боладаги бу ишонч Тарзанин ҳайратга солди. Яхши ўйнашини кеча Фиманикода синаб кўрди, лекин бу қадар ишонч, рақибга нисбатан бу қадар нописандликни алҳол ҳазм қилолмади. Дераза томон ўтириб, қора доналарни тергач, фарзинни олиб қўйди. Фуркат истамайгина оқ доналарга қўл юбориб, фарзин билан бир тўрани четга суриб қўйгач, колганларини тахта-

га терди. У катта кетмаган эди: кетма-кет уч марта ютди. Қарашидаги жиддийликни йўқотмай доналарни яна тераётганида купега вагон оғаси кириб келди. Кўзи шахмат тахтаси устидаги ўйинда, оғзи эса гапдан бўшамади. Йўлда содир бўлган турли саргузаштларидан гап очиб, орадаги зерикиш булутини хайдаши Ҳалимжонга маъқул келди. Навбатдаги икки ўйинни ҳам бой берган Тарзаннинг бош оғриғи кучайиб, ўрнидан туриб, жойини вагон оғасига бўшатди.

– Шу болани ўзингиз бир «эзиб» қўймасангиз, менинг кучим етмади, – деб ўзини жилмайишга мажбурлади, Фуркатга тан берганини билдириш учун эмас, боланинг кўнглини кўтариш учун кўшиб қўйди: – Бугун сизни ютса, вагон чемпиони бўлади, кейин жаҳон чемпионлигига ўйнайди.

- Акам чемпионлар, – деди Наргиза ишонч билан.
- Сен айтсанг, албатта чемпион бўлади.

Тарзан шундай деб жилмайди-да, эркалаш максадида қизчанинг юзини силаб кўймокчи бўлди. Наргиза худди юзига чўғ босилаётгандай қўркиб кетди, бир сапчиб, опасининг пинжига кирди. Синглисининг кўркуви Норхолга ҳам ўтди. Фуркат эса сингилларига хавотир билан бир караб олди-ю, яна шахмат доналарига тикилди. Қизчанинг бунчалик қўркиши сабабини тушунмаган Тарзан вагон дахлизига чиқиб, эшикни ёпди. Ўрмон бағридан юлқиниб чиккан поезд энди кўм-кўк майсага беланган чексиз кенглик бўйлаб борарди.

Болага ютқизгани сабаб бўлдими ё бош оғриғининг кучайганими – энди юраги ҳам сиқила бошлади. Кенгликка маъносиз бокиб, анча турди. Бекат яқинлашганидан огоҳ қилиш учун поезд секинлай бошлаганида, вагон оғаси тошилиб чиқди:

– Айтганингиздай, болангиз чемпион бўлди. Унга Каспаров бас келмаса, биздақалар яқинлашмаса ҳам бўларкан, – деганича вагон эшиги томон юрди.

Поезд бекатда уч дақиқагина тўхтади. Кимсасиз

чўлда нима учун тўхтади, ким чиқди-ю, ким тушиб колди, билиш қийин эди. Воқеан, билишнинг ҳожати ҳам йўк эди. Поезд ўрнидан жилгач, дахлизга Фуркат чиқди. Тарзанинг ёнида туриб атрофни кузатган бўлди. Унинг нимадир демокчилигини Тарзан сезди, шунинг учун «ичкари кир», деб оркасига қайтармади.

— Сиз Фишернинг ўйинларини кўп ўрганган экансиз. Менга Тальнинг композициялари кўпроқ ёқади, — деди Фуркат ташқаридан кўз узмай. Тарзан эса боланинг зийраклигига тан бериб, унга қараб, гапининг давомини кутди.

— Кеча сизга атай ютқизган эдим, — деди Фуркат энди унинг кўзига тик қараб, кейин гапини исбот килиш истагида давом этди: — биринчи ютишингизда филнинг ўрнига отни «е2»га сурганимда икки юришдан кейин мот бўлардингиз.

«Гапи тўғри», деб ўйлади Тарзан. Кеча чиндан ҳам отни сурмаганига ажабланиб, буни боланинг тажрибасизлигига йўйган эди.

— Тез-тез шунаقا «атай» ютқизиб турасанми? — Тарзан шундай деб унга синовчан тикилди.

— Йўқ, биринчи марта шундай қилдим.

— Фима айтувдими?

— Йўқ, Фима фақат ютишимни талаб қилган. Ютқизганимнинг сабабини тушунмадингизми?

Тарзан боланинг ўткир нигоҳидан кўзларини олиб кочди. Саволнинг жавобини билса ҳам, айтишдан бўйин товлаб:

— Ўзинг айт-чи, — деди.

— Ўртага нимани тикдинглар? Ютқизсам, ўша жойда қолиб кетардим-ку?

— Қолмас эдинг, атай келиб, битта шахмат баҳонасида куруқ кетадиган аҳмокқа ўхшатдингми бизларни? Фимани сал жиғига тегиб, лақиллатмоқчи эдик.

— Жиғига тегишдан кўра, уни ўлдирғанларинг яхши эди...

Боланинг совуқ бир оҳангда айтган бу гапини эшитган Тарзаннинг устидан гўё қайноқ сув куйилгандай бўлди-ю, сесканиб тушди. Зулм оламидаги кўргуликларга кўнишиб, ҳатто ваҳпийликка ҳам эътиборсиз қарайдиган Тарзан боладан бундай шафқатсиз хукмни сира кутмаган эди. Болалар бир-бирлари билан уришсалар ёки талашган нарсаларини бой берсалар, «ҳали қараб тур, сени ўлдираман!» деб пўписа қиладилар. Бу онда Фурқатнинг тилидан учган гап болаларча пўписа эмас, зулм оламининг ҳукми эди. «Ҳамонки, болада катъий истак бор экан, бу аҳднинг жиддий сабаби ҳам мавжуд», деган фикрга келган Тарзан унинг чакнок кўзларига тикилиб:

– Нега? – деб сўради.

Фурқат қалб исёнининг ҳайкириғини босишга ожизлик қилди:

– Бунака одамни ёндириш керак, – деди у янада катъийлик билан.

– Негалигини айт-чи, ахир сенларга яхши караган эмиш-ку? Яхши кийинтириби, корниларинг тўйк экан...

Тарзан боланинг айтгиси келмаётган ҳақиқатни суғуриб олиш максадида бу саволни унинг жигига тегиш учун атайнин айтди. Мўлжали тўғри чиқиб, Фурқатнинг лаблари гезарди:

– Ўлдириш керак! – деб муштумини тугди. Алам чангалидаги қалбининг фарёдини титрок лаблари ошкор қилди – бир ютиниб кўйди-да, аламли оҳангда сабабини айтди: – У... кечаси сингилларим билан... ётарди... Фимага ютқизган одам ҳам бир марта Норхолни...

Шундай деди-да, бошига тушадиган муштдан кўрккан кимсадай тумшайиб олди.

Бунақа гапни катталарнинг айтиши ҳам қийин. Машъум ҳақиқатни бирорга ошкор қилгандан кўра юрагини ўз қўли билан тилка-тилка қилиб ташлаш

осонроқдир. Шундай экан, чорасиз боланинг ахволини хис эта олувчи одам бормикин?

Тарзанга, бузукликнинг турли шаробини тотиб кўрган йигитга Фурқатнинг дардли хабари бошқача таъсир қилди. У тўшагида тунаган қизларнинг отоналари, акалари борлигини, уларнинг рухи азиат чекишини ўйлаб кўрмаган эди. Ҳозир, ўзи учун ҳам кутилмаганда, шуни ўйлади. Бирок, ҳозир ўзини Фима каби пасткашлар сафида кўрмади, аксинча, «кўнглимни олган қизлар тўшак ҳакини олиб кувонарди, кичкиналарга карайдиган ҳайвонлар бошқа», деган баҳона топди. У Фимани ҳайвонлар қаторига кўшиб хато қилди – тўрт оёкли маҳлукларнинг бу борада инсофли эканини, айғир ҳеч қачон тойчоқка иргимаслигини ўйлаб кўрмади.

Тарзаннинг унсиз турганига тушунмаган Фурқат максадини айтди:

- Уни барибир ўлдираман... аям билан кўришиб, сингилларимни топшираман-у, қайтаман.
- Ўлдиргинг келган бўлса, нега шунча пайт индамай юрдинг, кўрқдингми?
- Ўлдиролмай қолсам, сингилларимга қийин бўлишидан кўрқдим. Олдин уларни қутқаришим керак эди. Шу ёзда қочишни мўлжаллаб кўйган эдим.
- Сен... қасос олишга ёшлиқ қиласан, бу фикрни каллангдан чиқариб ташла, – деди Тарзан.
- Бу калладан чиқариб ташлайдиган фикр эмас, – деди Фурқат янада катъий оҳангда.
- Гапинг тўғри, – деди Тарзан энди ён босгандай бўлиб, – Фима ўлиши керак! Мен сенга сўз бераман: итдай хор бўлиб ўлади. Хоҳласанг, калласини узиб, кўлингта олиб келиб бераман.
- Хоҳламайман... калласини ўзим узишим керак...

Тарзан энди унга нима дейишини билмай ҳам колди. Ҳаётнинг азобли чиғирикларидан ўтган бу ўсмир бола такдири йўналишини ўзи белгилаб олибди.

Энди уни кайси куч тўғри йўлга бошлай олади? Тарзан уни «зулм оламига марҳабо, укажон!» деб қучок очиб кутиб олиши керакми? Бу олам атрофида гангиб, тентираб юрганида унинг ўзини куч билан тортиб олган эдилар. Фурқат эса шайтанат қўрғони дарвозасини зарб билан қоқиб, шитоб билан кириб келмоқчи. «Боланинг гапларини Мурда эшитганида яйраб кетарди, унга шунакалар ёқади», деб ўйлади.

Чиндан ҳам Ахтам аҳди кескирларни хуш кўрарди. Фуркатнинг аҳдини эшитгач, Тарзан каби ажабланмасди, балки «Тўппа-тўғри киласан!», деб зулм олами дарвозасини очиб берарди.

Тарзан болани нима деб овутишни билмай, гапни мужмал қилди:

– Фурқатбек, мен сен томондаман. Факат... буни бошқа бирорга айтма, уйга боргандан кейин маслаҳатлашамиз, балки, Барнаулга бирга кайтармиз...

3

– Болалар қани? – деди Асадбек Ахтамнинг ишшайиб турган юзига қарагиси келмай.

– Поездда келишяпти...

Ахтам шундай деб эҳтиёт чорасини баён қилиб берди.

– Оширворибсан, бола. Фиманинг айёргилиги ҳам, қўрқоклиги ҳам, хасислиги ҳам борлигини эшитганман. Бунақа одам сен ўйлагандай акл билан иш юрита олмайди.

– Бек ака, ўрисларда «эҳтиёткор одамни Худо эҳтиёт килади», деган мақол бор.

– Жонинг эҳтиёт қиладиган даражада ширинми? «Ўлимдан қўркмайман», деб катта кетган эдинг-ку?

– Катта кетмаганман, бўладиган гапни айтганман. Мен ўлмайман, ўлмайдиган одам ҳеч замонда ўлимдан қўркадими? Мен болаларни эҳтиёт килдим. Болаларни соппа-соғ ҳолатида қўлингизга топширай,

кейин «азроилнинг ичига кириб чик», десангиз, кириб чикмаган – номард!

«Бу бола Ҳайдар ҳам эмас, Маҳмуд ҳам, ҳатто Жамшид ҳам эмас, бўлган-тургани шу сурбетлик, уни тарбия қилишга уриниш ортиқча. Ўзига яраша балодай ақли бор. Ақлли бўлгани яхши, лекин... хавфли... орқасига бир телиб, йўқотиш керак, – деб ўйлади Асадбек, кейин фикридан кайтди: – Йў-ўқ... бир тепки билан куримайди бу сурбет. Рўпарамда туриб олиб бетимга сапчишга тайёр бола зартага орқамдан келиб курагимга пичоқ санчмайдими?.. Азроилнинг ичига кириб чикмагунича кўз олдимда юра тургани маъкул».

Шу карорга келган Асадбек «хозирча йўқот бунингни», дегандай Жамшидга караб олди. Жамшид хожасининг истагини англа, Ахтамга «сен боравер», деган маънода имлади. Асадбек хотиржам равишида узоқлашашётган Сурга караб, хаёлига бехос келган фикрдан сесканиб кетди. «Ҳайдар билан Маҳмуд таҳт талашиб-талашиб ўтиб кетишиди. Менам қачондир ташлаб кетаман бу лаънати таҳтни. Кимга қолади бу таҳт? Мана шу сурбетгами? Кесак – Ҳайдар бойлика уч зди. Бу бола бойлика кизикадиганга ўхшамайди. Унда таҳтга интилиб нима қилмоқчи? Таҳтни ўзим бўшатиб кетаманми ё тортиб оладими? Подшоларни ҳеч қачон ташкаридаги одамлар заҳарлашмаган, атрофидаги энг яқинлар юрагига ханжар уришган. Бу бола жонимни суғуриб олиш учун менга яқинлашдими? Йў-ўқ... унақамасдир... уни ўзим қанотимга тортдим-ку...»

Ҳа, ўзи тортди. Узокда эгарлоғлик турган кўркам отни ўзи чорлади... Бу отнинг ажал тулпори эканини фаҳм этмади. Нима бўлди унга? Кўзларига ғафлат уйқуси парда тортдими? Ғафлат пардаси тарқаб, нимага рўбаро бўлганини энди тушуняптими? Унинг ажал тулпорига ўтиришини кўпчилик пойлаб турибди. Ўша кўпчилик орасида бу сурбет ҳам борми?

«Бу бола чанг солмайди, мендан нарироқда,

ишишайиб, қуллук қилиб туриб муддаосига етади. Шуниси хавфлирок. Қиличи билан ташланса, ҳимоя килишга улгурман. Бунинг килиғи қанақа бўлади? «Бек ака, сиз тахтда яхши ўтирибсиз, тахтда ўтириш сизга ярашади», деб гап бошлайди. «Сизни кулатадиган аҳмоклардан эмасман. Фақат сиз тахтда ўтираверинг-у, пастдагиларнинг ишига бурнингизни тиқманг. Сизнинг даврингиз ўтиб бўлди. Сиз қорин ғамидан бошқасини ўйламанг...» Ҳа-а... шунака дейиши аник! «Ўқ илон» бир-икки мишиқининг қўлидаги кўғирчоққа айланса!? Ҳеч качон! Қилич эскириб, занглаган бўлса ҳам бир зарб билан одамни иккига ажратиб ташлайди. Булар ким бўлибди – бир қаламтарош! Номига муносиб иш килмаса, битта қаламни очмасдаёқ дами қайтади...»

Фикрлар жиловини бўш кўйган Асадбек муштумини тугди. Қовоқлари учди...

«Азроилнинг ичига кириб чиқмаган – номард!» дедими? Агар қадам олиши чатоқлашса, Азроилнинг ичига киради-ю, лекин чиқмайди. Ҳа, шундай бўлади! – деб пичирлади.

Ахтам ўша куни шом коронғисида Олмаота томон йўлга тушди. Кора «Волга»ни ўзи хайдади, икки йигит сарик «Жигули»да изма-из юрди. Тонг коронғисида Олмаотага яқинлашдилар. Катта йўл четидаги оқ ўтовлардан иборат қаҳвахонада тўхтаб, нонушта қилдилар. Поезд пешинда келиши керак эди. Ахтам қаҳвахона хўжайнининг хонасидаги телефондан шоҳбекатга кўнғирок қилиб, поезднинг уч соат кечикишини билгач, шаҳарда дайдиб юрмай, шу ўтовда дам олишни маъқул кўрди.

Поезд уч эмас, тўрт соат кечикиб келди. Ахтам соғинган аканинг меҳрибон овозида: «Кутавериб кўзларим тўрт бўлиб кетди-ку!» деб Тарзанга қучоқ очиб яқинлашиди. Пешонаси тиришган, қошлари чимирилган Тарзан бу соҳталиқдан баттар ғашланиб, кўл учини бериб сўрашди. Қайтишда яна ўтова тўхтаб,

овқатланишди. Тарзаннинг кайфияти ҳам, иштаҳаси ҳам йўқ эди. Ахтам буни сезиб:

– Уч кунда чимтомок болага айланиб қолибсанми? – деб тегишиди.

Тарзан бу пичингга жавобан «овозингни ўчирангчи!» дегандай ковок уюб караб қўйди. Шу пайт қахвахона эгаси кириб, ўтовда тунаб қолишлари ҳам мумкинлигини айтди.

– Ох, бовурим-а, – деди Ахтам уни елкасидан қучиб, – қозоқнинг меҳрибонлигига беш кетаманда! Менга қолса, битта қозоқ қизга уйланиб, шу ерда хизматингни қилиб юрадим. Лекин тўй бор, эрталаб Самарқандга етиб боришимиз керак, самарқандча ошни еб кўрганмисан? Бешбармоғинг ҳам зўр овкатку, лекин ош бошқача!

«Самарқандга етиб боришимиз керак», деган гапни эшитган Фурқат ажабланиб, Тарзанга қаради. Тарзан уни тинчтиш мақсадида бош чайқаб, «йўқ, у ёққа бормаймиз» ишорасини қилди. Қахвахона эгасини кузатиш баҳонасида ташқарига йўл олган Ахтам Тарзанни имлаб қўйди. Қахвахона эгаси ўз ўтовига караб кетгач, Ахтам шеригига юzlаниб, «Нима бўлди, ўтиришинг бошқача-ку? Ҳалим билан уришиб қолмадингми, ишқилиб?» – деб сўради.

– Унинг нимаси билан уришаман, отига яраша ҳалим-да... – деди Тарзан кўл силтаб.

– Юмшоккина бўлса ҳам, Бек акангнинг ёнида юрганини эсингдан чиқарма.

– Менинг у билан ишим йўк... Бошқа гап бор... Уйга боргандা айтаман.

– Ҳозир айтсанг-чи?

– Фойдаси йўқ.

– Нега?

– Бу гапни билдинг нима-ю, билмадинг нима – ҳеч нима қила олмайсан.

– Ҳеч нима қила олмаслигимни қаердан била қолдинг? Поездда ўргатишдими?

- Поезддами?.. – Тарзан шундай деб жим колди.
– Гапирмайсанми? Туғолмаётган хотинга ўхшаб түлғониб юравер!
– Поездда... қизчани эркалаб, юзини силамокчи бўлганимда у илон чаккандай сапчиб кетди.
– Нега юзини силагинг келиб колди?
– Эркаламоқчи эдим.
– Сенинг эркалашинга зорми у? Кейин нима бўлди?
– Ҳеч нарса... Даҳлизга чиқдим. Оркамдан Фуркат чиқиб хаммасини айтди. Бу сирни бирояга билдирма, девдим, ўзимнинг ичимга сиғмаяпти.
– Бунча чайналасан, нимани айтди?
– Фима, падарлаънати, педофил экан... Жамолбэгинг ҳам...

– Ух, мараз! – Ахтам тишларини гижирлатиб, уришга чоғлангандай муштумини тугди. – Қизларнинг жавдирашига караб, кўнглим сезгандай бўлувди-я! Ичимда бир овоз нуқул «ўлдириб кет, бу маразни», деб зўрлайверди, зўрлайверди. Бек акангдан балога қолмайлик, деб ўзимни босувдим. Ҳа, майли, ўриснинг гапи бор-ку: ҳечдан кўра кеч ҳам яхширок. Ҳаромининг қонини ичгани алоҳида борамиз.

Болалар билан Тарзан «Волга»га, Ҳалимжон эса оркарокда борувчи сарик «Жигули»га ўтириди. «Волга»нинг орқа ўринидиги кенг бўлса ҳам, болалар калхат ҳужумидан кўрккан полапонлардай ғуж бўлиб ўтиришди. Фурқат сингилларини меҳрибон она каби кучиб олди. Бир соатча йўл юришгач, машинанинг силкинишлари, поезддаги чарчок таъсир килиб, болалар ухлаб қолишли. Тарзан ҳам бошини деразага суюб мизғиди. ГАИ нозири ола таёқчасини кўтариб, машинани тўхташга ишора қилганда Ахтам «Бошланди, уйга етиб боргунимизча, Фиманинг пулларини шуларга бўлиб берамиз», деб минғирлаганда уйғониб кетди. Шундан кейин ҳудди поезддаги каби ухлагиси келса ҳам ухломлмай, азобланиб борди.

Куёш терак бўйи кўтарилганда Асадбекнинг уйига яқинлашиб, тўхташди. Ҳалимжон тушиши билан вазифасини бажариб бўлган сариқ «Жигули» бурилиб, кўздан ғойиб бўлди. Тарзан ҳам, Ахтам ҳам бу уйга киришмаган эди. Шу сабабли Ахтам «кирасанми ё чақирасанми, бу ёғига сен хўжайинсан», дегандай Ҳалимжонга қаради.

Чакиришга эҳтиёж йўк эди, болохонадаги йигитлар машина тўхташи ҳамон пастга тушиб, шийпонда Жамшид билан гаплашиб ўтирган Асадбекка янгиликни етказишиди.

— Болаларни олиб кир, аnavиларинг соат тўртда анҳор бўйида бўлишсин, — деди Асадбек Жамшидга қараб.

Жамшид кўчага чиқиб, хожасининг амрини йигитларга маълум килгач, болаларни ичкарига бошлади. Остонага етганда болалар кўркиб, тўхташди-да, нажот кўзи билан Тарзанга қарашди.

— Кираверинглар, аянг шу ердалар, — деди Тарзан, кейин Фуркатга қараб кўшиб кўйди: — Ўша гап — гап! Қайтган — номард!

4

«Аллоҳнинг раҳмат-марҳаматидан ноумид бўлмангиз», дейилган Ҳақсўзга итоат этувчиленинг гўзал мукофотларга зришувини ҳеч ким инкор эта олмайди.

Сабр аччиқ, аммо меваси ширин эканига Фазлияниг ўзи гувоҳ бўлди.

Дарвозадан кириб келаётган фарзандларини кўриб, учмоққа канот ёйган қуш каби қўзғолди. Ҳовли ўртасига етиб борганда кўз олди коронғилашди-ю, хушсиз йиқилди. Асадбек бу ҳолатни кутмаган эди, нима қиларини билмай, ҳайрон бўлганича қараб қолди. Манзура эса чаккон ўрнидан туриб, «вой Худойим,

Ўзинг асра!» деганича ёрдамга шошилди. Болаларни бошлаб кираётган Жамшид ҳам шу томон югурди.

— Сув олиб келинг, сув! — Манзура шундай деб ўзи Фазлияниң бошини күтариб, тиззасига кўйди.

Фазлияниң юзидан қон кочган, лабларигача оқариб кетган эди. Киприклар гўё мангуга қовушгандай эди...

— Фазлия, Фазлияхон, кўзингизни очинг, каранг, болаларингиз келди! — деди Манзура унинг бетларини силаб.

«Болаларингиз келди!»

Бу хушхабарни зўр қувонч билан суюнчилаб айтишни орзу қилган эди. Суюнтирувчи хабарни эшигтан она юзларида чаракловчи шодлик қуёши нурларидан баҳраманд бўлиш баҳтига умидвор эди.

Энди эса... Фазлияниң рангига, чирт юмилган кўзларига қараб, «юраги ёрилиб кетдимикин?» деган гумон уйғонди-ю, ўзининг юраги тўхтаб қолаёзди. Жамшид сув олиб келгунига қадар Фазлияниң лабларида хаёт нишонаси сезилди — «болам... болажон...» деб заифгина пичирлади. Заиф юрак зарби билан пи-чирлаб айтилган сўз Манзурага жаранглаб эшигандай бўлиб, назарида бутун замину само зириллаб кетгандай туюлди.

Одамнинг тупроқдан яратилганига ҳеч ким шак келтирмайди. Лекин маъсумаларниң чидамига, сабр ва тоқатига қараб туриб, «вужуди тупроқдан бўлса ҳам, юраги темирдандир», деган фикр хаёлни ёритиб ўтади. Осмондан ёмғир ёғса, раҳматга айланиб, тупрокка сингади. Фазлияниң бошига ёғилган жабру ситамлар эса чўкка айланиб юрагига тўпланаверган. Кўзларидан оқкан қон ёшлари бу ёнокларни куйдириб юбормаганининг ўзи бир мўъжиза!

Онасини кўргани ҳамон ўқ каби отилишга чоғланган Фуркат сингилларидан ўзиб кетгиси келмай, ўзини енгган эди. Бир қараашдаёқ ховли ва уйнинг ҳашамидан кўзлари камашган Норхол онасини дарров

кўрмади, Наргиза эса... танимади. Фазлия йикилгач, Фурқат сингилларини ҳам унутиб, югурди. «Аяжон!!» деган нола билан онасининг бошини қучиб, юзига юзини кўйди.

— Кўркма, болам, кўркма! Хурсандчиликда шунака бўлади, — Манзура шундай деб болани овутиб, онадан ажратди-да, беморнинг юзига сув сепди.

Фазлия бир сесканиб, кўзларини катта-катта очиб, девонаваш ҳолида атрофга жавдиради. Ўғлини кўрди-ю, яна хушидан кетди. Бу орада қизчалар етиб келишди. Наргиза бир қадам берида колиб, Норхол дод соганича онасини кучоклаб олди. Кўзларидан оккан ёш она ёноғига томди — бу сафар сув сепишга ҳожат қолмади, Фазлия кўзларини очиб, қаддини кўтарди. Йиллар бўйи бағрига йиғилиб, куйдириб келган дард ўкирикка айланиб, ташқарига отилди. Икки қўли билан икки боласини қучиб олди. Ётси-раган Наргиза ҳамон сал нарида жавдираб туради. Болаларини бағрига босган Фазлия бирдан йиғидан тўхтаб, «Наргиз, Наргиз қани?» деб бошини кўтарди. Манзура қизчани икки елкасидан ушлаб Фазлияга яқинлаштирди. Энди Фазлия кенжасини кучоклаб олди. Икки боласи икки елкасидан қучди.

Асадбек бу манзарага караб тура олмади. Томоғига нимадир тикилди. Юрагини чўғ каби доимий равишда куйдириб турувчи соғинч чўғи бирдан алганга олди. Айниқса, айрилик ўтининг аламли тиллари оловли қиличга айланиб, баданини тила бошлади. У бурилиб, уйга кириб кетди. Муштипар хотин ҳасратининг оғир тоши остида қолган Манзура эри каби ўзини ўзи енга олмас эди — кувонч ёшларига эрк берди. Унинг кувончи Фазлияникидан фарқ киларди. Фазлия дийдор кувончидан кўз ёши тўкарди. Манзуранинг кувончи соғинч тошлари орасидан сизиб чиқарди.

Дийдор дақиқалари соғинч ярасига бир оз малҳам кўйгандай бўлиб, Фазлия болаларини ўзи яшаётган хонага бошлади. Ўғли билан телефонда гаплашиб,

кўнгли чароғон бўлган куни Манзура уни бозорга олиб борган, болаларнинг ҳозирги қадди-қоматини тахминан чамалаб, янги кийим-бошлар сотиб олган эди. Қиммат-қиммат кийимлар харид қилинаётгани учун қимтиниб, хижолат бўлаётган Фазлияни «бу акангиздан суюнчи, суюнчини кайтариш мумкинмас», деб кўнглини кўтарган эди. Ният холислигиданми ё она кўнглининг сезгирилигиданми, чамалаб олинган кийимлар лоппа-лойиқ келди. Болалар чўмилиб, янги уст-бошларни кийишгач, Манзура баҳтиёр оилани меҳмонхонага таклиф килди. «Булар сизнинг ҳимматингиз туфайли баҳтини топди, савоби, Худо хоҳласа, ўғлимизнинг руҳига етади. Ярим соат бўлса ҳам бирга ўтиринг», деб кўчага отланган Асадбекни йўлдан қайтарди. Иззатли меҳмонлар учун ҳамиша тузоғлик дастурхон болаларнинг кўзларини олган бўлса-да, ўзларини эркин ҳис кила олмадилар, неъматларга, ҳатто нонга қўл узатишдан иймандилар. Фазлия Асадбекка миннатдорлик билдириб, қайта-қайта дуо килди-ю, жимиб колди. Буларга ҳозир бу шохона дастурхон эмас, чакка ўтувчи уйларидаги бир оёғи лиқиллаб колган хонтахта атрофида ўтириб, сувга қотган нонни ботириб ейиш азизрок ва суюмлирок эди. Уларнинг қалблари истаётган бу хузурни на Манзура, на Асадбек ҳис кила оларди. Агар Фазлия кўнгил истагини баён этгудай бўлса, «шунақаям ношукур бўладими!» деган таънани эшитиши мумкин эди. Манзура лабини тишлаб қолса ҳам, Асадбек шундай деб тўнғиллашдан қайтмаган бўларди.

Асадбек «гапингни икки қилмай, ўн дакиқа ўтиридим, буларнинг баҳтли бўлиши учун шу кифоя қилар, а?» дегандай хотинига маъноли қараб кўйди-да, зарур ишлари борлигини айтиб, ўрнидан турди. Бу шунчаки баҳона эмас, чиндан ҳам зарур иши бор эди: уни анхор бўйидаги нохуш учрашув кутарди. Кеча Тошкентга етиб келган Фиманинг арзини эшитган, бугундан колмай унинг масаласини ҳал қилиб бериши керак

эди. Аввалига «ўзинг тинчит, бу ишни», деб Жамшидга топширмокчи эди. Лекин болаларга тегишли масаланинг аввал ўйлаганидан кўра жиддийроқ эканини англаб, мулозимларини ўзи сўрок қилмоқчи бўлди.

Асадбек чикиб кетгандан кейин ҳам болалар яйраб ўтира олмадилар. Улар чўмилаётган пайтда Манзура Афрузага қўнғироқ килиб, хушхабарни етказган, кейин «бир пиёла чойга» таклиф этган эди. «Бирров кириб, табриклаб чиқаман», деб ваъда қилган Афруза келиб, давра сал жонланди. Истарали аёлнинг ширин сўзлари болаларга ҳам ёқди. Афрузанинг вақти зик эди. Мезбондан ижозат сўрашдан олдин Фазлияга мурожаат килди:

— Синглим, агар айбга буюрмасангиз, ширилларингизнинг исми ҳақида бир гап айтмоқчи эдим? — деди.

Фазлия бу илтимосдан ажабланиб, «сиз айтинг», дегандай Манзурага қаради.

— Айтинг, отин ойи, — деди Манзура.

— Пайғамбаримиз алайҳиссалом, фарзандларга ҳам чиройли, ҳам маъноли исм қўйиш зарурлигини тайинлаганлар. Ўзлари кўп саҳобаларнинг исмларини ўзгартирганлар. Ҳатто набираларига уруш аслаларининг номини исм қилиб қўйишганда бирини Ҳасан, яъни яхшилик, иккинчисини Ҳусайн, яъни чирой, ҳусн, деб ўзгартирганлар. Хайрли исм умидли ният фазилатида боланинг умри давомида ҳамроҳ бўларкан. Бизда тушунмаслик оқибатида маъноси ғалати исмлар қўйиб юбориш одати ҳам бор. Илгари араблар боласи туғилиши билан кўзига биринчи нима қўринса, ўшанинг номини исм қилиб қўяверган эканлар. Биттаси ўғлига «Жуал» деб исм қўйибди. «Жуал» арабчасига «саҳро қўнғизи» дегани. Кулгили, а? Мана, сиз ўғлингизга «Фуркат» деб исм қўйибсиз. Маъносини биласизми?

— «Фуркат» деган шоир бор-ку... — деди Фазлия айбли иши фош бўлган одамдай қимтиниб.

— «Фуркат» шоирнинг тахаллуси. Асл исмлари

«Зокиржон» бўлган. Ватандан айрилганлари учун шунақа тахаллус олганлар. Чунки «Фурқат»нинг – «айрилик» деган маъноси бор. «Норхол» – «туянинг холи» дегани...

- Мен туғруқхонадан чикқунимча дадаси шунақа деб ёздириб қўйибдилар...
- Ўзингиз нима деб қўймокчи эдингиз?
- Бувимнинг исмлари «Гуландом» эди, шуни қўйинг, девдим, унамадилар.
- Ҳали ҳам кеч эмас, «Гуландом» бўлаверсин.
- Майли... Фурқатжонга... – Фазлия Манзура га умид билан каради, – мулла акам исм қўйиб бера колсингилар...

Шу қарорга келдилар. Афруза кетгач, Фазлия болалар билан хонасига чиқди. Шом намозидан кейин «Рухсат берсангиз, эрталаб уйимизга кетардик», деди ялиниш оҳангига. Манзура эътиroz билдирса, «ҳеч бўлмаса болаларингиз топилгунича яшаб туринг», девдингиз, мана, Худога шукур, бағрим тўлди», демокчи эди. Иўк, Манзура каршилик билдирмади.

- Майли, – деди синиқ овозда, – ҳали мулла акангиз келсингилар...

Асадбек анхор бўйидаги «қозилик»дан қўнгли хирадашган аҳволда қайтди. Манзура боланинг исмини ўзгартириб қўйиб беришни сўраганида ажабланди. Чунки бунака ҳолни ҳатто эшитмаган эди. Буни хотинларнинг иримчилигига йўйиб, кўл силтади-да, «керак бўлса, ўзинг қўйиб беравер», деди.

- Сизники табаррук, бир умр эслаб юришади, – деди Манзура, бўш келмай. Ҳали шу масала қўтарилигандан негадир қўнглига «Абдуҳамид» бўла қолсин, деган ўй келган эди. Шундай қилинса, назарида ўғлининг номи ўчмас бўлиб қоладигандай эди. У хозир эридан шу исмни кутди. Асадбек кўп ўйламади, хаёлига келган биринчи исмни айтди:

– «Абдураҳмон» деб қўя қолларинг.

Шундай деди-ю, қўнгли равшанлашди. Эри-

нинг ҳар бир гапини конун ўрнида қабул килувчи аёл бу қарорни «нега?» деган савол билан муҳокама килиб ўтиrmади. Эрининг қарорини Фазлияга айтиш мақсадида чиқмоқчи бўлганида Асадбек тўхтатди:

– Болалари билан гаплашдингми? Акли жойидами? Маънилими? – деб сўради.

Кутилмаган бу саволдан Манзура ажабланди:

– Нега бунақа сўрайпсиз?

– Тушунмадингми? Эси-хуши жойидами? – деди Асадбек, бу сафар сал дағалроқ оҳангда.

Манзура «бир гап бўлган шекилли», деган ўйда эрига чўчиб каради.

– Бип-бинойи болалар...

– Ўғлини чакир, гаплашиб кўрай-чи.

– Хўп, – Манзура шундай деди-ю, юра қолмади.

– Яна гапинг борми?

– Фазлияхон эртага кетмоқчилар.

– Кетса мен нима қилай?

– Рухсат берамизми?

– Қамаб ўтиrmокчимисан? Шунақа бўлишини мен сенга бошида айтганман. Йигитларга айтаман, кузатиб кўйишади.

– Уйларида бирон ҳафта туриб, кейин қайтиб келишса-чи?

– Қайтиб келишса-чи? Унгача сен каллангни ишлатсанг-чи! Бу хотин сенга хизматкорлик қilmайди. Болалари ҳам сенга бола бўлмайди! Орзуйингни амалга ошираман, деб овора бўлма!

– Унақа деманг...

Манзуранинг ғам тиришлари сўлиштирган қалтироқ лабидан шу сўзларгина учди. Бошқасига курби етмади. Хотинининг куйилиш истагидаги ёшларга тўғаноқ бўлиб турган киприкларига кўзи тушган Асадбек юмшади:

– Яна ўзинг биласан. Келгиси келса, келаверсин...

Бу гап Манзурага далда бўлди. Тез-тез юриб чиқди-да, кўп ўтмай болани бошлаб қайтди.

Ўзига «Абдураҳмон» деб исм кўйиб берган, кўри-нишидан баджахл бу одамга Фурқат тик қарай олмади. Асадбек эса унга бошдан-оёқ разм солди.

– Фима хафа қилмай, яхши қарадими?

Кутилмаган бу савол боланинг юрагини кемириб ётган алам илонини қўзғади, вужудини эса гўё шафқатсиз қўллар кўтариб ерга урди: ҳамма ёғи зириллаб кетди. Тили қотиб қолди, жавобга ҳатто уринмади ҳам. Фиманинг аглаҳлигини Марлен акасига айтган, унга ишонади. Қовоқ уюб турган одамга ҳам ишониши керакми? Ким сўраса, гапириб бериши шартми?

Асадбекка бола безрайиб тургандек туюлди, унинг ичини қоплаб турган дард булутини сезмади.

– Фима сени нималарга ўргатди? – деб сўради ундан кўз узмай.

Абдураҳмон саволни тушунмагандай елка қисиб кўйди.

– Шахматни зўр ўйнармишсан, – деб саволига аниқлик киритди. – Картани ҳам яхши сурасанми?

Бола нима деб жавоб қайтаришни билмай, яна елка қисди. Асадбек столи тортмасини очиб, тахи бузилмаган картани олди-да, унга узатиб, «чийлаб, тарқат», деб буюрди.

Онаси «сизларни шу киши топдириб бердилар», деган эди. Энди нима қилмоқчи, бу ҳам киморга ўргатадими?

Абдураҳмон шу хаёл зарбида енгил сесканиб, картани қўлига олди-да, буйрукни бажаришга киришиди. Асадбек унинг бармокларидан кўз узмай, тикилиб турди.

– Яхши устознинг қўлига тушибсан, – деди Асадбек бир оздан кейин. – Нима қилмоқчисан, адангга ўхшаб қиморбоз бўласанми?

У нима десин? Ўз тақдири ўз қўлида бўлса кошки эди! Қўлма-қўл ўтиб, бу ерга келди. Фимадан озод

килган бу одамнинг мақсади нима – билмаса... Унинг мушкулини Асадбекнинг ўзи осон қилди: гапни кўп чўзмасдан муддаосини айтди:

– Киморнинг нималигини кўргандирсан. Бармокларинг чаккон экан. Ана энди шу чаккон бармокларинг билан бу картани йиртиб ташла.

Бола иккиланиб турди-да, кейин буйрукни бажарди.

– Нимага йиртганингни тушундингми? Бундан кейин қўлингга карта олмайсан. Карта ушлаганингни курсам ёки эшитсам, бармокларингни ўтмас пичок билан битта-битта кесаман.

Асадбек «ўтмас пичок билан», деб таъкидламаса ҳам бўларди. Бармоқ ўткир пичоқда кесиладими ё занглағанидами, бу ёшдаги бола учун барибир кўркинчли, ҳатто даҳшатли ҳукм. Абдураҳмон эса қилт этмади, даҳшатга ҳам тушмади, чунки унинг ўзи кимор масаласида аниқ бир қарорга келиб кўйган эди. Унинг ҳаёт йўлини белгилаган қососи Асадбекнидан ҳам, Тарзан ва айниқса, Ахтамнидан ҳам кескин фарқ киларди:

«Ўзим қимор ўйнамайман. Катта бўлганимда кимнинг ё хотинини ё боласини қиморга тикиб ютқизганини эшитсам, ўша куни бориб, қўлларини кайриб узаман, кейин бошини кесаман!»

XV б о б

1

Анхор бўйидаги ўзларининг жойларига соат тўртда келишлари шартлигини эшитиб, ажабланишмади. Вазифани қай йўсинда ўриннатганлари бўйича хисоб бериб, Бек акаларидан олқиши олишни ўйлаб, кайфиятлари кўтарилиди. Тарзан ювениб, дам олиш мақсадида уйига кетди. Ахтам эса анхор бўйига бо-

риб, чойхоначига «зўр бир жонон дастурхон» тузаб кўйишни тайинлагач, бошпанасига жўнади.

Анхор бўйида белгиланган вақтдан бир соат аввал учрашдилар. Чойхоначи сув устидаги сўрига «жонон дастурхон» тузаб қўйган эди. Ахтам бу диди учун уни алкаб турганида Тарзан тушкун кайфиятда келди. Чойхоначининг саломига алик ҳам олмади. Соҳилдаги сўрига омонат ўтириб, сувга тикилганча жим колди. Ахтам чойхоначига қўшимча топшириклар бергач, шеригига яқинлашди:

– Нима бўлди, худди мен еб сен курук қолгандай тумшайиб олдинг?

– Бирпас жаврамай тур, – деди Тарзан унга қарамай.

– Ҳа, тушингни сувга айтиб ўтирибсанми, менга ҳам айт, бир мазза қилай...

– Айтами? – Тарзан шундай деб ўрнидан турдида, Ахтамга ўткир нигоҳини қадади. Ахтам бу карашда аёвсиз зулм шарпасини кўриб, эҳтиёт юзасидан бир қадам тисарилди. Чўчиганини сездириб кўймаслик учун айёrona жилмайди:

– Ёнғоқнинг тагида ухлаб келмадингми, ишқилиб?

– Кўрган тушимни айтами? – деди Тарзан ғазаб билан. – Тушимда бир абллаҳ адамни каламушга ем килганмиш.

«Бу ифлосликни сен қилгансан, қани, тониб кўрчи!» дегандай Ахтамнинг ёқасига қўл юборди. Лекин кўли ёқага етиб бормади – Ахтам кафтининг қирраси билан бир уриб, четга сурди.

– Ўзингдан кетма, бола, дардинг бўлса, айт! Аданга нима бўлибди?

Тарзан энди «ростдан билмайдими, бунинг иши эмасми?» деган иккиланиш билан қаради. Аввалги шашти сал сўнганини дардли овози ошкор қилди:

– Адамнинг нозик жойини каламушга ем қилибди... кимдир.

Аламли одамнинг дардли овозини эшишиб, Ахтам-

нинг ичидаги шайтон қаққа отди. Аммо сир бой бермади, тухмат балосига учраб ранжиган дўст либо-сида эътиroz билдириди:

– Шунақами? Ўша «кимдир» мен эканманми? Ка-ламушларнинг базми қачон бўлибди, айт-чи?

– Олдинги кечаси...

– Красноярда туриб адангнинг нозик жойини мўл-жалга олибманми, аҳмок! Красноярдан эртасига эр-талаб учдим, кечаси аэропортида молдай ётганман. Пешинда учиб келдим-у, Бек акангга ҳисоб бериб, Ол-маотага жўнадим. Аввал суриштириб аниклагин-да, кейин менинг бўйнимга осил! Мендан шубҳаланишга ҳаккинг йўқ, каламуш сенинг кашифийтинг. Мен буна-канги ипириски ишлар билан шуғулланмайман. Аданг билан нима ишим бор?!

Ахтам дағал оҳанги билан уни ишонтиргандай бўлди. У Тарзанинг отаси учун касос олишга ҳаракат ҳам кильмаслигини билса ҳам, эҳтиёт чорасини кўриб қўйганди: Красноярдан учиш вакти чиндан-да, эртаси-га эрталаб бўлгани сабабли, пешинда Чимкентга учиб, Тошкентга таксида етиб келганди.

Шеригининг гаплари таъсир килдими, Тарзан жо-йига қайтиб ўтириб, бошини чанглаб олди.

– Аданг тирикми, ўзи? – деб сўради Ахтам.

Тарзан бош ирғаб «Ҳа» ишорасини қилди. Кейин «бундан кўра ўлгани ҳам яхшийди», деб минғирлади.

– Каерда бўлибди бу иш, суриштирдингми?

Тарзан «ростдан ҳам билмайсанми?» дегандай унга саволомуз караб олди-да, худди ўзига-ўзи гапиравчи телбанинг оҳангида эшитганларини баён қилди.

– Ота-онангнинг ёлғиз яшаши ёмон, деб сен-га неча марта айтдим. Уйланишинг керак. Хотининг ҳеч бўлмаса, ота-онангга қоровуллик килади. Мен ўғриман, уйланишим мумкин эмас. Сен тўғрисан, уй-ланишинг шарт, ўзингга ўҳшаган валаки-саланг болаларни қаторлаштириб қўйганингдан кейин борадиган жойингга жўнайверасан. – Ахтам бу гаплари шеригига

ёқмаётганини фаҳмлаб, энди меҳрибон ака оҳангига кўчди: – Аданг касалхонада эканми, бордингми? Дўхтири нима дейди?

– Нима дерди! – Тарзан алам билан қўл силтади. – Кон куйишибди, хатар ўтибди.

– Хатар ўтган бўлса, нега дий-диё қиласан. Аданг ўшасиз ҳам яшайверади. «Адам бузук», деб онангга ачинардинг-ку, ана, энди онангнинг кучоғида ўтираверадиган бўлибди. Ўрислар айтади-ку, «баҳт йўқ эди, баҳтсизлик қўллаб юборди»...

Соат тўртда Бек акаларини кутиб олиш учун дарвоза томон юришди. Кетма-кет келиб тўхтаган машинанинг олдингисидан Асадбек тушди. Унга пешвозчиқиши мақсадида қадам босганларида орқадаги машина эшиги очилиб... Фима кўринди. Ахтам «айтганим тўғри чикдими?» дегандай Тарзанга караб олди-ю, саросимага тушмай, кулимсираганича Бек акасига салом бериб, кўришмоқ мақсадида қўл узатди. Асадбек паст овозда алик олди-ю, қўл бермади. Йўл бошлаган Жамшиднинг изидан анхор соҳили томон юрди. Фима унга эргашди. Йигитларнинг ёнидан ўтаётганида ифрати ғазаб ва нафрат билан тикилди. У «Кутилмаган учрашув безбетларни шошириб қўяди», деб ўйлаб янглишганди. Ахтамнинг кўзларида саросимани ҳам, чўчиш аломатини ҳам кўрмади. Аксинча, Ахтам ишшайиб саломлашди:

– Салом, Фима амаки, яхши етиб келдингизми? Самолётда миянгиз чайқалмадими ишқилиб?

Фима: «Мия чайқалиши канака бўлишини ҳозир кўрасан», деб минғирлаганича ўтиб кетди. Йигитлар бир-бирларига «энди нима қилдик?» дегандай караб колишди:

– Сен тез бориб, пулинни олиб кел. Қолганини менга қўйиб бер.

Ахтам шундай деб меҳмонлар изидан шошилди. Асадбек сув устидаги сўрига ўтмай, соҳилдаги дастурхонсиз сўридан жой олган эди. Ахтам Бек акасининг

рўпарасига келиб, мутелик билан кўл боғлади. Асадбек унга бошдан-оёқ тикилиб, қошларини чимирди.

– Танийсанми? – деди Фимага қараб олиб.

– Бўлмасам-чи! – деди Ахтам қувонган одамнинг жилмайиши билан. – Етим бола боқиб оламан, деб юрганимда шу тавия учраб колди. Менинг ўгай ўғлим бу. Аслида иккитасини боқиб олганман, биттасининг моягига чипқон чиқиби, – деб меҳмонга айёрона бокди: – Фима, Алёшканинг ахволи қандай, олиб келмабсан-да?

«Бу бола нега ҳеч нарсадан тап тортмайди? Гунохи борлигини билмайдими? – деб ўйлади Асадбек ғашланиб. – Айёр тулкининг гапларига ишонайми ё бу сурбетгами?»

Кеча пешинда кўнғирок килган Балабуха йигитларидан эшитганларини айтиб, Фиманинг йўлга чикканини билдирган эди. Балабуханинг гапларига караганда буларда айб бўлмаса-да, Асадбек барибир Ахтамнинг ёнини олмади.

– Майнавозчилик қилма. Эски хунарингни ташламабсан-да? – деб ғазабли нигохини унга қадади, бу гап билан ресторандаги қилиғини эслатди.

– Бек ака, унака деманг, булари янги. Фиманинг келгани яхши бўлибди, ўзимиз ювиб-тараб, одам киласиз, – деди унга тик қараб.

– Сенга «тўғри бориб, тўғри келларинг», деб топширилувди.

– Чизган чизиғингиздан чикадиган аҳмок эмасмизку, Бек ака. Тўғри келишимизга бу тавиянинг ўзи йўл бермади.

Ахтам шундай деб Барнаул воқеаларини русчалаб бир-бир баён этди. Ўзидан ёлғон қўшмаётгани учун Фима гап қўшмади. Ахтам тингач, Асадбек унга «энди сен гапир», дегандай қаради. Фимага жон кирди:

– Ахир мен нотаниш одамларга болаларни икки кўллаб топширмайман-ку, тўғрими, Бек? Булар мени хақорат қилишди, пулимни ўғирлашибди.

– Шундай хурматли амакимизни ҳакоратлайдиган тил топилса, тилиб-тилиб итларга ташлаган бўлардим, – деди Ахтам. – Пулни олганимиз рост, лекин ўғирлаганимиз йўқ. Бек ака, бу амакимизни жонжонимиз билан иззат қилиб, меҳмонга чорласак, кўнмадилар. Биз томонларга келишлари учун пулни атай оловолдик. Мана, келдилар, тийин-тийинигача сабаб олаверадилар. Уч-тўрт ҳафта меҳмон қиласиз-у, уйларига тантана билан ўзимиз олиб бориб кўямиз. Факат...

– Пул қани? – деди Асадбек унинг гапини бўлиб.

– Тарзан ҳозир олиб келади.

– Сен бола, қадамингни ўйлаб бос. Ўғри бўлиб, ўғриларнинг конунига бўйсунмасанг, киморбоз бўлиб киморбозларнинг ўйинини бузсанг, оқибати нима бўлишини биласанми? Абжағинг чиқиб кетади.

– Бек ака, мен ўғри ҳам, киморбоз ҳам эмасман. Мен – Мурдаман. Мурдаларнинг конуни сал бошқачароқ бўлади.

Асадбек унга ғазаб билан караб турди-ю, гапни киска қилди:

– Барнаулга соат еттида самолёт учади. Хурматини жойига кўйиб, кузатиб кўйларинг.

Асадбек шундай деб ўрнидан турди. Фима «мен нима қилай?» деган хавотирли назар билан каради.

– Пул келгунча, зиёфатни еб ўтира тур, атай сени деб дастурхон тузабди, – деди Асадбек унга.

– Менга зиёфати керакмас, йўлкирамни, яна кўрган маънавий зараримни коплашсин.

Бу талабдан Асадбекнинг энсаси қотди: «коплайди, коплайди», деб дарвоза томон юрди. Ахтам Фиманинг кизчаларга қилган қилиғини айтольмай қолди. «Айтсан, «ўлдириб юбор», деб буйрук берарди, буйрук берса-бермаса, нима қилишни ўзим биламан», деган карорга келиб, ишшайганича Фимага яқинлашди:

– Ваъдам эсимда, сени хўроз гўшти билан сийламокчи эдим. Лекин, афсуски, кутилмаганда вакт-

лироқ келиб қолдинг. Сенга аталган хўрот ҳали курк товуқ тагидаги тухум ичида ётиби. Шунинг учун боримизни баҳам кўрамиз, – деб довдираб турган меҳмонни сўрига таклиф қилди. Фима сув устига курилган сўрига хавотир билан қараб кўйиб, ўрнидан жилмади.

– Фима, меҳмонни тўйдирив, кейин сувга итариб юборадиган маразлар бошқа жойда яшайди, – деди Ахтам унинг хавотирини фаҳмлаб. Кейин чойхоначими чакириб, дастурхон устидагиларни бу сўрига олдиртириди. Шундан кейин ҳам Фима ҳатто нонга кўл урмади, чой кўйиб узатилган пиёлани олмади. Тарзан кўрингач, кутилган кувончига етишгандай бир қимиirlади.

– Мана, пулинг эсон-омон етиб келди, Фима. Ҳали нима деятувдинг? Қанча қўшишимиз кераклигини хисоблагандирсан-а?

Фима айтди. Йигитлар бир-бирлари билан кўз уриштириб олдилар.

– Фима, ҳозир мени бозорга олиб бориб сотсанг ҳам бирор шунча пул бермайди. Сўраганингни кўнга тикиб балки бир кўл таплармиз? – деди Ахтам, но-чорликдан азият чекаётган одам каби иягини қашиган бўлиб.

– Ўйнамайман. Мен самолётга улгуришим керак, – деди Фима бир пул ўрамига, бир унга хавотир билан қараб.

– Самолётинг сенсиз учмайди, хотиржам бўл. Биз Бек акамизнинг талабларини ерда қолдира олмаймиз. Ҳозир сени аэропортга кузатамиз.

– Қолган пул-чи?

– Қолган пулни Тарзанникига кириб оламиз. Бунинг отаси бой. Ундан қарз ола турамиз. Ҳозир бориб Бек акамиздан пул сўрасак уят бўлади. Кетдик, Фима, энди пулингни ўзинг кўтар. Чап кўкрагингга босиб олсанг, юрагингга дармон оқиб киради. Шу пулнинг куввати билан яна юз йил яшайсан.

Тарзан шеригининг бир шумликни ўйлаганини сезди-ю, гап қўшмай, унга сўзсиз эргашди. Фиманинг улар билан бирга юришдан ўзга чораси йўқ эди.

Ахтам: «машинада ўтириб туринглар, мен чойхончи билан ҳисоб-китоб килиб қўяй», деб қаҳвахона ичкарисига кирди-да, «Зўр»га қўнғироқ килиб, тезлик билан етиб борадиган жойини тайинлади. Кўчага чиқиб, машинага яқинлашганда орқа ўриндикда ўтирган Алёшкага кўзи тушиб, кадрдонини кўргандай жилмайди:

– Алёшка, азизим! Нега бу ерда ўтирибсан, тушсанг бўларди, бир отамлашардик. Чопқиллаб юриб кетдингми? Қадам ташлашинг қалай, ўрдакка ўхшаб лапангламаяпсанми? Фима билан бирга келганинг яхши бўлибди, буни ёлғиз қўйиш ҳечам мумкинмас.

Алёшка бу гапларни эшитмаётган соков одам каби безрайиб ўтираверди. Ахтамга унинг бу қилифи ёқмаган бўлса ҳам, индамади. Ҳайдовчига «сен шу ерда қол, пастга тушиб, дастурхонга қараб тур, бирор тегмасин», деб тайинлади. Ҳайдовчи йигит бу топшириқни жиддий буйруқ сифатида қабул қилиб, чойхона томон юрди. Ахтам рулда, ёнида Тарзан, орқада Фима билан Алёшка биргалашиб йўлга тушдилар.

Машина шаҳарнинг шимол томонига қараб бурилгач, Тарзан шеригининг мақсадини англади.

– Тарзан, адангнинг пули кўп, амали ҳам зўр, янги ййни шаҳар марказига курса ҳам бўларди, – деди Ахтам атайин русча гапириб.

– Бу ёқларнинг ҳавоси тоза, – деди Тарзан.

– Гапинг тўғри, Фима амакингни баҳонада тоза ҳавога тўйдирап экансан-да. Фимани аданг билан таништириб кўй. Иккалаларининг ёшлари тенг бўлса кепрак, бунақаларнинг дунёкараши ҳам бир бўлади, гаплашишса, тез тил топишиб кетишади. Сибирдан ёғоч олиб келиб сотмоқчимиidi? Ана, Фима билан келиш-

син. Фима, бунинг отасига қўшилиб, кооператив тузмайсанми?

Ахтам шундай деб пешкўзгу орқали Фимага каради. Атрофга аланг-жаланг боқаётган Фима унга жавоб бермади.

– Фима, қўй энди, хафаликни йиғиштириш. Аҳмоклигимизни бўйнимизга олдик. Сен кетганингдан кейин Бек акамиз бизни роса тузлайдилар. Сендан бир илтимосим бор: аэропортга борганимизда Бек акамга қўнғироқ килиб, «шу аҳмокларни мен кечирдим, сен ҳам бир сафар кечир», деб қўймасанг, теримизни шилиб, ичига сомон тиқади. Бизга раҳминг келмайдими, Фима?

Кўксига босиб ўтирган пул ўрами юрагига далда бердими, хавотирни унутиб, бағрини куйдира бошлигтан ғазабини юзага қўполлик билан чиқарганини ўзи ҳам сезмай қолди:

– Сенга шайтоннинг раҳми келсин! – деб юборди-ю, «инدامай ўтирганим маъкул эди, валдираса валдиравермайдими» деган фикрда ўзига-ўзи танбех берди. Бир донишманд «айтган сўзим – хожам, айтмаганим қулим», деган экан. Фима яшайдиган олам бу каби ҳикматларни билмайди, уларнинг ҳукми бошка: «Айтган гапинг учун жавоб бер!» Шу гапни айтсайтмаса тақдири ўзгармасди. Тинмай валдираётган йигит уни «доносан!» деб мақтаса-да, ўлим чангалидан кутулиб қололмаслигини ҳозир эмас, кейинрок англади.

Ахтам эса унинг қўполлигини малол олмади, аввалги пичинг аралаш кувноқлигини давом эттириди:

– Яхши тилак айтдинг, – деди. Кейин ишонч билан қўшиб қўйди: – Шайтон менга ҳамиша яхшилик килиб келган. Мен шайтонга опичиб, баҳтини топадиган одамман. Келажакда мени жаннат парилари кутиб турибди.

Фима бу гапга жавобан: «Сени дўзах кутиб турибди», – деб тўнғиллагач, Ахтам хаҳолаб кулди:

— Унда яна ҳам зўр экан: агар нариги дунёда дўзах кутаётган бўлса, бу дунёда мазза килиб яшаб олишим керак.

Кенг йўлда бораётган машина бир-икки силкингач, Ахтам четга олиб, тўхтади.

— Нима бўлди? — деб сўради Фима.

— Бензин келмаяпти шекилли, хавотирланма, Фима, машина янги, балки карбюраторга бирон нима тиқилиб қолгандир. Очиб, бир пуфланса, тойчоқдек иргишилаб, чопиб кетади.

Ахтам шундай деб машинадан тушди. Тарзан ҳам тушмокчи эди, Алёшка уни елкасидан маҳкам тутди.

— Сен жойингда ўтириш, — деб буюорди Фима қатъий оҳангда.

— Асабинг чатоқ-ку? — деди Тарзан кулиб. Сўнг орқага ўгирилди: — Алёшка, кўлингни ол, елкамнинг китиги бор-а...

Ахтам олд қопқоқни очиб, ниманидир титкилагач, «Тарзан, калитни бура», деб буюорди. Калит буралди, мотор ўт олмади. Ахтам чап томондан юриб орқага ўтди-да, юхонани очди. Ниманидир кидирди. Кейин бирдан Алёшка ўтирган томонда пайдо бўлиб, эшикни шарт очди-ю, Алёшканинг жағига зарб билан тепди. Бақувват йигитнинг хушидан кетишига шу кутилмаган тепкининг ўзи кифоя қилди.

— Фима, соқчини ўзгартир, демаганмидим, ана, бир қоп ахлатга айланиб колди, — деди Ахтам эшикни асабий равишда қарсиллатиб ёпиб.

Фиманинг жонида жон қолмади. Кеча Асадбек билан учрашганида анча хотиржам тортган эди. Бироқ, Асадбекнинг бугунги карорига тушунмади. Анхор бўйида турганида юраги хатарни сезиб бир қалқиган эди. Асадбек тақдирини яна шу йигитларга топширганда бежиз хавотирланмаган экан. «Гирром ўйин бўлди», деб кўнглидан ўтказди. Бу йигитлардан ёмонлик кутган эди, аммо сокчисининг бу кадар латталигига чидай олмади. Нима килсин, айб ўзида.

Бу йигитлар Барнаулда тузлаб кетишигандан кейин сокчиларининг думларини тушиб юбориши шарт эди. Лекин уларни алмаштиришга фурсати бўлмади. Яхши соқчилар дўконда қоплаб сотилса экан-ки, бориб танлаб олса! Ҳақиқат шуки, танлаш имкони бўлганида ҳам Фима энг арzonини оларди. Жони эмас, пулини азиз кўрувчи одамнинг тақдирига ўзидан бошқа хеч ким ачинмайди.

Тарзан тезлик билан оркага ўтди. Бир томонини ҳушсиз сокчиси, иккинчи томонини Тарзан эгалламаган тақдирда ҳам Фима қочишга уринмасди. Бу аҳволда қочиб қаерга борарди. Пул дардиди бу ёққа келиб хато килганини англаб, афсусланишдан ўзга чораси йўқ эди унинг. Ахтам эса қопқокни ёпиб, жойига хотиржам равишда ўтириди-да, калитни буради. Машина, ўзи айтганидай, тойчок каби югуриб кетди, бояги силкинишидан асар ҳам колмади. Машина силкинмасди, бироқ, Фимани сирли қўрқув титрата бошлаган эди.

– «Ўқилон»ни ҳалол деб эшишган эдим, – деди Фима, пул тахламини бағрига янада қаттиқрок босиб.

Унинг гапи ғалат эди: адолатсиз оламда кандай ҳалолликни талаб киляпти?

Ахтам адолат, ҳалоллик хусусида фалсафий фикр юритиш фазилатидан маҳрум бўлгани учун ўз оҳангода давом этди:

– «Ўқилон» ҳалол одам, ҳамма бало Мурдада!

– «Мурданг» ким?

– Менман-да, – Ахтам оркага ўгирилиб Фимага қараб олди: – Нима, ўҳшамайманми?

– Мени Асадбекнинг олдига олиб бор, энди бошқача гаплашаман.

– Асадбек билан гаплаша олмайсан, у Барнаулга учеб кетди. Сени ўзи тантана билан кутиб олади. Йўлда юрагинг ёрилиб ўлиб колсанг, тобутга ўз кўли билан кўяди.

Ахтам манзилга етгунича Фиманинг жигига те-

гадиган телба-тескари гапларни айтиб, бир кулиб, бир сўкиниб борди. «Нима десам экан?» деб ўйлаб турмок, «бу сўзни нимага айтдим?» деб надомат қилгандан яхшироқдир», деган ҳикматдан бехабар одамдан маънили гап кутишнинг ўзи нодонлик эмасми?

«Зўр» яна икки йигит билан уларни ташландик бино олдида қаршилади. Пойманаси тўлганини сезган Фима «машинадан тушмайман», деб суюнчиқка ёпишиб олди. Уни судраб тушириш, хириллаб ётган соқчини эса юхонага ташлаш «Зўр» билан йигитларга унча малол келмади. Фиманинг қўлини қайираётганда «Зўр»нинг йўтали тутди.

— Яхшилаб йўтал, сенинг микробларинг шу амакингга табаррук, — деди Ахтам. — Сил юқтиргани атай сени излаб келибди.

Бу гапни эшитган заҳоти жон талвасасидаги Фима афтини бужмайтириб, бошини бурди. Ҳадемай ўладиган одамнинг силдан ирганиши Тарзанга кулгили туюлди. Лекин ҳозир кулиб, масхара килишнинг ўрни ҳам, пайти ҳам эмасди. «Зўр»ни кўргандаёк ғаши келган эди, йўтал бошлангач, ундан узоклашиш мақсадида ертўла томон шошилди.

Ботаётган куёш нурлари ертўла дарчасидан тушиб тургани билан, ёритишга ожиз эди. Фира-ширада Жамолбекнинг юзи ўликники каби оқариб кўринди. Бу ерга банди қилинганидан бери бир бурда нон-у, бир пиёла сув билан тирикчилик қилаётган одамнинг силласи куриб, қимирлашга мажоли қолмаган эди.

— Чала Бек акажоним, зерикмай ўтирибсизми? — деди Ахтам меҳрибонлик никобидаги киноя оҳангига. — Улфатчиликка кўзингиз учиб турган экан, Фима ошнантгиз ҳам келдилар.

Фимани судраб келган «Зўр» уни Жамолбек ётган томонга караб итариб юборди. Кўркув туфайли оёғида жон қолмаган Фима Жамолбекнинг устига йиқилди. Бусиз ҳам азобланиб ўтирган Жамолбек дод деб юборди.

- Ана, жамоа жам бўлди. Энди хисоб-китоб қилсак ҳам бўлади. Чала Бек, Худога ишонармишсанми?
- Ишонаман, – деди Жамолбек йиғламсираб.
- Ишонганинг яхши. Мен ҳам ҳозир ишониб колдим. Агар Худо бўлмаганида сен бу ерда сасиб ўлардинг, ошинанг ўзининг ертўласида каламушларга ем бўларди. Ғалати вокеани эшитувдим: бир фоҳиша сафарга чиққан экан. Денгизнинг ўртасига борганда кема тешилиб чўка бошлабди. Бечора фоҳиша оҳ-воҳ килиб, «Эй Худо, бузукларни ёмон кўришингни биламан, битта менинг касримга шунча яхши одам ўлиб кетиши инсофданми?» дебди. Шунда унга: «Ташвишланма, мен бу кемага сенга ўхшаганларни тўплаганман», деган экан. Худога раҳмат деб қўйларинг, ёлғизликда ўлиш ёмон... Барнаулдан қайтиб келганимдан кейин сени қўйиб юбормокчи эдим. Бир қилиғингни эшитиб, аҳдимдан кайтдим. Фима, мен сени ўлдириш учун атай Барнаулга бормокчи эдим, ўз оёғинг билан юриб келиб, оворагарчиликдан куткардинг.
- Худонинг иши шунака бўлади, – деди Тарзан шеригини кувватлаб. – Худонинг иши шунака, ургиси келган одамларни тўплаб-тўплаб, биздакаларга рўпара қиласи. Худо хоҳламаса, биз бирорни чертишдан ҳам кўрқамиз.
- Шу пайтгача одамларни қийнаб роҳатланардим-у, лекин ўлдирмовдим. – деди Ахтам. – Жон суғуриб олишнинг ҳузури канака бўлишини билмайман. Тарзан, биттасини танла, сенам мазза қилгин.
- Қиморда ҳар канака найранглар бўлади, лекин бунақа ишлар учун ўлдирилмайди, – деди Фима қаддини ростлаб.
- Сенинг конунинг шунақами? Яхши, қонунингга бўйсунамиз, – деди Тарзан. – Болаларни ким қандай ютиказди, ким қандай ютиб олди – ишимиз йўқ, қимор тўғрисида гаплашиб ҳам ўтирмаймиз. Сенлар ҳайвонликларинг учун ўласанлар.
- Ҳайвонларни хафа қилма, Тарзан. Ҳайвонларни

бунақа хайвонлик қилганини қаерда кўргансан? Сен менинг битта саволимга жавоб бер: одам маймундан пайдо бўлганми ё одамни Худо яратганми? Агар маймундан, десанг, бу иккала маразни кўрган маймунларнинг худосидан балога қоласан. Агар ўзимизнинг Худо яратган десанг, худойингдан сўраб кўр: бу падарлаънатларни яратиши шартмиди? Шу иккаласининг дунёни булғаб юриши шарт бўлса, шайтонни нима қиласди яратиб?

– Бу Чала Бекинг нима қилганини билмайман, менинг гуноҳим нима? Ҳақимни талаб қилганимми? – деди Фима жонхолатда.

– Сенинг ҳеч кимда ҳақинг йўқ, – деди Тарзан. – Аммо болаларнинг сенда ҳаки бор. Айниқса... кизчаларнинг...

– Уйингда кизчаларнинг жавдирашига қараб кўркишаётганини сезишга сездим-у, бу ахмок каллам чукурроқ ўйлаб кўрмабди.

Жамолбек ҳам, Фима ҳам сирлари фош бўлганини билиб, бу гуноҳ учун ўлимлари мукаррар эканини англаб, кўркув даҳшати исканжасида бир неча нафас жим қолишиди. Ҳукмни индамай эшлитиб, мутелик билан ўлиб кетишини иккови ҳам истамас эди. Жамолбек эътиroz билдиришга, ўзини оқлашга куч топа олмади. «Чикмаган жондан умид», деганларидаи, Фима титрок овозда ўзини оқламоқчи бўлди:

– Сен туҳмат қиляпсан... аввал исботла... Болаларнинг гапига ишониб, мени ўлдирмокчимисан?

Унинг бу гапи чўкаётган одамнинг жон саклаш умидида хаста тирмашишини эслатарди.

– Мен исбот қилиб ўтирумайман, – деди Ахтам. – Кўмирни ок, сутни кора десам, исбот талаб килсанг ярашарди. Кизчаларни олиб ётганингда бу роҳатларинг бурнингдан конли булок бўлиб отилиб чиқишини ўйламагандинг, а?

Агар Фима болаларни оч қолдириб, ё бошқача қийнаб ўлдириб юборганида Ахтам тишини тишига

кўйиб, бу аблахларнинг қорнини чавақлаб ташлашдан эҳтимол ўзини тия олган бўларди. Лекин етимликнинг турфа хорликларини кўриб ўсган бу одам етим қизларнинг, гарчи улар бегона бўлсаларда, хорланишларини кечириши мумкин эмасди. Дунё қонунлари адолатли кўрингани билан жабрланувчи учун аксинча туюлади. Гўдакларга тегиниш дунёвий қонун билан ҳам жазоланади – жиноят кўламига караб неча йилдир қамоққа ҳукм қилинади. Лекин бу ҳукм жабрдийдаларнинг қалб яраларига малҳам бўлиб даволай олмайди-ку? Ахтам ўғрилар оламига кириб, ҳали ўз ўрнини топмаган, етарли обрўга эришмаган эди. Юкори мартабанинг «козирли фраер» деб аталувчи дастлабки босқичидан ўтган эди, холос. Шундай бўлса-да, ўғрилар қонунига сўзсиз амал қилишни ҳам одат қилганди. Ўғрилар оламининг мутлак қонунига кўра, ҳатто балогат ёшидан ўтган қизларни зўрлаш ҳам жиноят ҳисобланиб, оғир жазога муносиб кўриларди. Ахтамнинг муросасиз қарорга келишига иккинчи сабаб айнан шу эди.

Тарзанга хорланган етимларнинг аччик қисмати бегона бўлса-да, ўғрилар қонунига амал қилмаса-да, унинг ҳукми ҳам шеригиники каби муросасиз, дунёвий маҳкамада жаранлагандай, «ҳукм қатъий, шикоятга ўрин йўқ» эди!

– Сен болаларнинг гапини тўғри тушуунмабсан. Бир-икки марта чирок ўчиб қолиб, қизчалар коронғида кўркишганда хонамга олиб кирган эдим. Экспертиза килдириб кўр, уларга тегмаганман. Қизларимни ўзимни боламдай авайлаганман, – деди Фима, кейин йиғламсираб қўшиб кўйди: – донишмандлар «ҳеч қандай яхшилик жазосиз қолмайди», деб тўғри айтишган экан.

– Тушингни сувга айт, Фима! Мен экспертиза килдирадиган аҳмоқ эмасман. Қизчаларнинг кўркиб жавдираб карашларининг ўзи мингта экспертизанинг

ўрнини босади. «Боламдай авайлаганман», дедингми? Қайси болангни айтапсан? Пуштингда куйиб, туғилмаган болангними?

- Агар пулдан воз кечсам ишонасанми?
- Қани пул?
- Пул... машинанды.
- Менинг машинамдами?
- Ҳа...
- Менинг машинамда бўлса, демак, пул менини экан, воз кечишинг шарт эмас. Келишмоқчи бўлсанг, костюмингни еч.
- Нега?
- Нега бўларди? Гуноҳингни шу костюмингга сотмоқчиман.
- Мени масхара килмоқчимисан?
- Бир оёғинг гўрнинг ичиди турибди-ку, сени масхара киладиган жинниманми мен? Еч дегандан кейин индамай ечаверсанг-чи, галварс! Ё манави сил ачомлаб-ачомлаб ечинтирсинми?

Бу гапдан кейин Фима титраб-қақшаб, пиджагини ечиб Ахтамга узатди.

- Ҳужжатларинг, калитларинг шу чўнтакдами? – деб сўради Ахтам пиджакни олмай.
- Қанака ҳужжат, қанака калит?
- Паспортни айтапман. Уйингнинг калитини ташлаб келмагандирсан?

Бир тийин устида юз юмалайдиган одам уй калитини энг яқин одамига ҳам ишониши мумкин эмасди. Бирон дарахтнинг тагига кўмиб яшириши ҳам эҳтимолдан узоқ эди.

- Чўнтағимда, – деди Фима иложсиз бир ўқинч билан.
- Олиб кўрсат, – деб буюрди Ахтам.
- Фима титроқ бармоклари билан аввал паспортни, кейин калитни олиб кўрсатди.
- Темир сандиқнинг калитини қаерга яширгансан?
- Қанака темир сандиқ?

- Остап Бендер деган қариндошинг айтган-ку, эсингдами: «пул сақланадиган сандик».
 - Менда сандик ҳам, пул ҳам йўқ. Сенлар келмасларингдан олдин Туладаги ўйинда катта тушган эдим. Уйим ҳам гаровда.
 - Ўйинг гаровда бўлса, ўлсанг, у ерда ўлигинга ҳам жой беришмайди. Шунинг учун шу ерда ўла қол, янги костюм кийдириб кўмдираман.
- Ахтам шундай деб чўнтағидан рўмолча чикардида, Фима узатиб турган пиджакни рўмолчаси билан ушлаб, «Зўр»га узатди. Бу эҳтиёткорлиги сабабини англаған «Зўр» ҳам пиджакка бармоғини тегизмай, рўмолча билан ушлади.
- Шимни ҳам еч, Фима. Ювилиб, дазмол қилинавериб шимингнинг жонида жон қолмабди.
- Фима янада титраб-қақшаб буйрукни бажарди. Бу сафар ҳам Ахтам шимга қўлини узатмади, имлаб кўйган эди, «Зўр» аввалгидай эҳтиёткорлик билан олди.
- Чала Бек, сен нега курбакага ўхшаб бақрайиб ўтирибсан, тур ўрнингдан, ечин! – деди Ахтам.
 - Мен нима гуноҳ қилдим?
 - Ҳалиям тушунмадингми? Ё сенам ошнангга ўхшаб кизчаларни болангдай кўрганмисан?
 - Мен бола-чақали одамман, Худодан кўркаман...
 - Бола-чақалисан, лекин одам эмассан. Худодан ҳам кўрқмайсан. Болаларни савдога қўйиб, бу мараз билан талашаётганингда «кизчалар шикалатдай-а!» деб нархини оширмаганмисан? Татиб кўрмаган бўлсанг, «шикалатдай»лигини гўрдан билармидинг?
- Ахтам тахминан айтган бу гап кўзни юмиб отилган ўқнинг аник нишонга етиб бориши каби бўлди. «Буларга ҳаммаси маълум экан-да», деган фикр хаёлини ёритиб ўтиб, талвасага тушганича тавба кила кетди. Яқингинада «Худога ишонаман» деган одамнинг тавбаси Раҳмон ва Роҳийм сифатли Раббисига қаратилмаган, балки умиди ўзи каби зулмкордан эди.

Ахтам йигитларга имлаб кўйган эди, улар икки тепки ва уч мушт ёрдамида нола чекаётган бадбахтни онадан туғилгандай ҳолатга келтириб кўйдилар. Кейин гал Фимага келди.

Ахтамнинг амрига кўра, икковини орқама-орка тиз чўқтириб, тизимча билан аввал кўлларини, сўнг бўйниларини боғлаб қапиштирилар. Кейин эса худди итни боғлагандай, занглаган қувурга боғлаб кўйдилар.

– Энди бу ёғи гардкам! – деди Ахтам ошиқ тепувчиларнинг лафзида. – Худога ишонсаларинг, гуноҳларинг бўлмаса, ўлмайсанлар. Уч кунда ўлмасаларинг кўйиб юбораман. Худо ўлдирмаса, мен ҳам ўлдирмайман.

Буларнинг иккови ҳам аҳмок эмас, марҳаматнинг охири барибир ўлим эканига, бу аҳволда уч кун эмас, уч соат ҳам чидаш мумкинмаслигига ақллари етиб турса-да, энди ялинмадилар. Қувватлари етмайдиган куч қархисида чорасизлик заҳрини ичишдан ўзга чоралари йўқ эди уларнинг. Кўзлари очик бўлса-да, ғафлат уйкусига берилган нодоннинг қалб фарёди билан уйғонишидан энди фойда бўлармикин? Ҳаётнинг лаззатини кимор ўйинидан қидириб яшаган Жамолбекка ҳам, Фимага ҳам «Одам қачон ютқизади?» деган савол берилса, «омад кетганда» ёки «лаллайиб анқайса», деб жавоб қайтаришлари аник. Ҳолбуки, бу саволнинг жавоби ўзгача: агар ҳаётни киморга ўхшатиш мумкин бўлса, бу ўйиндаги асосий ютқизик – ўлим. Ҳамма ўладими, демак, ҳамма ютқизикда! Аммо бу икки нодонга ютқизиқдан қутулиб колишнинг йўллари бордай туюлади. Ҳозир уларга азоб бераётган бу мағрур йигитларни ҳам шу ютқизик кутиб тургани хаёлларига келмайди. Озод инсон ўлаётганида ҳаёт қувончини йўқотади. Кул эса алamu дард ва азобларини... Булар озод эмасдилар, демак, йўқотишлари мумкин бўлган ҳаёт қувончлари йўқ эди. Улар зулмнинг кули эдилар, ўлиб, алamu дардлардан кутулардилар. Лекин уларнинг заиф онглари аксинча ўйларди: корин тўклиги,

маишатлар уларга ҳаёт қувончи бўлиб туюларди. Озод эмас, зулм қули эканини ўйлаб ҳам кўрмаган одам шу майшатли ҳаётдан ажраётганидан афсусла-нади, холос. Кечагина зулм саройида керилиб юрган бу икки гуноҳкор банда умид кулбаси ёниб кул бўлган икки ғариб сингари андух туфроғига корилиб қолавердилар.

Нимкоронғи ертўлага жам бўлган маҳкумлар ҳам, ҳукм чиқаргувчилар ҳам ўзларини «озод инсон», деб янглишардилар. Қамоқда ўтираслик, истаган пайтда еб-ичишлари, истаган пайтда майшат қилишлари, истаган одамини тепиб-янчишлари уларнинг назарларида озодлик эди. «Озодлик»нинг маъноси ўзгача эканини эса сира ўйлаб кўришмаган. Инсон учун энг улуғ дунёвий неъмат — унинг озод ва ҳурлиги экан, демак, озод инсоннинг баҳтсиз бўлмоғи мумкин эмас. Агар инсон «баҳтсизман», деб қайғу-ҳасратда ёнаяптими, демак, у озод эмас экан. У шубҳасиз ким ёки нима томонидан эзилган кимсадир.

Агар озодлик неъмат экан, озод инсон абллах бўла олмайди. Агар бир одам бошқалар олдида паст кетаётган ёки хушомад килаётган бўлса, демак, у озод эмас экан. Қамоқдан ташқарида юрган бўлса ҳам, у бир кулдир. У бўйинини қуллик сиртмоғига тутиб, бунинг эвазига бир товок овқат ёки бирон мансаб, ёки шунга ўхшаш бир нима ундиришмаган истайди. Ким озрок манфаатга эришибди, демак, озрок хушомад килибди. Зўрроқ хушомад билан эса каттароқ бойликка эришилади.

Озод одам ҳеч бир тўсиқсиз эгалик қилиш мумкин бўлган нарсага эгадир. Ҳеч бир тўсиқсиз нимага эгалик қилиш мумкин? Факат Ўз-ЎЗИГА! Агар одам ўз ўзига эгалик килмай, бошқаларга ҳам ҳукм ўтказмоқка жазм этар экан, демак, у озод эмасдир. У бошқаларга ҳокимлик қилишни истадими, демак, у ўз истаги — нафси қули экан!

Нафс инсонни ёмон нарсаларга буюради. Ин-

сон унга кулок солдими, тамом, нафс қулига айланади. Ҳақнинг қули эмас, нафсининг қули бўлади. Нимкоронғи ертўлада жамулжам бўлган нафс қулларининг бир томони ўзларини адолатсизлик қурбонлари, иккинчи томони эса адолат соҳиблари деб билардилар. Бугунми ё зартагами, Асадбек бу воеадан хабар топиб, ғазабланса-ю, чора кўрса, ҳозир ғолиблик нашидасини сураётганлар жазо онда ўзларини адолатсизлик қурбонлари сафига қўядилар. «У Уни ўлдирди, Сен Уни ўлдирдинг, Сени Мен ўлдирдим, Мени ким ўлдирап экан?» дейилгувчи ҳакиқат ҳам адолатмикин?

Ким билади, эҳтимол улар Қиёмат куни бир-бирларига рўпара келиб, даъволашарлар. Солих бандалар савобларининг ҳисобидан чиройли мукофотга эга чиқиб, кувонаётган лаҳзаларда булар «кимнинг гунохи оғиррок», деб тарозу талашаётган бўлармикинлар, валлохи аълам! Шуниси ҳакиқатга яқинрок. Чунки бундайлар дунёвий маҳкамага тортилгудай бўлсалар, жазодан кутулиб колиш, ёки енгилрок хукмга эришиш мақсадида шериклари устидан мағзава ағдраверадилар. Фоний дунё маҳкамасини чалғитишлари мумкинdir, лекин бокий дунёда...

«Ал-маъмуру маъзуурун» – буюрилган одам узрлидир, дейилганидай, Тарзан ҳам Ахтам бу онда ўзларини узрлилар қаторида кўрадилар. «Зулм денги зидаги тешик кайиқка ўтирган одамнинг қисмати не бўлар? Ҳар қанча эшкак эшмасин, ғарк бўлғусидир... Ўзинглар ҳам шундай кайиқда ўтирибсизлар», дегувчи акл эгасига учрасалар, бу ҳакиқатни тан олар эдиларми?

Йигитлардан бири кийимларни йиғишириб олгач, Ахтам шарт ўгирилиб, ташкарига чиқди-да, тўхтади. Изидан келаётган шу йигитга буюрди:

– Сен шу ерда коласан. Булар-ку қочмайди, лекин атрофга сергак бўлиб тур. Битта-яримта овсар довдираб келиб қолмасин. Бақириб жонингта тегишса,

пайпокларини ечиб, оғзига тикиб қўй. Эрталабга, нари борса, пешингача етар. Ўлганидан кейин ишингни килавер, – шундай деб Тарзанга қаради: – Каламушларга кўзинг тушмадими? Олдингги сафар каламушга ем килмоқчи эдинг. Ҳеч бўлмаса, ўлигини ейдиган қилгин. Милиса ис олса, суякларини томоша қилиб ўтираверади.

- Кислота куйиб куйдириб юборсак-чи?
- Милисани текин томошадан бебахра колдиранми? Майли, билганингни қил. Гўрсўхтага нимани тайёрлаб кўйдинг?
- Буни ўзинг пишитиб кўйгандирсан?
- Бек акам Барнаулга иззат-икром билан кузатиб кўйларинг дедиларми, бажармасак, йиғламоқдан бери бўлиб ранжийдиларми? Кеча келиб, бугун башарала-рига тик караб, сан-манга борсак, фирт аҳмок бўламиз. Фиманинг ўзи бу ерда колса ҳам, костюми иззат-икром билан уйига етиб боради.
- Алёшканг олиб борадими?
- Барнаулдан икки киши келган. Икки киши қайтиши керак. Биттаси Алёшкалигини билдинг.
- Мени бу ишга рўпара қилма, – деди Тарзан кескин оҳангда.
- Хафа бўлмагин-у, братишка, сен бунака ишни эплай олмайсан. Буни «Зўр» қотиради. Эшитяпсанми, – энди «Зўр»га қаради: – Костюмни гижимламай кўтар. Ҳозир Фиманинг ўрнига сен Алёшка билан жўнайсан. Уйининг эшигини калит билан очасан. Кўйлак-костюмини, туфлисини чиройли килиб қўясан. Худди ўзи келиб, ечингандай бўлсин.
- Алёшкангчи?
- Алёшка бир коп хамир. Бунака кўрқокларнинг иши осон: яхшилаб ишлов берсанг, сўраганларга хўжайини билан қайтиб келганини айтади. Бизга шу гувоҳлиги керак.
- Унга ишонма, – деди «Зўр».
- Бу ёғини хом ўйлабсан, – деди Тарзан пешона-

сини тириштириб. – Сен бу ерда «ишлов» берсанг, у ёқда терисини шилиб олиб ишлов берадиганлар ҳам бордир. Бир черткига чидамай, «гуллаб» қўяди.

– Гулласа-гуллар... Кўркма, унгача иш пишган бўлади.

– Агар у «гулласа», ўша куниёқ Бек акамизга хабар етиб келади. Хабарнинг ўзи бўлса майли-я...

– Хўп, нима дейсан? Фимадан кечирим сўраб, кўйиб юборайми?

– Бугун бўлмаса эртага Бек акамизга буларнинг қилиғини айтсак, ўзбошимчалигимиз учунномига бир-икки сўкиб кўйиб, кейин «ўлдириб тўғри килибсанлар», дейишлари аник. Лекин у томондан хабар келса, кечиришлари қийин.

– Мени кўрқитма.

– Гап кўркишда эмас. У ёқда Фимани тириклигига сарик чақага олишмаса ҳам, ўлдирилганини билишса, даъволари катта бўлади.

– Хе, даъвосига урай уларни!

Ахтам шундай деб аралашига бўралаб сўкина кетди. Унинг баъзи қиликлари, хусусан, шафқатсизлиги, кескинлиги, шарттакилиги Кесакполвонга ўхшарди, лекин окибатни салафига нисбатан камроқ ўйларди. Тарзан унинг режаси саёзлигини билиб тургани учун ҳам йўлдан қайтамокчи бўлаётганди. Ахтам сўкиниб бўлгач, ўз режасини баён қилди:

– Фима билан Алёшканинг паспортига иккита билет олиб «Зўр»инг билан бирга манавилардан биттасини юборамиз. Эшикни калит билан очиб киришади. Кейин уйни ағдар-тўнттар қилиб пулини қидиришади. Қанча топишса – ҳаммаси ўзларига. Барнаулдан тўғри Қора дengизга учиб, бир хафта дам олиб келишади. Ҳаммаси оппа-осон ҳал қилинади: Фима уйига эсон-омон етиб келган-у, кейин кимдир бостириб кириб, тинчитиб кетган. Из колдирмасаларинг бас. Ҳа, хозир пастга тушиб, бурнини конатларинг-да, рўмолчасига теккизиб олларинг. Уйига борганларинг-

да ташлаб кўясанлар. Милиса қизиқадими, шериклари кидирадими – бошларини котираверсин. Мухими – биз буларни иззат-икром билан кузатиб кўйганмиз.

– Хўп, мени кўндиридинг хисоб. Уларни кузатиб кўйганимизга аэропортдаги сержант бола гувоҳ бўлади. «Зўр»ни самолётгача олиб чиқиб кўяди.

Тарзан эътиroz билдириди:

– Сержантинг буни эплолмайди, юраги йўк бир кўркоқ, сўтак у.

– Юраги бўлмаса чўнтаги бордир? – деган гап билан Ахтам уни қайириб ташлади. – Одамга юрак эмас, чўнтак керак! Чўнтагини тўлдириб қўйгин, Барнаулга опичиб олиб боради. Бўпти, буларни мен кузатаман. Сен гўрсўхтани гумдон қилиб, ўрис мозорга кўмдириб кўй.

– Мозордан жой кидириб юрамизми? Ахлатхонадаги дайди итларга раҳминг келмайдими?

– Ўзинг биласан... пулни нима қиламиз? Йўқотиш керак, хосияти йўқка ўхшайди, бизларни ҳам гўрга тиқмасайди...

Тарзан унга караб, «ҳа, мард йигит, ўлимдан кўркмас эдинг-ку?» деган киноя билан узиб олмоқчи эди-ю, лекин тилини тия қолди.

– Пул болаларнинг ҳакига ўхшайди, ўшаларга бериш керак, – деди Ахтам, аниқ тўхтамга келиб.

– Камбағал бўлса ҳам онасининг димоги баланд эди, эсингдами? Нима деб берасан? Бир сўмингни ҳам олмаса керак?

– Ҳа, мен шунаقا аҳмоқман, «Фимани ўлдириб, пулни ундириб олдим», деб бераман-да, а?

– Жириллайверма. Таклифинг яхши. Балки... Шоди шилтанинг хотини эсингдами? Ўшани ишга соламиз.

– Нега?

– Болаларнинг онаси Шоди шилтанинг номини биларди. Унинг хотинини балки танир ёки отини эшитгандир. Пулни шу хотин олиб бориб беради: «Эрингиз ютган пулини бизникига яшириб кўйган экан», дейди.

— Хўп, у аҳмоқ хотин шодлигидан чапак чалиб пулни олади, «шунча пули бўла туриб эрим нега болаларни тикиб ютқизди?» деб ўйламайди, а?

— Ўйлайди, — деб хатосини тан олди Тарзан, лекин бўш келмай, давом этди: — «Эрим насияга ўйнаб, сизнинг эрингизга ютқизган экан, ўлимларидан олдин «тўлаб қўйларинг, қимордаги қарзи тўланмаса гўрда қийналаркан одам», деб васият қилганлар», деса ишонади.

Ахтам бир оз ўйланиб турди-да, кўл силтади:

— Нима қилсанг, ўзинг биласан, менинг бунаقا майда-чўйда ишларга тоқатим йўқ. Эртага Жамшид акага учрашиб, бир кунга жавоб оламиз. Мен ойимнинг қишлоғига бориб келаман, сен Шилтанинг хотинига учрашасан.

— Ойингнинг қишлоғида нима қиласан?

— Красноярга нима учун бордим? Ойимни олиб келишим керак-ку? Қишлоққа бориб, хилхоналарини аниқлайман, бувам билан тоға-ю холаларимни яна бир марта тузлайман. Аввал борганимда «сенлар тўйларинг», деб пул ташлаб келган эдим. Ўйлаб қарасам, бу ишим уларнинг аҳмоқ каллаларига таъсир этмаганга ўхшади. Борай-чи, энди қанақа кутиб олишаркин? Одамга ўхшаб кутиб олиб, ойимни кўмдиришса, индамайман, яна «оқ қилганман-кўк қилганман», деб турса, шўрини қуритаман, аяб ўтирумайман. — Ахтам шундай деб бир оз тин олди-да, кейин кутилмаганда сўради: — Айтмоқчи, аданг яхши-микин, кеч бўлса ҳам ҳозир бориб хабар олиб қўй. Агар мени таниганида бирга борардим, танимаганим учун «салом айтиб қўй», деб ҳам қўёлмайман. Майли, ёмон бўлса ҳам отанг бор, баҳтингга тузалиб кетсин.

Кейинги гаплар Тарзанни ажаблантириди-ю, лекин «нега бирдан адамни эслаб қолдинг?» деб сўрамади.

Сахрода адашиб, очлик ва ташналиқ балосига гирифтор одамнинг бахти бир қултумга боғлик бўлиб колганидай, Ахтамнинг ҳаёт қувончини қасос онлари бериши керак эди. Қалби темир сингари занглаб кетганмиди, орзу килган хузурни ҳис қилмади. Отасининг шўрини қуритиши, икки абллаҳни ўлим чоҳига ташлаб чиқиши саҳро ташналигини қондирмади. Уни кейинги ҳафталар ичи пул ёки шуҳрат қизиктирмай кўйган, ўз ҳаёлларининг қаландарига айланиб, сарсари кезади.

Тарзан билан хайрлашгач, анхор бўйига келди. Чойхоначи «меҳмонлар қайтишармикин?» деган гумонда дастурхонни йиғиштиргмаган эди. Ахтамнинг томогидан таом ўтмади, бир шиша пивони очишга очди-ю, ярмини ичиш билан кифояланди. Чойхоначани чакириб, сув устидаги сўрига кўрпа тўшаб бериши буюрди.

– Шийпонда ёта қолинг, ҳаво айниб турибди, – деди чойхоначи булутли осмонга хавотир билан караб олиб.

– Мабодо тош ёғиб қолса, уйғотарсан, – деди Ахтам пичинг билан.

У Асадбек даражасига етмаган бўлса ҳам «нега?» деган савол ўрнига «хўп»ни яхши кўтарди. Ўзини доно ҳисобламаса-да, ўзгаларнинг акл ўргатишлирини ёқтиримасди. Чойхоначи унинг одатини била туриб меҳрибонлик қилганидан афсусланганича амри ба-жарди. Ўринни қалин килиб тўшаб, дастурхонни йиғиштиргач, «яна бирон нарсани истаб қолармикин?» деган гумонда сўридан узоклашмади. Ахтам кийимини ечмаёқ ўрин устига чўзилди. Ёстиқни нари суриб, кўлларини болиш қилганича, булут парчаларининг фитнаси туфайли тилкалангандан осмонга тикилди: осмонни тилка-тилка қилишга азм этган яшинни зулмат дарҳол ютди-ю, дардли гулдирак билан замин-

ни титратди. Сўнг осмон йиғиси бошланди. Юзини ёмғир томчилари савалаши аввалига Ахтамга хуш ёқди. Кейин кўзларини чирт юмиб олди. Шийпонда жон сақлаётган чойхоначи жалада шалаббо бўлиб ётган Ахтамга яқинлашишни ҳам, шу ердан кузатиб тураверишни ҳам билмай иккиланди.

Ёмғир унга болалар уйини эслатди...

Аниқ ёдида – мактаб ёшига етган йили бир марҳаматли одам болалар уйига аллақанча ўйинчоклар совға қилди. Совғалар орасидаги велосипедни Ахтамга берди. Ҳатто «коравой бу ерга қайдан келиб колди?» деб бошини силаб, эркалаб ҳам қўйди. Шу пайтгача унга ҳеч ким, ҳеч нима совға қилмаган эди. Етимхонада ҳамма нарса ўртада, шахсий ўйинчок ўйқлигини билса ҳам Ахтам бу велосипедни ўз-ўзиники сифатида қабул килиб суюниб кетди. Аммо қувончи узоққа чўзилмади. Ёши каттарок бола велосипедни тортиб олиб, минди. Ахтам елкасига мушт урилганда индамади-ю, боланинг қувнаб, шодон қий-қириб велосипед учшига чидай олмади. Бола ундан велосипедни эмас, ягона шодлигини тортиб олган эди. Ҳеч қандай хуқуки бўлмаган заиф етимнинг кўлидан нима келарди? Кўпчилик йиғлаб-йиғлаб овунади.

Бу бола йиғласа ким овутади?

Ахтам ёши улғайгани сайин йиғини унутиб бораётган эди. Чорасизлиги туфайли йиғлаш ўрнига унда ўзини химоя қилиш, ўз хақини талаб этиш ҳисси уйғона бошлаганди. Бу ҳис жажжи қалбига қасос чўғини ташлади – велосипедли бола яқинлашганда рулни итариб юборди. Бола бошқарув мувозанатини ўйқотиб йикилди, ёшига ярашмаган ҳолда ариллаб йиғлай кетди.

Ахтам тортиб олинган шодлиги учун кичкина зулмкорни жазолаб, кўнгли роҳатланди – бу унинг биринчи қасоси эди. Бирок, кўнгил роҳати узоққа бормади, тарбиячи унинг ўзини жазолади. Аввал бетлари-

га урди, кейин ечинтириб, битта иштончада ҳовлига олиб чикиб қўйди. Кеч кириб колганди. Шимол кузи аёзли нафаси билан дов-дараҳтларни ҳам дилдиратиб қўйган чоқда иштончан бола титрай-титрай атрофга нажот билан бокар, аммо дод солиб ёрдамга чакирмас эди. Ёмғир ёға бошлади. Музтоғларни ошиб келган булут тўкаётган совук томчилар болани қақшатиб юборди. У ёруғ тушиб турган деразаларга нажот билан бокди. Қайси бир куни ўртоғини тарбиячи хотин ураётганида муштчалари билан ташланиб, уни ҳимоя қилган эди. Ҳозир ўша ўртоғининг бу ёкка чикмаса ҳам, деразадан караб қўйишини илинж билан кутди. Қараб қўймагач, алам қилганидан йиғлаб юборди.

Нажот бор эди, ҳамма болалар «Флюра ойи» деб эркаланадиган энага югуриб чиқиб, болани рўмолига ўраб кўтариб олди. «Йиғлама, кора кўз, йиғлама», деб овутди. Бола бир ҳафта иситмалади-ю, кейин тузалиб кетди. Лекин қалб яраси тузалмади.

Ҳозир илиқ томчилар савалаётган дамда ўша яра кўзғаб, рухини азоблади. Ҳарсангтош остида қолиб эзилгандай вужуди зириллади. Қаддини кўтариб, шийпонда турган чойхоначига кўзи тушди-да, «Ароқ олиб кел!» деб буюрди. Чойхоначи Ахтамнинг тушкун кайфиятини сезиб, «яна тортиб қолар», деган ўйда турфа ичкиликларни стол устига қўйиб, устини дастурхон билан ёпиб қўйган эди. Буйрукни эшитиб, ўша заҳоти қўлига шишани олди-ю, ёмғир остида бўкиб турган хожасига олиб боришни ҳам, уни бу ёкка чакиришни ҳам билмай, иккиланганича туриб қолди.

– Ҳой, анқов! Эшитмадингми? – деб бакирди Ахтам. Ҳозир чойхоначи кўзига деразадан қараб ҳам қўймаган бевафо ўртоғи бўлиб кўринди. Агар чойхоначи яна бир нафас имиллаганида эшитадиганини эшитарди. Бир қўлига сочиқ билан пиёлани, иккинчисига ароқни олиб, югурди. Сочиқни Ахтамнинг елкасига ташлаб, шишанинг копкоғини очди. Пиёлага кўймоқчи эди, Ахтам шишани тортиб олиб, кўтарди.

Унинг бунақа қилигини аввал кўрмаган чойхоначи анграйиб тураверди. Учинчи култумдан кейин Ахтам қалқиб кетди. Бир-икки йўталгач, шишани кўтариб, бошидан қўйди.

– Шийпонга ўтинг, сочиқни арокка хўллаб, баданингизни артиб қўяман, – деди чойхоначи меҳрибонлик билан. Бу оҳанг энди Ахтамга меҳрибон энагани эслатди.

– Артиб нима қиласан? – деди шаштидан сал тушиб.

– Шамоллашнинг олди олинади-да...

– Мен шамолламайман. Сибирнинг совуғини еб пишиб кетганман.

– Шийпонга юра қолинг...

Бирпасда шалаббо бўлиб, титрай бошлаган чойхоначига караб Ахтам кулди-да, ароқни узатди:

– Сен ипакдай нозик одамсан, ичвор, яна эртага бурнингни оқизиб, пикиллаб юрма. Ё баданингни артиб қўяйми?

Чойхоначи «йўғ-е, йўғ-е», деганича шишани олди-ю, аммо ичмади. Беихтиёр равишда ўрин-кўрпага қараб қўйди. Буни сезган Ахтам унинг елкасига енгил мушт уриб қўйди:

– Жудаям паст одамсан-да! Менга ачиняпсан, десам, дардинг кўрпаларингда экан. Дунё ўзи шунака – одам эмас, шу исқирт кўрпа азиз.

– Унақа деманг, кўрпа топиладиган матоҳ, одамдан азизроғи борми? – деб ўзини оқлади чойхоначи.

Ахтам ҳафсаласи пир бўлган киши кўринишида кўл силтаб қўйди-да, шийпон томон юрди, панага ўтиб яна икки култум ичди.

– Ичкарига кириб... кийимларингизни куритиб олинг.

– Кийимними?.. Уйга боргунимча ўзи куриб қолади. Бу ерда ўтирганимни ҳозир бирор кўрса, «жинни бўлиб қолибди», деб ўйлайди. Жиннилигимни уйимга бориб қила қолай.

Ахтам шундай деб юқорига караб юрди.

У бир кампирни кида ижарада туради. Икки-уч хонали уй сотиб олишга пули етса-да, бунга ҳаракат ҳам қилмасди. Тарзанинг «уй ол», деган гапларига кўл силтаб қўя қоларди. Уйланишни ҳатто ўйламаса, атрофида ота-онаси, ака-сингиллари бўлмаса, уйни нима қиласди? Ижарави кампир «шартнома тузайлик, ўлгунимча карайсан, ўлигимни кўмганингдан кейин шу уй сенга қолади», деганида ҳам «уйингиз ўзингизга сийлов, ўлсангиз энг чиройли тобутга солиб кўмдираман, худди маликалардай мазза қилиб ётасиз», деб ҳазиллашган эди.

Кийими шалаббо бўлиб кетган Ахтамни кутиб олган кампир шошиб қолди. Унинг кўзларидағи маъюсликни кўриб хавотирга ҳам тушди, лекин сабабини сўрамади. Ахтамнинг хонасига кириб жавонни очдида, кийимларни олиб каравот устига қўйди, кейин ҳаммомдан катта сочиқни олиб чиқди.

– Тез бўлақол, – деди шошириб. – баданингни ароқда артиб ташлайми?

– Баданимни ичидан артганман, – деди Ахтам кулимсираб.

– Нимадандир хафага ўхшайсан. Ритани чақирайми?

Кампир эрдан чиқкан набирасини Ахтамга таништириб, «ёқса уйлан, истасанг ўйнаш қилиб ол», деб очиқласига таклиф қилган эди. Рита бир-икки марта тунаб қолганидан кейин кампирда умид уйғона бошлаган, ҳозир Ахтамнинг тушкунлигидан фойдаланиб қолмоқчи эди. Ахтам «керакмас», дегандай бош чайқади.

– Унда кўнглинг нима истаяпти, айт, ёш йигитга сиқилиб юриш ярашмайди.

– Кўнглим нима исташини ўзим ҳам билмайман, – деди Ахтам ўйчанлик билан. Кейин хаёлини йиғиштириб олиб, жилмайди: – Йўқ, биламан,

кўнглим юмшоқ ўринда ётиб, мазза қилиб ухлашни истаяпти...

– Ёшлар ақлини еб қўйган, маза нимада эканини хам билишмайди.

Кампир шундай деб минғирлаганича хонаси-га чиқиб кетди. Ахтам ҳўл кийимларини ечиб, стул суюнчиғига ташлади-да, ўрнига ётди. Салқин таъсир қилиб, чойшабга ўраниб олди. Ичган озгина ароғи ёмғирнинг заҳрини кеса олмади, эти жунжикавергач, кўрпа орасига кирди. Кўрпада исиб кетиб, юраги беҳаловат ура бошлади... Тунни шу аҳволда, бесаранжом ўтказди. Кампир уйғонмай туриб, уйдан чиқди. Кечак Тарзанга «онамнинг қишлоғига бораман», деганда аҳди қатъий эмасди. Онасининг жасадини олиб келиб кўмиш учун, мозорини бориб кўриши шарт эди. Қишлоққа борганида «бобо», «тоға» аталмиш кимсаларни кўришни эса бир хоҳлаб, бир истамаётган эди. Хоҳлашининг сабаби – аввал учрашганида, гарчи илон каби уларни чаққиси келса-да, онаси арвоҳининг ҳурматини қилиб, ўзини тийган эди. Факат қўзойнакли илон сингари лабини шишириб, тилини ўйнатиб кўя колган, «шунинг ўзи уларни талвасага солади», деб ўйловди. Адашганини кейинроқ фаҳмлади-ю, «аламдан чиқадиган вакт ҳам келиб қолар», деган умидда мақсадини амалга оширишни галга солди. «Ота» аталмиш Дониёрнинг адабини бергач, навбат қишлоққа етди, деган тўхтамга келди. Бу сафар кариндошларига етарлича заҳрини соғандан сўнг, жасадни олиб келиб хилхонага қўйгач, мўлжалидаги юмушларнинг якунига етишига, тушларида қасосга даъват этаётган арвоҳнинг таъкибидан кутулишига ишонди.

Икки ҳил хис исканжасида отланиб, шу ҳолатда йўл юрди. «Ота» Дониёрнинг қисмати унинг учун аник, буларни тавбасига таянтириш йўлини билолмай гаранг эди. Баъзан уйғониб қолувчи «орадан ўтган вакт ичиди улар инсофга келиб қолгандир?» деган хайрли гумон йўлда яна қўзғолди: аввалги келгани-

да совук қаршилаб, совук гаплардан иборат ҳақорат тошларини отган бобоси бу сафар қучок очиб кутиб олса-чи? «Болажоним, қизимдан ёдгорлигим!» деб кўзларида ёш билан қучок очса-я?! «Бобожон, тогажонларим! Бу кунни мен салкам ўттиз йил кутдим», деб уларни бир-бир бағрига босадими? Дийдор Қиёматга қолмагани учун кувониб, кўзларига ёш оладими?

Бўлмаган гап!

Хаёлини яшин нури каби ёритган некбин орзу ўша заҳоти сўнди – қариндошларига инсоф кирганига ишонмади.

Кун тиккага келганда катта йўл четидаги чойхонада тўхтади. Ховуз бўйидаги тўртта мажнунтол соясига кўйилган сўридан жой олди. Шабада эсиб, қизиган машинада эзилган вужудига роҳат бахш этди. Мўйлаби сабза ура бошлаган ўсмир яқинлашиб, салом берди-да, дастурхон ёзиб, ўртага иккита нон кўйди.

– Чой қанакасидан бўлсин? – деб одоб билан сўради. «Фамил» деган жавобни эшитиб, яна сўради: – шўрва олиб келайми ё ошми?

– Шу иссиқда ош ўтадими, шўрва олиб кел.

Сал наридаги сўридан бир оила жой олганди. Калта оқ соқолли киши Ахтамни танигандай қараб-қараб кўйди-да, ўтирган еридан сўради:

– Мехмон, Тошкандан келаётганга ўхшайсиз, обҳаво қанака?

Қўқисдан берилган савол оддийгина бўлса-да, Ахтамни ажаблантирди.

– Кечқурун ёмғир куйиб ўтди. Эрталаб йўлга чиққанимда булут бор эди, чаласи қолган бўлса, балки ёгаётгандир. Нега қизиқиб қолдингиз?

– Набираларни ўйнатгани олиб кетаётувдим. Тошканда мошин кўп, аспал йўл кўп, қуёш қиздириб ташлайди, деб эшитувдим.

– Кўрқмай бораверинг, сиз боргунингизча қиздирмай туради, – деди Ахтам кулимсираб.

Қария унинг ҳазилини чин ўрнида қабул қилиб, яна соддалик билан сўради:

– Чиллада элликданам ошаркан, а? Қандай чидай-сизлар?

– Чидаймиз, – деди Ахтам ишонч билан. – Тошкентликлар иссиқ юз даражага боргандга қайнашади.

Қария ҳазилни англаб кулиб юборди-да, «ха, омон бўлинг», деб гапни бас қилди. Яна пича ўтиришгач, барчалари сояда турган икки машинага жойлашиб жўнаб кетишиди. Ахтам уларнинг изига soginч кўзларини тикиб қолди. Қаерда бўлмасин, овқатлангани кирганда оила жамланиб ўтирганини кўрса, юрагида ғалати хис уйғонади. Оила даврасининг нечоғли баҳт экани унга бегоналиги рост. Лекин дам-бадам юрак шундай нотаниш баҳтни қўмсайди...

Ҳозир ҳам шундай бўлди. Ярим коса шўрва ичиб, хақини тўлагач, яна йўлга тушди.

Икки соатдан кейин онасининг қишлоғига етиб борди.

Чанқамаган, очиқмаган бўлса ҳам, бурилишдаги чойхона ёнида тўхтади. Юз йиллик баҳайбат чинор паноҳида жойлашган чойхонада мудраб ўтирган икки қариядан бошқа ҳеч ким йўқ эди. Ахтам салом бериб, уларнинг яқинидаги сўрига омонат ўтирди. Чойхоначи «кўнгиллари нима истайди?» деб сўрамасданок бир чойнакда чой билан чети учган сопол пиёланинг сири кўчиб, кирланганга ўхшаб қолган эди. Шу сабабли Ахтам ирганиб, чойдан қуйиб ичмади.

Мудрок босиб, зерикib ўтирган қариялар ҳангоматалаб бўлишади. Айниқса, бегона одамни учратишса, гапга солгилари келаверади. Ҳозир ҳам шундай бўлди. Қариялардан бири тилининг тагига нос отиб, иккинчисига узатди. У носковоқни олиб, кўрпача устига ташлади-да, Ахтамга юzlаниб:

– Меҳмон ўғлим, йўл бўлсин? – деб сўради.

Чолларни гапга солиб, бобоси ҳақида у-бу нарсаларни сўраб олишни мўлжаллаб ўтирган Ахтам учун бу савол айни муддао бўлди.

– Йўлим шу ёққа тушувди, чой ичай, деб тўхтадим. Илгари ҳам бир-икки келувдим. Сангин бобо деган отахон билан танишувдим, бормилар ҳали? – деб кариянинг саволига савол билан жавоб беради.

– Ҳа-а... Сангинми?.. – Қария шундай деб Ахтамга тикилиб қаради: – У билан қанақасига танишиб колдингиз? Мухбир болалардан эмасмисиз?

– Шунака иш ҳам қилиб тураман, – деди Ахтам кулимсираб.

– Сангин комсомолда ишлаб юрганида уни мухбирлар тинмай макташарди, мактовнинг чаласи қолган экан-да?

– Худо уриб кўйган одамни ҳам мақтайверишадида, бу ғур мухбирлар, – деди нос отиб олган қария гўлдираб. Унинг бу гапи Ахтамни ажаблантирди:

– Худо уриб кўйган, дедингизми? Нима бўлди?

– Агар Худони танийдигон мухбир бўлсангиз, тўғрисини ёзинг, ўғлим, – деди иккинчи қария ўрнидан бир кўзғолиб олиб. – Авлиёнинг мозорини буздиргани учун пес бўлгани камлик қилган экан. Болалари ҳам куйдирди. Куйиб-куйиб ўлиб кетади ҳали.

– Бунисини билмабман, тушунтириброк айтинг.

– Битта кизи ўттиз йил олдин бир хайвонпеваванинг этагини тутиб қочворганийди, камалиб йўқ бўлиб кетди, деб эшигтанмиз. Яқинда кенжа ўғли билан қизини камаб кўйшибди.

– Нимага?

– Нафси ҳакалак отган-да! Ака-сингил бир вагон селитрни пуллаётганда қўлга тушиб қолибди. Агар отиб юборишмаса, икковиям анчага кетса керагов... Матқовул, эсингдами, «авлиёнинг мозорини бузма», деб Худонинг зорини қилганимизда «эски-лик саркитини йўқотмасам, онам хотиним бўлсин!» деб қасам ичувди. Онаси хотини бўлмади-ю, аммо-

лекигин қасамхўрни Худо боплаб урди. Энди додини кимга айтади, билмайман...

– Ҳадеб Сангинга осилаверма, ўз акли билан қилмаган, тепадан буюришган.

– Билмасанг гапирма, тепадагилар «зиёратгоҳнинг дарвозасига қулф ур», деб буюришган, у қизиғар, қулф топишга эриниб, буздириб ташлай қолди.

Бу янгилик Ахтамни яна аросат водийсига ҳайдади. Бобосига учрашиб нишини санчишни ҳам, «Худо уриб қўйибди-ку, шу ҳам кифоядир», деб изига қайтишни ҳам билмай иккиланди.

– Ҳа, меҳмон, ўйланиб қолдингиз? Бунака гапларни эшитмаганмидингиз? Олдин келганингизда сиз ҳам кифтини келтириб, бошдан-оёқ мақтаб ёзганмидингиз?

– Үзишга улгурмовдим, – деб Ахтам кулимсиради. – Худо бир асраган экан.

– Бу гапингиз ҳам тўғри, ёмонни мақтаган ҳам ёмон бўлади, бу иши Худога ёқмайди.

– Уттиз йил олдин кочиб кетган қизини айтдингиз, бу тарихни сал-пал эшитувдим. Қизлари камоқда ўлибди-ю, лекин... бир ўғли қолган экан-ку?

– Шуниси кулогимга чалинган-у, аммо-лекигин ўзини кўрмаганман.

– Шаҳарда менинг ҳам кулогимга чалинди, ўша ўғли онасининг жасадини олиб келиб шу қишлоққа кўммоқчи экан. Шунақаси ҳам бўладими?

– Бунақасини эшитмаганман. Жасади каерда экан?

– Қамоқда ўлган бўлса... балки Сибирдадир.

– Сибирда ётавермайдими? Безовта қилиши шарт эканми?

– Ақлли одамлар маслаҳат бергандир-да...

– Шунақа маслаҳат берган ақлли одамнинг кўп нарсага акли етмас экан. Агар ўғли онасининг жасадини олиб келиб кўмса-ю, кейин ўзи шу қишлоқда яшаб колса, бир нави – вақти-вақти билан мозоридан хабар олиб туради. Қишлоққа кўмиб қўйиб, ўзи кет-

в органидан нима фойда? Сангин қизини ўша вактда оқ килган, гўрига қарамайди.

— Оқ қилинган қизнинг ўлигини олиб келиб кўмишига қишлоқдагилар кўнмайди, демокчимисиз?

Кария ён томонига эгилиб, оғзидағи носни тупуриб ташлади-да, лабини кафтига артгач, сухбатга кўшилди:

— Отаси оқ қиладими ё кўк қиладими, қишлоқдагиларнинг нима ишлари бор? Ана мозор, хилхонасида жой кўп, кўмса кўмавермайдими? — шундай деб Ахтамга тикилди: — Менга қаранг меҳмон, қамоқда туғилган ўша бола ўзингиз эмасмисиз?

— Йўғ-е... — Ахтам ўнгайсизланди. — Нега унақа деяпсиз?

— Сангиннинг ўша қизига ўхшаб кетарканси. Айникса қошларингизнинг туташлиги ўхшаркан. Сухроб, ўша қиз эсингдами? Оти Рихсиямиди? Чап ёноғида холи бор эди.

— Холигача эсингда турибдими? Тоз-за сукланиб қараган экансан-да, а?

— Атай қарабманми? Ўғлим хуштор бўлганида, келин қиларман, деб қараганман-да. Аммо комсомолнинг қизи ўзига ўхшаган чиқди, бизларни менсимади, кочди-ю, кетди.

Ахтам карияларнинг эндиғи хотираларини эшитгиси келмай, шошилаётганини баҳона қилиб, ўрнидан турди. Бобосини кўргиси, «Ана, яна икки болангиз камалибди, уларни ҳам оқ қиласизми?» — деб сўрагиси келди.

Машинасини ариқ томонда тўхтатиб, тушиш ёки тушмаслик қарорига келолмай пича ўтириди. Ундаги ожиз меҳр шафқатсизлик зарбига кўпам дош беролмади. Машинасидан дадил тушди-да, дарвозанинг бир табақаси очиклиги сабабли ҳовлига тўғри кириб бораверди. Бобоси кетмонини елкага кўйиб, томорқадан чиқиб келаётган экан. Уни кўриб, аввалига танимади.

Кейин супадан анча берида тўхтаб қолди. Ахтам икки қўлини чўнтағига тиққанича унга яқинлашди.

«Ассалому алайкум, бобожон, соғ-омонмисиз?» дейилмади.

«Ваалайкум ассалом, кизгинамнинг ёлғиз ёдгори – жоним болам, хуш келибсан, соғина-соғина кўзларим тўрт бўлди-я!» деб алик олинмади.

Бобо ва набира кўз уриштириш мусобақаси ййнаёт-гандай бир-бирларига тикилиб туравердилар.

Ниҳоят бобо тилга кирди:

– Нега келдинг?

Бу совук муомаладан Ахтам оғринса-да, дарров жавоб бермади, сурбетларча караб тураверди. Чол бундан ғашланиб, энди ғазабли оҳангда сўради:

– Нега келдинг, деяпман?!

Бу хонадон аҳли, хусусан бобоси, тоғалари билан Ахтам орасида ҳурмат ва одобнинг белгили чегараси йўқ эди. Шу боис тўппа-тўғри сенсирашга ўтди:

– Агар ўлган бўлсанг, гўрингга тош-пош бостириб кўйами, деб келдим.

«Валади зино» аталгани билан ўз набирасига ҳукмрон эмаслигини Сангин чол билар, айни чокда унинг қаршисида тиланчи кўринишида ўтиришни истамасди. Набирасининг бу хунук гапидан сўнг юраги қалтирай бошлаган бўлса ҳам дардини сиртга чиқармади.

– Кет, кўзимга кўринма, ҳароми!

Дарғазаб кўринишида, ваҳшат билан айтмоқчи эди бу сўзларни, бироқ, курби етмади, лабларининг титраши ожизлигини ошкор қилиб қўйди. Ахтам бундан ҳузурланиб, у томон яна бир-икки қадам босди:

– Яна «ҳароми», дединг-а? Агар қизинг бир хунасани яхши кўриб қолиб, тукқан бўлса, менда нима айб? Дунёда алданган кизлар камми? Ҳаммаси оқ бўлганми? Қизингни оқ қилганинг учун Худо сенга нима берди? Олдин ҳам пеc эдингми ё қизингни оқ қилганингдан кейин бўлдингми?

— Сенсирама...

Ох, кани эди илгариғи күч-қуввати бўлса-ю, бу сурбетни кулочкашлаб бир уриб, бўғзигача ерга кирғизиб юборса. Билак кучи етмай қолса, милисага битта қўнғироғи кифоя эди.

Кани ўша куч, кани ўша мартаба? Узича қишлок осмонининг устуниман, деб керилиб юарди, энди билса, осмонга устуннинг ҳожати йўқ экан... Қариганида бир сурбетга қараб, «сенсирама» деб дўқ уришга ҳам ҳоли колмаган бўлса... бундан тубанроқ хорлик борми?

Ажид манзара: бирорининг гуноҳлар юкига бардош беролмаётган кемаси чўкиш арафасида турибди, бирори эса пўртанааларга парво қилмай, хаёт кемасига тўхтовсиз равишда гуноҳлар юкини ортятти... Янада ажабланарлиси шуки, қай бир кеманинг аввалрок чўкиши факат Худогагина маълум.

Бобосининг ғам сели олиб кетган қайғули юзига қараб роҳатланаётган Ахтам ғолиб кимса тахтини эгаллаб, қаҳ-қаҳ ургиси келарди.

— Мен сенсираб гаплашадиган жойда катта бўлганман. Тилим котиб қолган, — Ахтам энди бобосининг юзига лаънат тамғасини босаётгандай қилиб гапирди: — Сен мени олдин келганимда «валади зино» девдинг-а? Ўшанда ақлим етмаган эди. Бунинг нималигини кейин тушунириб беришди. Ҳозир «ҳароми» дедингми? Етимхонада ҳам мени «ҳароми» деб хорлашарди. Бунинг маъносига тушунмасам ҳам, ичим оғрирди. Кейин билсан, етимларнинг ярмидан кўпи ҳароми экан. Уч ёшлигимда мени онамдан тортиб олишган. Онам хайрлашаётганларида бир-иккита гапни айтганлари аник эсимда. Биттаси — «аданг билан никоҳимиз бор», деган. Ўшанда мен никоҳни ё ширин нарса, ё катта бойлик деб ўйлабман, шунинг учун бу гаплари эсимда қолган бўлса керак...

Ахтам кичикилигида шундай ўйлаб адашмаган эди.

Афсус шуки, никохнинг ширин ҳаёт асоси, энг катта бойлик эканини то ҳануз тушуниб етмади.

Кетмон дастасига суюниб қолган бобосига яна бир кадам яқинлашиб, кесатик оҳангидаги сўради:

– Балки ўзинг ҳам валади зинодирсан?

Ахтам бу саволи билан ўзи билмаган ҳолда ноизик жойдан тутди: Сангин валади зино эмас, бироқ, ўзи уйланаётганида хукумат идорасининг рўйхатидан ўтган-у, никоҳ ўқитишни истамаган эди. Ҳарбий хизматдан кайтиб келиб, комсомол йўлланмаси билан мактабда ишлаб юрганида ёш муаллимага кўнгил кўйди. Уларнинг аҳду-паймонидан кувонган мактаб аҳли, айниқса, комсомол идораси тўйни янгичасига қиласидиган бўлишди. Ота-боболаридан ўтиб келаётган удумлар ёкмай, «комсомол тўйи» дегани кўзларига жилвали кўринди. Никоҳ ўқитишмади, хукумат рўйхатидан ўтгач, яқинларини тўплаб, уйларида колхознинг ҳисобидан базм қилишди. Кўни-кўшнилари бурда нонга зор бўлиб яшаётган бир замонда базм қилишдан ўзларини тия олишмади. Келинни ёр-ёр айтиб олиб келишмади, ўт атрофида айлантиришмади, тортишмачок ҳам бўлмади... Бунинг ўрнига қадаҳ сўзлари айтилди. Келин ичмаса ҳам кўлига мусаллас тўлдирилган пиёлани ушлатиб қўйишиди. Куёвжўраси «кирқ кунгача оғзингга бир қултум ҳам арок олмайсан», деб огоҳлантиришига қарамай, қадаҳ сўзларидан илҳомланиб, барча билан баравар ичди. Эртасига куёв ошида ҳам жўралари билан тенгма-тенг ичиб, тўшакка ширакайф ҳолда кирди...

Буларнинг ҳаммаси гуноҳ эканини кейинроқ билди. «Валади зино» деб айблаётган набираси ҳозирги гали билан унинг шу оғриқ ярасини тилиб юборган эди. Агар никохсиз туғилган набираси валади зино бўлса, ўзининг барча болалари нима деб аталади?

– Оғзингга қараб гапир бола! – Бу гапни дўқ эмас, салкам ялиниш оҳангидаги айтди.

– Ҳа, нима, бўлиши мумкин эмасми? Биттаси ўғил

күрганини эшитиб, туғруқхонага бориб, хотинини чакирибди. Ҳаммага эшитиларли қилиб, «полвонтой ўғлим кимга ўхшайди?» деб керилиб турибди. «Сизга ўхшайди-да, дадаси» дейилишини кутган-да у лақма. Хотини тұғрисини айтиб қўя қолибди: «Вой, дадаси сиз у кишини танимайсиз»... Ўғил кўриб керилган ўша аҳмоқ сен эмасмидинг?

— Тур, жўна! Сен билан гаплашадиган гапим йўқ.

— Шошилма, ҳали менинг анча гапим бор. Кўрслигим ёқмаяптими? Мен ширин тилда гапира олмайман, дедим-ку? Аслида сен ўйлаганчалик тўнкамасман, атай шунақасига гаплашяпман. Агар туғилганимни эшитиб, мени уйингга олиб келиб тарбиялаганингда бунака бўлмасдим. Онам ҳам куйиб ўлиб кетмасди. Ёмон бўлишимга сен сабабчисан. Қамалишимга ҳам, қамоқдан чикиб беш-олтита одамни сўйиб ташлашимга ҳам сен сабабчисан.

«Беш олтита одам сўйиш»ни эшитиб чол бир чўчиб тушди. Ёлғон гапининг бунчалар таъсир қилганидан кўнгли тўлган Ахтам яна шу оҳангда давом этди:

— Қамоқдан чикқанимда лўли хотинга фол очи-рудим, «баҳтли яшашинг учун онангнинг қишлоғида ҳам уч-тўртта одамнинг конини оқизиб, худойи қилиб юборишинг керак, ҳар сўйганингда бир пиёлани қонга тўлдириб ичмасанг, онанг гўрида тик туради», деди. Лўлининг гапи – гап! Менинг кўрқадиган жойим йўқ. Баъзи нодонлар қамоққа тушишдан кўрқади. Қамоқхонада туғилган одам ҳам ўз уйидан кўркарканми? Ўша лўлидан «аввал тоғаларим билан холаларимни сўяйинми ё суюкли бобожонимними», деб сўровдим, «кичикларидан бошла», деб айтди. Яхши маслаҳат... Кўз олдингда болаларингни битта-битта сўяман... Ҳа, болаларингга ачинасанми? Ачинма. Ахир уларнинг отаси ким экани аниқ эмаску? Одам онасидан туғилганини аниқ билади. Отам деб юрганидан туғилганми ё бошқаданми, онаси билан Худо билади. Сенам шунақасан. Ўғилларинг-чи?

Ўзингга ўхшайдими? Балки сен комсомол айғирини миниб давр сурганингда, молбоқар дев хотинингни миниб, уйингни гуллатгандир?

Бу гапга чидаш қийин эди. Чол суюниб турган кетмонини даст кўтариб, набирасиға ҳамла қилди. Кетмонни кўтаришга улгурди, аммо, набирасининг бир тепкиси билан кетмонига қўшилиб ўзи ҳам учиб тушди. Шу пайтда уйидан югуриб чикқан ўғил отасиға ёрдамга шошилмай, Ахтамга ташланди. Лекин унинг мушти Ахтамга етиб келмади. Жағига тушган тепкидан сўнг отасининг ёнгинасидан жой олди.

Ахтам чўнтағидан буклама пичоқни чиқариб, тугмасини босган эди, тиф «ширқ» этиб очилиб, офтобда ярқираб кетди.

— Ҳозир икковингнинг киндингингни чатиштириб боғлаб қўяйми? Ё ичакларингни бошларингга салла килайми? — У росманасиға сўймоқчи бўлган одам шаштида улар томон қадам ташлади-ю, тўхтади: — Йўўқ... сўйсам ҳам ўзларингнинг пичоқларингда сўяман, бу пичоқни ҳаром қилмайман.

Бу пўписа чолга нисбатан ўғлига таъсир қилиб, у қўркувдан типирчилаб қолди. Ахтам кулиб, тифни жойига қайтарди-да, пичоқни чўнтақка солиб, улар томон тупурди:

— Лўлининг гапини қилмайман: сенларнинг қонингни аҳмок одам ичади. Аслида мен суюнчли хабарни эшишиб, сени табриклагани кирувдим. Қамалган ўғлинг билан қизингни ҳам энди оқ қиласанми? Улардан умидингни уз, тирик чиқишини кутма, мен қамоқдаги ошналаримни огохлантириб қўяман, болаларингнинг ўлигини ҳам кўрмайсан. Лекин мен онамнинг ўлигини олиб келиб, шу қишлоқقا кўмаман, тайёрланиб тур, ўз кўзинг билан кўрасан. Кейин ўлсанг, сенинг ҳам, менинг ҳам армоним қолмайди.

Бу шафқатсиз ҳукми билан уларни тириклайин гўрга тикқандан баттарроқ азобга гирифтор қилди.

Асадбек күнгилни эзадиган туш күрди:

...аввалига дарвозахонасида олов күринди. Кеин бир түп одам аскарлар каби сафга тизилиб кириб кела бошлаши. Қараса, барчалари ўлиб кетган қариндошлари, яқинлари. Күзлари бир нұктага қадалған... шийпонда ўтирган Асадбекка қараб хам күйишмайды. Ўліклар сафида отаси йўк... онаси йўк... ўғли йўк...

...улар кани?

Сўрайман, дейди-ю, овози чиқмайды. Кўчасига чиқиб қараса, икки томонига чукур ва узундан-узун хандаклар қазиб ташланганмиш. Уртада ёлғизоёқ йўл қолған. Асадбек кўлидаги чўлтоқ супурги билан йўлни тош-у кесаклардан тозалай бошлади. Шу онда оппок либосли, оппок дўлпили дадаси кўринди. Ажаб... хаётлигига хасса ушламас эди. Ҳозир мўйсафид кўринишида яқинлапиди-да:

– Ўғлим, сеникига кирмокчи эдим, йўл йўқ-ку? – деди афсусланиб.

– Ҳозир... ҳозир очаман йўлни, – деб янада тезроқ ҳаракат қилиб, тозалайверди. Шунда дадаси орқасига тисланмокчи бўлди.

– Орқага юрманг, юрманг, дада! – деб бакирди.
аммо...

вакт ўтган эди, дадаси ҳандакка қулади. Асадбек дод солиб ўзини чукурликка отди. Дадаси ҳандак тубидаги ботқокка чўкиб кетган эди. Асадбек жонҳолатда лойга қўл ботирди. Шунда ёнида Абдуҳамид пайдо бўлди: «мен кутқараман», деди-ю, бобосини ботқоқликдан тортиб олди.

Лекин...

вакт ўтган эди. Ота-бола биргалашиб жонсиз тана ни юкорига олишди.

Узоклардан онасининг хаста овози келди:

«Даданг ўлганлари йўқ, қара, киприклари пирпираялти»...

Дадасини кучмоқчи бўлиб эгилган эди... Унинг ўрнига... Суликонинг бобоси қад ростлаб турди...

«Дадам қанилар?! Қанилар дадам?!» деб дод солди ва...

ўз овозидан ўзи чўчиб, уйғониб кетди.

Ёнини караса, Манзура йўқ. Ташкаридан аzon чакириғи эшитилгач, қаддини кўтарди. Эзилган вужудини бошкариши қийин бўлса-да, дераза томон юрди. Манзура шийпонда жойнамоз устида ўтиради. Асадбек шу қарашида унинг келинлик чокларини, кимор ўйнаб қайтгандা, жойнамоз устида ўтирганларини эслади. Манзурунинг жойнамоз устидаги ҳозирги ҳолати бошқачароқ эди. Ҳар тонг шийпонда Фазлия билан намоз ўқиётган эди, кеча меҳмонлари уйларига кетишиди. Манзуруни тинмай эзаётган ёлғизлик азоби бу лаҳзада Асадбекка ҳам кўчди. «Шундай дабдабали саройда иккимизгина бўлсак-а?» деган ўй ҳозир кўрган нохуш туш таъсири билан қовушиб, юрагини увиштириди. «Енгил тортармикинман», деган ўйда ичкаридаги ҳовуз томонга ўтиб, ўзини сувга отди. «Сув – ёруғлик, сув қўнгил губорини ҳам кўтаради», дейдилар. Лекин бу ҳикмат ҳозир амал қилмади. Сувдан чиқиб, артинди-да, кийиниб, диванга чўзилди. Бу орада Манзура кириб салом бергач, «чойни шу ерга олиб келайми?» деб сўради. Кейин нима учундир эрининг пешонасига кафтини қўйди.

– Соппа-соғман, – деди Асадбек, бошини буриб.

– Илойим соғ бўлинг, – Манзура шундай деб чиқди. Саждага бosh кўйган онда у эрининг бақиришини эшитиб, чўчиб тушган, бироқ, намозни бузмаган эди. Эрининг тунлари алаҳсирашига кўнишиб қолаёзган бўлгани билан, барибир сиҳатидан хавотирланарди.

Хотини чиқиб кетгач, Асадбек яна кўрган туши таъсирига тушди. Суликонинг бобосини ҳеч тушида

кўрмас эди. Бугун ҳолати қизиқ бўлди-ку? Гуржистонда учрашганида у: «Ўғилларинг мен каби узоқ умр кўрсинлар, мен каби ҳалол яшасинлар, аммо фарзанд ҳажридан йирок бўлсинлар!» деб дуо қилган эди.

Ҳеч бир дуоси ижобат бўлмади...

Нега? Бошқа динда бўлгани учунми? Унда Муҳиддин отанинг дуолари-чи?

Асадбек билмайди, билолмайди...

Суликонинг бобоси «Қароргоҳларинг чўкишини билмайсанми?» – деб маломат қилган эди.

Қароргоҳи чўқажагини нега билмасин, билади. Фақат каерда, қачон чўкишигина унга номаълум холос... Қароргоҳи ўз-ўзидан чўқадими ё бирор чўқтирадими – буниси ҳам мавҳум.

Тушига кириб шуларни эслатмоқчи бўлдими?

Гуржи чолнинг бу маломатини ҳар эслаганида бу мавхумликларнинг чигал иларини ечмокчи бўлади-ю, аммо эплолмайди. Ўйлай-ўйлай тайнинли жавоб топа олмагач, «нима бўлса бўлар, бошга тушганни кўз кўрар», деб кўл силтаб кўя қолади. Ўғлининг ўлимидан кейин қароргоҳининг ҳалокати яқинлашгандай туюлди. Хотини билан қизини хорижга – Абдусамаднинг ёнига жўната олса эди, кўнгли анча тинчирди. Қароргоҳининг тақдиридан кўра она боланинг ўжарлиги уни кўп қийнаб кўйди. Азадор хотинини аядиган бўлиб колгани сабабли унга каттиқ гапиришдан тийиларди. Қизининг аҳволи ҳам маълум: унга салгина оғир гапириб юборса, кўнгил чинниси чил-чил синади...

Кеча Муҳиддин отани зиёрат қилиш баҳонасида дардини баён этмоқчи бўлди. Лекин «оиласми четга жўнатаман, балки кейинроқ ўзим ҳам кетарман», деган гапни айта олмади. Бир-икки мужмал гап билан чекланди. Муҳиддин ота Асадбекни ёмон дард қийнаётганини сезарди-ю, бошқа ташвишларидан беҳабар бўлгани учун бу дардни фақат фарзанд ҳажри билан боғларди. Кеча ҳам шу тўхтамга келиб, Асад-

бекнинг кўнглини кўтариш максадида бир ривоят айтиб берди. Мухиддин ота гап бошлаганида унинг юраги сиқилди, «кисқарок қилса-ю, туриб кета қолсан», деган ўйда кимирлаб ҳам қўйди. Кейин фикри ўзгариб, диккат билан тинглади:

– Қадим замонда ўтган улуғ донишманднинг хузурига одамлар келишиб, сухбати, панд-насиҳатидан баҳраманд бўлишар экан. Бир куни тўсатдан унинг ўғли ўлиб колибди. Таниш-нотаниш ҳамма бу воеадан кайғурибди, йиғлабди, – Мухиддин ота шундай деб Асадбекка маънодор қараб олди: – Бироқ, бу зот бир томчи ёш тўқмабди. Шунда аҳли аёли:

– Боламиз учун барча зор йиғлаб турса-ю, сиз нега йиғламайсиз, шунчалар бағритошмисиз? Қалбингиз шунчалар қотган бўлса, маҳшар куни инсонларга Аллоҳнинг изни ила меҳр-шафқат кўрсатиб, қандай шафоат қиласиз? – дебди.

Шунда у зот бундай жавоб қилибди:

– Эй ҳаётимнинг йўлдоши, йиғламаганимга мени марҳаматсиз, юраги тош қотган, деб ўйламагин. Менинг коғирларга ҳам раҳмим келади, уларга иймон насиб этсин, дея дуо қиласан. Кўппакларга, ҳатто мени тишлаган кўппакка ҳам ачинаман. «Ё Раббим, бу бечоранинг феълини ўзгартиргин, одамлардан калтак емасин, унга тош отишмасин», деб дуо қиласан.

Бу гап аёлига таъсир этмай, янада ўжарлик билан сўрабди:

– Қалбингиз шунчалар шафқат ва марҳаматга тўла экан, нега ўғлимиз учун йиғламаяпсиз?

– Инсон бир нарсани йўқотганда ёхуд ундан айрилганида йиғлайди, ранжийди. Фарзандларимиз ўлсин ёхуд тирик қолишин – улар кўнгил кўзидан йўқолмайдилар-ку?! Улар шундок кўз ўнгимда кезиб ўйнаб юрар экан, нега энди сенга ўхшаб йиғлайн, хафа бўлайн? Ўғлимиз бу замон даврасидан чиқди холос. У йўқолмади-ку? Атрофимизда айланиб юрибди, ахир! – Шайх шундай дегач, яна қўшиб кўйибди: –

Йиги ё аламдан келади, ё айрилиқдан. Ҳолбуки, мен севгандарим билан биргаман. Табиий, ўлган болам билан ҳам вуслатдаман. У билан югуриб юрибман. Одамлар уни тужида күрса, мен уйғоқ ҳолда, очиқравшан күряпман. Бу дунёда ўзимни яширганимда ҳам, борлик дарахтидан туйғу япроғини силкитганимда ҳам у билан биргаман.

Мухиддин ота ривоятни баён қилгач, пича сукут сақлади, кейин изоҳ берди:

– Бұтам, тушунгандирсиз-а, ривоятдаги шайх етукликка эришганлардан. Бундай одамлар нафсларини тарбиялаб, рухий-маънавий камолга еттанлар. Улар дунёвий, башарий, моддий оламнинг таъсиrlаридан кутулған зотлардир.

Асадбек кечгача Мухиддин отадан эшитганларининг таъсирида юрди. Балки шунинг учун ўғли тушига киргандир? Факат... сал бошқачароқ ҳолатда күринди, шундан күнгли хижил. У Мухиддин ота баён қилған донишманд шайх каби бўлолмайди, шуниси ҳам бор. Сабр булоғидан сув ичмай, касос гулханида ёнаётган одамдан яна нимани кутиш мумкин? Мухиддин ота «бўтамнинг ярасига малҳам бўлар», деган максадда бу ривоятни айтиб эди, шамолга қараб гапираётгани хаёлига ҳам келмаганди.

Манзура чой кўтариб кирганда ҳовлидан Жалилнинг овози эшитилди. У чойнакни хонтахта устига кўйиб, шошилиб қолди, лекин меҳмонга пешвоз чиқишига ҳам улгурмади, оstonага етмай тўхтади. Тўртта noni бор оқ белбоғ тугунча билан бир банка қаймок кўтарган Жалил кириб келгач, ўзини четга олиб, салом берди.

– Маҳалланинг noni билан каймоғини соғингандирсизлар, деб вактли келдим, – деди Жалил саломга алик олгач. Ошнаси билан кўришиб, манзират кутмай тўрга ўтиб ўтирди-да, хонадон ҳақига хайрли дуо килди. Манзура меҳмон келтирган неъматларни кўтариб, ташкарига чиқди.

– Кеча маҳалладаги оғайнилар билан ошхўрлик килувдим, сенга салом айтишди. Кечаси адамнинг уйларида мазза қилиб ётдим.

– Чакирсанг ўлармидинг, мен ҳам борардим, – деди Асадбек.

– Топилмайдиган матоҳдай бўлиб кетган бойваччани қаерлардан қидиришим керак?

– Кўнглингда бўлса, топардинг.

– Агар сенинг кўнглингда бўлса, ошналарим омонми, деб излаб борардинг.

– Айтмасанг ҳам бораман. Болларга самоворхонада ош қилиб беришни кўнглимга туғиб қўйганман.

– Ҳа, боллар сенинг ошинингга муҳтоҷ бўлишиб, тишлари такиллаб, оч-нахор ўтиришибди.

– Бўлди, сасима. Ҳаммаси тинч-омонми ишқилиб?

– Ҳа, ана энди ўзингга келдинг: ҳаммаси тинч. Думбули думбуллигича, алкаши алкашлигича юрибди. Алкашнинг кўнгли балиқ тусаб қолибди, «кейинги сафар баликхўрлик қилайлик», дейди. «Балиқка бошинг коронги бўлдими?» десам, «Балиқ ҳалқумни тозалар экан», дейди. «Ол-а, сенинг ҳалқумингни тозалаш учун бутун денгизлардаги балиқлар ҳам кифоя килмасов», дедим.

– Баъзан ҳазилни ҳам ошириб, тагига олдирворасан, а?

– Ҳазил эмас, чин гап бу. Эрта-индин элликка кирадиган аҳмоқ ичишни ташламаса, балиқ билан ҳалқумини тозалаб бўларканми? Тўлқининг нима дейди? Бир йиллик қовоқ кўрганмиш. Айвонидаги сандик оркасида битта қовоқ колиб кетган экан, кеча кўрибди. «Нима бўпти, мен эллик йиллик қовоқни кўрганман», дедим. «Қаерда кўргансан?» девди, «ана, елкангнинг устида турибди, дедим.

Асадбек жилмайиб қўйган эди, Жалил ўзининг галидан хузурланиб, хаҳолаб кулди.

– Мўмин-ювош ошнанг нега қовоқ бўларкан? – деди Асадбек.

– Пешона саждага тегмаса, ковокдан нима фарки бор?

Бу заҳарли гапдан кейин Асадбекнинг юзидағи жилмайиш йўқолди.

Манзура Жалил келтирган нондан иккитасини, иккита пиёлага солинган қаймокни патнисда кўтариб кирди-да, бирини Жалил томонга, иккинчисини эрига яқинроқ жойга қўйгач, «хуш келибсиз, олинглар», деб лутф қилди. Чой қуйиб узаттач, туриб кетмоқчи эди, Жалил тўхтатди:

– Бир ажойиб гапни ўқиб, илиниб олиб келдим, сиз ҳам эшитинг.

Манзура эрига нажот кўзи билан қаради-ю, кимти-ниб ўтириди.

– «Хотининг номаҳрамни олдида ўтирмасин», дердинг-ку? – деди Асадбек пичинг қилиб.

– Кессагинг номаҳрам эди, мен акасиман. Ака амри-маъруф қилаётганда сингил ўтирса бўлаверади.

Асадбек хотинига қараб, «иложинг қанча, ўтиришга мажбурсан», дегандай кулимсираб қўйди. Жалил чойдан бир ҳўплам ичгач, чўнтағидан тўрт буклоғлиқ газета кирқимини олиб, ёйди-да, ўқиши бошлади:

– «Бир одам қутурган туядан халос бўлмоқ учун жар устига эгилган икки шохга осилиб, жар ёқасига оёқ қўяди-ю оёғи остидаги индан тўрт илон бош чиқариб турганини кўради. Жарнинг тубига назар ташласа, у ерда бир аждаҳо оғзини катта очиб, унинг тушишини кутиб туриди. Юқорига қараса, оқ ва қора сичқон у осилиб турган шохларни тўхтовсиз кемирмокда. Бу аҳволдан қутулиш йўлини ўйлаётган онда сал нарироқдаги асалари уясига кўзи тушади-ю, боши узра тўпланаётган бало булутини ҳам унутиб, бармогини болга ботириб, ялай бошлайди. Асалнинг ширинлиги унинг бошини шу даражада айлантиради-ки, натижада, у ўзининг қандай аҳволдалигини унудади. Оёкларини тўрт илон боши устига қўйганлиги

ва бу илонлар ҳар онда чақиб олишлари мумкинлиги, сичконлар шохларни кемира-кемира синдиришгач, аждаҳо комига тушиши муқаррарлиги хаёлидан кўтарилади. Жаҳолат пардаси акл нурини тўсиб қўйгани туфайли оз фурсат ўтмай, жарга қулаб, ҳалок бўлади».

Жалил кўзларини сатрлардан узиб, дўстига саволомуз қаради-да, сўради:

– Бу ривоятни қаерда эшитганинг эсингдами?

Воажаб, бу дўсти тушмагур уни ғоят эси паст деб ўйлайдими? Абдураҳмон табибникидаги суҳбатни унтиш мумкин эканми?! Асадбек бир нарсага тушунолмади: «Ривоятни Манзурага ўқиб бериш учун атай олиб келдими ё «сен ўша асал яловчи нодонсан», деб яна таъкидламоқчими? Ҳархолда бу муғомбирда бир гап бор...»

– Донишманд оталар айтиб юрган ҳикматларнинг газетда чикқани яхши бўлиби. Оғзаки гап бироннинг кулогига ё киради, ё кирмайди.

Жалил «бироннинг» деган сўзга урғу берганини Асадбек фаҳмласа-да, унга қарши сўз айтмади. Жалил эса бундан фойдаланиб, ўқишда давом этди:

– «Ривоятдан англашиладиган маъно: даҳшатли ва чукур жарлик – дунё. Қора ва оқ сичкон – кеча ва кундуз. Улар инсонлар умрини озайтириш, ҳалок этиш учун узлуксиз бир-бирини алмаштириб туради. Тўрт илон – борлиқнинг моҳиятини ташкил этган тўрт унсур: ҳаво, тупрок, ўт, сув. Булардан биронтаси ўз мувозанатини йўқотса, инсон ўша заҳоти маҳв бўлиб кетади. Асал – азоби кўп, фойдаси кам бўлган, одамларни тўғри йўлдан оздириб, уларга нажот дарвозаларини беркитган фоний дунёдир. Аждаҳо – ҳеч ким қочиб кутула олмайдиган ўлимдир. Ажал шарбатини ичишга тўғри келганида, ажал фариштаси тепангга келиб турганида ўлимдан қутулиб бўлмайди. Пушаймонлик ҳам фойда бермайди. На тавбага вакт колади, на дуо ўқимоққа мажол.

Низомий ҳазратлари шундай ёзганлар:

Бир кун Яман шоҳин гўри устига борсам,
Кўл чузди-ю тутди кафан, кўрсатиб карам.
Ва деди: «Бу саховатим айб айламагил,
Бу дунёда бундан бошқа йўқ бирор нарсам».

Жалил ўкишдан тўхтаб, газетани яна аслидай қилиб буклади-да, Манзурага узатди. Манзура олишини ҳам, олмаслигини ҳам билмай, эрига савол назари билан қаради:

– Манзурага бунинг нима кераги бор? Ўзингда тураверсин. Мехмондорчиликларга борганингда донолик қиласан.

– Атай ўнта газит олганман, таги сероб. Лекин битта гапингни тўғри айтдинг, бунинг Манзурга кераги йўқ. Хотининг бир ўкиб берганимдаёқ тушунди. Сен қовоқмия фаҳмига етмадинг. Манзура сенга яна эллик марта ўкиб берса, кейин тушунасан.

Бу гапдан кейин Манзура Жалил узатиб турган газета парчасини олишдан чўчиди.

– Ўзимга бер, керак пайтида ўкиб оламан, – деди Асадбек хотинининг мушкулини осон қилиб.

– Сен бунақа ақлли гапларнинг қадрига етмайсан, ўқишингга ишонмайман, ғижимлаб ташлаб юборасан, – шундай дегач, Манзурага қаради: – Олсангчи, эрингнинг кўзига мўлтиллаб қарайвермай, одам бўлишига ёрдам бер.

Асадбек «ҳали сен одамсан-у, мен одам эмасманми», деб гап бошлагудай бўлса, Жалилнинг гап халтаси баттар очилиб кетиб, шарманда қилиб ташлашини фаҳмлаб индамади. Хотинига «ола кол, шунинг жафи тинсин», деган маънода қараб қўйди. Манзура газета парчасини олди-ю, хижолат бўлганидан бетлари қизариб, тезгина чикиб кетди.

Жалил пиёладаги қаймоққа нон тўғраб, иштаҳа билан еди. Асадбек бир-икки тишлам нонни аранг ютиб, дастурхондан кўлинин тортди.

– Маҳалланинг нонини соғинмадингми? – деди Жалил чойни хўриллатиб ичиб.

- Нонни ҳар куни маҳалладан олиб келишади, – деди Асадбек.
- Унда мен ахмок бўлиб кўтариб келибман-да?
- Ҳайрият-е, ахмоклигингни бир марта бўлса ҳам тан олдинг, – деб кулди Асадбек.
- Ақлли одам бир марта ахмоклик қилса, ҳамма кўриб, ноғора қилиб чалади. Ахмок одам кунда минг бир ахмоклик қилса ҳам бирор сезмайди, – деди Жалил тагдор оҳангда.
- Ахмокликни тортадиган тарози бўлганида биринчи бўлиб сени торттириб кўрардим.
- Менга кичкина қўл тарози ҳам кифоя қилади, ўзингга тракторларни тортадиган катта тарози буюришинг керак бўлади, оғайнижон!
- Нонупта шундай киноялар-у заҳарли ҳазиллар билан ўтди. Жалил чойни ичиб бўлгач, пиёласини тўнтариб кўйди-да:
- Тур, кийин, Мухиддин отаникига борамиз, – деб буюрди.
- Кеча борганман, – деди Асадбек, қимиirlагиси келмай.
- Кечагинг ҳисобмас, бугун хажжул-масокин, саййидул айём, жумадаги зиёратнинг савоби улуғ бўлади. Гапни кўпайтирма, бўла қол.
- Жамишид бозор қилиб чиқсин...
- Бозоринг керакмас, отамнинг кичкинагина қорни бор, сенинг ҳашаматингга зорлиги йўқ. Зарур нарсани ўзим овлолганман.
- Асадбек унга эргашибга мажбур бўлди. Жалил отага аталган тугунчани дарвозахонага кўйиб кирган эди. Асадбекнинг беписанд караб кўйгани унга ёқмади:
- Нега чимириляпсан? Назарга илмаяпсанми? Иккита патир, бир бонка қаймок, ярим кило гилос, ярим кило кулупнай, ярим кило новвот сенга камлик қилади-да, а? Сен бозорнинг ярмини тўртта қоғозхалтага жойлаб, керилиб кириб бор-

масанг, кўнглинг ўрнига тушмайди. Кеча шунака қилгандирсан?

— Шунаقا қилмадим, икки қўлимни бурнимга тикиб кириб бордим, десам сенга ёқаманми?

— Сен бир жононмидинг-ки, менга ёқсанг, — Жалил шундай деб кўча томон юрди-да, ахдини маълум қилди: — Автобусда кета қоламиз, ярим соатли йўл.

— Жиннилик қилма, ўтири машинага!

Асадбекнинг жаҳл билан буйрук бериши таъсир қилди: Жалил тўхтаб, амрга итоат этди.

Улар кириб келганда Мухиддин ота мутолаа билан банд эди. Меҳмонлар билан кўришиб, китобни олиб кўймокчи эди, Жалил: «Шошманг, бир кўрай, ҳар холда сиз ақлли гапларни ўқийсиз», деб қўл узатди.

— «Аввал таом, баъд аз калом», — деб кулимсиради Мухиддин ота.

Кечада Асадбек кириб келганда ҳам Мухиддин ота китоб ўқиб ўтирган эди. Вараклар орасига қофоз парчасини кўйиб, китобни четга олиб кўйишини Асадбек зътиборсиз кузатганди. Ҳозир Жалилнинг китобга интилишидан мутаассир бўлиб, унинг шаштини қайтармади.

— Биз нонушта қилиб келдик, сиз ҳам чой ичгандирсиз, — Жалил шундай деб китобни кўлига олди-да, ўкишни бошлади:

— «Саба жуда катта шаҳар эди, шунчалар катта эди-ки, катталиги бир товоқча келарди... Саба шахри айни пайтда жуда улуғ, баҳайбат, азамат шаҳар эди. Шунчалар баҳайбат эдики, гўё каттакон бир пиёздай...» — шу ерга келганда Жалил сатрлардан кўзини узиб, Мухиддин отага ажабланиб қаради: — Ие, хато ёзилмаганми?

— Хато эмас, айнан шундай, — деди Мухиддин ота жилмайиб, — ўқийверинг, мағзини кейин чақиб оласиз.

Жалил «қизик», деб бош чайқаб қўйиб, ўкишда давом этди:

— Бу ғалати шаҳарда уч ғалати инсон яшар эди.

Бири кўр, бири кар, яна бири эса яланғоч. Кўр узокларни кўрар, кар жуда яхши эшитарди. Учови бир жойда ўтиришганда кўр: «Қаранглар, узокда отликлар келишяпти, уларнинг қайси қабилага мансублигини ва неча киши эканлигини кўряпман», деди. Кар эса: «Ха, ха, мен овозларини эшитдим. Ҳатто нима деганларини айтиб беришим мумкин», деди. Гапга яланғоч кўшилиб: «Агар бу ерга келишса, бизларни ечинтириб кўйишади», деб кўркди. «Қаранглар, яқинлашиб колишди. Қани, бўлинглар, улар келмасларидан, бизларни тутиб олмасларидан, қочиб қолайлик», деди кўр хавотирланиб. Уларнинг талвасаси карга ҳам ўтди: «Бўла қолинглар, дўстлар, шовқин борган сари яқинлашяпти, вакт борида жуфтакни ростлайлик», деб ўрнидан турди. Улар шаҳарни ташлаб қочишли Ниҳоят, бир қишлоққа етиб келишди. У қишлоқда жуда семиз бир қушни топиб олишди. Куш шунчалар бокилган эди, семизлигидан вужудида гўштдан асар ҳам йўқ эди. Ҳатто суяклари ингичка ипдай эди. Уч ўрток қуш гўштини ейишди, қорни тўйган филлар каби семиришди. Шунчалар тўйиб ейишди-ки, оламга сиғмай кетишли. Шунча шишганларига қарамай, бир эшикнинг тирқиншидан ўтиб, бир уйнинг ичига кириши...»

Жалил ўкишдан тўхтади-ю, сатрлар орасидан маъно кидиргандай кўз узмади.

– Ха, тишинг ўтмай қолдими? – деди Асадбек унинг ҳолидан кулиб.

– Тишинг ўтган бўлса, қани, тушунтириб бер-чи? – деди Жалил пешонасини тириштириб.

– Тушунмадим, мен сенга ўхшаб доноликни даъво қилмайман.

Мухиддин ота икки ошнанинг маънисиз баҳсига тезоқ якун ясаш максадида гапга аралашди:

– Мавлоно Румий ҳазратларининг ҳикматларини англаш осон эмас, бўтам. Қадим сўфий адабиётида маънолар рамзлар, ишоралар билан баён қилинган.

Мавлонони тушуниш учун бошқа олимларнинг шархини ҳам ўқиши керак. Шўронинг ҳозирги адабиётида бунақа маънолар йўқ.

— Ўқишига ўқидик, бизни энди пичоксиз сўймай, маъносини тушунтиринг, — деди Жалил.

— Аввали шуки, ўқиган хикоянгизни енгил киноя асосида деб қабул қилинг. «Саба шаҳри» – инсон танасининг рамзи. «Шаҳар аҳолиси» дейилганда инсондаги руҳоний ва жисмоний кувватлар назарда тутилган. Демак, Саба шаҳри – инсон кўнгли экан. Кар – истак, тилакдир. У ҳаётдан кўп нарсаларни талаб қилувчи, еб-тўймас инсон рамзи. У бошқаларнинг ўлимини эшитади-ю, ўзининг ўлиши мукаррарлигини хаёлига ҳам келтирмайди. Кўр эса нафсоний ҳирснинг тамсилидир.

— «Тамсил» нималигини ўзбекчалаб тушунтирингда, ахир биз оми бўлсак, – Жалил «оми бўлсак»ка урғу бериб, Асадбекка маъноли қараб қўйди.

Мухиддин ота бу пичингни англаса ҳам, аҳамият бермай, салмоли оҳангидаги давом этди:

— «Тамсил» – «мисол» дегани. Ҳикоядаги кўр ҳалқнинг айб-нуқсонларини ипидан-игнасигача кўради, ҳатто маҳаллама-маҳалла айланиб, уларни айтиб юради. Яланғоч эса доимо «этагимни кесиб кетишади», деб кўркиб яшайди. Ахир яланғочнинг ҳам этаги бўладими? Бўлмайди! Бу ердаги яланғоч – дунёга топинган, бойликка муккасидан кетган муфлисдир. «Муфлис» – бенаво, бечора, қашшоқ, «илмсиз, бефаҳм», деган маънолари ҳам бор. Ҳикоядаги яланғочнинг руҳи қашшоқ. Руҳий қашшоқлик эса илмсизликдан келиб чиқади, – Мухиддин ота шундай деб Жалилга қараб олди. – Яланғоч бечора ечинтиришларини, яъни тунаб кетишларидан кўркиб, ваҳима ичидаги яшайди. Ваҳоланки, у дунёга яланғоч келган, оқибат яланғоч кетади. Пайғамбаримиз алайҳиссаломнинг: «Одам боласига бир водий тўла олтин берилса, иккинчисини истайди, иккинчиси берилса, учинчиси-

ни истайди, унинг кўзини факат тупрок тўйдиради», деган муборак гаплари ана шунаقا яланғочларнинг кўзини очиш учун айтилган. Ҳазрат Навоийнинг бир байтлари ҳам шу хақда: «Нафским, ул айши мудом истагай, сенга гуноҳ, ўзига ком истагай». Нафс кишини гуноҳга кўйиш эвазига, ўзини баҳтли қилишни истаркан. Ҳикоядан менинг тушунганим шулар. Энди меҳмоннинг иззатини қилиб, дастурхон ёзмасам бўлмас.

– Сиз энг зўр дастурхонни ёзиб, энг зўр неъматлар билан сийладингиз. Биз чойга келмадик, жума намозини сиз билан ўқиши ният қилганмиз, жомега бирга борамиз.

Жалилнинг «бирга борамиз» деган гапи Асадбекка ғалати туюлиб, унга савол назари билан қаради. Жалил бу қарашга эътибор бермай давом этди:

– Бундан бу ёғига ҳар жумани бирга ўқиймиз.

– Инша Аллоҳ, инша Аллоҳ, – деди Мухиддин ота «шу гап ростми?» деган маънода Асадбекка қараб олиб. Кейин ўрнидан турди-да, тайёргарлик кўриш учун ташқарига чиқди. Асадбек «бирга борамиз», деб ўзи билан отани назарда тутгандир», деган тўхтамга келиб, гапни кавлаштиrmади. Жалил ҳам индамай ўтираверди.

Машина ярим йўлга етганда Асадбекка қараб:

– Таҳоратинг бормиди ё масжидда оласанми? – деб сўради.

– Мен сизларни кузатиб кўяман, зарур ишим бор, – деди Асадбек жавобдан бўйин товлаб.

– Биз билан жума ўқимайсанми? – деб сўради Жалил зарда билан.

– Бошқа сафар... Бугун зарур ишим бор, – Асадбек шундай деб узрли нигоҳи билан Мухиддин отага қаради.

– Худонинг фарзидан ҳам зарурроқ иш бўладими? – деди Жалил, портлагудай бўлиб. – Ростдан бормайсанми?

- Кейинги сафар дедим-ку?
- Сенинг «кейинги сафаринг» кўп. «Кейинги сафарга»ча ким бор-у ким йўк. Тұхтат машинангни!
- Жириллама, олиб бориб кўяман.
- Тұхтат, дедим, биз машинада туғилмаганмиз, автобус ҳам бўлаверади.
- Бўтам, тўхтата қолинг, ҳали вакт бор, ҳангомалашиб етиб оламиз, – деди Мухиддин ота уларни муросага келтириш учун.

Жамшид машинани тўхтатиши билан Асадбек тушиб, орқа эшикни очди. Жалил нимадир деб ғўлдираганича, нариги эшикни очиб, тушди. Мухиддин ота Асадбекнинг ҳақига дуо қилди, Жалил эса «бунингизнинг одам бўлиши кийин», деганича колаверди.

– Идорага ҳайда, – деб буюрди Асадбек, машинага қайтиб ўтиргач. Шаҳар марказига жойлашган учқаватли иморатга яқинлашганда ертўладаги серҳашам хонасида димикиб ўтиришни истамай, қарорини ўзгартирди: – Анҳор бўйига ҳайда.

– Жўжаҳўрзларинг кўринмайдими? – деди Асадбек сув устига қурилган сўри томон юриб.

Жамшид уларнинг қаердалигини айтди. Асадбек «ҳар қадамидан хабардор бўлиб тур», деди-да, кўрпачага ёнбошлади. Чойхоначи хонтахта устини бирпасда ноз-неъматларга тўлдириб ташлади-да, «янги картошкадан димлама қилиб қўювдим, кора қўзи гўштидан козонкабоб ҳам тайёр», деб навбатдаги амрни кутди. Асадбекнинг кўнгли димламани тусади. Пахтагулли катта лаганда ҳовури чиқиб турган таом келтирилди. Зираворларнинг ёқимли иси димоққа урилиб иштаҳани кўзғаса-да, Жамшид қилтамоқ сингари кўп емади. Асадбек буни сезиб:

– Ҳа, бугун машқинг пастроқми? Ресторанда ивирсисб юрган экансан, кечаги майшатинг чарчатиб кўйдими? – деди.

Асадбек «ресторанда юрган экансан», деб тахминан айтган эди, мўлжални бехато урди. Бўйдоқ одам

хожасини уйига кузатиб қўйганидан кейин қаёққа бориши мумкин? Акаларининг фожиаларидан сўнг бунақа жойларга камқатнов бўлиб қолган Жамшид чиндан ҳам кеча ресторанга борган эди. Асадбекнинг гапидан кейин «бирор чақибди-да», деган хаёлга бориб, бошини эгди:

— Оғайнилар ўтиришган экан, ярим соатга кириб чиқдим, — деди қўлга тушиб шармандаси чиқкан ўсмирнинг айбли оҳангига.

— Кўзингни очиб юр, ҳозир анқаядиган пайт эмас. Оғайнининг ҳам ҳар қанақаси бор.

Жамшид ёлгон гапирди, оғайнилари баҳонасида кирмаган эди. Кўнгли тортди-ю, кирди, бошка сабаб йўқ. Хожасига шундай дея олмайди-ку? Аслида кўнгли бекорга тортмаган экан: кириб ўтиргач, тўрда давра қурган одамларнинг шовқини хаёлини олди. Қандайдир идора ходимлари кимнингдир туғилган кунини шоду хуррамлик билан нишонлашаётганини шу шовқин орасидаги табрик сўзларидан англади. Давра томонга беихтиёр қаради-ю... ўша хонимни кўрди.

Ҳа, ўша хоним...

Фитна қилиб уни қамоққа жўнатган хоним...

Камоқдалигида, айниқса биринчи ойлари, озодликка чиққанидан кейин бу хонимни жазолаш йўлларини кўп ўйлаган, лекин кутулгач, уни кўришга ҳаракат ҳам қилмаган эди. Ҳозир тўрда талтайиб ўтиришига қараганда, бугун унинг туғилган куни.

Айнан шундай! Унутиб бўларканми? Туғилган куни арафасида бўлган эди-ку, ўша воқеа?! «Эртага туғилган куним, лекин сиз билан бугун нишонлайман», деб шампанни очган эди. Паҳлавонкелбат ўсмирни осонгина енгаман-у, кучокқа оламан, деб ўйлаганди. Лекин Жамшид унамаганди. Кейин... найранг қилди – гўё учинчи қаватдан ўзини ташлагандай бўлди... Айнан шу куни Жамшидни зўрлашга уринишда айблаб, қамоққа тикишган эди.

Тасодифни қаранг-а!

Буларни эслагач, ғашланиб, чиқиб кетгиси келди. Лекин китмирлиги тутиб, кузатишни истади. Ракс бошланганда даврага яқинлашиб, гүзәл қизни таклиф этди. Қиз нозланмади, ўрнидан турди. Қизни билагидан ушлаб, ракс майдончасига бораётганида хоним томон қаради: күзлар түкнашди! Қизни жойига кузатиб қүяётганды ҳам нигоҳлар учрашди.

Кейин...

Мусиқачилар «қызылар йигитларни таклиф этишади», деб зълон қылганида хоним у ўтирган столга яқинлашди-да, нозли табассум билан, «сизни таклиф этаман», деди.

Жамшид кутилмаган баҳтдан суюниб кетгандай жилмайиб, ракс майдонига бошлади. Ёши ўтиб қолган бўлса ҳам, хоним чиройини йўқотмаган эди. Жамшид уни белидан ушлаб ўзи томон тортганда кўзлари атрофига ажин оралаганини кўрди.

- Қариб қолибманми? – деди хоним, карашма билан.
- Чиройли қызылар қаримайди, – деди Жамшид.
- Сизга тилёғламалик ярашмайди. Бу ерда учрашиб қолишимизни кутмаганмидингиз?
- Нега кутмайман, атай келдим-ку?
- Алдаманг, атай келган бўлсангиз... гулдаста кани?

– Гулдастами? – Жамшид уни ўзига тортиб, қулоғига шивирлади: – сизга аталган анвойи гулларни гулчилар бугун экишди, кейинги йилгача кутасиз энди.

– Илтимос, мени майна қилманг... – Хоним бошини бурди, Жамшидинг қучоғидан чиқишига урингандай, ўзини нари тортди. – Бир неча марта узр сўраб бормоқчи бўлдим... Биламан, мени ҳеч қачон кечирмаймайсиз... Лекин бунчалик шафкатсиз бўлиш йигит кишига ярашмайди.

– Сиздан хафамасман, аксинча хурсандман. Агар мени турмага тикиб қўймаганингизда нари борса, кайсиdir кавакда илмий ходимнинг жойини эгаллаб,

китоб титиб ўтирадим. Сизнинг баҳонангизда ақадемияни битириб, профессор бўлдим. Мени баҳтли қилганингиз учун оёғингизни ўпсам ҳам арзиди.

– Кўйинг бунақа гапларни. Уйландингизми, болачақангиз борми?

– Уйланмадим. Болам йўқ, лекин чақам кўп. Сиз ҳам турмушга чиқмагансиз.

– Каердан била қолдингиз?

– Кўзингиз айтди...

Хоним энди унга дадил тикилди:

– Истасангиз, бугун сиз билан кетишими мумкин.

– Афсуски, бугун ҳеч қаёққа кетмайман, мен шу ресторонда қоровулман. Бир кун иш, икки кун дам. Бугун менинг навбатим, – Жамшид шундай деб хонимни ўзига яна ҳам қаттироқ тортди. Хоним кўлдан сирғалиб чиқмоқчи бўлган балиқдай уринди-ю, эпломади.

– Ҳалиги қиз ёқдими, истасангиз таништириб қўяман. Ярим йил олдин эрга теккан эди, эрига кўнгли йўқ.

– Агар қўлингиздан келса, менга ёпиштирманг-у, эрига иссиқ-совуқ қилиб беринг. Менга онаси ўпмаган қизлар ҳам етарли.

Жамшид шундай дегач, хонимни кўйиб юбордида, столига қайтиб бормай, кўчага чиқиб кетди. Кечаси уйкунинг тайини бўлмади, Асадбек айтмоқчи, машқи пастлиги шундан. Яхшики, хожаси битта гап билан кифояланди. Майдалаб сўраганида, нима дея оларди, билмайди.

Асадбек қўлини артиб, чой ичаётганда чойхоначи кўриниб, Жамшидни имлаб чакирди. Жамшид унинг гапини эшишиб, хожасига қараб олди. Кейин яқинлашди-да:

– Бек ака, қанақадир хондан одам келибди, сизда зарур гапи бормиши, чиқиб қарайми? – деб сўради.

– «Қанақадир хон» деганинг нимаси?

– Отига тили келишмаётганмиш.

Асадбекнинг хаёлига «Хонгирейми ё Гирейхонми?» деган ўй келди. «Ўша мараздан келган бўлса, бу жойдалигимни қайдан билибди?» деган савол кўнглини хира килиб, пешонасини тириштириди:

– Қара, Хонгирейдан бўлса, бошлаб кел, – деб буюрди. Кейин «ошга пашша тушди» деб минғирладида, пиёладаги чойни анҳорга караб сепиб юборди.

У адашмаган эди: Жамшид Маматбейни бошлаб келди.

– Ў, жан гардашим, сени чўх сағиндум!

Маматбей шундай деганича кучок очиб кўришмокчи эди, Асадбек унга қўл учини узатди. Маматбей бундан ғашланса ҳам, сиртига чиқармади, жилмайганича давом этди:

– Хабаринг ўлдумики, буюк фожиа кўпди: Козлов гардашни Аллаҳ чақирмиш экан, иззати юзасидан жанозасига вордим. Сўнгра эса Красноярдан учиб, Асадбек гардашимни зиёрат этмай ўтиб кетар ўлсам, оғам Хонгирейнинг арвоҳи чирқиллаб қолажак, дедим-у, виждоним чўх қийналди. Йўлни сен томон бурдим, азиз гардашим.

«Сенда ҳам виждон борми?» – деб ўйлади Асадбек. Ўғлининг ўлимида Маматбейнинг ҳам иштироки борлигини аниқ билмаса-да, уни бўғиб ўлдиргиси келди.

Маматбей Асадбекнинг ҳолини билиб турарди. Хонгирей Асадбекнинг ақлли эканини тан олиб, «ақлли одамнинг узок яشاши дуруст эмас», деган, лекин ўшанда камрок яшаши чорасини кўрмаган, шу касали билан ўлиб кетади, деб калтабинлик қилган эди. Москвадаги учрашувдан кейин Хонгирей «анча дадиллашиб қолибди-ку?» – деб ажабланганида Маматбейнинг ўзи «Княз, у эртага бутунлай синиб, чилпарчин бўлиб кетадиган одам», деб ишонтирган эди. Ҳозир Асадбекни зимдан кузатиб, «ўзига келиб қолибди, синадиган одамга ўхшамайди», деб ўйлади-да, сир бой бермай гапини давом этди:

– Билюрмисанки, Козлов гардашим Хонгирейни чўх севијор эди. Аркадашининг ўлимидан калби сиқила-сиқила инфаркт бўлмиш экан. Княз номи ила бир сиким туфракни тобути устига ташлаб, Хонгирейни-да арваҳин шод эттим. Унда Козлов ҳам ўлимин топди, энди не ўлур, гардаш?

– Нима бўларди, Козлов ўлса, ўрнига Барапов чикар, у ўлса, Зайцеви бордир. Сенга Зайцев бўлгани дуруст, – деди Асадбек заҳарли киноя билан. Насабга доир сўз ўйини қилгани Маматбейга хуш ёкиб, кўзлари чақнади:

– Чўх гўзал сўз ўлди! Аммо Козлов Красноярни қандайдир Бараповга яки Зайцевга эмас, Гирейхонга васият қилмиш экан. Бунга не дејорсан?

– Гирейхон? – Асадбек қошларини чимириди. – Моргашни айтяпсанми?

– «Моргаш» узок ўтмишда қолмиш, энди ул Гирейхандир! Билиурмисанки, Крим хони Гирей у ёғи Полша, бу ёғи Русни титратмиш эди. Бизим Гирейхан совет русини бир қўлида ўйнатажак!

– Чоғи келармикин? Даъвоси катта-ку?

– Куввати етмас ўлса, Асадбек гардаши вор-ку?

– Асадбек қардоши энди бунақа ишлардан четга чиқиб кетган.

– Билюрмисанки, гардашим, бир инсан ики қайиқка оёқ қўюб турмас. Сув дўлқуни қайиқларни ики томон сураг ўлса, окибат не ўлур? Чати йирилур, а?

Асадбек ўзининг четга чиққанини айтди-ю, Балабуханинг гапини эслади: «Ўйиндан чиқдим, деб хомтама бўлма, бизнинг ишимизда фақат ўлган одам ўйиндан чиқади. Одам йўқми, демак, муаммо ҳам йўқ. Сел келса, барчани баравар олиб кетади. «Бу киши ўйинда йўклар», деб ўзанни ўзгартирмайди».

Сел Хонгирейни, Кесакполвонни олиб кетди. Лекин сел йилда бир келмайди-да! Кейингиси кимни

олиб кетади? Энди сел йўлида Моргаш билан Асадбек турибдими?

– Сана Гирейханнинг чўх саламлари вар.

Аблаҳ одам ҳақида гап бориб, «у қашкирнинг ўлими яқинга ўхшаб турибди», дейишганда донишманд «ўлаётган қашкирдан кўркқули», деб огоҳлантирган экан. Кўзлари чакчайиб турган бу одам ўладиган қашкирдан салом олиб келиб, нима демоқчи? Асадбек унга синовчан тикилиб, сўради:

– Сени Хонгирейнинг ўрнини олади, деб эшитувдим, ҳали ҳам дастёрикдан кутулмадингми?

– Тарозунинг бир палласийа ўлум, икинчи паласийа ҳаёт қўюлур ўлса, гай бир аҳмак ўлумни танлийор? Анжак дастярлик чўх яхши эмасми?

– Ўша тарози ҳали ҳам турибдими ё ташлаб юбордингми? – деди Асадбек пичинг билан.

– Бул тарозу ташлаб юборилмаяжак, – деди Маматбей жиддий тарзда. – Масковдаги жан гардашинг бул тарозуни сана юбармиш ўлду. Танламак ихтияринг вордур: Бек, сан-да, ман-да гап адамлари эмасдумиз. Лақиллаб ўлтурмакка фурсатинг йўктур?

– Дардинг бўлса, айт, гапни ўзинг чўзяпсан-ку?

– Хангирей гардаш вафат тапду, амо, ниятлари тириқдур, сан шунинг-да, ҳисабин алмағинг лазим ўлур.

– Хўш, кейин-чи? – деди Асадбек қошларини чимириб.

– Европая таман наркотик шу ердан ўтажак ўлса, сан қаршилик қилмиюрсан.

– Мен қанақасига қаршилик қилишим мумкин? – деди Асадбек зардали овозда. – Нима, мен чегарачиманими ё милисаманими? Аниқроқ гапир, балки ёрдам беришим керакдир?

– Эҳтимал... эҳтимал... – деди Маматбей мужмал тарзда.

– Яна ҳам аниқроғи – мен Моргашнинг гумаштаси бўлишим керами? Ё кўпагига айланаманими?

– Бунларни Гирейхана рўпара ўлганингда ҳал

килиб алажаксан. Сан ила музакара юритмакка манда ихтияр йўқтур. Ман деганимни дедим. Жаваба шашилмак вазифанг вар, унутма! Сана қийин ўлди, гардаш, Айдер ҳам йўқ, Махмуд ҳам йўқ. Энди не ўлур? Бу гардашларнинг йўқ ўлгани сан учун чўх муддао ўлди. Варисларинг тахтингга чўх ишқибаз эдилар. Худо уларни олмас эрса, сани-да олиюр эди. Ай гардаш, ўлумни ўйламакдан на фойда, кўй, ўлумни! Ўлум лабларидан ўпич алмағимиз чўх узокдир. Аллах сени-да, мени-да роҳат ила яшасун, деб яратмиш экан, ман роҳата тўйганим йўқтур. Сан-да тўймагансан! Ўйнамак ва кулмак, кулмак ва ўйнамак керак! Гулагула яша, гардаш!

Маматбей шундай деб хайрлашди-да, изига қайтди. Асадбек ичидаги сўкиниб кўйиб, унинг гапларини фикр чиғириғидан ўтказа бошлади: «Козловни эслатиб, қўлимиз шу даражада узун, сенга ҳам етиб келади», демоқчими? Огоҳлантиришдан мақсади нима? Яна қанака шумликларни бошлаб келди бу ҳароми?! «Ўйнамак ва кулмак...» дедими? Қачондир айтган эди-я, шу гапларини? Ким ўйнаб-кулади-ю, ким кафандигини кучоқлаб ётади – эндиғи ечиладиган масала шундан иборатми?»

Асадбек адоксиз саволларига жавоб истаб ўтирганида Жалилнинг бир заҳарли гапи хаёлини бехос ёритиб ўтди: айтилган ўша гап отилган ўқ каби қалбига санчилиб колган, ўқтин-ўқтин ғимирлаб, вужудини ғижимлаб ташлагандай бўлаверарди: «Агар оламнинг куни сенларга топширилса, ер юзида ҳалоллик ҳам, вафо ҳам, меҳр-окибат ҳам қолмайди. Сенлар куртак очган ниҳолни синдириб ташлашдан, бойчеками ё полопонларними аямай топташдан тоймайсанлар. Ҳатто, бир-бировингни аямай янчасанлар. Нима учун Ҳайдар кессагинг билан дўстсан, айтами? Икковингнинг ҳалқуминг бир, нафсинг бир»...

«Ҳайдар ўлимини топди-ю кетди. Энди шу ҳаромилар билан ҳамтовоқ бўламанми?»

Дунё ҳаёти узунга ўхшайди, аслида кимсани ўз бағрига олган бир нафасдан иборатдир. Ўтган дақиқа ўтмиш бўлиб қолади. Киши эришганидан ортиқ ҳеч нарсага эга бўлолмайди. Келажагининг қандай бўлишини эса билолмайди. Вакт шундай нарсаки, тун кундузнинг ўлимидан хабар беради. Туннинг бошлиниши у куннинг завол топганини билдирувчи бир ишоратдир. Тинимсиз келиб кетган ҳодисалар инсонларни ўзгартиради, эскитади, қаритади. Вактнинг вазифаси жамоаларни сочиб ташламоқ, сараламоқ ва неъматларни йўқотмоқдан иборатдир. Амал узун, умр киска, ҳар нарса эса ёлғиз Аллоҳга қайтади.

Маматбей ҳозир эндиғи вактнинг зиммасига жиддий масъулият юкланганини англатиб кетди: Аллоҳдан қайтишдан олдин вакт шайтанат оламини саралаб бериши керак. Ким элакдан ўтади-ю, ким ўтмайди?..

XVI б о б

1

— «Аифклерунгс» деган идорани билурмисан? — деб кайта сўради доктор Худоёр.

— Билмайман, — деди Абдусамад.

— Мутлақ билмиор эрсанг янада чўх гўзал бўлур эди. Сизда «кгб» отлиқ бир идора вордур, «аифклерунгс» шу кабидур. Энди айт-чи, не сабабдин бул идора санинг ила қизиқмоқни ихтияр этмиш?

— Билмайман, — деди яна Абдусамад.

— Билиурсан, — деди доктор Худоёр кескин оҳангда. — Турк қаҳвахонасинда ким ила ҳамсуҳбат ўлдунг?

Абдусамад «сиз буни қаердан била қолдингиз?» дегандай ажабланиб қаради.

— Сан мана бу каби ажаб ила боқма. Ул малла ўруснинг муддаоси не экан?

- Муддаоси...
- Истагинг йўқ эрса, демагилки, ўзима маълумдир. Агарчи ул маним ила қизиқиб, «нейтрон бомба яратиш юмушларида иштирок этиюр», деса, чўх адашур. Ман қайдаман-у, нейтрон бомба қайда? Бироқким, доктор Яқвалхўжамга ихтиярлари ўлса, ул зотга яқинлашмоқ амри маҳолдур. Яқинлашмоқ фикридан воз кечажагингиз маъқулроқ эрур.
- Менинг яқинлашиш истагим йўқ. Ўша ўрис йигитда хоҳиш бор, гапириб нима қилдим, ўзингиз билар экансиз.
- Ҳа, мани-да огоҳ эттилар. Мани-да «аифклерунгс» азаматлари сухбатга тортмиш ўлдилар. Турк қаҳвахонаси ва ўрус йигит хусусинда сўзлаган ўшал азаматлардир. Сан ўйламагинки, доктор Худоёр «аифклерунгс»нинг ҳуфяси экан, деб. Асти ундей эмас! Ҳамонки, шу туфроқ тузини totaётмиш эканман, бу юртга хизмат этмоқка бурчилидирман. Ўзга ҳақиқат йўқ. Эрта-бириси кун азаматлар сени-да сухбатга чорлиюрлар, зийраклик ила тадорик кўра тур.
- Нимага тайёрланаман?
- Сан ўрус йигит ила яна бир кўришмак чорасини қилувинг лозим ўлур. Мақсадин очик-ойдин англа. Сўнг...
- «Аифклерунгс» айғокчисига айланишимни таклиф қилмоқчимисиз?
- Ўзга чорамиз йўктур. Фаннинг ҳеч бир тармоғи йўқким, ҳарбийга хизмат этмаса. Биокимёни одамлар тирик организмларнинг кимёвий таркиби ва ўнларда содир бўлажак кимёвий жараёнлар ҳақиндаги фан деб билиюрлар. Нейтрон бомбага алокаси мавжудлиги афкор омма учун махфийдир. Сан ики ўт исканжасига тушганинг англамагинг жоиз. Агар «аифклерунгс» ила ҳамкорликдан бўйин товламоқ ўлсанг, бу юртда турмоғингда хавф вордур. Юрtingга қайтмоқ истасанг, «кгб» шамширига рўбарў бўлажаксан.

Абдусамад буни ўйлаган эди. Бир вактлар бо-
босини «халқ душмани» деб йўқ килган идора уни
аяб ўтиаридими? Зулм вужуди аслидай турганини,
факат либоси ўзгарганини у билмайдими? Шуларни
ўйлаганда «Абдуҳамидинг ўлимига ким айбдор?»
деган саволга жавоб топгандай бўлади. Отасининг
душманларидан кўра, шу идоранинг кўли бормикин,
деб гумон қилади. Москва аэропортида қорадори би-
лан қўлга олинишлари, милициянинг «маймунхона»
деб аталмиш ҳибсонасидан осонгина чиқиб кетишила-
ри кўп гумонларни уйғотган эди.

«Бу найрангни милициянинг ўзи қила олмайди.
Қорадори масаласида иғво қилганлари ойдек равшан
эди. Чунки қорадори Шарқдан Ғарбга оқади. Бизнинг
Ғарбдан Шарқка олиб ўтишимизда мантиқ йўқ эди.
Демак, бу фитнани милиция тепасида турадиган идо-
ра қилган...»

Ана энди ўша идоранинг ноғорасига ўйнашга маж-
бур. Бу ёқда яна бир ноғора чалиниб турибди...

– Эҳтимол шуки, ишингни авиация соҳасига бу-
рарсан, балки бионикага, – деди доктор Худоёр маъ-
нодор оҳангда.

– Ўрис йигитни ҷалғитиш учунми?

– Оре, рост. Маним нейтрон бомба ила шуғуллан-
моғим эҳтимоли ҳам вордир.

– Бунга унинг ўзи ҳам ишонмайди. Гапининг
оҳангидан сезганман. Биофизика билан биокимёни
аралаштириб юборадиган гўлга ўхшамайди. Унинг сиз
билан иши йўқ. Сиз орқали профессор Яквалхўжага
чиқиши. Менинг вазифам икки ўртада воситачилик
килиш. Қайси бири фош бўлса ҳам биринчи галда мен
кетаман.

– Дуруст англастан.

– Мен фақат бир нарсага тушунмайман: Берлин
деворининг бузилишига ўзлари йўл очиб бердилар.
Икки Германиянинг кўшилиб, яна Буюк Германияга
айланиши мумкинлигини энди англаш, хавотирланиш-

яптими? Бир мамлакатнинг кучайишига шароит яратиб бериб, энди талвасага тушиши нодонлик-ку?

— Ҳақ сўз айтдинг: ўнларнинг дастидан бир-ики одам жабр кўрибгина қолмай, хаёт чоки сўкилиюр. «Холи жой топса, тўнғиз пештоққа чиқмоқчи ўлур» маколи мазмунига мувофик, дуч келган тўнғиз, кўряпмизки, Оврупо тахтига чиқяпти. Советнинг туфроғида бўлганимда хайратда эдим. Бундан карасак, коинотга эга чиқмоқ тараддуудида, унга бориб карасак, трамвай изни темир таёқ ила буришяпти. Таракқиётнинг бир учи осмону фалакда, бир учи сассик балчикда. Оврупога қара, минглаб киравчи, бомбаловчи учоклар вордир. Бироқким, ўрмонига ўт тушса ўчира олғувчи сувсепар учоклар бармоқ ила саналарли. Ақлданми шу?

Абдусамад «Европа менга деса бундан баттар бўлмайдими!» дегиси келди-ю, устози ҳузурида тилини тийди.

— Сана бир ривоят айтай, дикқат ила тингла: **Тақдир**нинг бениҳоя тенгсиз гўзал, оқила қизи бор эмиш экан. «Тақдир» исмининг тагдор маъносини англаюрмисан? Қараки, бир вақтнинг ўзида **Ақл**, **Давлат** ва **Умид** исмли йигитлардан совчилар келди. **Тақдир** қизини чакириб дедики: «Куёв бўлмишни ўзинг танла, қай бири сенга маъқул?» Доно қиз ўйлаб туриб жавобан дедики:

— **Ақл** инсондаги энг олийжаноб фазилатким, унинг ёрдамида дўстни душмандан, хушёрни эса девонадан фарқлаш мумкин. Бироқ, **Ақл**нинг бир айби борки, кишини чалғитиб, хатарли йўлларга солиб кўймоғи ҳам мумкин. «Ақллилик балоси» деб бекорга айтмаслар.

Тақдир фарзанду аржуманди сўзларидан чўх ҳузурланиб яна дедики:

— **Давлат** ҳақида нима деюрсан?
— **Давлат** — ишбилармон ва ҳукмдордир. **Давлат**нинг итоатида кўп нарсалар бор. Бироқ, унда вафо йўқ. Агар ихтиёрни ўзима бериорсангиз мен **Умид**ни

танлагум. Чунки Умид ҳар қандай холатда ҳам инсондан ажралмаяжак, ҳар қандайин холатда ҳам вафодин чекинмаяжак, энг яқин дўст бўлиб қолажак...

Доктор Худоёр ривоятни айтиб бўлгач, маҳзун ҳолга тушди.

— Сенинг англамоғинг мушкулдир: Олмонияда ўлсун, Бирлашмиш Штатларда ўлсун ёинки Саудийдами, Туркиядами, Афғондами бўлсин, яшамоқда ўлан ўзбаклар шу умидни танлаганмиз. Умид қушини юрагимиздан аълороқ равишда эҳтиёт сақлаймиз. Айтиб эдим, боболаримиз бизлар учун тилла-жавҳар эмас, юрт соғинччин мерос қилиб ташлаб кетмишлар.

Доктор Худоёр «бошқа гапим йўқ», дегандай стоди устидаги китобни беихтиёр чертиб-чертиб қўйди. Абдусамад унинг ахволини тушунди. «Аифклерунгс» билан ҳамкорликдан бўйин товлаган такдирида буларнинг тинчи ҳам бузилишини ўйлаб, чорасиз одам кўринишида тушкунликка тушди. У айни чоқда маслаҳатга, кўпни кўрган доно одамнинг насиҳатига мухтож эди. Рўпарасидаги доно одам у истаган йўлни кўрсатиб бера олмади.

Отасининг паноҳида эмин-эркин яйраб юрган кунлари қани? Ҳамма атрофида эди, таъзимга шай эди, дўстлари бениҳоя кўп эди...

Қани улар?

Ҳаёт нақадар бешафқат!

Атрофини юзларча, ҳатто мингларча одамлар ўраб тургани ҳолда ёлғизлик балосидан жабр чекса...

Солиевнинг касалхонада хушсиз ётганини зиштган Зоҳид, барча ишини четга суриб, устозини зиёрат қилишга шошилди. Лекин уни кўриш насиб этмади. Даволовчи врач: «бехуш одамни кириб кўрганингизнинг нима фойдаси бор?» деб зътиroz билдирса ҳам, Зоҳиднинг ялиниши туфайли, касалхо-

на тартиб-интизомини бузишга мажбур бўлди. Зоҳид хона эшигини аста тақиллатганда ичкаридан Солиевнинг хотини чиқиб, «кирмаганингиз маъқул» деган маънода оstonада туриб олди. Зоҳид саломлашгач, кўлидаги қофоз халтани унга узатиб:

– Тузукмилар? – деб сўради.

– Худога шукур, бугун яхшилар, икки марта ўзларига келдилар. Кейингисида сизларни ҳам сўрадилар.

– Олдинги куни телефонда гаплашувдим, яхши эдилар... – деди Зоҳид афсусли оҳангда.

– Кечаси юраклари тутиб колди. Иккинчи хуружи қаттикрок бўларкан. Худодан умид қилиб ўтирибмиз...

«Балки топилиши қийинрок дори керакдир?» деган гапига хотин «ҳамма нарса етарли», деб, орқасига ўгирилиб, хона ичкарисига хавотир билан караб олгач, Зоҳид узр сўраб, изига қайтди. Ишхонасига боргиси келмади. Бир оз пиёда юрди. Касалхонадан узоклашгани сайин кўнгли ғаш бўлаверди. Гўё Солиев унинг изидан норози қиёфада тикилиб, «мени шу ахвода ёлғиз ташлаб кетяпсанми?» дегандай бўлаверди.

Солиев биринчи хуруж билан касалхонага тушганда ошинаси ачиниб, «инфаркт бўлгандан кўра, елкасиданми ё сонидамни яралангани минг марта яхши эди, шу касал туфайли ишдан кетиши инфарктнинг ўзидан ҳам ёмонрок», – деган эди. Илёсов билан бу ҳақда бир марта гаплашган бўлса ҳам, Зоҳид нима учундир уни кўп эслайди. Ҳозир ҳам унинг гаплари қулоги остида жаранглагандай бўлаверди:

– Умр бўйи кўчада юрган одамнинг бундан бу ёғига «энди яна қачон инфаркт бўларкинман, иккинчи сида ўлармикинман ё учинчисидами?» – деб уйда Азроил келишини кутиб ўтириши осонми?.. Одам одами беш дақиқами ё икки соатми кутса, бетоқатланади. Ҳар дақиқа, ҳар соатда ўлимни кутса-чи? Инфаркт

нима ўзи? Юрек касаллигими? Йў-ўк... бу шунчаки хасталик эмас, аслида Азроилнинг ташриф қоғози. Куттилганга нисбатан кутилмаган меҳмон анча дуруст...

«Адолат сўқмоғи билан бориб, ҳақиқатга етмоқчи бўлган одамнинг топгани шуми энди?» – деб ўзига ўзи савол берди. Жавобни эса Солиевнинг ўзи шивирлаб айтгандай бўлди:

«Ким айтгани эсимда йўқ, бир донишманд: «Адолат кучли, куч эсаadolатли бўлиши керак», деган экан. Менинг ишларим бошқачароқ бўлди: кучсизadolат ваadolatsiz куч – икки даҳшат муроса қилди...» Биринчи юрак хуружи билан касалхонага тушганда шундай деган эди...

Кўнгли ғашланган киши хаёлини тўзитиб ташлаётган саволлар жиловини бўш қўйса, баттар кийналди. Дунёдаadolат излаган камми? Ўзи-чи? Адолат излайман, деб илмдаги йўлини йўкотди, энди нимани топяпти? Худо унга риёзиёт оламини ҳайратга сола оларли қобилият берган эди. Риёзиёт осмонининг ёркин юлдузи бўла олмаган тақдирда ҳам, дунёнинг мана-ман деган риёзийлари орасида, шубҳасиз, ўз ўрнини топарди.

Акасининг фожиали ўлими, терговчи-ю ҳакамларнинг номардлиги Зоҳиднинг умидларини парчалаб ташлади. Унинг қулоғи остида кимдир: «риёзиёт йўлини ташлайсан, ҳуқук илмини оласан, бу абллаҳларга қарши курашасан,adolatни тиклайсан, бечораларга суюнчик бўласан», деб минғирлайверди. Бу гаплар ўшанда унга ҳақиқат бўлиб туюлди. У ҳозир ҳам сонлар назарияси билан шугулланиши, дифференциал тенгламаларни ечиб бериши, ҳатто катта олимларнинг қурби етмаётган Ферма теоремасини исботлашга уриниши мумкин. Бирок, йиллар бўйи тинимсиз уринса-да,adolат формуласини ечишга тиши ўтмаяпти. «Не-не алломаю донишмандларни юз йиллардан бери ўйлантириб келган бу масалани ечишга менинг курбим етармикин?» деган савол ўзига бўлган ишончсизликни тобора мустаҳкамлаб борарди.

Ҳақиқатга кўрсатиладиган энг катта лутфу карам – унга амал қилмоқлик, дейдилар. Аммо дунёда ҳеч нимага ҳақиқатчалик мashaқат билан эришилмайди. Ҳақиқатни излаш, унга етиш учун ойлар, баъзан йиллар зарур бўлади. Ҳаёт шундайки, бунда ҳақиқатдан кўра хатони топиш осонроқ. Ҳато кўриниб туради, киши уни дарров пайқайди, ҳақиқат эса пинҳона – яширинган бўлади ва уни ҳар ким ҳам топавермайди. Ҳақиқатга етишмоқликнинг энг биринчи шарти – ҳақиқатни чинакамига севмоқлик эканини барча ҳам билавермайди. Зотан, фақат ҳақиқатгина чинакам гўзалдир, факат угина меҳр-муҳаббатга лойикдир. Ҳақиқатни шунчаки севиш ва тил учидагапиришнинг ўзи кифоя эмас, ҳақиқатни бирон-бир улуғ мақсадни кўзлаган ҳолда юрак-юракдан севиш ва гапириш лозим бўлади. Киши бирор фойдали ҳақиқатни очгучи, юзларча одам омадсиз изланишлар ва аянчли янглишишлар билан ўз умрини ҳазон қилмоғи ҳам мумкин. Ҳақиқат излаш вақтиголик билан эмас, ҳаяжон ва ташвишлар билан ўтади. Бироқ, шунда ҳам барибир уни излайвериш керак, акс ҳолда, ҳақиқатни топмаган, уни севмаган одамнинг ҳалок бўлмоғи тайин. Ҳақиқатни ўргана туриб уч мақсад кўзда тутилади: уни излаб топиш, топгандан сўнг, албатта исботлаш, ниҳоят, ҳақиқатни изохлаб, исботлаётгандан уни сохталиқдан ажратабилмоқлик шарт.

Ҳақиқатга етиш бир-икки жиноятчини фош этишдангина иборат эмас. Агар ҳаётнинг мазмуни факат шундангина иборат бўлса, демак, ҳақиқат ҳеч қачон карор топмайди. Чунки, майдонни бир жиноятдан то-залаб улгурмасидан, иккинчиси сел каби ёпирилиб, балчиқка тўлдиради. Солиев ўзини ҳазонрезгида ташвиши ортувчи кўча фаррошига ўхшатиб: «сарғайиб тўқилган баргларни супуриб, энди нафас ростлайман, деса, шабада туради-ю, кўчани яна аввалги ҳолига келтириб қўяди...» – деб маъюс кулимсираган эди. Ҳозир Зоҳидни шу маъюслик таъкиб этди.

Касалхонадан икки бекат наридаги уйда илмдаги устози Ҳабиб Сатторов яшарди. Ҳаёллари ҳукмига ўзини топширган Зоҳид сувоклари кўчиб, олачалпок бўлиб кетган, кўримсиз етимдай мунгайиб турган тўрт қаватли уйга келиб қолганини ўзи ҳам сезмади. «Нимага бу ерга келдим?» деб ўйлаб, тўхтади. Бу уйга келмаганига бир йилдан ошган эди, устозини кўрганидан бери ҳам кўп ойлар ўтди. Неча марта йўқлайман, деди-ю, турли ишлар баҳона бўлиб, зиёратни галга солаверди. Энди оёқлари бошлаб келибди.

Аста зинадан кўтарилиди. Тўртинчи қаватдаги хаворангга бўялган ўша ёғоч эшик... Олдинги келганида бола кўли билан бўрда «проф. Ҳабиб Сатторов», деб ёзиб кўйилганди. Бирор артиб ташлаганими ё вақт ўтиши билан ўзи ўчиб кетганми, ҳарҳолда ёзув кўринмади. Қўнгирок тугмасини босди, овоз бўлмади. Олдин келганида устозининг ўзи текшириш учун тугмани учинчи босгандан ичкаридан булбул овози келган эди. «Болалар тугмани ўйнайвериб, ишдан чиқарганга ўхшайди», деб баҳона қилганди. Ҳозир учинчи марта босгандан кейин ҳам қўнгирок ишламади – булбул сайроғи эшитилмагач, эшикни аста тақиллатди. Эшикни профессорнинг бўйи етган кизи очиб, Зоҳидни дарров таниди, салом берди-да, «кираверинг, дадам уйдалар», деб ичкарига бошлади. Аввал киш пайтида келган, томдан чакка ўтаётгани учун деграза томонга тогоралар, ўртадаги стол устига эса кўк пластмасса челак кўйилган эди. Бу нарсалар йўклиги учун Зоҳидга хона кенг бўлиб кўринди. Ҳабиб Сатторов чиқиб, хушнудлик билан кўришди-да, уни иш хонасига бошлади. Чап томонни згаллаган жавон китобларга тўла. Стол усти ҳар доим батартиб бўлгучи эди, қофозларнинг ёйилиб ётиши, ёндафтарларнинг бетартиб сочилиши Зоҳидни ажаблантириди. Шогирдининг савол назарини уққан профессор кулимсираб, изоҳ берди:

– Чанг артаятувдим. Жавон бўлди, стол усти қолувди.

– Кизлар уйда экан-ку? – деди Зохид.

– Агар хонамни қизларим йигиштиrsa, кейинги кунларим қоғозларимни қидириш билан ўтади. Қайси китоб қайси жойда турганини кўзимни юмиб туриб ҳам топаман. Қизларим чанг артса... бу ёгини тушунгандирсан? Хонамни ўзим йигиштиrsam, кўп кунлик, ҳатто кўп ҳафталик кўнгил ғуборларим ҳам тарқаганга ўхшаб, енгил тортаман. Агар хона чанг бўлса ёки шипнинг бурчагини ис босса, тамом, ишнинг баракаси кетади. Карра жадвалга ҳам каллам ишламай қолади.

Зохид унинг бу фазилатини яхши билади. Уйда ҳам, ишхонасида ҳам ҳамиша батартибликка, озодаликка амал килишни устозидан ўрганган. Ҳамдам Толипов билан бирга ишлаганида шериги учун ҳам хонани йигиштириб туришга мажбур бўларди. Ҳамдамнинг бундай тартибга тоқати йўқ, ўз ибораси билан айтганда, унга «ит ётиш – мирза туриш» ёқарди. Бетартиб ташланган қоғозлари ичидан кераклисини қидириб хуноб бўлса ҳам, тартибга ўрганай, демасди. Зохиднинг озодалигини кўриб, «сен милиса эмас, хирург бўлишинг керак экан», деб куларди.

Ҳабиб Сатторов Зохидни ўтиришга тақлиф қилди:

– Чойни ҳам шу ерда ичамиз, – деди у, кейин муҳим нарсани эслагандай кўшиб кўйди: – Кеннайинг чиқмаганига ажабланма, бугун бизникида «учинчи жаҳон уруши» бўлиб ўтди.

Бу хонадонда тилга олинган «уруш» у ёқда турсин, эр-хотин орасида оддий аразлашув ҳам бўлиши мумкин эмасди. Ҳабиб Сатторов майда-чуйда гапларга парво қилмас, хотинининг феъли ҳам кенг эди. «Баҳслашиб, масала талашиш учун менга фан майдони ҳам кифоя қиласди, оила майдонини жангу жадалсиз генерал хонимга топширганман», деб ҳазиллашарди. Бугун «учинчи жаҳон уруши» бўлиши?!

– Ажабланяпсанми? – деди профессор. – Ўртанча қизимга совчи келавериб, чарчатиб юборди. Каттасига бирор оғиз солмай турибди. Кеннайингга «ўртанчани

узатаверайлик», десам кўнмайди. Сингил олдин эрга тегса, опасини бирор олмай кўярмиш. Шунақа теоремани эшитганмисан? Опа-сингиллар орасида қатъий навбат белгилаб кўйилганидан хабаринг борми?

Зоҳид кай томонни кўллашни билолмай, мужмалик билан:

– Бу бир одат-да, – деди.

– Берлин девори йикитилган пайтда биз битта кичкинагина одат тўсиғидан ошиб ўтсак халқ душманига айланамизми?

Ҳаёт тажрибаси етарли бўлмаган Зоҳид оиласиий муаммолар бўйича жўяли бир гап айтишга ожиз эди. Шу сабабли устозининг саволини жавобсиз қолдирди. Стол четидаги ўн икки варакли дафтарлар тўплами диккатини олиб, устозига савол назари билан каради.

– Болаларнинг назорат иши, – деб изоҳ берди профессор бу қарашнинг маъносини англаб.

– Қайси болалар? – деди Зоҳид ажабланиб.

– Эшитмабсан-да, мактабда ўқитувчилик қилиман. Сенга кулгили туюляптими ё ачинарлимиси? Ҳа... академикликка номзоди кўйилган, Англиянинг нуфузли университетига таклиф қилинган, Москвада обрў топиб ишлаши мумкин бўлган одамнинг паст кетиши ё хорланиши бўлиб туюляптими сенга?

– Унақамас, лекин ҳарҳолда... – Зоҳид фикрини очиқ баён қила олмади.

Солиев: «одамлар адолатни севишлари учун уларга адолатсизлик оқибатларини кўрсатиб туриш керак», деган эди. Дунёнинг нуфузли дорулфунунларида ишлашга лойик кўрилган олим – Кембриж университети фахрий профессорининг оддий бир мактабда оддий ўқитувчилик қилиши адолатсизлик эмасми? Бу адолатсизликни кимга кўрсатиши керак. Бу адолатсизликдан кимлар ибрат олиши керак? Ибратнинг ҳосиласи хайрли бўлармикин?

Зоҳид гапиролмай, чайналиб қолган бўлса-да, устози уни тушунди.

– Кеннайинг ҳар куни маломат килади. Нима, мен амалпараст Соҳиб Пўлатовга хизмат қилиш учун дунёга келганманми? Қаерда бўлса ҳам фанга хизмат қилиш муҳимроқ эмасми? Айт, тўғрисини айт менга!

– Муҳими... Соҳиб Пўлатовга, ҳатто фанга эмас, ҳақиқатга хизмат қилиш зарурроқмикин?

– Ҳа, қойилман! Сен математикани буткул унтиб, милиса сифатида фикрладинг. Укам ўзини ўлдирмасидан олдин «дунёнинг тузилиш формуласини яратдим», деб ҳақиқатни нолга тенглаштирган эди.

– Буни айтган эдингиз. Яқинда Элчин билан гаплашганимда, у ҳам айтди. Лекин...

– Ланжлик қилмай айтавер фикрингни. Милисаҳонангда бу мавзуда фикр юритадиган ҳамсухбатинг йўқдир?

– Милисаҳонадан кетганимга анча бўлди, прокуратурадаман, – деб изоҳ берди Зоҳид.

– Мен учун бунинг мутлақо фарки йўқ, – деб, мезбон хатосини тан олмади.

– Укангизнинг формуласи менга ҳам ёқкан, лекин ҳосила бир ёқлама бўлиб қолган. Формуланинг бошқа ечимларини ҳам излаб кўриш керак, бўлмаса яшашнинг қизиғи қолмайди. Хуллас, укангизнинг ҳаёт формуласига танқидий ёндашиш тарафдориман, ҳеч бўлмаса, нисбият назариясидан четга чиқмай қаралса, тўғрирок бўлар.

– Фикрларимизда якинлик бор: диккат қил-чи, ҳозир исбот этилган нарсалар илгарилари факат тасаввурда мавжуд бўлганми? Бугун ҳақиқат деб эъзозланадиган қанчадан-қанча нарсалар-чи, то рўёбга чиқарилгунича хурофотга ўхшаб туюлган. Ҳатто бу ҳақиқатлар аввалига масҳараланган. Тарихга қараб туриб, ҳар қандай таълимот уч босқичдан, таъбир жоиз бўлса, уч чиғириқдан ўтган, дейиш мумкин. Аввалига, уни «ақлга сиғмайди», деб инкор этадилар. Ҳатто хуруж қиласидилар. Кейин бу таълимотда озгинагина ҳақиқат борга ўхшайди, деб тан ола бошлидилар.

Нихоят, унинг ғоят муҳим, оламшумул эканини тан оладилар-у, сўнг «уни мен очдим!», «йўқ, сен эмас, бу менинг кашфиётим!» деб талаша бошлайдилар. Улар обрў талашаётган пайтда бу кашфиётга йўл очган, боши балоларга колган одам гўрда чириб ётган бўлади... Эслагин-чи, автогенни ихтиро қилган олимни дўстлари масхаралашганми, кашфиёти инкор этилганми? Ўғрилар эса қизиқиб, сотиб олишган. Бир неча ойдан сўнг Лондон банкидаги энг мустаҳкам пўлат сандик автоген ёрдамида кесилиб, пул ўмарид кетилган... – Ҳабиб Сатторов баҳсни юмшатиш мақсадида гапни ҳазил оҳангига бурди: – Сен эса кашфиётнинг қадрига етадиган ўғриларни қамайман, деб излаб юрасан. Нисбият назариясини тилга олдинг, дуруст, баҳслашмайман, энди айт-чи, фанга нисбатан олганда ким жиноятчи? Янгиликни инкор этган олимларми ё янгиликка йўл очиб берган ўғриларми? Инкор этувчиilar олимнинг бебаҳо ҳаётини ўғирлаганлари учун жазога тортилмайдилар-а? Чўнтакдан ўғирланган ўн сўм учун қамайсан, олимнинг ўн йиллик умрига зомин бўлганга ғинг дея олмайсан. Сенинг ҳакиқатинг шуми?

Ҳабиб Сатторов усталик билан мавзуни бошқа томонга буриб юборди. У мактабда ишлашининг бошқалар томонидан муҳокама қилинишини истамасди. Бу масалада олимлар орасидаги дўстларининг танбех беришлари тушунарли, мактаб ўқитувчиларининг ўзаро висир-висирлари кўп ажабланарли эди. «Шундай олим одам мактабимизда ишляпти, фарзандларимизга билим беряпти» деб фахрланиш ўрнига «ишдан нима учун ҳайдалган экан?», «нима учун урилиб кетибди?» деган бемаъни саволларга ўралашиб, бемаъни жавоблар топишлари унинг дилини оғритарди. «Ишдан урилиб» кетиши сабаблари орасида ёш шогирд қизни зўрлашдан тортиб, зўр иктидорли олимни заҳарлаб ўлдиришгача жиноятлар балчиғи мавжудлиги ҳам кулгили, ҳам аянчли ҳол эди. Шундай мухитда

бу олим одам яйраб-кувнаб ишләяпти, дейилса ким ишонаркин? «Юрган эканман-да, катта даргоҳларга осилиб, мактабда мазза қилиб юрибман», деганига ўзи ҳам ишонмайди. Бирок, бошқаларни ишонтиришта уринади.

Мактабда қандай найранглар борлигини Зохид билмас эканми? Енгил масалани ҳам еча олмайдиган ўқувчининг «олтин медал»га асосий даъвогар бўлиши, ўқитувчидан тортиб, директоргача бой ота-оналар олдиди паст кетиши билан бу олим муроса қила олар эканми? Мактабда мингта бола ўқиса, шуларнинг нечтасида қобилият бор, нечтасига математика илми керак? Математикани пул сана什ни ўргатадиган фан деб билувчи нодонлар қанча?

Хозир устозининг гапини бўлиб шуларни айтсинми? Ярасини янгиласинми?

Ҳабиб Сатторов худди шогирдининг фикрини ўқигандай, бирдан ҳомуш тортиб, аввалги мавзуга қайтди:

– Ўқишни ташлаб, бу соҳага ўтиб кетганингда мен сени фанга нисбатан хиёнат қилдинг, деб айبلاغан эдим. Сезиб турибман, ҳозир сен менинг гарданимга шу айб юкини ортиб ўтирибсан. Лекин янглишасан, сенинг ўйлинг чиндан ҳам хиёнат эди, менини ундей эмас. Сенам бошқаларга ўхшаб «Нега чет элга кетмадингиз?» деб маломат қиласан? Соҳиб Пўлатов мени ишдан бўшатганида бир гурӯҳ илмий ходимлар норози бўлиб, Академияга хат ёзишибди. Шунда «бекор қилибсизлар, ўзим ариза бериб бўшамоқчи эдим, Москвага кетаман, бу ердаги ноҳақликлар жонимга тегди», деганимда келиним Хонзода «Московда ҳақиқат бор эканми?» деб киноя қилган эди. Бу ҳақда укам билан ҳам баҳслашиб, «Менга ҳақиқат эмас, илмий иш учун шароит керак», деганимда, «Ҳақиқат йўқ ерда шароит ҳам бўлмайди. Московдаги домлангиз бошингизни силагани билан «кора-кура келгиндилар нонимизни еб кетишаپти», дегувчилар кўп эмасми-

кин?» – деб оғзимни очирмай кўйганди. Ҳозир сенинг ҳам шунака дегинг келяпти. Тўғри, четга жўнавориши мен учун қийин эмас. Тарихга қарагин, Али Кушчидан тортиб, Хоразмийгача барча энг зўр олимларимиз четга кетаверган, тўғрими? Бунга чек кўйиш зарур эмасми? Ҳеч бўлмаса сен тушун: мен юртим учун керакман.

– Рақибларингиз «юртга мен керакман» деб даъво қилаверса, илм бир ёқда қолиб, ўзаро тортишувларингиз давом этаверадими?

– Бу олишувларнинг охири бор. Телевизор кўрасанми ҳеч? Депутатларинг масала талашиб, муштлашиб кетай дейишияпти-ку? Дикқат кил: советинг чокчокидан сўкилай деб турибди. Сахаров яратган водород бомбасини ишга солмади-ку, лекин ҳар бир гапи бомба бўлиб портлаяпти. Горбачёвинг бу портлашларга чидаёлмайди. Ана шунда юртга биз керак бўламиз.

Ҳабиб Сатторов шундай деб ўрнидан турди-да, узрли нигоҳ билан меҳмонига қаради:

– Чой кирмади, демак, «учинчи жаҳон уруши»нинг даҳшатли оқибатлари тугатилгани йўқ. Кеннаингга чикиб, «узил-кесил мағлуб бўлганим ҳақидаги капитуляцияга» имзо чекиб, шунинг эвазига бир чойнак чой дамлаб келай. Албатта, кеннаинг «намунча дарров енгила қолдингиз», деб менга ишонмайди. Шунда Зоҳиджоннинг ўткир дипломатияси туфайли чекиндим, дейман, сен эса буни тасдиклайсан.

Зоҳид устозининг бу ҳазилидан мамнун бўлиб, кулганича ўрнидан турди:

– Бу соҳада менинг дипломатик тажрибам йўқ, аралашмай қўя қолай.

– Ҳа, айтмоқчи, ўғриларинг билан дипломатик музокаралар олиб бормайсан-а? Демак, акангни жанг жадал бўхронларига рўпара қилиб кетаверасанми?

Шу пайт эшик очилиб, мезбоннинг хотини патнисда чой-нон, ширинликлар кўтарганича кириб келди. Зоҳид билан саломлашиб, ёзув столининг бир четини бўшатди-да, дастурхонни тўрт буклаб солди.

– Мехмонхонага чиқа колсанглар бўлар эди, – деди эрига қараб.

– Уруш асоратлари тугамай туриб, чиқишдан кўркдик, – деди Ҳабиб Сатторов қувлик билан кўз кисиб.

– Гапингиз курсин, кўйинг, совуқ нафас қилманг, – деди хотин эрига гина қилиб. Кейин меҳмонга қарди: – Зоҳиджон, акангизга насиҳат қилиб қўйинг, қариганда бўлар-бўлмас гапларни гапирадиган бўлиб колдилар. Бошларидағи «катет-гипотенуза»ларни сал четга суриб, «оила, тириклиқ ташвиши, қизларнинг бахти», деган тушунчаларга ҳам жой берсинлар.

– Хоним, хоним, илтимос қиласман, урушга ми-лисаларни тортманг. Мен енгилганимни тан олиб, ҳузурингизга чиқмоқчи эдим, яна тил замбарагидан ўкка тута бошласангиз, фикримдан қайтаман.

Хотин бу кинояларни эшитмагандай, Зоҳидга қараб ҳол-аҳвол сўради:

– Олдин келганингизда адангизни айтувдингиз, оёқлари синганмиди ё беллари чиққанмиди? Яхши бўлиб кетдиларми, ишқилиб Худо шифо берсин...

Шундай деб дуо килиб чиқиб кетди. Зоҳид устозининг зўри билан бир пиёлагина чой ичгач, тез-тез келиб туришга ваъда бериб, хайрлашибди.

«Тез-тез келиб тураман», деди-ю, бироқ, ваъдасига ўзи ҳам ишонмади, устози ҳам. Йилда бир келишини «тез-тез» деб аташ мумкин бўлса, демак, орадан яна ойлар ўтаркан. Яқинлари билан хайрлашув вактида «тез-тез келаман» деб ваъда берувчилар, ваъдага вафо қилмовчилар ҳаётда кўп. Ваъдасини унугланган киши ўша яқин одами билан бир йилдан сўнг учрашгудай бўлса, турмуш ташвишларини баҳона қиласди. Кунда, кун ора чойхонадаги ошхўрликдан бўшамайдиган одам ҳам «ишим шунақанги кўп-ки, ўзим билан ўзим ўралашиб қолдим», дейди. Яқин кишиси эҳтимол гина килар ё эътибор бермас, бу жиддий масала ҳам эмас, муҳими – дийдор Қиёматга қолмаса бас... Зоҳид чой-

хонада валаклаб ўтиrmайди, иши чиндан ҳам кўп, баъзан овқатланиш у ёкда турсин, бош қанишишга ҳам фурсати бўлмайди. Лекин кўнгил чопса, яқинларини зиёрат қилиш учун вакт топса бўлади. Муҳими – кўнгил!

Дахлиздаги телефондан Саид Қодировга кўнғирок килган эди, «тезроқ келинг, зарур гаплар чиқиб қолди», деган топшириқ олиб, ишхонасиға шошилди.

Зоҳид бу чорловни эшитгач, «ашулачининг ўлимига доир иш бўйича ҳисобот талаб қилишса керак», деб ўйлади. Бу идорада ҳеч қачон «ишни пухта ўрганиб, калаванинг учини шошилмай, адашмай топинг», дейишмайди. «Ишни нега чўзяпсиз?!» – катталарнинг талаби шу саволга жамланган бўлади. Зоҳид милиция олиб бораётган қидирув ишлари билан танишиб, марҳум ва йўқолган ашулачининг яқин дўстлари билан гаплашди-ю, лекин, содир бўлган жиноят хусусида ҳали аниқ бир тўхтамга келолмади. Шунга қарамай, раҳбарларга айтадиган гапларини тайёрлаб кўйди. Ишхонасиға бориб, тўғри Саид Қодировга учрашди.

– Бирпас йўклигингизга ҳамма ёқни жиноят босиб кетди, – деб, гапни ҳазил оҳангидага бошлади. – Ё эшитдингизми?

– Нимани? – деб сўради Зоҳид таажжубланиб.

– Ахлатхонадан яна битта одамнинг жасади топилган, тўғрироғи, дайди итлардан қолган суюклари... Экспертизанинг дастлабки хулосасиға қараганда, жасад европа миллатига мансуб одамники, ёши ўттизларда... Шу маълумот етарлими? – Саид Қодировнинг кейинги саволи киноя оҳангидага бўлди.

– Маълумот керагидан ҳам кўп, – деди Зоҳид худди шу оҳангда. – Яна ўша ахлатхонами?

– Яна ўша ахлатхона, яна ўша аҳвол, – деб таъкидлади Саид Қодиров. – Энди биз нима қилишимиз керак: ахлатхонадаги дайди итларни отиб ўлдириш ҳакида буйрук берилган эди, ҳалигача бажаришмабди.

– Сабаби оддий: итларни топишса милтиқни қидиришади, милтиқ топилса, итлар йўқ.

– Бу муттаҳамларни қаранг: бечора итларни ҳам жиноятга тортишяпти-я! Ҳанғомани эшигининг: бир одам машинасида кетатуриб, йўл ўртасида ётган итнинг ўлигини кўрди. У ўзининг итини таниди, машинасини секинлатди, аммо тўхтамади. Ёнидаги ҳамроҳига караб: «Олапарнинг куни битибди, эрталаб кўринмай қолган эди-я!» – деди. Ит умр бўйи унга садоқат билан хизмат қилган эди. Ўлимига ҳам шу садоқати сабаб бўлди – хўжайнининг ошхонасидан гўшт ўғирлаётган мушукни қувиб бораётганда машина уриб кетди. Итнинг садоқатига хўжайнини хиёнат билан жавоб берди. Агар дунё айланиб келиб, бу одамнинг бошига шундай кун тушса, ит хўжайнининг жасадини ташлаб кетмаган бўларди. Европаликлар итни яхши кўришларини биласиз. Уй ичидаги, ҳатто тўшагида олиб ётадиганлар ҳам бор. Кўчаларда ит билан атай сайр қилгани чикишади. Лекин Лондонда ит билан қабристонга кириш негадир тақиқланган экан. Яқинда бир одам ўлибди-ю, или эгасининг қабрига келиб ётиб олибди, ҳеч нима емабди ҳам, ичмабди ҳам. Шу ётишида охири ўлибди. Итнинг вафодорлигидан таъсирланган лондонликлар итларнинг қабристонга киришига рухсат беришибди. Кўрдингизми, уларнинг итлари ҳам маданиятли. Бизнинг дайди итлар прокуратурага керак бўлиб қолар, деб озгина бўлса ҳам ашёвий далил қолдирмай, ўликни ғажиб ташлашади.

Сайд Қодировнинг пичингларига жавобан жилмайиб кўйган Зоҳид жиддий оҳангга кўчди:

– Ўликнинг кийимлари қолгандир?

– Ҳа, отангизга балли! Криминалистлар ўрганишяпти. Лекин шими Киевда тикилган, пойабзали Ригада ишланган бўлса, ўзининг изини қаердан қидирамиз? Биласизми, аслида итларга раҳмат дейишимиз керак. Юнусобод томондаги ташландик бино ертўласида икки одамнинг қолдиқлари топилган. Хато гапирмадим, ахлатхонадагига ўхшаган суюклари эмас, суюкларнинг қолдиқлари... У ёкка ит кирмаган, мурдаларни икки оёқли жонзорот кислотада куйдириб ташлаган.

— Бу ишларни ҳам бизга юклашдими?

— Йўқ, азизим, бизнинг баҳтимиз ҳам айнан шунда.

Бу билан бошқалар шуғулланишади. Буни мен янгилик сифатида айтдим-кўйдим. Сизга тегишли янгилик бошқа: Дониёр Жасуров деган одамни танийсизми?

— Йўқ... лекин номи танишга ўхшайди.

— Шаҳарнинг бели бақувват казо-казоларидан бири. Демак, Асадбек билан яқинлиги бор. Асадбекни юрак-юрақдан севмаса ҳам, ё хизматини қилади ё бир четда мутелик билан қўл қовуштириб туради, — Саид Қодиров шундай деб столи тортмасидан бир сурат чиқариб, Зоҳидга узатди. Унда Асадбек билан кўшкўллаб кўришаётган Дониёр акс этган эди.

— Энди эсладим, — деди Зоҳид, — бу одамни Асадбекнинг тўйида кўрган эдим. Кислотада куйганларнинг биттаси шу эканми?

Бу гапни эшишиб, Саид Қодиров кулиб юборди:

— Қаҳрингиз жуда-а қаттиқ, азизим, — деди ёлғон пўписа оҳангиди. — Бу одам куйдириб ташлайдиган даражада хавфли эмас. Уни каламушга ем қилишган.

— Қанақасига?

— Икки сонини чилвирда боғлаб туриб, шимининг ичига оч каламуш ташлашган. Терини салгина тилиб кўйган бўлишса, озгина қон чикқану жониворнинг иштаҳасини очиб юборган. Энди олдинги йилдаги қотилликни эсланг: йўл четидаги дарахтга бир одамни осиб, ёкиб юборишган. Муҳими — аввал эркаклигини кесиб ташлашган. Каламуш жазонинг янгича тури эмасми?

— Иккала жиноят битта одамнинг иши демокчимисиз?

— Битта одаммасдир, бунда жиноятчи гуруҳнинг кўли борга ўхшайди. Жабрланувчининг ўзи ҳам, хотини, ўғли ҳам бизга арз килмади. Буни тез тиббий ёрдам врачлари хабаридан билдик. Бу ҳолат ҳам ажабланарли.

— Кўркишдими? Кимдан? Асадбекдан, демокчимисиз?

— Мен ҳеч нарса демокчимасман. Олдинги иш билан сиз шуғуллангансиз. Жабрланувчини аникладингиз-у, котил ҳалигача топилгани йўқ. Жасуровнинг воқеаси билан ҳам қизикиб кўринг, балки шу томондан йўл очилар?

— Мен Асадбекка тақалаёттган ишлар хақида кўп ўйладим. Унинг жиноятлари бизга маълум бўлса ҳам, ҳозирча исбот қила олмаймиз. Лекин шаҳарда факат унинг тўдаси керилиб юрибдими? Жиноят турлари янгиланаётганига қараганда, шайтоннинг янги жиянлари пайдо бўлмаётгандикин?

— Бу фикрингизни инкор эта олмайман. Айниқса, «шайтоннинг янги жиянлари» деганингизга гап йўқ. Бир жойда ўқувдим: шайтоннинг туёғига тақа уриб, устига эгарсиз миниб олганлар Худога сигиниб, шайтоннинг шарридан паноҳ сўрар эканлар.

Зоҳид бу гапдан кулиб, кўшиб кўйди:

— Бунақаларни кўравериб, найрангларидан куйган шайтон Худога ёлбориб: «Эй Худо, шу одамларни яратган экансан, мени яратиб нима қилардинг?» деб нолаю фифон қилса керак.

— Ҳа, шунақа, кўлга тушган жиноятчиларнинг кўпидан «мени шайтон йўлдан урди», деган гапни эшитганман. Суриштириб қаралса, аслида, унинг ўзи шайтонни йўлдан урган бўлиб чикади, — Саид Кодиров энди муддаога кўчди: — демак, Жасуров воқеаси билан жиддий шуғулланасиз. Ўзи индамаса, атрофидагилардан гап олинг, сизга ўргатишнинг ҳожати йўқ. Бу масала ҳал, деб ҳисоблаймиз. Ашулачиларнинг иши нима бўляпти? Бугун раҳбарлар мени тикка турғизиб кўйишиди. Ҳисоботга арзирли гап борми?

— Ҳозирча йўқ, яна бир-икки марта тик турингизга тўғри келади. Дастлабки тергов юзаки олиб борилган. Баллистик экспертизада ҳам камчилик бор. Хуллас, кўп ишлар деярли бошидан бошланди. Милициядаги дўстларимиз Илёсбекни дўсти Коғимбек ўлдириб, яшириниб юрибди, деган гумонни маҳкам ушлаб олишган, бошқа шубҳа-ю, фикрга

ўрин колдиришмаган. Уларнинг иш услубини ўзингиз ҳам яхши биласиз: жиноят кодекси қаршисида тирик одам турганини хисобга олишмайди. Бу одамнинг руҳий олами, руҳий изтироблари эътибор доирасидан ташқарида қолади.

– Шу ерга келганда ўлчовни жуда тор олдингиз, сал кенгрок бўлаверинг. Жиноятчининг ё гувоҳнинг руҳий оламини ўрганишга уларнинггина эмас, сиз билан менинг ҳам вактим йўқ.

– Германиядаги, Хинdistондаги мутахассислар ўрганишибди, дунёдаги энг даҳшатли жиноятлар Ой тўлишганда, яъни ўн учинчи, ўн тўртинчи, ўн бешинчи кунлари содир этиларкан.

– Бу даъвоингиз энди ортиқча бўлди. Жиноятчини осмондаги Ойга қараб қидириш керак, демоқчимисиз. Кўйинг, бу гапларни. Хўп, Илёсбек билан Козимбекнинг уйига борибсиз, консерваториядаги устозларидан сўраб-суриштирибсиз, кимлардан шубҳангиз бор, шуларни айтинг.

– Яхши... Демак, ҳозирча барча ишлар икки ашулачи йигит атрофига ўрганиляпти. Ҳолбуки, бу икки дўст ёнида Толибжон деган қўшикчи ҳам бор. Учови қалин дўст, учови қобилиятли. Энг муҳими – ораларида бир гўзал қиз ҳам бор.

– Қиз талашиб ўлдиришган, деб ўйлаяпсизми?

– Қизга учовининг муҳаббати бўлган. Лекин у гўзал тушмагур, «Бокудаги халкаро қўшик кўригига ким ғолиб чиқса, ўшанга тегаман», деб шарт кўйган. Устозларининг айтишича, кўрикка Илёсбек бориши керак бўлган. У ўлдирилган, дўсти йўколган, окибат Толибжон борган-у, ғолибликни қўлга кирита олмаган.

– Гўзалингиз нима дейди, куни энди шу Толибжон деганига қолибдими, кўнгли бор эканми унга? Ё шартга биноан тегмоқчими?

– Гўзалим... «шартни ҳазиллашиб айтувдим, йигитлар ҳам ҳазил тарикасида кабул қилишган, ме-

нинг кўнглим бошқа йигитда, улар билишарди», дейди. Қизнинг йигити бошқа эканини Толибжон ҳам тасдиқлади. Унинг ўзини тутиши, довдираши менда шубҳа уйғотди. Ўзи отмаган бўлса ҳам, котилликни уюштириши мумкин, деган тўхтамга келдим. Илёсбек ўлдирилмаса, халқаро кўрик Толибжоннинг тушига ҳам кирмас эди. Қизнинг қалбини забт этган йигитнинг касби заргар экан. Бунака гўзал халқаро кўриклар ғолиби, машхур қўшиқчи йигит турганда заргарни танлашига ҳам унча ишонмаяпман.

— Тушундим, — деди Сайд Қодиров, пешонаси ни силаб. — Милиция ходимлари тиндираётган ҳовуз сувини титиб, баттар лойқалатибсиз-да? Гапингизда жон бор, раҳбарлар олдида ҳали кўп терлашим аниқка ўхшаб қолди.

Бу сафар Сайд Қодиров уни буровга олмади. Кунлар ўтиб, раҳбарлар сикуви кучайса, унинг талаби ҳам бошқача бўлишини Зоҳид англади.

XVII б о б

1

Зайнаб боши берк кўчага кириб қолиб, чиқиш йўлини билмай довдираб қолган одам ҳолига тушган эди. У акасининг ўлимига кимлардир сабабчи эканини биларди. Уларнинг кимлигини тахмин ҳам киларди, аммо уларга қарши бир иш қилишга ақли етмас эди. У Ҳайдар амакисининг Москвадан кайтишини интиқ кутарди. Бир-икки марта Кесакполвоннинг тантиқ қизи Моникага кўнғироқ қилиб «амаким яхши юрибдиларми?» деб сўради. Моника «да ну его, юрибди где-то ялло қилиб», деб қиска жавоб бергач, ўзининг янги кийимларию атир-упаларидан гап очиб, уни бездирди. Ҳайдар амакисининг қаерда эканини, қачон келишини факат отасигина аниқ биларди. Отасидан сўрашга эса

Зайнабнинг ҳадди сиғмасди. Суриштириши оқибатида отасидан гап эшитишдан чўчирди. Жамшид ҳам билиши мумкин. Лекин... Жамшид билан қаерда гаплаша олади? Бу ерга, эрининг уйига чакирадими? Тўғри, Жамшид бу ерга келиб-кетиб туради, лекин у билан юзма-юз гаплашиш имкони унда йўқ. Отасининг уйида ҳам Жамшидни кўриб турса-да, бир оғиз сўзлашмокка журъат эта олмайди. Энди нима қилсин, кўчада гаплашсинми?

Билмайди... билолмайди.

Акаси эса уни қасосга чорлайверади. Тушида эмас, баъзан куппа-кундуз куни ўнгидаги ҳам пайдо бўлади...

«Наҳот менинг тақдирим ҳеч кимни ташвишга солмаса?..» дейди алам билан.

Аслида акасининг пайдо бўлиши, қасосга ундаши Зайнабнинг хаёлидагина рўй беради. Агар Абдухамидинг руҳи чиндан ҳам у билан гаплаша олса эди, синглисидан қасос олишни зинҳор талаб қилмаган бўларди. Зайнаб хаёллари тузоғида қолган кезлари ўзининг қисмати, оиласи осмонидаги ташвиш булатларининг тарқамай туриб олганини кўп ўйлади. Бунинг сабабларини кидиради. «Буларнинг барчаси ҳаром луқмаларнинг меваси» деган ҳақиқат хаёлини ёритмайди. Балки «буларнинг ҳаммасига адамнинг ҳасадчи душманлари айбдор», деган фикр унга мутлак ҳақиқат бўлиб кўринади. Кўпроқ отасига тортган қиз онасининг йўлини кўриб турса ҳам, унга эргашибини ўйламайди.

Кеча онаси «Худодан узоқлашиш одамнинг бошига кўп балолар ёғдиаркан, Аллоҳнинг «эй бандам, сен менга бир қарич яқинлашсанг, мен сенга бир қулоч яқинлашаман», деган ваъдаси бор экан. Одам саждага бош қўйганида Раббисига яқинлашаркан...» деб насиҳат қилган бўлди. Манзура муҳаббатсиз қалб – тош қалб эканини, Тангри таоло тош қалбларга зинҳор назар солмаслигини эътиборга олмай даъват қилди. Инсон қалби уйини Аллоҳга бўлган ишқи би-

лан тузатмоғи жоизлигини, вайрона қалбини фақат муҳаббат билангина обод этмоғи мумкинлигини илмисизлиги туфайли тушунтираб бера олмади.

Ўлимнинг муздек лабига бир неча марта лаб тутган, ўлимнинг димоғидан уфураётган совук нафасдан эти сесканган Зайнаб, «дунёдаги барча нарсалар заҳарланган», деб яшаётган бу маъсуманинг онаси йўлига ўтиши учун бир-икки даъват кифоя килмас эди.

Онасининг Худога якинлашиш ҳакидаги гапи унга кора хотинни эслатди. Кейинги пайтда бу лўли хотинни эсламай қўйганди. Бу кеч онасининг гапи сабаб бўлдими, елкасига хуржун ташлаган ўша қора хотин кўзига яна кўринди. Иккинчи марта ўзини осмоқчи бўлган куни шу лўли хотинни кўрган эди. Дастрраб кўчага чиққанида кўрди, бу тиланчига пул олиб чиқмоқчи бўлганида у «менга қаранг, дардингизни олай», деб тўхтатди. Кейин: «Худо денг, дардингиз кетади», деди. Кўчага чиқмасликни тайинлади. Зайнаб қорадорининг хумори тутганда унинг гапини унутди, кўчага чиқди... Оқибатда ўша шармандали ҳол... Адаси «ўзингни ос», деган мақсадда арқон ташлаб кетди... Арқондан сиртмок ясаётганда бу лўли хотин уй бурчагида пайдо бўлган эди. «Агар Азроил шу бўлса, ўзимни осмай туриб жонимни осонгина олиб қўя колмайдими? Ўзимни осганимни билган одамлар минг хил миш-миш тўқийди. «Тўсатдан ўлибди», дейилса, «ёшгина жонга жабр бўлибди», деб ачинишади. Азроил бўлса нега тикилиб турибди? Шартта чанг солиб, жонимни суғуриб олавермайдими? Ё сиртмоққа осилишимни пойлаяптими? Уйимда осганимда бу хотин кўринмаган эди. Унда ойим қутқариб қолгандилар. Энди... ойим йўқлар...» – деган афсусли ўйлар домидан кутула олмай, кора хотинга қараб: «Сен қанаканги Азроилсан ўзинг! Осишимни пойлаб нима қиласан? Ўлимга рози бўлганимдан кейин оладиганингни олавермайсанми?» – деб бақирмоқчи бўлган, бироқ, овози чиқмаган эди.

Овози чиқмаса ҳам, кора хотин унинг нима демокчилигини англаб, «ўзингни осиб овора бўлма, сен ўлмайсан, узок яшайсан... Сен Худодан узоклашгансан, ҳар қадаминг билан яна узоклашаверасан, ҳозир ўлим топмоқчимисан? Сенга бунақанги осон ўлим насиб этмайди. Худо узок умр бериб, сени қаттиқ азобларга рўпара қиласди...» деган эди. Бу оқшом яна ўша уй бурчагида пайдо бўлиб, пичирлади. Зайнаб унинг гапларини эшита олмади.

Элчин ўтирган хонадан радио овози эшитилиб, унинг хаёлинини бўлди. Қора хотин ўша заҳоти кўздан йўқолди. Радиодан тараляётган ҳазин оҳанг, сўнг дардли қўшиқ Зайнаб ўтирган хонага ҳам оқиб кирди:

Дилда дардинг, тилда отинг, ёр,
Қани сенинг диёнатинг, ёр?
Менга бу киёматинг, ёр –
Хиёнатинг, хиёнатинг, ёр!

Зайнаб овоз эгасини таниди – Илёсбек. Қўшиқни ҳам эслади. Икки ойча аввал келганида Илёсбек «устоз, янги ашулангизни мен айтмоқчиман», деб тор чертиб, айтиб берган эди. «Радиода ёздиришга ултурган экан, бечора, балки охирги ашуласидир», деб ачинди Зайнаб. Тор ёнига най ва фижжак қўшилгани учун қўшиқ янада таъсирли чиккан эди:

Эр киши ҳеч згиларми, айт,
Фам чекмаса, эзиларми, айт,
Мени ерга teng қиларми, айт –
Хиёнатинг, хиёнатинг, ёр?

Қўшиқ тутамай, радио ўчирилгач, Зайнаб хавотирланиб, зрининг ёнига шошилди. Элчин суюнчикка бошини тираганича шифтга тикилиб ўтирас, икки ёноғини ёш томчилари намлаган эди. Хотини киргач, ўзини ўнглади-ю, ёноғини кафти билан артди. Зайнаб овунтирумокчи бўлиб гап бошласа, уни баттар хижолат

килиши мумкинлигини фаҳмлаб, ашулани эшитмаган одам кўринишида жавондан нимадир излагандай бўлди. Кейин иккита ликопча олиб, эрига юзланди-да: «хозир овқатни сузаман», деди.

Элчин йиглагани учун хижолат бўлмади. Бу ашула ўзининг руҳан хорланган кунларини эслатган эди.

Бир йил ўтибди...

Беҳол ётган Зайнаб унга мунгли нигоҳини қадаб: «Мен ўзимни ўлдирмокчи эдим... – деб йигламсираган эди. Кейин даҳшатли ҳақиқатни айтишга ўзида куч топиб, кескин оҳангда давом этганди: – Жамшид акамни ўлдиришди... Мен Жамшид акамни яхши кўрардим... Худодан яширмаганни сиздан яширмайман... Худо жонимни олмади. Болангиз туғилганидан кейин... мени ўлдиринг! Мен... сизга хиёнат қилдим...»

Бу гапларга ишонгиси келмаса ҳам Элчиннинг юраги тарс ёрилиб кетай деганди.

«Ўлдирасиз...»

Бир неча нафас сукут сақлаган Зайнаб энди пичирлаганди. Жонсиз лабларидан учган заиф сўз ўққа айланниб, Элчиннинг юрагига қадалганди.

Ўша тун уйда ёлғиз ўтирганида туғилган эди бу қўшиқ...

Зайнаб бу қўшиқнинг ўзига аталганини билмайди...

Овқат сузиб келган Зайнаб: «ўтган ҳафта тўғридаги қўшнимиз бир коса чучвара чиқарган эди. Чоршанба куни тугун оши қилиб, қўшиларга тарқатилса яхши бўлар эмиш, менам шу одатга риоя қилдим», деб кулимсиради. Зира ҳиди анқиб, иштаҳани қитиқлаган бўлса ҳам, косаларида овқат қолди. Зайнаб идишларни ювиб, телевизор томоша қилгани ўтирганда чирок ўчди. Шам ёруғида бирпас китоб ўқиган бўлди. Эрининг ўтирган ерида мудраётганини кўриб, унинг аравачадан тўшакка ўтишига кўмаклашди.

Ярим кечаси машина эшигининг қаттиқ ёпилишидан чўчиб уйғониб кетди. Аввалига «тушимда эшитилдимикин», деб ўйлади. Кейин кўча томондан овоз-

лар эшитилгандай бўлиб, ўрнидан турди-да, деразага яқинлашди. Пойлоқчи йигитларнинг машинаси ёнида икки нотаниш одамни кўриб, хавотирланди. Шу онда бир кора машина деразаси кархисида тўхтади. Зайнабнинг юраги ёмонликни ҳис этиб, телефонга югурди...

Чирок ўчган... телефон ҳам ишламайди. Машинадаги пойлоқчилар ҳам кўринмайди...

Эрини уйғотишдан фойда йўқ.

Нима қилиш керак? Отаси бекорга хавотирланмаган экан-да?!

Зайнаб бир қарорга келгунича дарвоза очилиб, тўрт-беш йигит югуриб кириб келди.

У бақиришга ҳам улгурмай қолди. Кўзига яна ўша кора хотин келди:

...сен ҳали узок яшайсан...

2

Субхи содик азони эшитилмай туриб уйғонган Манзура эшикни аста очиб, ташқарига чиқди. У эрини уйғотиб юбормаслик учун шарпасиз юришга ҳаракат қилаётган эди. Ҳолбуки, аввалроқ уйқуси ўчган Асадбек хотинини уйғотиб юбормаслик учун жимгина ётган эди. Манзура ювингани ҳаммомга кирган пайтда тунги сукунат ҳукмронлигини болохонадаги телефон жиринги тўзитиб юборди. Дам ўтмай йигитлардан бири иккала табақаси очик турган деразага яқинлашиб, паст овозда «Бек ака!» деб чакирди. Асадбек шарт туриб, деразага яқинлашди.

– Жамшид акам телефон қилдилар, Зайнаб опамикига тез борар экансиз.

Асадбек «нимага?» деб сўрамади. Орқасига қайтиди-да, тезгина кийиниб, ҳовлига чиқди. Унгача бир йигит машинани ҳозирлаб, иккинчиси дарвозани очиб турган эди.

Жамшид хожасини кўчада кутиб олди.

- Нима гап? – деди Асадбек зарда билан.
- Ичкарига кирайлик, – деди Жамшид кўрқувини яширолмай.

Ховлидаги темир сўрида бир йигит чўзилиб ётибди, иккинчисининг боши боғланган, ихраб ўтирибди. Яна иккитаси тик турибди. Асадбек уларнинг саломига алик олмай, уй томон юрди. Ётоқхонадаги қаравотда кимдир ҳаракатсиз ётибди, тепасига чойшаб ёпиб кўйилган. Буни кўриб Асадбекнинг ранги оқариб кетди. Тили қотиб қолгандай бўлди: «Ким бу?» деб сўрашга ҳам курби етмади. Жамшид хожасининг аҳволини сезиб, чойшабни кўтарди-да, ётган одамнинг юзини очди. Асадбек унга бир оз қараб тургач, умиди сўнаётган одам овозида сўради:

– Зайнаб қани?

Жамшид айбдор кишининг узр сўрашига ўхшаган овозда жавоб берди:

– Олиб кетишибди...

Бу хабар Асадбекнинг зулмат босиб ётган бағрига янги ханжар бўлиб санчилди. У такдир қартасининг бу тариқа чийланишини хаёлига ҳам келтирмагани учун довдираб қолди.

– Ким?

Жамшид «билмайман» дегандай елка қисди.

Аламига чидолмаган Асадбек мулозимини уриб юборди. Кутилмаган зарбадан мувозанатини йўқотган Жамшид чўккалаб қолди, йиқилмади. У хожалар томонидан мулозимларнинг жазоланишини кўп кўрган, бироқ, у пайтлар бу вазифани асосан Ҳайдар акаси бажаарди. Аввал муштларди, кейин тепкилаш бошланарди. Жамшид ҳозир тепкини кутди. Бироқ, Асадбек тепмади:

– Қанака сўтакларни қўйган эдинг?! – деб сўкинди.

– Элчин акам йигитларни ичкарига қўймасдилар... – деди Жамшид, каддини ростлаб.

Асадбекка бу янгилик эмас, фақат йигитларни ичкари қўймайдиган одам Элчин эмас, қизи Зайнаб эканлигини ҳам ўзи яхши билади.

— Ярим кечада беш-олтитаси бостириб келибди. Элчин акамни аравачасига боғлаб кетишибди. Қутуламан, деб ҳаракат килгандарыда бўғилиб қолганларми ё улар ўлдиришганми... ҳархолда аравачада осилиб ўтирган эканлар. Милиса чақирайми ё дўхтирми, билмай иккиланиб турувдим.

Жамшилдаги иккиланиш хожасига ҳам ўтди. Бир зум жим турди-да, тақдирга тан берган одам овозида деди:

- Милисани нима қиласан? Таниш дўхтилингни чақир. Зайнаб топилгунча «тирик», деб саклаб турсин.
- Зайнаб-чи?
- Овоза қилмаларинг.
- Қидиришни бошлайликми?

Аслида «Зайнабни қаердан қидирайлик?» – деб сўрамоқчи эди. Бундай саволга яраша сўкиш эшишиб колишдан чўчиди. Асадбек унга ўқрайиб қараб:

- Қаердан қидирмоқчисан? – деб сўради.
- Маматбей... шу ерда бўлса, ишни ўшандан бошласакмикин?
- Ҳа, ўшандан бошлайсан. Фақат... қидирмайсан, ўзи келади олдимга. Мен у хунасаларнинг ғирром ўйинини биламан. Сур тайёр турсин. Ҳалимни топиб кел.

Ҳа, у адашмади – Хонгирей ўлгани билан зулм олами ўлмаганини яхши биларди. Моргашнинг телефондаги пўписаси, Балабуханинг огохлантириши, Козловнинг ўлдирилиши, Маматбейнинг пайдо бўлиб колиши... бежиз эмас. Шиддат билан бостириб келаётган қора кунлар сели ўғлининг вафоти билан тўхтагандай бўлган эди. Йўқ, селнинг кучи ҳали кирқилмаган экан. Қора тақдирнинг қора дарёси бир ўлимга тўймадими? Нахот?!

Хонада сиқилиб ўтиришга тоқати етмаса ҳам, Асадбек сабр қилишга мажбур эди. Қизини ўғирлаганлар шаҳарни остин-устун қилиб ташлашини кутишгандир. Аввалгисида шундай қилган эди.

Унда... бошқача ҳолат эди.

Унда... мавқеи ҳам ўзга мартабада эди...

Энди-чи? Сингани ростми?

Буни ўйлашнинг ўзиёк дард устига чипкон эди.

Ҳалим келгач, дардли ўйлар исканжасидан кутулиб, аччик ҳаёт ташвишларига қайтди. Ҳалим ичкари кириб, одати бўйича хона ўртасига етмай тўхтади-да, «буюринг, хизматингизга тайёрман», дегандай қўл қовуштириди. «Шундай йигитнинг милисалиги чатоқ-да», деб ўйлади Асадбек унга бошдан оёқ разм солиб. Кейин Ҳалимжонни ажаблантириб, ўтиришга таклиф этди.

– Эшигандирсан? – деди Асадбек, савол назари билан тикилиб.

– Эшигдим, – деди Ҳалимжон зийраклик билан.

– Нима қилиш керак?

– Хонгирей бошлаган ўйиннинг давомига ўхшапти?

– Тўғри сезибсан. Хизматимни қилмоқчийдинг, фикринг ўзгармадими?

Бошқа ҳолат бўлганида Асадбек «милисангда ишлайвермайсанми?» деб кўрслик килиши мумкин эди. Лекин ҳозир бунинг мавриди эмас, мазкур маъно сакланиб колса-да, саволнинг юмшокроқ тарзда қўйилиши шундан.

– Хизматдан қочмайман.

– Очифини айтай, ҳали ҳам ишончим тўлиқ эмас, сенга.

– Синаб олишга шароит етилганга ўхшайди.

– Ҳа, етилган... Барнаулга қандай бориб келдиларинг?

– Айтишгандир...

– Айтишди. Фиманинг ўзи келиб-кетди. Шерикларинг ҳақида нима дейсан?

– Тўғрисини айтайми?

– Албатта.

– Улар ҳали ғўр. Бошида бўш жой кўп, шамол айланиб юради.

– Тўғри англабсан. Кунимиз шунакаларга қолган. Қовоқ каллада шамол айланмаслиги учун пишитишимиз керак.

– Пишитиш қийин бўларов... Уларнинг фалсафасини ўзгатириш керак.

– Яна қанақа фалсафа?

– Сурники жуда ғалати: «Кимнинг пули бўлса – ўшанинг келажаги бор, пули йўқда келажак нима қилсин?» – дейди. Бу фалсафаси яхшиликка олиб бормайди.

Бу гапни эшишиб, Асадбек бир сесканди. Чунки унинг ўзи ҳам бир пайтлар шу фикрда койим эди. Ка-сали зўрайган пайтда эса «Пулдорнинг ахволи шуми? Пулдор одамнинг келажаги – кафанми?» деб афсусланганди.

Ҳозир бу фалсафа хусусида фикр юритишга вакти ҳам, тоқати ҳам йўқ эди, шу сабабли муддаога кўчди:

– Энди гап бундай: Маматбей шу ерда бўлса, менинг олдимга ўзи келади. Жамшид билан келишиб, унинг изига одам қўясанлар: юрса – юрларинг, ётса – ётларинг, турса – турларинг.

Ҳалимжон вазифага тушундим, дегандай бош ирғагач, кетишга рухсат тегди.

Асадбекнинг ёлғизлиги бу сафар узок чўзилмади. Кутаётган одами уни пешинга яқин йўклиди. Қорақош эшикни қия очиб:

– Маматбей деган одам сўраяпти, – деди.

Бу хабарни эшитган Асадбек сакраб ўрнидан турди. Мехмонни бўғиб ташлашга қасд қилгандай биринки қадам босди-ю, тўхтади.

– Чой ичяптилар, бирпас кутар экансиз, де. Ўзига ҳам чой қуйиб бер, ўпкасини босиб турсин.

Шундай деб илиб қолган чойдан икки ҳўпламгина куйиб ичди-да, жойига ўтириди. Маматбейга сир бой бермаслик учун ўзини босиб олиши керак эди. Суянчиқка суюниб, кўзларини юмди. Ҳеч нарсани ўйламасликка ҳаракат килди. Эплолмади... Кўз олдиди қизининг маъюс чехраси гавдаланиб туравер-

ди. Бу кўриниши ҳайдашни истамади. Кўз олдига бошқа нарса келтиришга интилса, қизини тўрга тикиб кўядигандай юраги эзилди.

Ўн беш дақиқадан сўнг Қоракошни чакириб, «кирсин», деб буюрди.

Маматбей ҳеч қанақа разил воқеа юз бермагандай, кулимсираганича кириб келди. Асадбек ўрнидан ҳам турмади, сўрашмок учун кўл ҳам узатмади, меҳмонни ўтиришга ҳам таклиф этмади. Маматбей бу илтифотсизликни сезмаган одам кўринишида яқинлашиб, стулга ўтирди.

– Чай ичиб ўлдунгми, жан гардашим, Аллах сана чўх гўзал иштаҳа версин.

Асадбек жавоб бермай, ғазабли нигоҳини унга қадаб ўтираверди. Илико: «Бизнинг баҳтимиз зўр душманнинг қўлидан ўлим топиш» деган эди. Асадбек кўзига бир қоп ахлат бўлиб кўринаётган Маматбейдан нигоҳини узмай, «шулар зўр душманми?» деб ижирғанди. Кейин «бу бошни силаш керакми ё кесишими?» деб ўйлади.

Минг тўққиз юз қирқ тўққизинчи йилнинг ўттиз биринчи декабридан бери унинг қалбида бир қасос ўти ёниб-ўчгач, иккинчиси аланга олаверади. Асадбек отасининг қасосини олиш учун яшамай, отасига яхши ном, яхши дуо келадиган ишларни қилгани хайрлироқ эди. Олган қасосидан ким қандай наф кўрди? Отасини олиб кетганларнинг бири осилганида, иккинчиси жинни бўлиб дайдиганидан кейин ҳаёти чиройлироқ бўлиб қолдими? Йўқ! Ҳатто ўзининг қонга ташна синик кўнглига ҳам тасалли етмади.

Энди янги қасос гулхани ёниб, ичини куйдиряпти.

Маматбей «аввал сен дардингни айтиб, ёрил, кейин мен гапларимни айтаман», дегандай бамайлихотир ўтираверди.

– Қизим кани? – деди Асадбек тишларини ғижирлатиб.

– Бу ман учун коронғудир, жан гардашим. Бу хусусда сўз юритмакка манда ваколат-да йўқтур.

- Нимага ваколатинг бор?
- Сен-да мусулманин, мен-да...
- Мусулмонликни аралаштирма. Нима демокчи-санлар?
- Жан гардаш, анжак санинг бу аҳволинг ила катта кетмагинг хатарлидир, сўзима қулак ас.
- Шунаками?! – Асадбек шарт туриб, унга рўпара келди-да, ёқасидан бўғди. Маматбей шунда ҳам талвасага тушмади. Асадбекнинг сўкишларини индамай эшилди. Ёқасини бўшатишга ҳам, ўзини хорланган ҳис қилиб жавоб қайтаришга ҳам уринмади. Унинг бу қилиғи Асадбекнинг шаштини қайтариб, ёқасини бўшатди. Маматбей шундан кейингина тилга кирди:
 - Қизинг каерда, ман билмиюрим. Иста, мани ўлтур, истарсан, мани гарова ол. Ҳар ики ҳолда-да ютқизик санинг томонингда ўлур. Ютқизмакни истаюрмисан? Ўйлайманки, йўқ. Сан Гирейхана муқобил ўлма, на деса десин, сан уни бажар. Санинг ихтиярингда ўзга чара йўқтур.
 - Асадбекнинг бўйинини синдириб, гумаштага айлантириш йўлини топдик, деб қувоняпсанларми?! Йўқол!
 - Ғазаб ихтияринда ўлмак хатарлидур, гардаш. Сан шартни тингла. Сўнра мани тепиб ҳайда.
 - Айт, шартингни, – деди Асадбек, жойига қайтиб ўтириб.
 - Шарт санинг учун заҳматли ўлмас. Ҳафта ўн кун орасинда Афгандан бир юк ўтар. Сан уни Термизда қаршилаб, то Қазақстанга ўтгуни қадарли назарингда ушлаб туражаксанки, то ҳеч бир begana кимсанинг назари душмасун. Гирейхан бу учун сана чўх илтифотлар кўрсатијор.
 - Шунинг ўзими?
 - Ҳа, гардаш.
 - Олдинги хўжайининг «куч билан битадиган иш учун ҳақ тўлаш аҳмокликдир», дерди. Моргашнинг

бундан хабари йўқми? Кучларинг кўп-ку, нимадан кўркасанлар?

– Ҳар бир юмушнинг ўз ҳадиси вордур. Гирейхан мурувватин сан инкор эта кўрма.

– Мурувват, дегин. Сенларнинг ишларингда мурувват йўқ, мажбурият бор.

Ноҳақлик зўр келган онда ҳақиқатнинг ожиз қолиши аниқ. Асадбек ғазаб алансини босиб, энди арконни узун ташлашни ихтиёр қилди:

– Моргашга айт, мен бу ердан чиқиб, уйимга етгумчима кизим уйида бўлса, шартини қабул қиласман.

– Бу шартинг мақбул ўлмас, гардаш. Санда шарт қўймак ихтияри йўқтур. Юк Қазақстана ўтгани ҳамон кизинг уйингда ўлажак.

Маматбей тўғри айтди: Асадбек хозир иложсиз эди. «Ўқ илон»нинг тасарруфидаги оламга чанг солишдан тоймаган куч аҳмоқ эмасдир. Кизни узок шаҳарга олиб кетмаган тақдирда ҳам, яхшилаб яшириш йўлини килгандир. Икки ярим миллион одам ғимирлаб юрган шаҳарда кизни топиш, игнани излашдан ҳам мураккаброқ эканини билгани учун ҳам иложсиз эди.

Маматбей эса рўпарасида ўқилон эмас, чувалчанг типирчилаётгани каби мағрур ўтиради.

Асадбекнинг бу ҳолга чидаши қийин бўлди.

Лекин чорасиз эди...

– Кизимни кўйиб юборларинг, ўзимни гаровга олларинг. Сенлар айтган жойда ўтириб, ишларингни битириб бераман. Битирмасам – ўлдирасанлар.

– На ўлди, сана гардаш? Биз сани ўлтурмак истар ўлсак, муаммо йўқ эди. Сан шарт қўя кўрма. Бизим шарта кўнар ўлсанг, кизинг сочидан бир тола ҳам тўкилмас.

– Яхши... жавобини эрталаб айтаман.

– Бу ишинг дуруст ўлмас, жавабин акшам олажакмиз.

– Яхши... унда... ўзинг билган Жамшид билан гап-

лашаверасан. Жамшид бу ишнинг оғир-енгил томон-ларини билади.

– Бу кааринг чўх гўзал ўлди, гардаш. Ман Ги-рэйхана дедимки: Бек гардашимнинг ақли чўхдир, ул Масковдаги гардаши Илико ила гардашлиқ работасин узиб ташлагандир.

Асадбек бу гапдан «Илико билан боғланишга ово-ра бўлма, агар у аралашса, қизингнинг аҳволи вой бўлади», деган маънони уқиб, заҳарли жилмайди:

– Сен тулки жуда сезгирсан-а! Илико билан алоқа-ни узганим рост. Акаси мендан анча қарз эди. «Акам қарздор бўлса, мозорига бориб, ўзидан талаб қил, мен тўламайман», деб туриб олди, туллак. Ишлари орқага кетганми, пули йўқ шекилли? Бунақа одам менга дўст бўла олмайди.

Маматбей бу гапдан қувонган кўринса-да, Асадбекнинг қарорига бир ишониб, бир ишонмай, ўрнидан турди. Стол устидаги қаламни олиб, газетанинг бир четига рақамларни ёзди:

– Телефон нумерам санда-да турсин. Энди биз са-нинг ила иш бирлиги япажакмиз.

Маматбей чиқиб кетгач, Асадбек кўп ўйлаб ўти-май, телефон гўшагини кўтариб, Томск билан уланди. «Эшитяпман, гапиринг», деган овоз келгач, ўзини танитиб, «Павел Владимировични чақириб беринг», деб илтимос қилди. Ярим дакика ўтмай, Балабуханинг овози эштилди:

– Бек, тинчликми? Нима бўлди?

Воқеани баён килишга Асадбекнинг тили айланма-ди. У Балабухага шикоят қилмоқчи ҳам, ёрдам сўра-моқчи ҳам эмасди. Ундан баъзи маълумотларни сўраб, аниқлаб олмоқчи эди. Балабуха унинг жим қолганидан хавотирланиб:

– Бирон нохушликка учрадингми? – деб сўради.

– Нохушликка дейсанми? – Асадбек ўзи учун ҳам кутилмаганда хўрсинди. Лекин сир бой бергиси кел-май, гапни улаб кетди: – Қизимни ўғирлашди, куёвим-ни ўлдиришди.

- Моргашми?
- Яна ким бўлиши мумкин?
- Шунга ўхшаган бир ҳайвонлик қилишини кутган эдим. Сени огохлантирувдим, хафа бўлмагин-у, ўшанда катта кетувдинг. Хўп, ким ўтган гапни кавласа, кўзи ўйилсин. Нима деяпти у мараз?
- Хонгирей нимани талаб қилган бўлса, унинг дарди ҳам шу – корадори.
- Шартига кўнишдан бошқа чоранг йўқка ўхшайди.
- Мен дуч келган битлиқига тиз чўкадиган лақма эмасман!
- Мен сени камситиш фикридан узокман, Бек. Қизингни қандай қуткармоқчисан? Агар уни бу томонларга олиб келишган бўлса, шубҳасиз, ёрдам бераман. У ёқда бўлса... демак, бу ўзингнинг муаммоинг. Яна қандай ёрдам беришим мумкин?
- Бир-иккита маълумот керак менга.
- Нималарни режалаштиряпсан, менга айта оласанми?
- Ҳозирча йўқ. Бугун ва эртага у аглаҳ қаерда бўлишини, атрофидаги одамлар қанчалигини аниқ билишим керак.
- Эшитишимча, у ҳозир Хонгирейнинг дала боғида. Аммо эртага аzonда мен билан учрашув белгилаған. Ишончим комилки, учрашувга ўзи келмайди.
- Нега? Қўрқадими?
- Қўрқмайди, у тулкига ҳам дарс берадиган айёр. Одамларини менга ташлайди. Балки ҳаммамизни кириб ташлашга ҳаракат қиласар. Бек, ўйлаб иш қил, олов билан ўйнашма.
- Ёшлигимда менга «ўқилон» деб лақаб беришганди. Ўқилон ташланса, одамнинг товонидан кириб миясидан чиқиб кетади. Менам бир ташлансам, душманим нафас олишга улгурмай колади. Шунинг учун ҳам мени ҳамма ҳурмат қиласарди.
- Буни биламан, Бек. Лекин у замонлар ўтиб кет-

ган. Агар бу томонларга келадиган бўлсанг, қаерга қўнғироқ қилишни биласан. Мен кечгача Москвага етиб бораман.

Асадбек унга «ўқилон»ни бекорга эслатмади. «Ўйчи ўйига етгунча, таваккалчи ўйига етади», деганларидай, ҳозир «нима қилсам экан?» деб машварат қурадиган вақт эмас. Рақиб ғолиблик жомини симираётган пайтда унга шундай зарба бериш керакки, тондан кириб, мияни ўпириб чиқиб кетадиган ўқилон ҳам бу тадбир олдида ип эшполмай қолсин.

Асадбек режасини хаёлан пишириб, катъий қарорга келган пайтда Жамшид кириб келиб, ҳисоб берди:

– Элчин акамни эски касаллари бўйича расмийлаштириб қўйишди. Ўлим ҳақидаги гувоҳномани ҳам шу асосда беришади. Ўликхонадаги одамнинг оғзи маҳкам, гулламайди.

– Ўликхонага қўйдиларингми? – деб сўради Асадбек.

– Касалларнинг ичидаги сақлаб бўлмайди-ку?

– Йигитларингдан биттаси ўша ердан жилмасин, дўхтирларингга ишониш кийин, бири бўлмаса бири лақиллади. Маматбей опнанг келди, мана, телефоны, – шундай деб ракам ёзилган газетани у томон сурниб қўйди. – Изига тушиб овора бўлмаларинг. Улар ўзларича очик ўйин ўйнашмоқчи. Ҳар қанақа очик ўйиннинг таги ғирром эканини мен билмас эканманми?! Ҳозир Сур, Ҳалим, яна тўртта бақувват йигитинг билан Москвага учаман. Сен шу ерда шай бўлиб турансан. Биз учгандан кейин шу ракамга қўнғироқ қилиб, итдан тарқаган Маматбейга «хизматингизга тайёрман, Бек акамнинг шарти кетиб, парти колган, шунака зўрлаганларинг ҳам дуруст. Ҳозир иккита лимонад цехи билан тирикчилик қиласидиган замон эмас», – дейсанми, хуллас, бошимга ҳар қанақа мағзава ағдаравер. Ҳайдар аканг ўрнимни эгаллаш учун қандай ҳаракат қилган бўлса, ўзингни шундай кўрсат. Термизга бугун

одам жўнаташни талаб қилса, жавоб бериб юборган йигитларингни қайта тўплаб, буйруқларини бажар. Тушундингми?

– Тушундим... Фақат... у ёкка борадиган бўлсангиз... олти киши камлик қилмайдими?

– Етти кишимиз, янглишма. У ёкка пода-пода бўлиб боришнинг хожати йўк. Одам тўплашни Ҳайдар аканг яхши қўрарди. Сенам ўшанга ўхшайсан. Керак бўлса битта ўзим рўпара келаман у ит эмганларга!

Асадбекнинг бу гапида қатъий ишонч зохир эди. У олифтагарчилик учун айтмади бу гапни. Болалигига ҳам, ундан кейинги ҳаёти давомида ҳам «биргабир чикиш»дан қайтмас эди. Ҳатто кавказликлар чақиришганда ҳам чўчимаган эди. Отасини қамоқقا олиб кетгандардан бирини топиб, ўч олгани бу ёқдаги кавказликларга маълум бўлгач, унга жазо бермоқчи бўлишган эди.

– Йигирмата йигит душманларингнинг қонига ташна бўлиб турибди. Орқангдан борамиз-у, ҳаммасини бира тўла онасиникига кирғизворами!

Кесакполвон шундай деб катта кетганда Асадбек: «Биттанг ҳам бормайсан, сен бугун уларни онасиникига кирғизворсанг, эртага у ёқдаги юзтаси отасиникидан чиқиб келади», – деб унинг шаштини қайтарди.

«Келиб-келиб шулардан кўркяпсанми?» деган ма-ломатни ўзига олмай: «Қирғин бошланишини истамайман, улар мени чақиришяпти, демак, бир ўзим бораман. Агар ўлдиришса, отам учун ўлган бўламан. Бу ҳам чиройли ўлим», – деди.

Чиндан ҳам ўлимни бўйнига олиб борди. Кесакполвон «Улар билан ҳазиллашма», деб йўлдан қайтармоқчи бўлди. «Мен ҳазилни ёмон кўраман, теппа-тенгига гаплашаман», деб қароридан қайтмади.

– Бу дунёда бирга-бир чиқиб гаплашадиган мард қолмаган, – деди Кесакполвон ўжарлик билан.

– Бирга-бир чиқиб, теппа-тенг гаплашадиган битта одам қолган, валдирама, – деди Асадбек.

– Кавказлигингни айтяпсанми, ўзинг валдирама, унингда мардликнинг «м»си ҳам йўқ.

– Ўзимни айтяпман, кавказлигинг билан нима ишим бор? Йигитларингни тўплаб қўйган бўлсанг, чойхонада ош дамлаб тур, узоғи билан икки соатдан кейин қайтаман.

Марказга жойлашган меҳмонхона орқасидаги дарахтзорда уни тўрт йигит қарши олди. Тўрттовининг лабларида сигарет, бармоқларида тилла узук, бўйнилари ва билакларида тилла занжир... Асадбекни ўраб олишиб, «сенам одаммисан?» дегандай беписандлик билан караб туравериши. Уларнинг бу килиғи Асадбекнинг ҳамиятига тегиб, йигитларини бошлаб келмаганига афсусланди. «Буларнинг уруғини ўйнатиб юборишим керак эди», деб ўйлади. Кавказлик йигитлар «кимсан, нега келдинг?» деб сўрашмади, у ҳам гапирмади. Орадан ўн-ўн беш дақика ўтгач, меҳмонхона томондан башанг кийинган, кирра бурни остидаги мўйлови ярашмаган бир йигит келиб, Асадбекнинг рўпарасида тўхтади. У ҳам шериклари сингари сурбетлик билан тикилди. Кейин энсаси қотган одам овозида сўради:

– «Ўқилон» деганлари сенмисан?

– Менман, – деди Асадбек киприк қоқмай унга тикилиб.

– Айтишларига қараганда, менинг юртимда адабишиб юрган экансан?

– Юрting қаерда ўзи? – деб сўради Асадбек дадил овозда.

– Кавказда... Унутдингми? У ерда бир одамни ранжитибсан?

Асадбек унинг нима демоқчи эканини англаш, «кимни ранжитибман?» деб сўрамади:

– Ранжитган бўлсан, сабаби бордир? Бекорга қидирмагандирман уни.

– Агар мингта сабабинг бўлса ҳам, бу ҳаром қўлингни бизнинг одамга қўтаришга ҳакқинг йўқ! –

деди йигит тупук сачратиб. – Унинг бир пайтлар ахлат бўлганини биламиз. Ахлатдан ҳам баттар бўлгани учун ундан нафратланамиз. Бизнинг миллатдан бўлгани учун эса севамиз! Биз миллатдошимизни хорлатиб кўймаймиз, шунга ақлинг етмадими?

– Сенинг хисобинг бошка, меники бошка: у ўлиши керак эди – ўлди. Мен отам учун қасос олишим керак эди – олдим. Бу хисоб-китобнинг ҳеч мураккаблиги йўқ. Менинг ўрнимда бўлганингда ўзинг ҳам шундай қиласардинг.

– У отангни ўлдирғанмиди?

– Шунақа десам ҳам бўлади. Қирқ тўққизинчи йилда отамни қамаган, отам Сибирда ўлиб кетган. Сен севадиган миллатдошинг жуда кўпларнинг ёстигини қуритган. Агар сен ҳакиқий кавказлик бўлсанг, ўғлонларнинг оталар учун қасос олиши мутлақ шараф эканини билишинг керак.

– Сени ўжар, ахлоқсиз, деб тўғри айтишган экан. Сендақаларни ўлим яхши кўради.

– Кавказга бориб келгунимча отам учун қасос ололмай ўлиб кетишдан кўрқардим, энди кўрқадиган ерим йўқ.

– Қасос олиб бўлдингми?

– Буниси энди менинг ишим.

– Албатта... албатта... сенинг ишингга аралашибга тоқатим йўқ. Йигитларинг кани, бу атрофда кўринмайди, пистирманг қаерда?

– Ўзимнинг уйимда ўзим пистирма кўяманми? Бир ўзим келдим.

Башанг йигит «ростданми?» дегандай шерикларига каради, улардан бири Асадбекнинг гапини тасдиклаб бош иргаб қўйгач, кулимсиради:

– Бир ўзинг келган бўлсанг... гапни чўзишдан маъно йўқ. Оғайниларимнинг сенга нисбатан бўлган нафратлари чексиз эди. Лекин биз ўғлонлар қасосининг кадрига етамиз. Мардлик қалиб келибсан, биз ҳам мардлик қиласиз, юр, дастурхонимизнинг азиз меҳмони бўл...

Ха, ўшанда шундай бўлган эди. Жамшид буни билмайди. Балабуха тўғри айтди: у замонлар бошқача эди. Ҳозиргиларда бунақа мардлик йўқ.

Асадбек килинадиган ишларни Жамшид билан келишиб олгач, ўрнидан турди. Аэропортга боришдан олдин уйга бирров кириб-чиқмокчи бўлди.

Ховлига қадам босди-ю, шийпон зинасида паришон ўтирган Манзурага кўзи тушиб «билиб қолдими?» деган хавотирда тўхтади. Манзуранинг бошидаги рўмоли сирғалиб елкасига тушган, нигоҳи бир нуқтага қадалиб қолган эди. Эри келганда пешвоз чикишга шошилувчи аёлнинг қимирлагиси ҳам йўқ эди.

– Манзур, сенга нима бўлди? – деди Асадбек унга яқинлашиб.

Манзура дардли нигоҳ билан унга қараб, синик овозда салом берди. Асадбек хотинининг юзидаги ғам чизикларига қараб, инграб юборай деди.

– Нега бу ерда ўтирибсан?

Манзура эридан берухсат бир иш қилиб кўйган айбдор хотиндай бош эгиб хўрсинди.

Тонгда таҳорат қилиб чиққунича эрининг шошилиб кетиб қолишидан хавотирга тушди. Намозини қандай ўқиганини ҳам билмади. Юраги потирлаб, ўйнаб кетаверди. Болохонадаги йигитни чакириб:

– Аканг қанилар? – деб сўради.

– Билмадим, шошилиб кетдилар...

Йигитдан тайнинли жавоб ололмаслигини билса ҳам яна сўради:

– Ким телефон қилувди?

– Билмадим, меҳмон келибди шекилли...

Тонг отди... Куёш терак бўйи кўтарилди. Хавотирини енгиш учун таҳоратини янгилаб, чошгоҳдаги нафл намозини ўқиди. Кўнгли бир оз таскин топгандай бўлди. Нонушта ўрнига ярим пиёла чой ичди. Томоғидан бир тишлам нон ҳам ўтмади. Телефон гўшагини кўтариб Зайнабга кўнғироқ қилди – жавоб йўқ. Кейин эрига сим қоқди – Коракош гўшакни

күтариб, хўжайини меҳмонлар билан юрганини маълум қилди. Бундай гаплар билан безовта она қалбини алдаш қийин. Манзура яна Зайнабнинг рақамини терди... Учинчи марта ҳам жавоб бўлмагач, кизиникига отланди...

Тайинли хабар эшифтмаган бўлса ҳам, ҳушидан кетар ҳолида қайтиб, шийпон зинасига ўтирган эди.

– Тур, уйга кир, – деди Асадбек уни билагидан ушлаб.

– Зайнабникига борувдим... – деди Манзура ўрнидан туриб.

– Нега бординг?

– Сиз ҳам борибсиз-ку? Нима бўлди?

– Ким айтди, борганимни?

– Кўшни кўрибди. Эрталаб сал бесаранжомлик бўлганмиш-ку?

– Кўшниларнинг миш-мишига ишониб ўтирибсанми? Эрталаб қизинг телефон қилувди, куёвингнинг мазаси қочибди. Бориб, касалхонага ётқизиб келдик. Зайнаб эрининг ёнида колди.

– Қайси касалхонада?

Манзура шундай деб «мени алдаманг», деган маънода эрининг кўзларига маъюс тикилди. Қизи дастлаб ўғирланганида Асадбек хотинини ношудликда айبلاغан эди. Энди бу хабарни ўзи айтиши керакми? Қайси тили билан айтсин? Яраланган кўнгилни баттар оғритсинми?

Асадбек хотинининг бу карашига дош беролмай, нигоҳини олиб қочиб, уни заҳарли оҳангда енгмоқчи бўлди:

– Айтсам, ҳозир учиб борасанми ёнига?

– Ҳеч бўлмаса телефонда гаплашай?

– Шарт эмас. Бугунча безовта қилма, эртага бирга борамиз.

Асадбек хотинини ишонтиргандай бўлиб йўлга отланди.

Манзура дардли жилмайиш билан эрини кузатиб қўйгач, яна шийпон зинасига бориб ўтириди. Алхол

у ўзини фақат шу ҳовлида эмас, олам аро ёлғиз ҳис қилди.

Бу қанақа ҳаёт ўзи? Худо унга уч фарзанд берди-ю, лекин худди тирнокка зор хотин каби ёлғизлатиб кўйди. Уйда ҳамма нарсаси бор. Бекаму кўст яшашига кўпчилик ҳавас қиласи.

Фақат... биттагина бўлса ҳам дардкаши йўқ...

У эрининг алдаётганини билиб турган бўлсада, эътиroz қила олмади. Куёвига эмас, Зайнабнинг ўзига бир нима бўлганини сезди. Манзура оғир дард юкларининг ҳаммоли бўлиб яна қанча яшашини билмасди. Бунақа юкнинг эзиз туришига ҳеч бир она чидамаган, Манзура чидай оларми? У ўзига аталган ташвиш сандигини тўлиб-тошган деб ҳисобларди, эрини кузатиб, ўйлаб қараса, бу сандикда хали бўш жой бордай туюлди.

Кимнингдир елкасига бошини кўйиб йифлагиси келди.

3

Асадбек ўтирган машина унинг вужудини олдинга сурар, ҳаёли эса ортда қолаётган уйида, паришон чехра билан кузатиб қолган хотинида эди. Жон вужудини тарк этмоқ истади. Дард куртлари емириб адо қилаёзган тана елпигич каби тебрана бошлади. Ҳозир дардга бўйин бериши мумкин эмасди: чуқур-чуқур нафас олиб, енгил тортгандай бўлди.

Самолётнинг олд бўлмасидан ёнма-ён жой олдилар. Ҳалимжон хожасининг одатини билгани учун тарбияли мўмин боладай жим кетди. «Атрофда хатар йўқмикин?» деган мақсадда дамо-дам олазарак караб кўйиши назарга олинмаса, тек ўтирди. Ахтам ўриндикка ташлаб кўйилган кўп сахифали русча газетани вараклаб, у ер-бу еридан чўқилаб ўқий бошлади. Асадбек бошини суюнчикқа тираб кўзларини юмди. Бир маҳал Ахтам Ҳалимжоннинг бикинига тирсаги билан туришиб, гапга солди:

— Мана буни эшит: Хитойдаги зилзилада қирқ минг одам ўлибди. Яна қирқ минги бедаракмиш. Саккиз кун давомида босиб колган уйи тагида қолган бир юз саккиз ёшли кампир тирик чикибди! Сувсиз, овқатсиз саккиз кун яшаганмиш. Минг-минглаб ёшлар ўлиб кетганда бу кампирнинг тирик қолиши ҳаётнинг адолатсизлиги эмасми?

— Адолатсизлик эмас, — деди Ҳалимжон паст овозда. — Қирқ йил қирон келса, ажали етган ўлади.

Бу гапларни Асадбек ҳам эшилди. Кўзларини очмаган ҳолда «ўчириларинг», деди. Ҳалимжон «жим ўтиранг ўлармидинг, гапингга жавоб қайтарган мен ахмок!» дегандай Ахтамга норози қиёфада каради-ю, бошини бурди. Ахтам эса газетани тўрт буқлаб, оёғи остига ташлади-да, суюнчиқни пастлатиб, ястаниб олди.

Кўзлари ярим юмук Асадбек гўё воқеликдан тамоман узилгандай эди. Ҳавотирли ўйлар ҳукмига ўзини топширган одамнинг аҳволи ачинарлими ё дўзах ўтида куяётганникими – буни аниқлаш мумкин эмас. Ўйларнинг бири ёғоч қурти сингари миясини кирчиса, бири чўғ бўлиб товонини куйдирса, бири илон каби қўйнига кирса, яна бири сиртмоқ бўлиб бўйнига осилса, бошқаси эса ўргимчак тўрига айланниб, кўл-оёгини чирмаб ташлаган бўлса, каердан, қандай чора ахтарсин? Москвада камалиб қолган ўғилларини чиқариш учун учганида ҳам худди шундай аҳволда – оташ чўғлар узра ялангоёқ юргургандай бўлган эди. Ўша сафар чоғида ўттиз йил олдинги бир фарёд қайта уйғониб, вужудини тилкалаб ташлаганди. Ҳа, кизи бадном бўлган хотин қарғаган кезда ҳали Зайнаб туғилмаган эди. Қалб фарёди билан отилиб чиқкан қарғишнинг ўлмас экани, йиллар чиғириғидан ўтиб келиб, кутимаган онда тақдирга чанг солишини ўшандада билмаган эди.

«Худодан қайтсан!» – хотиннинг фарёди эди бу.

«Худодан қайтибди... Сен зўрлаган қизларнинг

ҳам ота-оналари бор эди...» – ошнаси Жалилнинг шафқатсиз хulosаси шу эди.

Хозир Москвага учаётган онда бу фарёд яна момакалдирок сингари гумбурлаб, вужудини титратиб юборди. Жалилнинг овози гумбурламади, аксинча, висирлаб, томир-томирларига сингиб, қақшатди. Ҳаммамасси ўшандаги даҳшати билан яна кўзига игна бўлиб санчилди.

Худодан қайтиби...

Бу кулоги остида жаранглаган овоз эмас, балки юзга урилган ўлим нафасидай туюлиб, баданига муз юурди.

Зайнаб ўғирланганда Жалил айтган бу гап йил давомида унтуилмаган, дараҳт илдизига тушган курт сингари юрак томирларини кемириб ётган эди. Гарчи ўшанда «Менинг маишат қилганимни кўрганмидинг?!» деб баланд келишга уринса-да, факат ўзи-ю ва Аллоҳгагина маълум бўлган қиликларини эслаб, бу хулоса рўпарасида ич-ичидан таслим бўлган эди.

Хозир...

Жалилнинг овози эшитилгач, энди ўзи кўринди...

Кўзларида ғазаб учқунлари бор...

Киприк қоқмай яна гап бошлади:

– Ўтмишда ўтган донишмандлар чиройли безатилган дунёни шайтоннинг дўконига ўхшатишган. Ким бу дўкондан бирон нарса олса, то ҳақини тўламагунича шайтон ҳоли жонига кўймайди. Тақдирдан нолима, безакларга маҳлиё бўлиб, бу дўкондан кўп нарсалар олиб кўювдинг, қизингнинг номуси, ўғлингнинг жони билан ҳақ тўладинг. Эҳтимол, тўловларингнинг яна чаласи бордир. Шайтоннинг иши шунака, ҳақини пул билан олмайди, унга банданинг ғамли кўз ёшлари керак, конли кўз ёшларидан эса хузурланади. Шуни билмай қолдинг. Эсингдами...

– Бўлди, бу гапларингни ҳадеб такрорлайверма, ундан кўра дуо қил, боламни Худо асрасин!

Халимжон хожасининг пичирлаб айтган бу гапини

эшитиб, унга қаради-да, «уйкуда алаҳсираяптилар», деб ўйлади.

Самолёт Домодедово аэропортига қўниб, ташкарига чикишганда дим ҳаводан кўнгиллари бехузур бўлди. Икки кун ёқкан ёмғирдан сўнг кун бўйи куёшнинг киздериши натижасида ердан кўтарилиган намлик шаҳарни эгаллаб олган, куёш ботган бўлса-да, бу намликни тарқатиб юборишга қодир шабада эсмаётган эди.

Асадбек шу ернинг ўзидан Балабухага қўнғирок қилди:

– Ҳалиги маълумотда ўзгариш йўқми?

– Йўқ. Ҳозир бир одам сенга яқинлашади. Нима дейишини биласан.

Қисқа гап тўсатдан узилди. Асадбек ким келар экан, деб атрофига аланглади. Шу пайт унга бўйдор малла йигит яқинлашиб: «Балабуха аксирмай кўйди», деди-да, жавоб кутмай, кўча томон юрди. Ахтам ҳам, Ҳалимжон ҳам Барнаулда кутиб олиб, ҳамроҳ бўлган бу йигитни танишди. Ахтам тез-тез юриб бораётган хожасига яқинлашиб: «ишенчли йигит, бизни Фиманикига шу олиб борган эди», деди. Асадбек гапни эшитмагандай кетаверди, унга ҳатто бир караб ҳам кўймади.

Майдончада турган «РАФ»га чиқишлиари билан, машина тез кўзғолди. Аэропортдан узоқлашишгач, ҳайдовчининг ёнида ўтирган йигит орқасига ўтирилиб, Асадбекка юзланди:

– Мижозингиз ҳозир Шаховскойда, икки соатлик йўл. Район марказида битта «Запорожец» билан «Москвич»га ўтамиз. Ўрмонга кираверишда «КамАЗ» кутади.

– «КамАЗ»инг нимага керак? – деб сўради Асадбек.

– Темир дарвозани очиб беради.

Асадбек эҳтиёт чораларини эшитиб, Балабуханинг ниятини тушунди: «Демак, Моргашни йўқотишни

мүлжаллаб кўйган экан, у пишириб кўйган ошни мен сузиб оламанми?» Ҳозир Балабуханинг мақсадини мушоҳада килиб ўтирадиган вақт эмасди. Асадбек темир дарвозадан ўтгунига кадар ихтиёри шу йигит кўлида эканини англади.

— Ярим соат вақтингиз бор. Эрталабки рейсда Ленинградга учасиз. У ерда уч соат бўлиб, кейин уйингизга қайтасиз.

Агар бу гапни Балабуханинг ўзи айтганида Асадбек: «Эҳтиёткорликни оширвординг, Масковдан тўғри учавераман», деб зътиroz билдирган бўларди. Бу йигит ижрочи, хўжайини нима деган бўлса бажаради.

Шаховскойга етишганда машинадан тушмай туриб, малла йигит ён чироқни ёқди-да, чўнтағидан тўрт буқланган қоғоз чикариб, ёйди:

— Эслаб қолинглар: бу Хонгирейнинг қароргоҳи. Моргаш ҳамма хоналарнинг чироғини ёқиб қўяди. Ётоқда ҳам, меҳмонхонада ҳам ётмайди, қазноқقا жой қилиб олган. «КамАЗ» дарвозага урилиши билан, мен ошхона орқали ўтиб, ўша қазнокни оламан, сенлар, — шундай деб Ахтам билан Ҳалимжонга каради, — ётоқ билан меҳмонхонани босасанлар. Пойлокчилар буларники. Бир шартни унутмаларинг: бу ер Барнаул эмас, ўзбошимчалик килмайсанлар.

Уларнинг қисқа ва кескин тарзда айтилган буйруққа сўзсиз бўйсунишдан ўзга чоралари йўқ эди. Ҳалимжон билан Ахтамга кимнинг буйруғига итоат этиш фарқсиз эди, Асадбекка эса оғир ботди. Малла йигитнинг сўзини бўлди:

— Энди сен ҳам эшитиб ол, — деди Асадбек унга амр оҳангига: — «КамАЗ»инг керакмас, дарвозани бузмай, шовқинсиз оламиз.

лар ичи Ҳамзатбей ҳам, бошқалари ҳам унга индамай қўйишиди. Ҳатто Балабуха қўнғироқ қилиб, иноклик билан ишлашни таклиф этди. Моргаш бу таклифга ишонқирамай, уни Москвага чақиртирди. Аввалги куни Бугай билан ҳаммомда учрашиди. Яқиндагина кўз ёши қилиб юрган Бугай Хонгирейнинг ўлимидан кейин катта гапирадиган бўлиб қолган эди. Хонгирей унинг шохини қайириб қўйган эди, Моргаш бира тўла синдирмокни касд килди.

– Бугай, Хонгирей ўлмаганидан хабаринг борми? – деди у салом-алик ўрнига.

– Бизнинг ишимизда ҳеч ким ўлмайди, – деди Бугай.

– Хонгирейга фойданинг йигирма фоизини ваъда қилган эдинг-а?

– Адашдинг, беш фоизга келишганимиз.

– Хотиранг пасайиб қолибди, Бугай. «Орхидея»ни очганингда Хонгирей сендан ҳеч нима талаб қилмади. Четга темир чикармокчи бўлганингда йўлни сенга ким очиб берди? Хонгирейга йиғлаганинг эсингдами? Тўғри, сен беш фоиз бермокчи эдинг, лекин Хонгирей йигирмани сўради. Охири, сенга раҳми келиб, ўнга рози бўлувди, а? Кеча Хонгирей ўликхонамга телефон қилиб, «ўшандা бекорга раҳмдиллик қилибман, айтиб қўй, фойданинг йигирма фоизини берсин», деди. Гапига ишонмасанг, ўзинг учраш унга.

– Оширишнинг иложи йўқ, вазият ўзгариб, харажатлар кўпайди, бир тийин ҳам қўша олмайман.

– Гапинг тўғри, вазият ўзгарди, менинг харажатларим ҳам кўпайди, шунинг учун йигирма фоизни тўлаб қўясан. Ўзинг биласан, мен ўликхонада ишлаб юрган одамман. Уликни ечинтириб оладиган одам Хонгирейга ўшаган раҳмдил бўладими? Ўликхонамда жой кўп... хоҳласанг, бориб кўр. Кўмадиганлари ҳам бор, куйдириб юборадиганлари ҳам бор. Кўнглингга қараб, танлайверасан. Красноярскдаги Козёлни билармидинг? Эшигандирсан? У крематорийдан қўркар экан, кўма қолишибди.

Табиатан күркөң бўлган Бугайга шу гапларнинг ўзи кифоя эди. Унинг ваъдасини олган Моргаш кувониб, Хонгирейнинг Шаховскойдаги қароргоҳига жўнади. Балабуханинг масаласини шу ердан туриб ҳал қилмоқчи бўлди. Крот Маматбей билан Красноярга бориб, Козловни ўлдиргач, унга бўлган гумони тарқагандай бўлди. Унинг амрига биноан Маматбей Тошкентга, Крот эса Томскка учди. Иккови ҳам вазифани ўринлатди. Бу ёғи хотиржамлик...

Фақат бир нарсада янглишди: қиморда кўп ютқизадиган Крот унга эмас, Балабухага хизмат қилишни афзал кўрди.

Балабуханинг малла йигити Асадбекка тўғри маълумот берган эди: Моргаш эҳтиёт чораси сифатида қароргоҳдаги барча чирокни ёқтириб қўйиб, ўзи қазноқда тунарди. Ярим кечаси йигитларини Балабуха билан учрашувга жўнатгач, бу тунни ўзига баҳт келтиришига ишонгани учун қазноққа тушмай, ётоқдаги партўшакда керилиб ётди.

Бирор «ҳаёт нима?» деб сўраган тақдирда «маза қилиб яшаш» деб жавоб қайтарувчи бу нодон ҳаётидаги сўнгти тунни ўғирлаб адо қилаётганини билмасди. Ҳаётнинг туғилиш онидан бошлиб ўлим паккасига караб жону жаҳди билан югуришдан иборат эканини сира ўйлаб кўрмаган одамдан яна қандай жавоб кутиш мумкин? Барчани ўлим билан қўрқитувчи бандасига охир-оқибат Парвардигор қандай мукофот берарди...

Ширин туш кўраётганда бир шарпадан уйғонди. Шошилиб ёстиғи остига қўл юборди-ю, тўппончани олишга улгурмади. Аввал жағига қаттиқ мушт тушиб, гангитди, кейин бўғзига пичоқнинг ўткир тиги тиравлади:

– Жон ширин бўлса, қимирлама!

Овоз қай томондан келаётганини билиш учун алантлади. Бўғзига пичоқ тираган Ахтамнинг орқасида турган Асадбекни кўриб кўзларига ишонмади. Бир неча соат олдин Маматбей кўнғироқ қилиб:

«Ўқилон»ни чувалчангдай эзиб ташладим, ҳамма шартларимизга кўнди. Ҳатто юкни ўзи оркалаб ўтишга ҳам рози», деган эди. Чувалчангдай хорланган одамнинг кутилмаганда бу ерда пайдо бўлиши эртак ўрнида баён қилинса, бирор ишонмайди. Лекин... Моргаш ишонишга мажбур. Чунки рўпарасидаги «ўқилон» эмас, нақ ўлимнинг ўзгинаси эди!

– Умрингдан бир дақиқаси колди. Ақлинг бўлса, узайтирасан, бўлмаса Хонгирейнинг олдига бекафан жўнайсан.

Бу дағдагадан Моргаш саросимага тушмади. Аксинча, кулимсираб, кўришмоқчи бўлгандай Асадбекка кўл узатди:

– Гап йўқ, Бек! Қойилман! Ҳеч қанақа гап-сўзсиз таслим бўламан! Сен мутлак ғолибсан! Мен келишингни билардим, факат Балабуха билан бирга бўларсан, деб ўйлаб хато қилибман. Омадинг бор экан, Бек. Ҳозир у ерда менинг йигитларим мўъжиза яратишяпти. Учрашувни бекорга соат тўрт-у ўттизга белгиламадим. Ҳудди шу пайтда мен роппа-роса кирк ёшга тўламан. Йигитларим менга қиркта ахмоқ каллани кесиб совға қилмоқчи бўлишибди, сенинг ақлли бошинг буларнинг ичидаги бўлмайди, шунисидан хурсандман. Юбилейимни сен билан бирга нишонлайман, энг ардокли меҳмоним бўласан. Ҳайдар ошнанг Хонгирейга тилла ҳайкалча совға қилган эди. Сенинг келишингнинг ўзи менга катта тухфа. Ҳозирнинг ўзида ташвишли масалангни ҳал қилиб бераман. Сен мендан ранжима, биз қизингни ўғирламадик, бу шунчаки ҳазил эди, Маматбейни биласан-ку, йўнилмаган таёкка ўхшайди, ҳазили шунақа қўполроқ бўлибди. Ҳозирнинг ўзида унга кўнгирок қиласан, суюкли қизинг ярим соатда уйингда бўлади.

Шунча гапдан кейин ҳам бўғизидаги пичок олинмади. Асадбекнинг қаҳрли қарашида муроса сезилмади:

– Галириб бўлдингми? Энди қизимнинг қаердагигини айт.

- Ўзим қўнғироқ қила қолай.
 - Ярим дақиқа вақтинг қолди. Маматбей йўнилмаган таёқ бўлса, бу бола ўткир ханжар, қўли қалтирамайди.
 - Бек, сен билан талашадиган мулким йўқ, биргалиқда гўзал ҳаёт кечиришимиз мумкин.
 - Сен ҳозир ҳаётингни саклаб колишни ўйла. Қирқ ёшингга қиркта калла совға олмоқчимидинг? Илико билан Бугай Балабуханинг ёнида томоша қилиб тургани йўқ. Йигитларинг ўттиз тўққизта чикса, қирқинчи калла ўзингники бўлиши мумкин.
- Асадбек Илико билан Бугайни тахминан айтган эди. Моргаш бунга ишониб, бўшашди, энди Асадбекдан марҳамат кутиб қаради:
- Мен сен билан ҳеч нарсани талашмайман. Юкни олиб ўтишимга ҳалал бермасанг бўлди.
 - Сен менга шарт қўйма. Маматбей кеча менга «шарт қўйиш ихтиёринг йўқ», девди.
 - Бўпти айтаман: «Грек шаҳарчаси», деган жойларинг борми? Ўша ерда Нилуфар кўчаси бор. Номини чиройлилигини қара-я! Шу кўчадаги ўн учинчи уй.
- Асадбек телефон томон юрди, унинг ўрнини Ҳалимжон эгаллади.
- Сени танидим, — деди Моргаш унга қараб, — Наркобаронга мол олиб бориб ишни пачавасини чиқарган эдинг-а? Биз жонингни саклаб қолган эдик.
- Ҳалимжон кар-соқов одам сингари индамай тураверди.
- Асадбек Жамшид билан боғланиб, манзилни айтгач, «борган жойингнинг телефон рақамини ўзинг билган жойга маълум қилиб қўй», деб топшириғини эслатгач, жойига қайтди.
- Сен менга бир дақиқа ҳаёт инъом этмоқчи эдинг, билишимча, яна ярим соат кўшасан шекилли? Лайчаларингни ол, мен сени алдамадим. Ўтириб, хотиржам гаплашиб олайлик. Агар менинг йўлимга юрсанг, иккаламиз дунёнинг энг бой одамларига айланамиз.

— Кўлларини боғлаб, оғзига пайпоғини тикиб қўйларинг, вайсайвермасин, — деди Асадбек Ҳалимжонга қараб.

— Бек, сен ахмоқ одам эмассан. Зўрлар бир-бирлари билан ёвлашмаслиги керак. Бу оламни бошқаришга фақат иккаламиз ҳақлимиз...

Моргаш бошқа гапиролмади. Асадбекнинг амри ўша заҳоти бажарилди.

— Битта одам бошқариши мумкин бўлган оламда иккинчи одам нима қиласди? — деди Асадбек. У энди ўз зулмининг тантанасидан қувонган ғолиб овози билан гапирди: — Сен паст кетдинг. Хўжайнинг тахтида бир ўзинг ўтиromoқчи эдинг. Сен Хонгирейнинг сояси эдингми? Соя тахтда ўтира олмайди. Хўжайнинг «Машина яхши юриши учун мурватларини алмаштириб туриш керак», девди. Сен мурватликка ҳам ярамайсан. Хонгирей ақлли гапларни кўп гапиради Охирги учрашувимиздамикин, «битта ўлик сиккан гўрга иккитаси ҳам сиғади», деган эди. Шу ростмикин?

Бу гаплар Моргашнинг қўрқувдан потирлаётган юрагига камон ўқлари каби санчилиб, баттар талvasага солди. Гўё мушукники сингари кичкина гавдасига қафасдаги йўлбарс ғазаби жойлашиб олгандай бўлди. Жавоб беришга, ўзини оқлашга ожизлигига чидолмай, тўлғонди. Унинг бу ахволига қараб Асадбекнинг ичидага шайтон қаҳқаҳа отиб юборди.

— Эсингдами, «Ок сурпга ўралиб, кироллигимга меҳмон бўлиб келишдан олдин мен билан дўстона равишда, тирик ҳолингда учрашишни ният қиласвер», деб таклиф этган эдинг. Энди таклифингдан ўзинг норозига ўхшайсан-а?

Асадбек деворда осиғлиқ турган қиличлар, турли ханжарларга кўзи тушиб, яқинлашди-да, кумуш сопли қилични қўлига олди. Одамзоднинг ишлари ажабланарли: чолғу асбобларини садаф билан безашига тушуниш мумкин, нағислик, назокат акс этиб туради. Инсон қонини тўкиш, жон олиш учун ясалган қуролни

безашдан максад нима экан? Асадбек килични салмоклаб кўриб, яна Моргашга яқинлашди. «Мени чопиб ташлайди шекилли?» деб ваҳимага тушган Моргашнинг кўзлари ола-кула бўлиб кетди. Айниқса, кўкрагига қилич тифи тиralганида ҳаётдан умидини узди. Лекин Асадбек тиғни тиради-ю, ботирмади.

– Хонгирейнинг итдай хор бўлиб ўлганини эшитганимда кувонишим керак эди. Ҳарҳолда сен шундай деб ўйловдинг. «Хонгирейнинг ўлими муносабати билан бошлаган байраминг адогига етдими ё ҳали ҳам давом этяптими?» – деб сўровдинг, а? Сен янгишган эдинг, Хонгирейнинг ўлими менга қувонч эмас, алам берди. Чунки унинг ифлос пешонасига битта ўқни ўз кўлим билан қадашни истаётган эдим. Соясини чолиб ташлаганим билан кўнглим барибир ором олмайди. Сен хўжайнингни кўрганингда гапимни етказ: мен у билан дўзах гулханида учрашсан ҳам, барибир юрагини суғуриб оламан.

Асадбек шундай деди-да, хона бурчагида турган одам бўйи баравар келадиган нақшли кўзага қаради. Кўза ўртасига Хонгирейнинг кулиб турган сурати туширилган эди. Суратдаги Хонгирей унга гўё «ҳеч качон бу мақсадингга ета олмайсан», дегандай бўлди. Асадбек кўза томон икки қадам ташлади-ю, қилични боши узра кўтариб, кўзага зарб билан урди. Зарб бериш чоғида йўлбарс каби ўкирдики, ҳатто йигитлари ҳам сескандилар. Асадбек кўза парчаларини тепкилаб, майдалаб ташлади. Унинг ҳаракатларини Моргаш кўркув билан, йигитлар эса хавотир билан кузатиб туришди. Ҳеч ким унга яқинлашмади, «кўйинг, ўзингизни босинг», деб кўлидаги қилични олмади. Йигитларнинг бундай қилишга ҳаддилари сиғмасди.

Орадан ярим соат ўтгач, Асадбек ўзи билган телефонга кўнғироқ қилиб, «Менга хабар борми?» – деб сўради. Уч дақиқа олдин шу телефон билан боғланган Жамшид фақат Асадбекнинг ўзигина тушунадиган рақамларни билдириб кўйган эди. Асадбек шошилиб, титроқ бармоқлари билан рақамларни терди. У томон-

да гўшак кўтарилиб, Жамшиднинг овозини эшитган заҳоти умид билан:

- Нима гап? – деб сўради.
- Алдамабди, ҳаммаси зўр бўлди, хавотирланманг.
- Зайнаб яхими?
- Яхши, сал қўрқибди. Ҳозир ўзига келиб қолди.
- Эрини айтма. Ўзи қани?
- Ҳовлида ўтирибди, чакирайми?
- Чакир...

Зайнаб титроқ овозда салом берди, гўё унинг иссиқ нафаси Асадбекнинг юзини майин силагандай бўлиб, кўнглидаги дардларни кува кетди.

- Опокмисан, жон қизим?
- Яхшиман, адажон... Ҳозир ойим билан гаплашдим, хавотир олманг, дедим.
- Ақлли қизим... яна менинг касримга қолдинг... мени қарғамагин, жон қизим.

Ўзини қизининг қарғишига лойик деб билган Асадбек бу гапни юракдан чиқариб, ийғламсираб айтди. Агар Зайнаб бераҳм қиз каби отаси томон лаънат тошларини отганида ҳам, Асадбек бош тутиб берган бўларди. Бирок, Зайнабнинг тилидан шафқатсиз сўзлар учмади:

- Унақа деманг, адажон, ўзингизни эҳтиёт қилинг, – деди меҳрибонлик билан.
- Сен хотиржам бўл, жон қизим, мен буларни тинч қўймайман.
- Йўқ, йўқ! – Зайнаб баланд овозда шундай деб юборди-ю, жимиб қолди. Бир неча нафасдан сўнг босиқлик билан гапирди: – Адажон, унақа деманг, хеч кимга тегманг.
- Бу ҳаромиларнинг қонини ичган одам савобга қолади.

Асадбек «Акангни ўлдирғанлар ҳам шулар, хунини олмагунимча тинчимайман», демоқчи бўлди-ю, тилини тийди. Зайнаб унинг ниятини англаандай яна бир оз жим турди-да, ялиниш оҳангода гапирди:

— Адажон, тегманг уларга. Ўлим улар учун нажот бўлади.

Асадбек эслади: қизи олдин ҳам шудай деган эди. Ўшанда ҳам унинг ниятини тушунмаган эди, ҳозир ҳам. Зайнаб эса йиғисини қайтармоқчи бўлгандай яна сукут сақлагач, давом этди:

— Жазоларини Худо беради, сиз соғ-омон қайтинг. Набирангиз қон устига туғилмасин...

Зайнаб яна жимиб қолди. Асадбек у ҳовлида бир неча одам қонига беланиб ётганини билмагани учун кизининг ахволига тушунмади.

Бир оздан сўнг Жамшиднинг «Бек ака» деган овози эштилди.

— Маматбейни қидириб топларинг, — деди Асадбек қатъий оҳангда.

— Қидиришимизнинг ҳожати йўқ. Ана, ҳовлида ётибди, — деди Жамшид.

— Нимага?

— Юраги чатоқ экан, қўркқанидан ёрилиб кетди шекилли?

— Бу ёғига зийрак бўл, нима қилишни ўзинг биласан.

Асадбек гўшакни жойига қўйгач, йигитларига қараб, «бўлди, кетдик!» деди.

Моргашнинг ёнидан жилмай турган Ахтам:

— Буни гумдон қилайми? — деб сўради.

— Ўзига тегма, уйга ўт қўйларинг.

Асадбек шундай деб чиқди. Ахтам унга эргашиб, икки қадам босди-ю, ишни чала ташлаб кетгиси келмади. Чўнтаgidan рўмолчасини чиқариб, Моргашнинг ёстик остидаги тўппончасини олди. Сўнг бошига ёстик ташлаб, ўқ узди. Моргаш жон талвасасида ти-тиричилашга ҳам улгурмади. Қадимгилар «Нечук шарбатки, сен элга ичирдинг, ўзинг ҳам охири уни симирдинг», деганларидай, тириклик қадаҳини ўлим шарбати билан тўлдириб ичишдан ўзга чораси қолмади.

Кўп жонларни қийнаган бу одам жонини осонгина

топширди... Зайнаб айтганидай, ўлим унинг учун на-
жот бўлди.

Ахтамнинг кўлида рўмолча билан чиқаётганини
кўрган Асадбек «бунинг нимаси?» дегандай савол на-
зари билан қаради. Ахтам тушуниб, аянчли жилмай-
ди:

- Бурнини артиб кўйдим...
- Уйни ёқиши керак, – деди Асадбек малла йигитга
караб.

– Бу ёғини бажарадиган одамлар бор.

Малла йигит ишора қилган эди, кўчадаги дарахт-
лар панасидан икки одам чиқиб келди. Асадбек Бала-
буханинг иши пухта эканига тан берди.

– Ленинград самолёти уч соатдан кейин учади, –
деб шоширди малла йигит.

Малла йигит улар билан бирга Ленинградга учди.
Шаҳарга чиқмай, Тошкентга учадиган самолётни шу
ерда кутадиган бўлишди. Асадбек шаҳарлараро авто-
мат-телефондан Жамшидга қўнғироқ қилди. Ҳамма
иш жойида бўлганини маълум қилган Жамшиднинг
бир гапни айттолмай чайналаётганини сезган Асадбек:

- Яна нима гап? – деди зарда билан.
- Бек aka, айтмасликнинг иложи йўқ...
- Чайналма!
- Элчин аканинг қариндошлари билиб қолишибди.
- Қанақасига билишибди?
- Кўшнилар етказишгандир...
- Ношуд!.. «Ҳамма ишларингнинг орқасидан шил-
таси чиқади», деб сўкиб бермоқчи эди, мавриди эмас-
лигини фаҳмлаб, дағдағасини давом эттирмай, «нима
қилмоқчисан?» деган савол билан чекланди.
- Дўхтирлар маҳкам, касали бўйича ўлган, деб
коғоз беришди. Қариндошлари бугун асрга чиқариш-
моқчи... Келишингизни кутишмасинми?
- Бориб тирилтириб бераманми? Кўмса кўма-
версин. Бунча латтачайнар бўлиб кетдинг, акангга
ўхшасанг-чи?

Акаси Маҳмуд – Чувриндига ўхшаш осон эканми? Акасига ўхшаши учун хожаси укахонини қандай яхши кўрган бўлса, унга ҳам ўша даражада меҳрли бўлиши керак. Ўлимга ҳукм қилиб юборилганининг аниқ сабабини ҳалигача билолмаган Жамшид бир ишни ўзича ҳал килиш мартабасига етмаган эди.

Жамшид билан гаплашиб, кўнгли хиралашган Асадбек одамлар кўзидан панароқ бўлсин, деб ресторанга ўтди. У Ҳалимжон билан алоҳида ўтириди. Ахтам малла йигит билан, қолган тўртта йигит ҳам алоҳида столдан жой олишди.

– Қайтганимиздан кейин хўжайнларингга нима деб ҳисоб берасан? – деб Асадбек мулозимини кутилмаганда саволга тутди.

«Мен милисага хизмат қилмайман, сизга содикман», деб қасам ичиши фойдасиз эди, Ҳалимжон шу сабабли «билмайман» дегандай елка қисиш билан кифояланди.

– Ўзинг кўрдинг, аслида мен сенларнинг хизматингни қилдим.

– Бунақаларни жазолайдиган қонун бор, – деди Ҳалимжон.

– Конунинг қўлидан нима келади? Турмага тикасанми? Булар турмангдан қўркар эканми? Қамоғингнинг битта эшик, битта дарвозаси бор. Эшикдан кириб, дарвозадан тантана-ю шоду хуррамлик билан чиқиб кетаверади.

Ҳалимжон эътиroz билдиromoқчи эди, хизматчи йигит яқинлашиб, Асадбек томон энгашди-да, одоб билан: «Сизни сўрашяпти», деди.

– Ким? – Асадбек шундай деб атрофга аланглади. Ҳалимжон ҳам зийраклик билан қаради.

– Ичкарида кутишяпти, – деди йигит яна ўша одобли оҳангда.

Асадбек Ҳалимжон билан кўз уриштириб олгач, ўрнидан турди. Буни кўриб, Ахтам билан малла йигит ҳам кўзғолдилар.

– Бир ўзингиз кираг экансиз, – деб изоҳ берди хиз-

матчи йигит қўлидаги оппок сочиқни билагига ташлаб.

– Бир ўзлари кирмайдилар, иши бор одам бу ёққа чиксин, ё бирга кирамиз, – деди Ҳалимжон Асадбекнинг йўлинни тўсиб.

– Улар чиқишмаса керак, – хизматчи йигит шундай дегач, Асадбекнинг қулогига: «Гап ўғлингиз тақдирига тегишли экан», деб пичирлади. Шундан кейин Асадбек мулозимларига қараб: «Қимирламай ўтирларинг», деди-да, хизматчи йигитга эргашди.

Ресторан директорининг хонасида уни сочига оқ оралаган, ўрта ёшлардаги хушмуомала одам кутиб олди. Хизматчи йигит икки финжонга қахва қўйгач, изига қайтди.

– Сизни яхши танийман, – деди нотаниш мезбон. – Мени танимадингиз, битта самолётда учиб келдик, эътибор килмабсиз. Ташибиши кўп одам шунақа бўлади. Қаҳвадан ичинг, совумасин. Ўзимни сизга танитмайман. Бу ердан чиқасиз-у унутасиз.

Битта самолётда учиб келдик?..

Демак... доимо буларнинг кузатувида бўлганми? «Босган ҳар бир қадаминг бизга маълум демоқчими?» Шаховскойдаги воеани ҳам билишадими?

Асадбек Балабуханинг тадбирига тан берган эди. Лекин томсклик ўғрининг Илико билан эмас, кавказлик тўдаларни қиришга қиришган маҳсус хизмат идораси билан тил бириктирганини у қаёқдан ҳам билсин? Асадбек ҳозир бунга тегишли калаванинг учини топишга уринмайди, унинг дарди ўғлининг қисмати билан банд.

– Ўғлимга нима бўлди? – деди у хавотирини яшира олмай.

– Ўғлингизга нима бўлиши керак эди? Совет Иттифоқининг эркин граждани сифатида чет элда билим оляпти, менинг билганим шу.

– Унда мени нега чақирдингиз?

– Биласизми, азизим, ҳаёт шундайки, Ватан сени эркалар экан, сен Ватанга хизмат қилишинг ке-

рак. Ўғлингизнинг шу ҳақиқатни тушуниши қийин бўляпти. Сиз ҳам тушунмаяпсизми?

– У ўқияпти, хизматни кейин қиласди, – деди Асадбек.

– Хизматни ҳозир бошлиши керак. У бизга айрим илмга тегишли маълумотларни аниқлаб бериши мумкин, энди тушундингизми?

– Сирли маълумотми? Жосуслик қилиши керакми?

– Кўпол гапирдингиз. Жосуслик эмас, Ватанга хизмат бу. Агар сиз ўғлингизни тўғри йўлга солмасангиз, кўргуликлари яхши бўлмайди.

Бу одамнинг сўзлари ширин бўлгани билан тилида заҳар борлигини Асадбек фаҳмлади. Кўргуликлари яхши бўлмаслигининг ортида қандай аянчли қисмат ётибди?

– Мен нима қилишим керак?

– Ҳозир ўғлингиз билан боғлаб қўяман, насиҳат қилинг, ўзини ҳали у ёқка, ҳали бу ёққа ташламасин. «Валерийнинг чизган чизигидан чикма», десангиз кифоя. Ўғлингиз ақлли бола, нима демокчи бўлганингизни дарров тушунади.

– Шунинг ўзими?

– Бу камми?

– Олдинги талабингизга солиштирганда буниси осон.

– Қайси талабимиз?

Асадбек айтсамми ё айтмасамми, деган мулоҳазада бир оз сукут сақлагач, ўғилларини камаб қўйган милисаҳонадаги сухбатни қисқа тарзда баён қилди.

– Мен буни текширтириб кўраман, гапингизга караганда, у бизнинг одамга ўхшамайди.

У шундай деб телефон рақамларини терди-да, у ёқдан овоз эшитилгач, немисчалаб сўрашиб, Абдусамад жанобларини чақириб беришларини илтимос қилди. Асадбек унинг гапларидан фақат ўғлингиз исминигина тушунди. У томондаги телефон гўшагини Абдусамад олиб, овоз бергач, бу киши туркчалаб «бир дакика, афандим», деди-да, гўшакни Асадбекка узатди.

Отасининг овозини эшитиб, Абдусамад ажабланди:

– Ада, тинчликми? Ойим яхшимилар? – деб сўради.

– Ҳаммаси яхши, сен гапимни дикқат билан эшит: Валерий деган йигит анча бамаъни бола, у билан яхшилаб дўстлашиб олгин-у, чизган чизигидан чиқма.

Отасидан бундай насиҳатни кутмаган Абдусамад ажабланиб:

– Бунинг ҳеч иложи йўқ, ада, – деб эътиroz билдириди.

– Дунёда иложсиз нарсанинг ўзи йўқ! – деди Асадбек зарда билан. – Сен айтганимни қил. Яқинда борамиз, колган гапни ўша ерда гаплашамиз.

Гапни мухтасар қилиб, гўшакни қўйгач, у одам савол назари билан каради:

– «Яқинда борамиз», дедингизми? Сир бўлмаса айтинг-чи, қаерга бормоқчисиз?

– Сир эмас, ўғлимнинг олдига бормоқчимиз. Нима, ҳаққимиз йўқми?

– Ҳозирдан эътиборан ҳаққингиз йўқ, азизим. Бир кадам четга чиқмоқка ҳаққингиз йўқ. Сиз ўзингиз билмаган ҳолда давлат сири билан танишдингиз. Энди бу сирни саклаш мажбурияти ҳам бор. Мана буларга имзо чекинг.

У стол устидаги қофозларни Асадбекка узатди. Асадбек қофозларни қўлига олиб, кўз югуртириди, кейин давлат сирини ошкор қилмаслик ҳақидаги тилхатга имзо чекиб берди.

– Отангиз ҳақидаги ҳужжатлар билан танишмоқчи бўлганингизни айтишди. Сиз учун йўл очик. Борган идорангизда полковник Чернобородовга учрашсангиз, муаммоларингизни ҳал қилиб беради. Сизга уруш иштирокчисининг оиласи фойдаланадиган барча имтиёзлар берилади. Масалан, солиқларнинг ярми кесилади, навбатсиз машина ҳам олишингиз мумкин.

У Асадбекнинг бундай имтиёзларга ҳожати йўқ-

лигини билгани учун кейинги гапларни киноя охандыда айтди. Асадбек «кетаверайми?» дегандай ўрнидан турди. У эса жойидан жилмай, гапини давом эттиреди:

– Иосиф Тито ўлганидан кейин Югославияда ҳам уруш тарихига муносабат ўзгарди. Кузатаётгандирсиз, мамлакати парчаланяпти. Сал олдинрок бўлганда отангиз жанг қилган жойларни зиёрат килиб келишиниз мумкин бўларди. Агар ўғлингиз истаса, айланиб чиксин, унга монелик йўқ.

У яна телефон рақамини териб, овоз келишини кутди кейин туркчалаб, «хонум афандини лутфан», деб сўради. Манзуранинг овозини эшиштагач, «бир дакика, хонум афандим», деди-да гўшакни Асадбекка узатди. Асадбек нима дейишини ҳам билмай қолди.

– Тинч ўтирибсанларми? – дейишдан ўзга сўз тилига келмади.

– Вой, адаси қаердасиз? – деди Манзура салом бергача.

– Йўлдаман, тўрт соатдан кейин уйда бўламан.

Асадбек шундай деб хона сохибига қараб қўйди.

– Нима овқат қилиб қўяй? – деб сўради Манзура соддалик билан.

Эрининг кимнинг ҳузурида, қандай аҳволда эканини у бечора қаердан билсин? Хотинлик бурчига мувофиқ сўради. Асадбекнинг жаҳли чикиб, зардали оҳангда: «мошхўрда», деди-да, гўшакни жойига ташлади. У одам лутф кўргазиб, Асадбекни эшикка қадар кузатиб қўйди. Хожаси кетганидан бери жойига ўтирмаган Ҳалимжон «Тинчликми?» деб сўрамаса-да, уни савол назари билан қарши олди.

– Эски танишим учраб қолди, – деди Асадбек жойига ўтириб. – Ҳар жой, ҳар жойда танишларинг бўлгани яхши-да!

Ичига чироқ ёкса ёришмайдиган одам кулимсирагани билан дардини яшиrolмайди. Зийрак назарли Ҳалимжон ичкарида қандайдир жиддий гап бўлганини англади.

Асадбек уйга қайтиб ахлиясини қувноクロқ ҳолда күришни умид қилғанди. Күёвининг жанозасидан эндигина қайтган Манзура аввалгидай паришон күриниши билан эрининг күнглидаги умид чироғини ўчирди.

Асадбек Манзура билан Зайнабнинг маъюс бокувчи кўзларига қараб эзилди. Зайнаб уч кунгача зрининг жияниникида, майит чиқарилган уйда турди. Асадбек бунга карши бўлса-да, дардини ичига ютди, индамади.

Асадбекнинг ўзи ҳам бу кунлар ичи кўчага чикмади. Пешин чоғи зерикиб, юраги сиқилиб ўтирганда телефон жиринглаб, болохонадаги йигитлар «Ҳайдар акамнинг хотинлари» дегач, Манзурага қараб, «ўзинг гаплаш», деди. Манзура итоаткорлик билан гўшакни олиб, кўнгил хуши бўлмаса ҳам, узок гаплашишга мажбур бўлди. Кетма-кет «хўп-хўп», деявериб кутулгач, гўшакни эрига узатди:

– Сизда зарил гапи бормиш.

Асадбекнинг энсаси қотиб, «ҳа, нима дейсан, сингилжон?» деди.

– Яқин орада Московга бормадингизми?

Бу саволи қизик бўлди-ку? Бирордан эшитганми ё туスマллаб сўрайгитими?

– Нима эди?

– Укангиздан дарак йўқ-ку?

– Дарак кутмагинам.

– Вой, нега?

– Анавинда нима девдинг, эсингдами? «Мегажини билан ўша ёқда кўшмозор бўлсин», деб карғаганимидинг? «Қарғишинг уриб ўша томонларда ўлиб кетса, кейин пушаймон ейсан», девдимми? Ана энди ўзингдан кўр, дардингни кимга айтсанг айтавер, нафси бузук эринг ичбуруғ бўлиб ўлибди. Кундошинг ўрисчасига ҳам кўмдирмай, биратўласи куйдириб, кулинни сочдириб юборибди.

– Вой, мен энди нима қиласман?

– Нима қилардинг, битта мулла чақириб ис чикариб юборсанг етарли. Кунини айтсанг, борарман.

Гўшакни жойига қўйиши билан Манзура ёқасини ушлаганича:

– Вой ўлмасам, рости биланми? – деб сўради.

– Кўявер, озгина куйсин, ўрис хотинга уйлангани рост. Эрнинг қадрига етмаганидан кейин энди тирикми ё ўликми, бунингга нима фарқи бор?

Манзура «тавба, тавба» деганича, нари кетиб, ўзининг юмушларига овора бўлди. Аср намозини ўқигач, Асадбекка қарашга ботинмай, «эрнинг кирки чиқкунича уйида ўтирамиши», деди.

– Бўлмаган гап! – деди Асадбек ғазаб билан.

– Кўнглига қарамасак бўлмайди, адаси...

– Кўнглига?

Асадбек Зайнабнинг «неварангиз» кон устига туғилмасин», деган гапини эслаб, хотинига савол назари билан қаради:

– Бўйида борми?

– Нега унака деяпсиз?

– Сен саволимга жавоб бер.

– Бўлмаса керак...

– Анигини айт!

– Йў-ўк...

«Ҳайрият... – деб енгил нафас олди Асадбек, – «неварангиз» деганда акасининг боласини назарда тутибди-да...»

Асадбек ўйлаб қўйган режасини амалга оширишни галга солмай, Жамшидни чақирди:

– Ахтамга айт: Элчин акангнинг уйи эрталабгача йўколсин.

– Буздириб ташлайликми?

– Калланг жойидами? Бир хил уйларда газ очик колса портлаб кетармиши?

Жамшид тушундим, дегандай қуллук килиб, буйруқни бажаришга шошилди...

АБДУСАМАД

1990 йил, июнь, Олмония.

Асадбек навбатдаги қасос жомини симириб уйига кайтаётган вактда мусофириликдаги ўғли боши узра ташвиш булутлари түпданаётган эди. Отаси билан гаплашиб, унинг нима сабабдан бундай буйрук бергани сабабини англашга уриниб ўтирганида уни телефонга чакиришди.

— Мен Валерийман, ўзинг билган ўша турк қахвахонасида кутяпман...

Буйрук оҳангидаги бу гап... Яна сенсирашга ўтилиши... Бехурматлик белгисими ё яқинлашишни англатувчи русларга хос одобми? Ёки кимга тобе эканини билишига ишорами?

Катта ўйин бошланганидан кўнгли ғашланганича айтилган жойга етиб борди. Валерий ҳурматини жойига қўйиб кутиб олди. У қўлидаги кўп саҳифали рангли газетани бўш стул устига ташлаб, хизматчини чакирди-да, қахва буюрди:

— Ҳозир дунёни водород ёки нейтрон бомбаси қизиқтирмай кўйди, — деди у. — Ҳамманинг бутун зътибори биогенетикада! Шу соҳага ўтиб кета қолсаммикин? Сен қизикарсан? Мен клонлаштиришни назарда тутяпман. Қўллаб-кувватлаётган одамлар бунинг нималигини дуруст англашмайди. Нима ўзи бу, деб сўрасанг, агар маъносини билса, ўз ҳужайрасидан фойдаланиб нусха кўчириш, дейиши мумкин. Тушунишимча, бола организми минглаб ҳужайралардан ташкил топади. Агар бир-икки ҳужайра етишмаса, ногирон, ҳатто қўлсиз ёки оёқсиз бўлиб туғилади, тўғрими? Хўп, энди менга тушунтириб бер: биттагина ҳужайрадан қанақа бола пайдо бўлади? Агар эллик ёшли киши ҳужайрасидан одам ясалса, неча йил яшайди? Дейлик, ҳужайраси олинган одам етмиш йил яشاши керак. Ундан эллик йиллик ҳужайра олинди-

ми, демак, ясалган одам йигирма йил яшар экан. Генетикларинг буни тушунтириб бера оладиларми?

– Буни генетиклардан сўранг.

– Сўрамайман, менга шу газетадаги вайсақиларнинг гапи ҳам етиб ортади. Илм ҳам отбозор бўлиб кетди.

Валерий илмдаги адолатсизликлар ҳакида гапира туриб, бирдан мавзуни ўзгартирди:

– Мени бошқа жойга юбориштади. Яқинда сенинг жонажон дўстинг келади. Менга шу қаҳвахона ёқарди. Унга уйда гаплашиш маъқулмиш. Уйи қаердалигини ўзи айтади. Дераза дарчасининг ҳар куни соат саккиздан саккиз яримгача очик туриши хотиржамлик белгиси хисобланади. Уйга бемалол кираверасан. Манави газетани олиб, дикқат билан кўриб чиқасан. Рекламлардаги манзилларга белги қўйилган: ўн икки жойда учрашув нуқтаси бор. Ҳар бирининг номланишини янги дўстинг айтади. Ҳозир қаҳвахонадан бирга чиқиб, кутубхонага борамиз. Ўша ерда хайрлашамиз. Отанг биз билан ҳамкорлик қилишга тилхат берди. Энди ота-онанг гаровда тургандай бўлади, бу ердаги қадамингни сал чаток боссанг, уларга жабр бўлади.

Абдусамад шу тариқа ўргимчак тўрига уралди. Доктор Худоёр уни қуткариш чораларини кўради, лекин фойдаси бўлмайди. Орадан ойлар ўтиб, советнинг чоки сўқилгач, енгил нафас олади. Унгача босиб ўтилиши керак бўлган анча ташвишли довонлар бор.

ЗОХИД

1990 йил, июнь, Тошкент.

Элчиннинг ўлими ҳақидаги кутилмаган хабар Зоҳидни таажжубга солди. Унинг ўлимида жиноят унсурлари бўлса аниқлаш учун эмас, балки танишлиги хурматидан жанозага борди. Борди-ю... Асадбекнинг

кўринмаганидан ажабланди. Кўпчиликка қўшилиб, тобут орқасидан бораётганда Жамшид яқинлашиб саломлашди-да, ажабланганини сезгандай унга изоҳ берди:

– Бек акам яна қаттиқ иситмалаб қолдилар...

Шундай деди-ю, одамлар оқимига қўшилиб кетди.

«Ҳар бир нарсага гумон билан қарашимни атрофимдагилар ҳам сезишади шекилли?» деган ўй Зоҳиднинг кўнглини хира қилди.

Майит лаҳадга кўйилиб, яқинлари бир кафтдан тупрок ташлаётган пайтда кўзларидан ёш қуиилаётган кўркам йигит унинг дикқатини тортди.

«Козимбек-ку!?

Суратига карайвериб, чехраси ёд бўлиб кетган, адашиши мумкин эмасди. Ҳозирнинг ўзида бориб, билагидан ушлагиси келди. Ҳатто қабр томон икки қадам ҳам ташлади. Йигит ўзига тикилиб турган нигоҳни сезиб, Зоҳид томонга қаради. Кейин белкуракни олиб қабрга тупроқ ташлай бошлади. Зоҳид эса уни кузатиб туриш билан чекланди. «Агар қочадиган бўлса, қуръон ўқилиб, ҳамма турган пайтдан фойдаланади», деб ўйлаган Зоҳид ундан узоклашмасликка ҳаракат қилди.

Фотихадан сўнг ҳамма тургач, йигитни кўздан кочирди. Жаноза маросимида эканини ҳам унутиб, атрофга аланглай бошлади. Қабристондан чиқаверишда орка томонидан кимдир ширали овозда салом берди. Ўгирилиб қараса – Козимбек!

Зоҳид бир неча нафаслик таажжубдан сўнг ўзини ўнглаб олгач, «Козимбекмисиз?» деб сўради.

– Ҳа, сиз кидираётган Козимбек менман.

Зоҳид унинг кўзларига қараб, маъсум бир покликни кўрди.

– Мени танийсизми? – деди ажабланиб.

– Учрашмоқчи бўлиб икки марта йўлингизни пойладим. Сизни кўрдим-у, яқинлашишга кўрқдим. Уч кун олдин Элчин акамга қўнғироқ қилиб маслаҳат

сўраган эдим. Сизга учрашишимни тайинладилар. Мен ёвуз қотил эмасман... мен кўрқоқман... Кошиб юрмаслигим керак эди.

– Нима бўлганини шу ерда айтмоқчимисиз ё идорага борамизми?

– Олдин эшитинг, кейин... ўзингиз биласиз. Қамокдан қўркмайман... Илёсбекнинг кўзларидан қўркяпман...

– Айтинг бўлмаса.

– Илёсбек менинг энг қадрдон дўстим эди. Кўп ашуулаларни бирга айтганмиз.

– Лекин Илёсбекни сизга қараганда кобилиятлирок, деб хисоблашаркан.

– Бунга ўзим ҳам тан берардим. Илёсбек авжни мендан кўра яхшироқ оларди. Лекин ишонинг, иккимиз обрў, шуҳрат талашмас эдик.

– Шунга қарамасдан... Илёсбекни сиз отдингизми?

Козимбек хўрсинди.

– Отдим... Лекин бу бир ўйин эди.

– Қанака ўйин?

– Толибжоннинг янги уйига борувдик. Деворига милтиқ осиб қўйилган экан. Урушда зўр мерган бўлганлари учун бобомга совға қилишган», деб мақтанди. «Ростакам милтиқми, отиладими?» деб кизикдик. «Отилади, ўклари ҳам бор», деди. Кейин: «менам мерганман, йигирма қадамдан шишани учириб юбораман», деб мақтанди. Ўқ отиш тўгарагига қатнаганим учун «ўттиз қадамдан олманинг уруғини пойлайман», деб менам мақтандим. Шунда Зулайҳо, «Йигитлар, унда гўзал маликага етишиш учун отишмайсизларми?» деб қолди. Олдин «Халқаро кўрикда ким ғолиб чиқса ўшангага тегаман», деб шарт қўйган эди. Уни учаламиз ҳам яхши кўрардик. Лекин унинг кўнгли бошқа йигитдалигини билардик. Билсак ҳам муносабатимиз яқин эди. Унинг шартлари жиддий эмас, ҳазил эди. Хуллас, бокка яқин майдончада отишадиган бўлдик. Толибжон эплолмади. Мен олмани нишонга олмоқчи

бўлганимда Илёсбек «Тўхта, ҳақиқий мерган бўлсанг, циркдагига ўхшаб отасан», деб олмани бошига қўйиб олди. Мен ҳазиллашиб қўркитмокчи эдим. У ҳам «ҳазиллашяпти, барибир отолмайди», деб ўйлади шекилли. Мени калака қилиб чалғитмоқчи бўлди. Аввал секин ўтирди, кейин ўнг томонга сурилди. Мен кулиб нишонга олавердим. Чап томони бўш эди. Олманни ҳам, бошини ҳам нишонга олмадим, ишонинг, бўш томонни пойладим... Қанакасига сурилганини билмай колдим...

Козимбек «гапларимга ишонинг», дегандай Зоҳидга илтижо билан каради.

— Мен тахминан шундай бўлгандир, деб гумон килган эдим. Отиш сабабини билмасам ҳам, Илёсбекнинг туриб берганига ишонардим. Ҳозир фотиха ўкиб, кейин идорамизга борамиз, айтганларингизни ёзив берасиз, — деди Зоҳид.

Козимбек унга итоат билан эргашди. Худди кўл-оёқларига оғир кишан урилгандай оғир-оғир қадам босди.

Козимбек «Тушунтириш хати» ёзаётган дамда Зоҳид милициядаги терговчига кўнгирок қилиб, милтиқни ашёвий далил сифатида олиб келтирди. Ўша куниёқ Толибжон билан қиз гувоҳ сифатида кўрсатмаларини ёзив беришгач, Сайд Қодиров раҳбарлар ҳузурида қизаришдан қутулди...

АСАДБЕК

1991 йил, апрель.

Олдинги йили Каримулла тилёғламалик қилиб: «Ҳажга биллалашиб борсак бирам ярашади, сиз билан борсам икки марта ҳаж қилгандай бўламан», деганида Асадбек «Сен ҳаром қадамингни Маккага босма, Каъбатуллоҳга покиза одамлар бориши керак», деб

уни ҳайдаган эди. Масжид қурдираётганини писанда қилиб, Ҳажга боришга ундовчилар кейин ҳам топилди. Абдураҳмон табибникида даволанаётганида «тузалиб кетсам, Ҳажга бораман», деган ният ҳам туғилган эди. Кейинги воқеалар уни бу ниятдан қисман қайтарди. Рамазон байрамида йўқлаб келган Саматохун бу йил Ҳажни ният қилганини билдириб, Асадбекни ҳам даъват этганда, хаёлига ўзини ҳам кувонтириб юборган бир фикр келди: Манзура боради!

Қарорини хотинига айтган эди, у қувониш ўрнига эрига маъюслик билан тикилиб:

– Бирга бормаймизми? – деб сўради.

– Менинг тайёргарлигим йўқ. Бориб, болаларимизни дуо қиласан. Кейинги йили бирга борамиз. Ушанақаси Германияга ўтиб, неваранг билан келинингни олиб келамиз.

Бу жонбахш ваъдадан Манзурунинг кўнглига чирок ёқилгандай бўлди.

Невараси туғилгандан бери на ўзи бора олади, на келини келади. Абдусамад ҳам ҳар телефон қилганида галга солади. Эри тайнинли гап айтмайди. Четга чиқиши мумкинмаслигини аниқ билмагани учун турли хаёллар буровида қийналаверади.

Эрининг эндиғи ваъдаси... Дийдорга кадар яна бир йил вақт бўлса-да, кўнгли ёришди. Аслида Ҳаж ибодатини бажариш ўзининг дилида ҳам бор эди-ю, эрига билдиришдан тортиниб турганди.

– Сиз бормасангиз... маҳрамсиз боришим мумкин эмас, – деди етдим деганда йиқилган иложсиз одамнинг афсуси билан.

– Жалил боради. Жалил сенга ака қаторида, намозини ҳам қотириб ўқийди. Хоҳласа Зайнаб ҳам борсин.

Қани эди! Лекин... қанча тушунтирмасин, Зайнаб отаси каби саждага бош қўйишга рағбат қилмаётган эди. «Эҳтимол Ҳажга бориш баҳонасида иймонга кириб қолар», деган умидда яна гапириди. Зайнаб

эътироз билдиришга баҳона ўйлаб турганида Манзуранинг ўзи топиб берди. Отасининг сафарни кейинги йилга мўлжаллаганини эшишиб, «мен адам билан бора қоламан», деди. Манзура бундан ранжиса-да, «на илож, Аллоҳ чакирмаганлар бормайди-да», деб такдирга тан берди. Эрининг розилигини олиб, Афрузани таклиф этди. Афруза Асадбекнинг маблағига боришдан оғринди-ю, буни сиртига чиқармади. «Бу йил иложим йўқ, кейинги йилларда «лаббайка»ни айтиб йўлга чиқиш насиб килиб қолар», деб кўйди. Кўнгил бу ибодатга чопгани билан, бориб-келишга етадиган маблағни хеч қачон тўплай олмаслигини билса ҳам, бу таклифи қайтаришга ўзида куч топди.

Асадбек Жалилнинг уйига бориб, ниятини баён қилганида у Афрузадан фарқли ўлароқ, «Мен Ҳажга борадиган бойларданмасман», деб бобиллаб берди.

– Харажатини ўзим кўтараман, – деди Асадбек мулојимлик билан.

– Хотинингни Ҳажга юборгинг келаётган бўлса, ўзинг намозга киргин-у, олиб боравер.

– Ҳеч бўлмаса битта яхши иш килишимга ёрдам бергин, илтимосимни қайтармагин.

Асадбек унга хеч қачон бундай синик оҳангда гапирмаган эди. Жалил бўшашибди. Асадбек ялиниш оҳангидаги «Манзурани синглим, дегансан, синглинг учун бориб келгин», дегач, ҳовури пайсайди.

– Битта шартим бор: бир йил ичидаги намозга кириб, кейинги йили ўзинг ҳам борасан Ҳажга.

– Айтсанг, айтмасанг, шунака ниятим бор. Бу сафар хотининг бирга борса янам яхши бўларди, – деди Асадбек.

– У нима қиласи? Намозни ўқишини ўргансин... Мени ўйлаганинг учун раҳмат, лекин сен доим чала ўйлайсан. Мухиддин ота билан гаплашмадингми?

– Ниятим бор. Отамга биргалашиб айтамиз, деб олдин сенга келдим, бутун одам.

Жалил тезгина отланди-ю, Мухиддин отаникига йўл олишибди.

Ҳар тонг намоздан сўнг китоб ўқиши Мухиддин отанинг одати эди. Бу тонг бир шарафли ҳадисга Мавлоно Румий томонидан берилган шархни ўқиб, мутассир бўлди. Нонуштадан кейин янада чукурроқ англаб олиш мақсадида китобни қайта кўлга олди:

«Пайғамбар, соллаллоҳу алайҳи васаллам, марҳамат қилдиларким: «Олимларнинг ёмони амирларни зиёрат қилгани, амирларнинг яхшиси олимларни зиёрат этганидир. Фақирнинг эшигига келган амир накадар хуш ва амирнинг эшигига борган факир нақадар ноҳушдир».

Халқ бу ҳадиснинг зоҳирий маъносинигина қабул қилган. Яъни бир олим ёмон олим бўлмаслик учун амирни йўқламаслиги лозим, амирни бориб кўриш унга муносиб эмас, деб билган. Аслида фикрнинг ҳақиқий маъноси халқ ўйлагандай эмас, балки шундай: Олимларнинг ёмони амирдан ёрдам олгани ва улар воситасида ўз аҳволини яхшилагани, кучга кирганидир. Амирлар менга инъом берадилар, мени иззатикром қиласилар, бир яхши жой эҳсон этадилар, деган тушунча билан ва уларнинг кўркуви остида ўқиган кимса олимларнинг энг ёмонидир. Шу ҳолида бу кимса амирлар тарафидан ислоҳ бўлган, билимсизликлардан биладиган аҳволга келгандир. Олим бўлганда ҳам амирлар кўркувидан ва уларга ёмонлик қиласликдан тарбия кўрган бир инсонга айлангандир. Энди у истаса-истамаса, ҳамма вақт бу йўлга уйғун тарзда ҳаракат этмоғи керак бўлади. Хуллас, бу важдан зоҳиран хоҳ у амирни кўргани борсин, хоҳ амир унинг ҳузурига келсин, барибир, у зиёрат қилган, амир эса зиёрат қилинган бўлади.

Олим агар амирлар соясида олим бўлишни ўйламаса, унинг билими ибтидо ва интиҳода Аллоҳ учун қилинган бўлади. Унинг тутган йўли ва кўрсатган фаолияти савоблидир. Чунки яратилиши шундайдир, балик сувдан бошқа ерда яшай олмаганидек, у ҳам бундан ўзгани қилолмайди. Унинг

кўлидан келгани шу. Бундай бир олим ҳаракатларини бошқариб йўлга солиб турган нарса – АҚЛдир. Ҳамма ундан кўрқади ва инсонлар баъзан билиб, баъзан билмасдан у таратган нурдан баҳра оладилар. Ҳуллас, бундай бир олим амир ҳузурига борса, зохирان у зиёрат қилган, амир эса зиёрат қилинган бўлади. Аммо амир олимдан ҳамма вакт юксалишга чорловчи бир кувват – ёрдам олади, олимнинг эса амирга эҳтиёжи йўқ, чунки у бадавлатдир, нур сочаётган куёш кабидир. Иши тамасиз кўмак бермок, эхсон этмоқдир. У тошлардан лаъл ва ёкут қила олади. Таркиби тупроқдан иборат бўлган тоғлардан мис, олтин, кумуш ва темир маъданлар ясайди. Тупроқни тозалайди, ёшартиради. Дараҳтларни турли-туман мевалар билан бойитади. Иш ва эрмаги – бағишламоқдир, хадя килмоқдир.

Арабнинг «Биз бермокни ўргандик, олмокни ўргана олмадик» мақолидаги сингари олим ҳам беради-ю, бирордан олмайди. Нихоят, бундай олимлар хақиқатда зиёрат этилган, амирлар эса зиёрат этган бўладилар».

Мухиддин ота бу фалсафанинг мағзини чакиб ўтирганда Асадбек билан Жалил кириб келиб, уни фикр дунёсидан юлиб олишди. Бир оз у ёқ-бу ёқдан гаплашиб ўтиришгач, Жалил мақсадни баён қилди. Мухиддин ота уларга миннатдор назар билан бокди. Ҳатто кўзлари намланди. Кейин бошини эгиб, ўйга толди. Имкон ўзида бўлганда учиб борарди. Лекин... маблағ масаласи... Тўғри, пулнинг ҳароми бўлмайди. Бироқ, уни топиш йўлларида шубҳа бўлса... Мухиддин отанинг шубҳаси бор, аммо билдирамасликка уринади. Асадбек келтирган неъматларнинг ўндан бирини олиб колиб, қолганини қўни-қўшниларга тарқатади. Ўзи Жалил келтирганлар билан кифояланади. Шундай ҳолда буларнинг таклифини кабул қила олармиди? Рад этса, кўнгилларини оғритади. Мухиддин отанинг ўйга толгани шундан.

У бошини кўтариб аввал Асадбекка, сўнг Жалилга қаради-да, маъюсгина жилмайди:

– Сизларни Аллоҳ сийласин, – деди хаста овозда. – Ҳазрати Соҳибқирони Акбар Шероз шахрига боргандарида Ҳофиз Шерозий билан сұхбат қуриб, «Ғазалингизда гүзалнинг битта холига Самарқанд билан Бухорони тортиқ қилиб юбормоқчи бўлибсиз. Сизни Самарқандга олиб кетаман, бу шаҳарнинг нақадар гүзаллигини ўз кўзингиз билан кўринг», деб марҳамат қилганларида, шоир: «қариб қолдим, етиб боролмай йўлда ўлиб колишим мумкин, етиб борсам ҳам, она шаҳримга қайтиб келолмасман», деб узрини айтган экан.

Жалил бу тарихнинг баёнидан мурод не эканини англади. «Ҳали куч-куватга тўласиз, Худо чакирганидан кейин Ўзи қўллайди», деб аврамоқчи бўлди. Унга Асадбек қўшилди. Бироқ, икковининг харакати зое кетди. Муҳиддин ота:

– Каъбатуллоҳда менинг ҳакимга ҳам дуо қилинг, Мадинаи Мунавварага бориб, Масжидул набавияга кирганингизда пайғамбаримиз алайҳиссаломга саломимини етказинг, – дегач, умидлари синган ҳолда хайрлашдилар.

МАНЗУРА

1991 йил, июнь, Маккаи Мукаррама.

Одамлар оқими ҳажарул-асвад томон интилади. Каъбатуллоҳ атрофида айлананаётган ҳожиларнинг бир-бирларига азият етказишлари ман этилганига қарамай, одамлар бу одобни унутиб, бир-бирларини босиб бўлса-да, қора тошни ўпишга интилишади. Манзура бу оқимни ёриб бориб, муқаддас тошни ўпишдан умидини узган эди. Каъбани олтинчи айланишида оқим уни ҳажарул асвадга ўзи олиб борди. Ҳатто муқаддас тош рўпарасига келганда шошиб қолди. Тошдан тараляётган кўнгилни хуш этувчи ёқимли ҳид димоғига

урилди. «Жаннатдан чиқарилган бу тошдан жаннатнинг иси тараги туради», деган гапни эшигтан эди. Ҳозир худди жаннатга тушгандай хис этди ўзини. Вужуди ҳалимдай юмшади. Ўзини гүё күш каби хис килди. Тошни ўпди. Кўз ёшлари тошга томди...

Кун бўйи ибодат билан банд бўлди, меҳмонхонага бориб овқатланиб келишни ҳам хоҳламади. Хуфтонни ўқигандан кейингина Жалилнинг зўри билан қайтди. Ҳудди юрагининг бир парчасини ташлаб чиқаётгандай, айрилиқ азоби билан қайтди меҳмонхонага. Кечки таомни еб, хонасига қирганда кўнглини хира қилувчи манзарага гувоҳ бўлди.

Хотинлардан бири ўртага ўтириб олган, атрофига турли матолар ёйиб ташланган. Бу хона ҳожиялар хордик чиқарадиган жойга эмас, ёймачи бозорга ўхшаб колган эди. Хотин барчани ўзига қаратиб гап берарди:

— Мен аҳмок, юк бўлади, деб ўн кило асал олибман. Кейинги йил икки фляга асал олиб келаман, бира тўласи ойимга «ҳаж бадал» қилиб кетаман.

Шундан сўнг харид қилиб келган молларини бир-бир тахлаб, риал долларга қанча, бу доллар рублга қанча бўлишини санади. Ҳисоб-китобга шу даражада берилган эди-ки, ҳозир намозга турса, «тўрт ракаат суннат ўқийман», деб ният қилиш ўрнига «тўрт риаллик намоз ўқийман», деб юбориши ҳеч гап эмасди.

Манзура секин оркасига қайтиб, Жалилга билдирамай, бир ўзи Каъбатуллоҳга қайтди. Тонгни шу ерда кутиб олди.

Мадинаи Мунавварага бориб келгунча ҳам, хайит арафаларида Минога чиқишганда ҳам, Арафотда туриб дуо қилганда ҳам, Муздалифадан тошчаларни териб келиб шайтонни лаънатлаб отганда ҳам қандайдир күш канотида учиб юргандай бўлди. Унинг ибодатга бутун борлиғи билан берилганини кўрган Жалил аралашмай, холи қўйди.

Жамаротда шайтонга сўнгги тошни отиб, Маккага

қайтгач, ҳадемай бу муқаддас жойларни тарк этажатини ўйлаб, юраги эзилди. Бир томондан уй соғинчи, иккинчи томондан айрилик уни паришон килди.

Видолашув ибодатини бажариб бўлганда субх кириб, намоз чакириғи янгради. Бомдодни ўқиб бўлиб, қаъдага ўтирганида юраги бежо урди, худди қафасни бузиб чиқишига қасд қилган қуш каби потирлади. Шу онда Каъбатуллоҳ томон янада ёришиб кетиб, одамлар кўринмай қолишиди.

Кейин...

...Абдуҳамид кўринди.

Кучоқ очиб югуриб келарди...

«Жоним болам, сенам шу ердамисан?» Шундай деб пичирлади-ю...

юраги тўхтади...

АСАДБЕК

1991 йил, июнь.

– Қанча сарф килиб бўлса ҳам жасадини олиб келсанг ўлармидинг? – деди Асадбек.

– Эсинг борми? Одамлар ўша ерда жон бераб, ўша ерда колишни орзу қилишади-ку? Кейинги йили борасан, зиёрат қиласан, – деди Жалил бўш келмай.

Мухиддин ота бу фикрни қўлламаганида Асадбек унга яна аллаканча маломат тошларини отмокчи эди.

Мухиддин ота билан Жалил аввал Асадбекка, кейин бошига кора рўмол ташлаган Зайнабга тасалли берувчи сўзларни айтишгач, уйларига қайтишди. Зайнаб ошхонага кириб кетди. Асадбек шийпонга чиқиб, ёнбошлиди.

Кўкрагида қаттиқ оғриқ қўзғолди. Икки кунгача оғриқ азоб берди. Кейин йўтала бошлади. Йўталазобини Абдураҳмон табибининг дориси кесган эди. Энди унга шифо берувчи табиб йўқ. Асадбек мозор-

га тортиб борадиган дард билан оғриганини англади. Англади-ю, күнгли равшанлашди. Суйганлари билан ковушиш онлари якин қолганидан ҳатто кувонди. Дунё ташвишларидан безган одамга яна нима керак?

Йўталганда бўғзидан коп-қора қон отилиб чиқди.

Ётган жойида умид билан кўча томон қаради: дарвозаси очилиб, бир тўп одам саф бўлиб кириб кела бошлиди. Диққат қилиб қаради: барчалари ўлиб кетган қариндошлари. Қачондир шундай туш кўрган эди.

Дадаси... онаси... Самандар... Маҳмуд... Абдуҳамид...

Унга маънодор қарашди, сўз айтишмади. Шийпонни ёнлаб, ўтиб кетишиди.

Сўнг... дарвозахона ёришди. Зайнаб кўринди...

Фақат Зайнаб...

Кўзларида ўт чақнайди...

Кейин...

Асадбекнинг кўз олди коронғилашди.

Хожаларини туну кун турли балою оғатлардан, фалокатлардан асрашлари шарт бўлган болохонадаги йигитлар ғафлатда қолдилар.

Агар киши атрофини етти қават темир кўрғон билан ўраса-да, ажал ўзига йўл топади. Игнадай тешикдан кириб бўлса ҳам вазифасини белгиланган кун, соат, дақиқа, сония, нафасда бажаради. Кишининг саноқли нафаси адoғига етгач, кўшимча нафас ололмайди, ризки тугагач, кўшимча бир қултум сув ҳам ичолмайди. Шундай экан, хатарнинг олдини олиш пайида болохонада ўтирувчи йигитларнинг қўлидан нима келарди?!

В а с с а л о м .

СҮНГСҮЗ ЎРНИДА

Кўп йиллик ишимизни ниҳоясига еткурган Аллоҳ таборак ва таолога беадад шукурлар киламиз. Оқибатнинг хайрли бўлишини Раббимиздан сўраймиз.

Асарни сўнгги сатрларигача ўқиб чиқкан сиз – азизларга миннатдорлик билдириб, ҳакингизга хайрли дуолар киламиз. Ҳафсалангизни пир киладиган сатрлар, сахифалар учраган бўлса, Аллоҳ ҳузурида тавба қилган ҳолда, сиздан узр сўраймиз. Бир неча йиллар давомида учрашувларда «бешинчи китобни ёзасизми?» деб сўрашди. «Хоҳиш бор, гайрат бор-у, журъат етишмаяпти», дердим. Нихоят, Аллоҳга таваккул қилиб иш бошладим. Китобхонлардан дуо қилишларини сўрадим. «Китобни ёзсин», деб шунчаки дуо қилманглар, «китобни яхшилаб ёзсин, савияси тушиб кетмасин, аввалгиларидан аълорок даражада ёзсин», деб дуо қилинглар. Шояд, дуоларингиз ижобат бўлиб яхши асар ёзилса», деб эдим. Ҳозир сўнгги нуктаси кўйилган бу китоб шу дуоларнинг натижасимикин, валлоҳи аълам!

Мазкур асарни ёзиш ҳаракати ўтган асрнинг саксонинчи йилларида бошланган эди. Биринчи китоб «Шарқ юлдузи» журналида 1992 йилда нашр қилиндики, фурсатдан фойдаланиб таҳририят ахлига ташаккурларимни айтаман. Аммо, афсуски, «Ёзувчи» нашриётининг «китобни босиб чикарсак сота олмаймиз, нашриёт зарар кўради» деган ғалати хавотири туфайли икки йилгача босилмай ётди. Ана шунда «Шарқ» нашриётининг эътибори ва мардлиги туфайли китоб мухлислар қўлига етиб борди-ки, бу учун нашриёт раҳбарлари, барча ходимлари ва ишчиларига миннатдорчилигимни билдираман. Ана шундан бери деярли

барча асарларим шу нашриётда нашр этиляптики, бу учун ҳам миннатдорман.

«Шайтанат»нинг тўрт китоби нашр этилгач, матбуотда ёзма равишда, учрашувларда оғзаки тарзда кўп сухбатлар бўлди. Ўқувчиларимиз мактублар йўллаб турли саволлар билан қизиқдилар. Лозим жойда танқид ҳам қилдилар, баъзан жавоб қайтартмокка тилимиз ожизлик қилган пайтлар ҳам бўлди. Бешинчи китобга якун ясашда беҳисоб саволларга муҳтасар жавоблар қайтаришни лозим кўрдик.

– «Шайтанат» асарингизни ёзишига нима туртки бўлган?

– Бу савол деярли ҳар учрашувда, ҳар мактубда такрорлангани учун сухбатни шундан бошладим. Учрашувларда бу саволни эшлишим билан ҳазил оҳангига «шайтонлар туртки бўлган», деб жавоб берардим. Гарчи жавоб ҳазилга йўйилса-да, унинг замирада ҳақиқат ҳам бор. Умуман, мен нима учун детектив, яъни жиноятлар жараёни баён этилган асар ёзишига ҳаракат қиласман? «Алвидо, болалик!», «Сўнгги ўқ», «Мурдалар гапирмайдилар», «Чархпалак» «Талваса» ва ниҳоят «Ов»... Одамлар шу мавзуга кўпроқ кизиққанлари учунгина ёзилганми ё бошка сабаб ҳам борми? Бор. Асосий сабаб, менинг асл мақсадим бошка томонда. Мен жамиятни жиноятчиларсиз равнақ топишини орзу қиласман. Ҳеч кимнинг боласи жиноятчи бўлиб туғилмайди. Ҳеч кайси ота-она фарзанди туғилганда «ўғлим (ёки қизим) ўғри бўлсин, гиёхванд бўлсин», деб орзу қилмайди. Лекин афсуски, маълум ёшга етганда айримлар жиноят кўчасига бурилиб, шайтанат оламига кириб кетганларини ўзлари ҳам билмай коладилар.

1982–83-йилларда тоғам, машҳур ёзувчи Мирзакалон Исмоилий кайсар ўсмирнинг оқибатда жиноятчига айланиб қолиши мумкинлиги ҳақида асар ёзмокчи эканликларини айтдилар. У дамларда тоғамнинг сиҳатлари унча яхши эмасди. Шунга карамасдан ёшлар-

та бир ибратли гап айтгилари бор эди. Ички ишлар вазирилигидагилар билан маслаҳатлашиб, ёзувчини ўсмир жиноятчилар сақланадиган «ахлок тузатиш меҳнат колонияси» деб аталмиш қамокхонага юбордик. Тоғам кун бўйи ўша ердаги болалар билан танишиб қайтдилар. Мен тоғамни кутиб олиб: «Болаларни кўрдингизми?» дейишим билан кўзларида ёш кўринди. Йиғидан ўзларини тутолмай: «Ўша болалар қамоқда ўтирадиган болаларми? Укийдиган, ўйнаб куладиган вактларида-я!?» – дедилар. Тўрт йил урушда ваҳшийлигу даҳшатларни кўриб йиғламаган, тухмат билан қамалиб ётганида ҳам кўзларида ёш кўрсатмаган бу одам ўсмир жиноятчиларни кўрганларида чидай олмадилар. Оғир хасталикларига қарамасдан «Ўзингдан кўр» деб номланган ахлоқий қисса ёздилар. Бу ёзувчининг сўнгги асари – васияти бўлиб қолди.

Ўша саволни мен ҳам ўзимча тез-тез такрорлайман: нима учун болалар жиноят оламига кириб қоладилар? Адашибми? Нима учун биз, катталар улар адашгунларича караб турамиз?

«Шайтанат»ни ёзишда мен ўзимни қийнаган муаммоларга жавоб топишга ҳаракат қилғанман. Ёзувчининг вазифаси нимадан иборат? Жамиятни кузатиш, таҳлил этиш, юзага чиқаётган муаммоларни ҳал этишда қатнашиш эмасми? Ўтмиш жамиятнинг касалликларидан бири – жиноят олами эди. Мен ўша хасталикнинг бир заррасинигина қаламга олганман. Жиноят олами, яъни шайтонлар етовидаги оламнинг нақадар қабиҳ эканини одамлар ўз кўзлари билан кўриб ёки эшишиб юрган эдилар. Мен шулардан айримларини жамлаб, қофозга туширдим, холос. Бу воқеаларни ёзишдан асосий мақсадим – одамларни огоҳлантириш эди: «Одамлар, кўриб қўйинглар, бефарқ юрманглар, сиз билан бизнинг ёнимизда кўзга кўринмас, аммо ваҳший бир олам борки, ундан ўзингиз ҳам эҳтиёт бўлинг, айниқса, фарзандларингизни асранг, токи бу

оламга банди бўлиб қолишмасин. Бу оламнинг биттагина эшиги бор. Кирдингми, тамом, ўз оёғинг билан қайтиб чикишинг маҳол, кафансиз кетишииг анипроқ...» – демоқчи бўлганман.

– «Шайтанат» сўзи нимани англатади? Нима учун асарни айнан шундай деб атагансиз?

– Бу сўзни мен кашф этмаганман. Дастраб ҳазрат Навоийнинг асарларида, сўнг устоз Абдулла Қодирий романларида учратганман. Сўзниң луғавий маъноси – шайтонлик, шайтон етови таъсирида йўлдан оздиришликни ҳам тушунса бўлади. Бошқачароқ айтсак, шайтонлар бошқарадиган жиноят олами назарда тутилган. Ҳазрат Навоийнинг «Хазойинул-маоний» достонларидаги бир байт:

«Риёй шайхдурким шайтанатдин тавқи лаънатдек,
Солур ўз бўйниға тасбихни ҳар лахза ул малъун» –

диққатимни тортиб, «Шайтанат» номи билан бир асар ёзиш истаги туғилган эди. Адашмасам, 1984 йил эди шекилли, Андижонда содир бўлган бир жиноят тафсилоти мени қизиктириб колиб, шу номда кисса ёза бошладим. Умидим – аввал бошдан уч китобдан иборат кисса ёзиш эди. Аммо тақдир тўрт китобни насиб этган экан, деб юрсан бешинчи китобнинг куртаклари ҳам кўриниб қолди. Андижонда эшигтан воқеа Элчин билан Зайнаб тақдирига тааллукли эди. Ёзиш жараённида бу воқеа асарга сингмай, тушиб қолди. Кейинрок худди шу воқеа асосида «Мурдалар гапирмайдилар» деган асарни ёза бошладим. Ажабки, ўша воқеа бу асарга ҳам сингмади. Худо билади, балки янги асарга «томизғи» бўлар?

– Нима учун асарда қора бўёқлар қуюқ? Айниқса, аёллар образини бошқа асарларда ҳам кўпроқ қора рангларда бергансиз?

– Бу тасодиф эмас. Аввал бошдан ниятим шундай эди. Агар эсласангиз, биринчи китобга ёзилган

сўзбошида «Замон берган эркинликдан фойдаланиб, турмушимизнинг қора кўчаларига киришга жазм этдим. Ёзганларимни ўқиб, чор-атроф зимиштун экан-ку, деб ваҳимага берилманг. Ёруғ кунда барча нарсаларни кўриб турамиз. Коронгида эса кўрмаймиз. Урилиб, сурилиб, қоқилиб юрамиз. Алқисса, ёруғ куннинг қадрига етмоқ учун коронгиликни ҳам кўриш лозим эмасми?» деганман. Асадаги бўёқлар кимгадир қуюқ, кимгадир эса хира туюлиши мумкин. Бу ўринда у ёки бу одамнинг ҳаётни қай даражада англаши, воқеаларга муносабати ҳам мухим. Масалан, Зайнабнинг тақдири бировни ҳаяжонга солса, бошқа бир китобхон, «бунаقا гиёҳванд аёлларни ўзим ҳам кўрганман», деб бефарқ қараши мумкин. Дунёда неча миллиард одам яшаса, шуларнинг бармоқ излари бир-бирига ўхшамайди. Демак, шунча миллирад бармоқ излари мавжуд. Шунга кўра, айтиш мумкинки, одамларнинг феъл атворлари, ҳис-туйғулари, дунёни англамак зеҳнлари ҳам бирбирига ўхшамайди.

«Шайтанат»да, бошқа асарларда ҳам ҳавас қилиш мумкин бўлган аёллар кам тасвиrlанганинг сабаби бор. Камина, такрор айтаман, шайтонлар бошқарадиган оламни, кора бўёқларни қаламга олганман. Бу оламда яхши аёлларнинг кўп бўлиши мумкинми? Очиги, мен ёмонларни тасвиrlаганимда юрагимда оғриқ турарди. Буларни ёзмасликни истардим. Лекин на илож? Ибрат маъносида ҳам ёзиш керак эди.

— Асадаги қаҳрамонлар ҳаётдан олинганми ёки тўқимами?

— Яна биринчи китобни эслашга тўғри келади: «Асанни охиригача ўқий олсангиз, бунга сабрингиз ва вакtingиз етса, бир қанча одамлар билан танишасиз. Улар балки қўшнингизга, балки дўстингизга, балки қариндошингизга ўхшаб кетар. Шу хол юз берса, «Фалончини ёзибдилар», деб юрманг. Бу шунчаки тасодифий ўхшашликдан бошқа нарса эмас», дейилган.

Шунга кўра айтиш мумкинки, айрим миш-мишлар элакдан ўтказилиб, айрим воқеалар умумлаштирилиб, баъзилари бўрттирилиб ёки аксинча, камайтирилиб хаёл маҳсулига қўшилган. Чингиз Айтматов айтмоқчи, хаёл маҳсулини ишонарли тарзда баён қилиш ёзувчининг бурчи хисобланади. Биз «хаёл маҳсули» деймиз. Ўйлаб кўрайлик: хаёл маҳсули сув ичадиган булоқ қаерда экан? Асарда баён қилинган гап-сўзлар ҳам, ҳаётнинг ўзидан эмасми? Шунча гапларни тўкиб чикаришга битта одамнинг куч-куввати етмаса керак?

— *Асарингизни ўқиган одам сизни қаҳри қаттиқ инсон деб ўйлади.*

— Бу янгиш холоса. Мен қаҳри қаттиқ, бешафкат эмасман. Ҳаётнинг ўзи бешафкат. Менинг вазифам ўша бешафқатликнинг баёнини қоғозга кўчириш, холос. Асадбек қизини шармандали ҳолда кўргач, «ўзингни осиб ўлдира кол», деган маънода арқон ташлаб кетган сатрларни ёзаётганимда қалб оғриғидан қийналганман. Бир неча ҳафта қўлимга қалам ололмай юрганман. Кўпчиликни Асадбекнинг ўлиш ёки ўлмаслиги қизикириади. Ёки Жамшид билан Зайнабнинг муносабатлари ўйлантиради. Аксар китобхонлар Асадбекнинг тирик қолишини хоҳладилар. Андижондаги учрашууда бир муаллима синглиميز: «Мен Асадбекни яхши кўриб қолганман, илтимос, уни ўлдирманг», дедилар. Мен ҳазиллашиб: «Яхши кўришингизни эрингиз биладиларми?» деб сўрадим. Синглиميز: «Ҳа, биладилар. Асадбекни у киши ҳам яхши кўрадилар», дедилар. Бу масалада айтишим лозимки, Асадбек одам сифатида китобда тирик қолиши мумкиндир. Аммо жиноят оламининг сардорларидан бири сифатида ҳаётимизда қолиши мумкини? Бу масалада рамзий маъно излашимизга тўғри келди. Тўртинчи китобнинг сўнгги сатрларига шу маънолар жамланмоқчи бўлинди. Ёки Зайнабнинг тақдирини олайлик: агар у айтайлик, Глория ёки Наташа бўлганида мажруҳ эрини ташлаб, суйгани би-

лан ковушмоғи мумкин эди. Лекин кимнинг қизи бўлишидан қатъи назар, у ўзбек аёли! Ўзбек аёллари эса камдан-кам ҳолларда эрларидан юз ўгирадилар. Эрга кўнгиллари бўлмаса ҳам уларни оғир ахволда ташлаб кўймайдилар. Агар мен Зайнабни китобхонлар истагига кўра Жамшид билан ковуштириб кўйсам, ўзбек аёлларининг бекиёс фазилатларига хиёнат килган бўлардим.

— Асадбек ижобий қаҳрамонми ё салбийми?

— Асадбек, шубҳасиз, салбий одам. Тўғри, унинг айрим мардликлари ҳам бор. Лекин одам ўлдирган ёки ўлдиришга ҳукм этувчини яхши киши дея оламизми? Баъзиларга Асадбек яхши кўринаётгандай туюлиши ҳам мумкинdir. Лекин бу, менингча, алдамчи туйғу. Диккат қилайлик: аслида биз Асадбекни яхши кўрмаймиз, бошига кулфатлар ёғилаётгани учун унга ачиняпмиз. Бошига нима учун кулфат дўллари ёғиляпти? Бунга Жалилнинг гапи жавоб бўлади: «Худодан қайтиби!» Ҳали Зайнаб туғилмасидан олдин қизи хўрланган муштипар она уларни қарғаган эди, эслайсизми? «Дунё шайтоннинг дўкони, ундан бир нарса олдингми, шайтон ҳакини ундириб олмагунича тинчимайди». Асадбек шайтоннинг дўконидан кўп нарса олган эди, йиллар ўтиб, қизининг номуси ва бир ўғлининг жони билан ҳак тўлади. Дунёда хеч қандай зулм жазосиз қолмайди. Мен бу сатрларни атай бешинчи китобда такрорладим.

Авваллари ижобий қаҳрамон фаришта каби тасвирланарди. Ҳолбуки, ҳаётда бутунлай яхши одам ҳам, бутунлай ёмон одам ҳам йўқ. Яхшининг оз бўлса-да, ёмон хулклари, ёмоннинг оз бўлса-да, яхши ишлари бўлиши табиий. Асадбек ва унинг атрофидагилар, юқорида айтганимдай, жиноятчи, зулмкор бўлиб туғилмаган эдилар. Уларни ўтмиш жамиятнинг адолатсизлиги шу ҳолга солди. Асадбек гурухини «аламзадалар тўдаси» десак ҳам бўлади.

— Нима учун асар бошида Зайнабнинг уйи кўриқланмайди?

— Биз чет эл мафияси ҳақидаги киноларни кўравериб, уларнинг уйлари ҳамиша қўриқланади, деб ўйлаб колганмиз. Хориждаги жиноий гурухлар билан биздагиларнинг анча фарки бор. Майкл Корлеоне мафиясига ўхшаган тўдалар саксонинчи йилларда бизда йўқ эди. Гурухлар орасидаги «уруш»лар ҳам етилмаганди. Шунинг учун ҳам уларни катта куч билан кўриқлашга ҳожат йўқ эди. Шундай бўлса-да, бу саволга тўртинчи ва бешинчи китобда жавоб беришга ҳожат сезилди.

— Ёшларга асар салбий таъсир этмайдими?

— Агар шундай бўлганида бу асарни ёзмаган бўлардим. Мен ёшларнинг ок-корани ажратиб олишларига ишонаман. Назаримда ёшларнинг биронтаси Ҳосилбойвачча ёки Кесакполвонга ўхшаб яшаб, улар каби азобли ўлим топишни истамасалар керак. Ниятим – жиноят оламига қизиқиб, маҳлиё бўлиб юрганларни бу йўлдан қайтаришга хизмат қилиш. Умуман, у ёки бу китобни ўкиш натижасида жиноят оламига кириб қолган одамни ҳали учратганим йўқ. Лекин «Шайтанат»ни ўкиш натижасида бу разил оламдан чиқиб кетганлар билан учрашганим рост.

Диккат қилинса, «Нафснинг келажаги зулмдир, зулмнинг келажаги эса хорликдир», деган фикр асарнинг шиори, дейиш ҳам мумкин. Бу каби асарларни ёзишдан максадим шайтанат олами, яъни шайтонларга тебе бўлган жиноят олами билан ёшларни таништириб, уларни бу ярамас йўлдан қайтаришга уринишдир. Бошқача айтганда атрофимизда шундай қабиҳ олам борлигидан одамларни огоҳ этишдир. Бизнинг адабиётимизда ҳали «қонундаги ўғри» деб аталмиш жиноятчилар олами баёни берилмаган эди. Бу оламнинг шиорига эътибор беринг: «Дунёда ўғридан бошқа ҳеч ким инсон тақдирини ҳал қилиш ҳуқуқига эга эмас!» Мана шундай зулм оламини биз билиши-

миз керакми? Албатта керак. Фарзандларимизни бу олам таъсиридан химоя килишимиз учун ҳам керак. Ҳар ҳолда мен шундай бўлар деган максадда қўлга қалам олган эдим. Агар бирон-бир асар тарбияга хизмат килмас экан, ёзувчининг уринишлари зое кетибди, деб ҳисоблайман.

— *Асадбекдай одамнинг ҳаётда бўлишини хоҳлар-мидингиз?*

— Йўқ. У қанчалик мард бўлмасин, қанчалик жабрдийда бўлмасин, жамиятимизнинг бундайлардан ҳоли бўлишини истардим. Асадбек бизнинг жамиятимизда яшашга ҳақли эмас!

— *Китобда кўп шеърларни ўқидик. Ўзингиз ёзган-мисиз?*

— Афсуски, дурустрок шеър ёзишга менинг кобилиятим йўқ. Кофиядан нарига ўтмайдиган нарсаларни ёзишдан ўзгаси қўлимдан келмайди. Шунинг учун нуктадон шоирларнинг шеърларидан фойдаланаман. Китобда мархум дўстим Аскар Қосимнинг шеърларидан кўпроқ фойдаланганман. Асардаги Анвар тақдирига шу дўстим ҳаётини асос қилиб олганман. Шу боис Анвар Аскар Қосимни устозим деб билади ва хаёлан у билан учрашади ҳам. Асарда мумтоз назмдан, хусусан, ҳазрат Навоий, ҳазрат Бобур ғазалларидан, раҳматли Рауф Парфи, замондош шоирларимиздан Гулчехра Нур ва Садриддин Салим Бухорий шеърларидан ҳам фойдаландим. Кинофильмдаги қўшиқлар шеърларини Кутлибека ва Шукур Курбон ёзганлар. Фурсатдан фойдаланиб, марҳумларни Аллоҳ мағфират килсин, деб дуо киламан, замондошларга эса миннатдорлигимни изҳор этаман.

— *Китоб билан фильм ўртасида ўзгаришлар бор. Буни қандай изоҳлайсиз?*

— Ҳазил тариқасида айтсан, бунга сабр ва чидам билан карайман. Гап шундаки, кино санъати билан бадиий адабиёт орасида кескин фарқлар бор. Талаблар ҳам фарқланади. Шунга кўра, ёзувчилар киночи

биродарларининг инжикликлариға чидашга мажбулар. Чидаш кийин бўлгани учун ҳам кўп ёзувчилар ўзларини киночилардан нари олиб юрадилар. Айримлар китобнинг ўзгаришлар билан олинишидан норози бўлишади. «Шайтанат» фильмни учун мен санъаткорларимизга раҳмат айтаман. Лекин бир изоҳим ҳам бор: китобдаги Асадбек билан кинодаги Асадбек орасида фарқ мавжуд. Китобда Асадбекнинг ёмонликлари, бу ёмонликларни туғдирган омиллар баёни батафсил берилган. Кинода эса асосан унинг яхши томонлари бўрттириб кўрсатилган. Шу сабабли «Асадбек ижобий қаҳрамонми ё салбийми?» деган саволлар юзага чиқди. Китобни синчиклаб ўқиган кишида бундай савол уйғонмаса керак, деб ўйлайман.

— Асарда диний мавзуларда ҳам фикр юритгансиз. Бу соҳада маҳсус билим олганмисиз?

— Афсуски, йўқ. Ёшлигимиизда бундай илм олиш имконияти бўлмаган. Бу соҳада мен устоз кўрмаган шогирд макомидаман. Диний масалаларга доир нашр этилган китобларни кўп ўкиш, уламолар сухбатидан баҳраманд бўлиш натижасида китобга айрим фикрларни киритишга уриниб кўрдик, холос.

— «Шайтанат»нинг барча китоблари муборак Куръон оятлари билан бошлангани сабаби нимада?

— Ҳаётнинг энг улуғ фалсафаси аввало Аллоҳнинг шу илохий китобида мужассам. Баъзи бирорлар муқаддас оятлардаги огоҳларга эътиборсизликлари туфайли адашиб, шайтанат дунёсига кириб қолишган. Шарқ адабиётига азалдан Куръон маёқ бўлиб, ҳақиқат йўлини кўрсатиб келган. Дунёнинг Фёдор Достоевский, Лев Толстой сингари буюк ёзувчилари ҳам асарларида Инжилга мурожаат килиш орқали эзгуликнинг улуғворлигини таъкидлашган. Менинг ҳам мақсадим Аллоҳнинг хитобларини, огохлантиришларини одамларга зослатиш йўли билан эзгулик учун курашдир.

— Танқидга муносабатингиз? Асарни кўп танқид қилишдими?

— Танқидни яхши күрадиган одам бўлмаса керак. Ҳазрат Умар камчилигини айтмайдиган дўстдан фойда камлиги хақида ибратли гап айтганлар. Шунга кўра, ҳар бир одам танқидга чидамли бўлса ўзига фойда. Танқид ҳам икки хил бўлади: холис танқид учун миннатдор бўлиш жоиз. Танқид замирига хусумат жойлашган бўлса, бу танқидчига инсоф тилашдан ўзга чорамиз йўқ. Мен танқиддан бирданига лов этиб ёнмайман. Дикқат билан эшитаман. Агар танқид нотўғри бўлса, кўп ҳам аччиқланмайман. Чунки ҳар бир одам ҳар бир масалада ўзининг танқидий фикрини билдириш хуқуқига эга. Баъзи хато фикрга асосланган танқид беғараз бўлиши ҳам мумкинким, улардан мутлако ранжимаслик керак. У ёки бу асарни барча бир хилда севишга мажбур эмас. Асаримни барча бир хилда севсин, эъзозласин, деб талаб қилувчи ёки умид қилувчи ёзуви нодондир. Агар танқид тўғри бўлса, мен кўпроқ ўзимдан ранжийман. Танқидчидан эмас, ўзимдан хафа бўламан. «Шу оддий нарсага ақлинг етмадими?» деб ўзимни ўзим койийман. Эътиборсизлигим туфайли шу камчиликка йўл кўйганим мени кўп қийнайди. Маълум фурсат ўтгандан кейин ёзганларимни ўқиб, ўзим кўпроқ хатолар топаман. Бешинчи китобни ёзиш жараёнида аввалги тўрттала китобими ни қайта ўқиб, таҳрир килдим. Хатолар, чалкашликларга дуч келганда юрагим ачишди. Бу хатоликлар учун муҳтарам китобхонлардан узр сўрайман. Худо хоҳласа, танлаган асарлар жумласига киритилса, бу хатоликларни тузатаман, деган умидим бор.

— *Айрим фикрларни такрорлашни яхши кўрасиз. Ҳатто айрим фикрлар бир китобдан бошқасига ҳам ўтади. Бу камчилигинизми?*

— Баъзилар камчилик ўрнида кўришлари мумкин. Эътиборсизлиги учун такрорляяпти, дейишса ҳам эҳтимол. Лекин ундин эмас. Мен ўзимга ёқкан фикрларни атайнин такрорлаб туришни ёқтираман. Ҳаёт учун зарур бўлган бирор фикр бир китобда ёзилса-ю,

ўкувчи эътиборсиз ўтиб кетган бўлса, яна дикқатини тортиш учун такрорлайман. Масалан, «Эй Одам фарзанди, мен зулмни Ўзимга ҳаром қилдим, бас, бир-бирларингизга зулм қилманглар», деган қудсий ҳадисни бир неча китобда такрорлаганман. Аслида бу хитобни ҳар бир одам ёдлаб, амал қилишини истар эдим. Ёки нафс ҳақидаги фикрлар ҳам шулар жумласидан. Жалилнинг «Худодан қайтибди» деган гапи ҳам шунақа. Биз ҳар қандай ишимиз учун Аллоҳдан ажр олмоғимизни унутмаслигимиз керак. Агар бу ҳақиқатни ўзимиз ҳам такрорлаб турмасак, унутиб қўйишимиз мумкин. Асадбеклар шундай унутувчилардан эди. Биз ундай бўлмайлик.

2010 й.

10.000с

ТОХИР МАЛИК

ШАЙТАНАТ

Kussa

Бешинчи китоб

«Sharq» нашриёт-матбаа
акциядорлик компанияси
Бош таҳририяти
Тошкент — 2011

Рассом *Бекзод Ҳайдаров*

Мухаррир З. *Мирзаҳакимова*
Бадиий мухаррир Т. *Қаноатов*
Техник мухаррир Р. *Бобохонова*
Саҳифаловчи Т. *Оғай*
Мусаххихлар: Н. *Охунжонова*, Ш. *Хуррамова*

Босишига руҳсат этилди: 27.12.2010. Бичими 84x108^{1/32}.
«Times» гарнитураси. Офсет босма. Шартли босма тобори
33.6. Нашриёт хисоб тобори 33.9. Нашр адади 20 000 нусха.
1382-сон буюртма. Баҳоси шартнома асосида.

**«Sharq» нашриёт-матбаа
акциядорлик компанияси босмахонаси,
100000, Тошкент шаҳри, Буюк Турон кўчаси, 41-үй.**